

三国志文类

佚名

文硕阁

wenshuoge.com

目录

关于我们	4
提要	6
卷一	7
卷二	10
卷三	13
卷四	16
卷五	19
卷六	21
卷七	24
卷八	27
卷九	30
卷十	33
卷十一	37
卷十二	40
卷十三	44
卷十四	47
卷十五	51
卷十六	55
卷十七	58
卷十八	62
卷十九	66
卷二十	69
卷二十一	72
卷二十二	76
卷二十三	79
卷二十四	82
卷二十五	86
卷二十六	88
卷二十七	91
卷二十八	95
卷二十九	98
卷三十	101
卷三十一	104
卷三十二	107
卷三十三	111
卷三十四	115

卷三十五		119
卷三十六		122
卷三十七		126
卷三十八		130
卷三十九		134
卷四十		137
卷四十一		140
卷四十二		143
卷四十三		146
卷四十四		149
卷四十五		152
卷四十六		156
卷四十七		160
卷四十八		163
卷四十九		166
卷五十		170
卷五十一		174
卷五十二		178
卷五十三		182
卷五十四		186
卷五十五		190
卷五十六		193
卷五十七		195
卷五十八		197
卷五十九		201
卷六十		204

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望可以帮助有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部八

三国志文类 总集类

提要

【臣】等谨案三国志文类六十卷不着撰人名氏今流传有宋刊本宋史艺文志载此书注云集者不知名则当时已无可考也案柳宗元河东集有柳宗直西汉文类序其文皆采之汉书是编惟采三国志之文盖沿其例凡分二十三门曰诏书曰教令曰表奏曰书疏曰谏诤曰戒责曰荐称曰劝说曰对问曰议曰论曰书曰牋曰评曰檄曰盟曰序曰祝文曰祭文曰诔曰诗赋曰杂文曰传所采上涉汉末而下及晋初则以魏志载曹操事皆在建安中而裴松之注所采多晋人书也惟其中劝说对问二门皆当时口语本非词翰取盈卷帙于义未安又陈寿所评亦犹马班之赞摘出别立篇名亦乖体例以其宋人旧本姑存之以备考证焉乾隆四十四年正月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷一

钦定四库全书

三国志文类卷一

诏书

魏

汉献帝

命魏公承制封拜诏【天子以公典任于外临事之赏或宜疾速乃命公得承制封拜诸侯守相诏曰】

夫军之大事在兹赏罚劝善惩恶宜不旋时故司马法曰赏不逾日者欲民速覩为善之利也昔在中兴邓禹入關承制拜军祭酒李文为河东太守来歙又承制拜高峻为通路将军察其本传皆非先请明临事刻印也斯则世祖神明权达损益盖所用速示威懷而着鸿勲也其春秋之义大夫出疆有专命之事苟所以利社稷安国家而已况君兼任二伯师尹九有实征夷夏军行蕃甸之外失得在于斯须之间停赏俟诏以滞世务固非朕之所图也自今已后临事所甄当加宠号者其便刻印章假授咸使忠义得相獎勵勿有疑焉

封魏公为魏王诏

自古帝王虽号称相变爵等不同至乎褒崇元勲建立功德光啓氏姓延于子孙庶姓之与亲岂有殊焉昔我圣祖受命朔业肇基造我区夏鉴古今之制通爵等之差尽封山川以立藩屏使异姓亲戚并列土地据国而王所以保乂天命安固万嗣歷世承平臣主无事世祖中兴而时有难易是以旷年数百无异姓诸侯王之位朕以不德继序 业遭率土分崩羣凶纵毒自西徂东辛苦卑约当此之际惟恐溺入于难以羞先帝之圣德赖皇天之灵俾君秉义奋身震迅神武捍朕于艰难获保宗庙华夏遗民含气之伦莫不防焉君勤过稷禹忠侔伊周而掩之以谦让守之以弥恭是以往者初开魏国锡君土宇惧君之违命虑君之固辞故且懷志屈意封君为上公欲以钦顺高义须俟勲绩韩遂宋建南结巴蜀羣逆合从图危社稷君复命将龙骧虎奋梟其元首屠其窟栖暨至西征阳平之役亲擐甲冑深入险阻芟夷蠹贼殄其凶丑荡定西陲县旌万里声教逵振宁我区宇盖唐虞之盛三后树功文武之兴旦奭作辅二祖成业英豪佐命夫以圣哲之君事为已任犹锡土班瑞以报功臣岂有如朕寡德仗君以济而赏典不丰将何以答神武慰万方哉今进君爵为魏王使使持节行御史大夫宗正刘艾奉策玺土之社苴以白茅金虎符第一至第五竹使符第一至十君其正王位以丞相领冀州牧如故其上魏公玺绶符策敬服朕命简恤尔众克绥庶绩以扬我祖宗之休命

魏王三辞诏三报不许又手诏

大圣以功德为高美以忠和为典训故勩业垂名使百世可希行道制义使力行可效是以勩烈无穷休光茂着稷契载元首之聪明周召因文武之智用虽经营庶官仰叹俯思其对岂有若君者哉朕惟古人之功美之如彼思君忠勤之绩茂之如此是以每将镂符析瑞陈礼命册寤寐慨然自忘守文之不德焉今君重违朕命固辞恳切非所以称朕心而训后世也其抑志擢节勿复固辞

与魏太子丕诏

魏太子丕昔皇天授乃显考以翼我皇家遂攘除羣凶拓定九州 功茂绩光于宇宙朕用垂拱负扆二十有余载天不憖遗一老永保余一人早世潜神哀悼伤切丕奕世宣明宜秉文武绍熙前绪今使使持节御史大夫华歆奉策诏授丕丞相印绶魏王玺绂领冀州牧方今外有遗虏遐夷未宾旗鼓犹在边境干戈不得韬刃斯乃播扬洪烈立功垂名之秋也岂得脩谅闇之礼究曾闵之志哉其敬服朕命抑弭忧懷劳只厥绪时亮庶功以称朕意于戏可不勉与

变雒为洛诏

诏以汉火行也火忌水故洛去水而加佳魏于行次为土土水之牡也水得土而乃流土得水而柔故除佳加水变雒为洛

魏文帝

封孔子后为宗圣侯诏

昔仲尼资大圣之才懷帝王之器当衰周之末无受命之运在鲁卫之朝教化乎洙泗之上栖栖焉遑遑焉欲屈已以存道贬身以救世于时王公终莫能用之乃退考五代之礼脩素王之事因鲁史而制春秋就太师而正雅颂俾千载之后莫不宗其文以述作仰其圣以成谋兹可谓命世之大圣亿载之师表者也遭天下大乱百祀堕壞旧居之庙毀而不脩褒成之后絶而莫继阙里不闻讲颂之声四时不覩蒸嘗之位斯岂所谓崇礼报功盛德百世必祀者哉其以议郎孔羨为宗圣侯邑百户奉孔子祀令鲁郡脩起旧庙置百户吏卒以守卫之又于其外广为室屋以居学者

天地之眚勿复劾三公诏

灾异之作以譴元首而归过股肱岂禹汤罪已之义乎其令百官各防厥职后有天地之眚勿复劾三公杨彪待以客礼诏【公卿朝朔旦并引故汉太尉杨彪待以客礼诏曰】

夫先王制几杖之赐所以宾礼黄耆褒崇元老也昔孔光卓茂皆以淑德高年受兹嘉锡公故

汉宰臣乃祖以来世著名节年过七十行不逾矩可谓老成人矣所宜宠异以章旧德其锡公延年杖及冯几谒请之日便使杖入又可使着鹿皮冠彪辞让不聽竟着布单衣皮弁以见

作壽陵戒俭葬诏【表首阳山东为壽陵作终制曰】

礼国君即位为棨存不忘亡也昔尧 谷林通树之禹 防稽农不易畝故 于山林则合乎山林封树之制非上古也吾无取焉壽陵因山为体无为封树无立寝殿造园邑通神道夫也者藏也欲人之不得见也骨无痛痒之知冢非栖神之宅礼不墓祭欲存亡之不黷也为棺槨足以朽骨衣衾足以朽肉而已故吾营此丘墟不食之地欲使易代之后不知其处无施芻炭无藏金银铜铁一以瓦器合古涂车刍灵之义棺但漆际防三过饭含无以珠玉无施珠襦玉匣诸愚俗所为也季孙以璵璠斂孔子歷级而救之譬之暴骸中原宋公厚塋君子谓华元乐莒不臣以为弃君于恶汉文帝之不发霸陵无求也光武之掘原陵封树也霸陵之完功在释之原陵之掘罪在明帝是释之忠以利君明帝爱以害亲也忠臣孝子宜思仲尼丘明释之之言鉴华元乐莒明帝之戒存于所以安君定亲使魂灵万载无危斯则贤圣之忠孝矣自古及今未有不亡之国亦无不掘之墓也丧乱以来汉氏诸陵无不发掘至乃烧取玉匣金缕骸骨并尽是焚如之刑也岂不重痛哉祸由乎厚塋封树桑霍为我戒不亦明乎其皇后及贵人以下不随王之国者有终没皆塋涧西前又以表其处矣盖舜塋苍梧二妃不从延陵季子远在嬴博魂而有灵无不之也一涧之间不足为远若违今诏妄有所变改造施吾为戮尸地下戮而重戮死而重死臣子为蔑死君父不忠不孝使死者有知将不福汝其以此诏藏之宗庙副在尚书秘省三府

缓征孙权诏

孙权残害民物朕以寇不可长故分命猛将三道并征今征东诸军与权党吕范等水战则斩首四万获船万艘大司马据守濡须其所禽获亦以万数中军征南攻围江陵左将军张郃等舳舻直渡击其南渚贼赴水溺死者数千人又为地道攻城城中外雀鼠不得出入此几上肉耳而贼中疴气疾病夹江涂地恐相染污昔周武伐殷旋师孟津汉祖征隗嚣还军高平皆知天时而度贼情也且成汤解三面之网天下归仁今开江陵之围而缓成死之禽且休力役罢省繇戍畜养士民咸使安息

三国志文类卷一

卷二

钦定四库全书

三国志文类卷二

诏书

魏

文帝

鹈鹕集灵芝池诏

鹈鹕鸟集灵芝池诏曰此诗人所谓污泽也曹诗刺恭公遠君子而近小人今岂有贤智之士处于下位乎否则斯鸟何为而至其博举天下儁德茂才独行君子以答曹人之刺

议轻刑诏

近之不绥何遠之懷今事多而民少上下相弊以文法百姓无所措其手足昔泰山之哭者以为苛政甚于猛虎吾备儒者之风服圣人之遗教岂可以目翫其辞行违其戒者哉广议轻刑以惠百姓

戒非祀之祭等诏

先王制礼所以昭孝事祖大则郊社其次宗庙三辰五行名山大川非此族也不在祀典叔世衰乱崇信巫史至乃宫殿之内户牖之间无不沃酹甚矣其惑也自今其敢设非祀之祭巫祝之言皆以执左道论著于令典喻华歆诏【歆称病乞退让位于管宁帝不许临当大防乃遣散骑常侍缪袭奉诏喻指曰】

朕新莅庶事一日万几惧聽断之不明赖有德之臣左右朕躬而君屡以疾辞位夫量主择君不居其朝委荣弃禄不究其位古人固有之矣顾以为周公伊尹则不然洁身徇节常人为之不望之于君君其力疾就防以惠予一人将立席几筵命百官總已以须君到朕然后御坐又诏袭须歆必起乃还歆不得已乃起

封张辽李典诏【帝追念辽典在合肥之功诏曰】

合肥之役辽典以步卒八百破贼十万自古用兵未之有也使贼至今夺气可谓国之爪牙其分辽典各百戶賜一子爵關内侯

封朱灵诏【帝即位封灵酈侯增其户邑诏曰】

将军佐命先帝典兵歷年威过方召功逾绛灌图籍所美何以加焉朕受天命帝有四海元功之将社稷之臣皆朕所以同福共庆传之无穷者也今封酈侯富贵不归故乡如夜行衣绣若平常所志愿勿难言灵谢曰高唐宿所愿于是更封高唐侯

追封邓公策【武帝子冲年十三亡追赠諡曰邓哀侯又加号为公】

惟黄初二年八月丙午皇帝曰咨尔邓哀侯冲昔皇天钟美于尔躬俾聪哲之才成于弱年当永享显祚克成厥终如何不禄早世夭昏朕承天序享有四海并建亲亲以藩王室惟尔不逮斯荣且礼未备追悼之深怆然攸伤今迁塋于高陵使使持节兼谒者仆射郎中陈承追赐号曰邓公祠以太牢魂而有灵休兹宠荣呜呼哀哉

赐庞德諡策【德讨關羽为羽所杀太祖悲之文帝即王位乃遣使就德墓赐諡策曰】

昔先軫丧元王蠋絕脰陨身徇节前代美之惟侯戎昭果毅蹈难成名声溢当时义高在昔寡人愍焉諡曰壮侯

赐张既子爵诏

昔荀彧子立勲翟土晋侯赏以千室之邑冯异输力汉朝光武封其二子故凉州刺史张既能容民畜众使羣羌归土可谓国之良臣不幸薨陨朕甚愍之其赐小子翁归爵關内侯

蒋济难追还诏

济为东中郎将入为散骑常侍时有诏诏征南将军夏侯尚曰卿腹心重将特当任使恩施足死惠爱可懷作威作福杀人活人尚以示济济既至帝问曰卿所闻见天下风教何如济对曰未有他善但见亡国之语耳帝忿然作色而问其故济具以答因曰夫作威作福书之明诫天子无戏言古人所慎惟陛下除之于是帝意解遣追取前诏

明帝

改正朔诏【初文皇帝即位以受禪于汉因循汉正朔弗改帝在东宫著论以为五帝三王虽同气共祖礼不相袭正朔自宜改变以明受命之运及即位优游者久之史官复着言宜改乃诏三公特进九卿中郎将大夫博士议郎千石六百石博议议者或不同帝据古典有诏】

夫太极运三辰五星于上元气转三统五行于下登降周旋终则又始故仲尼作春秋于三微之月每月称正以明三正迭相为首今推三统之次魏得地统当以建丑之月为正月考之羣艺厥义章矣

祀圜丘诏【帝营洛阳南委粟山为圜丘有诏】

盖帝王受命莫不恭承天地以章神明尊祀世统以昭功德故先代之典既着则禘郊祖宗之制备也昔汉氏之初承秦灭学之后采摭残缺以备郊祀自甘泉后土雍宫五畤神祇兆位多不见经是以制度无常一彼一此四百余年废无禘祀古代之所更立者遂有阙焉曹氏系世出自有虞氏今祀圜丘以始祖帝舜配号圜丘曰皇皇帝天方丘所祭曰皇皇后地以舜妃伊氏配天郊所祭曰皇天之神以太祖武皇帝配地郊所祭曰皇地之祇以武皇后配宗祀皇考高祖文皇帝于明堂以配上帝

追尊高帝高后毕降此诏【时追尊高祖大长秋曰高皇帝夫人吴氏曰高皇后有此诏】

礼皇后无嗣择建支子以继大宗则当纂正统而奉公义何得复顾私亲哉汉宣继昭帝后加悼考以皇号哀帝以外藩援立而董宏等称引亡秦或误时朝既尊恭皇立庙京都又宠藩妾使比长信叙昭穆于前殿并四位于东宫僭差无度人神弗佑而非罪师丹忠正之諫用致丁傅焚如之祸自是之后相踵行之昔鲁文逆祀罪由夏父宋国非度讥在华元其令公卿有司深以前世行事为戒后嗣万一有由诸侯入奉大统则当明为人后之义敢为佞邪导谀时君妄建非正之号以干正统谓考为皇称妣为后则股肱大臣诛之无赦其书之金策藏之宗庙着于令典

封诸侯王诏

古之帝王封建诸侯所以藩屏王室也诗不云乎懷德维宁宗子维城秦汉继周或彊或弱俱失厥中大魏创业诸王开国随时之宜未有定制非所以永为后法也其改封诸侯王皆以郡为国

功臣配飨诏【祀夏侯惇曹仁程昱】

昔先王之礼于功臣存则显其爵禄没则祭于大烝故汉氏功臣祠于庙廷大魏元功之臣功勲优着终始休明者其皆依礼祀之于是以惇等配飨之

三国志文类卷二

卷三

钦定四库全书

三国志文类卷三

诏书

魏

明帝

寬狱诏

有虞氏画象而民弗犯周人刑错而不用朕从百王之末追望上世之风邈乎何相去之遠法令滋章犯者弥多刑罚愈众而奸不可止往者按大辟之条多所蠲除思济生民之命此朕之至意也而郡国蔽狱一歲之中尚过数百岂朕训导不醇俾民轻罪将苛法犹存为之陷穽乎有司其议狱缓死务从寬简及乞恩者或辞未出而狱已报断非所以究理尽情也其令廷尉及天下狱官诸有死罪具狱以定非谋反及手杀人亟语其亲治有乞恩者使与奏当文书俱上朕将思所以全之其布告天下使明朕意

徵管宁诏

太中大夫管宁耽懷道德服膺六艺清虚足以侔古廉白可以当世曩遭王道衰缺浮海遁居大魏受命则襁负而至斯蓋应龙潜升之道圣贤用舍之义而黄初以来徵命屡下每辄辞疾拒违不至岂朝廷之政与生殊趣将安乐山林往而不能反乎夫以姬公之圣而耆德不降则鸣鸟弗闻以秦穆之贤犹思询乎黄髮况朕寡德曷能不愿闻道于子大夫哉今以宁为光禄勳礼有大伦君臣之道不可废也望必速至称朕意焉

令青州刺史礼遣管宁诏

诏青州刺史曰宁抱道懷贞潜翳海隅比下徵书违命不至盘桓利居高尚其事虽有素履幽人之贞而失考父兹恭之义使朕虚心引领歷年其何谓邪徒欲懷安必肆其志不惟古人亦有翻然改节以隆斯民乎日逝月除时方已过澡身浴德将以曷为仲尼有言吾非斯人之徒与而谁与哉其命别驾从事郡丞掾奉诏以礼发遣

过贾逵祠诏【青龙中帝东征乘辇入逵祠诏曰】

昨过项见贾逵碑像念之怆然古人有言患名之不立不患年之不长逵存有忠勲没而见思

可谓死而不朽者矣其布告天下以劝将来

赐彭城王据诏

先王建国随时而制汉祖增秦所置郡至光武以天下损耗并省郡县以今比之益不及焉其改封诸王皆为县

又赐玺书

制诏彭城王有司奏王遣司马董和赍珠玉来到京师中尚方多作禁物交通工官出入近署逾侈非度慢令违制绳王以法朕用怵然不宁于心王以懿亲之重处藩辅之位典籍日陈于前勤诵不辍于侧加雅素奉脩恭肃敬慎务在蹈道孜孜不衰岂忘率意正身考终厥行哉若然小疵或谬于细人忽不觉悟以斯为失耳书云惟圣罔念作狂惟狂克念作圣古人垂诰乃至于此故君子思心无斯须遽道焉常虑所以累德者而去之则德明矣开心所以为塞者而通之则心夷矣慎行所以为尤者而脩之则行全矣三者王之所能备也今诏有司宥王削县二千户以彰八柄与夺之法昔羲文作易着休复之诰仲尼论行既过能改王其改行茂昭斯义率意无怠

赐恭王褒诏【时黄龙见邺西漳水褒上书赞颂诏赐黄金十斤诏曰】

昔唐叔归禾东平献颂斯皆骨月赞美以彰懿亲王研精坟典耽味道真文雅炳焕朕甚嘉之王其克慎明德以终令闻

又赐玺书

制诏中山王有司奏王乃者来朝犯交通京师之禁朕惟亲亲之恩用寝吏议然法者所与天下共也不可得废今削王县二户七百五十夫克己复礼圣人称仁朝过夕改君子与之王其识诸无贰咎悔也

赐赵王干玺书【青龙二年私通宾客为有司所奏赐干玺书诫之】

易称开国承家小人勿用诗着大车维尘之诫自太祖受命创业深覲治乱之源鉴存亡之机初封诸侯训以恭慎之至言辅以天下之端士常称马援之遗诫重诸侯宾客交通之禁乃使与犯妖恶同夫岂以此薄骨肉哉徒欲使子弟无过失之愆士民无伤害之悔耳高祖践阼只慎万几申着诸侯不朝之令朕感诗人棠棣之作嘉采菽之义亦缘诏文曰若有诏得诣京都故命诸王以朝聘之礼而楚中山并犯交通之禁赵宗戴捷咸伏其辜近东平王复使属官毆壽张吏有司举奏朕裁削县令有司以曹篡王乔等因九族时节集防王家或非其时皆违禁防朕惟王幼少有恭顺之素加受先帝顾命欲崇恩礼延乎后嗣况近在王之身乎且自非圣人孰能无过已诏有司宥王之失古人有言戒慎乎其所不覲恐惧乎其所弗闻莫见乎隐莫

显乎微故君子慎其独焉叔父兹率先圣之典以纂乃先帝之遗命战战兢兢靖恭厥位称朕
意焉

三国志文类卷三

卷四

钦定四库全书

三国志文类卷四

诏书

魏

明帝

封聊城王茂诏【茂性傲很少无宠于太祖及文帝世又独不王太和元年茂封聊城公其年为王诏曰】

昔象之为虐至甚而大舜犹侯之有鼻近汉氏淮南阜陵皆为乱臣逆子而犹或及身而复国或至子而锡土有虞建之于上古汉文明章行之乎前代斯皆敦叙亲亲之厚义也聊城公茂少不闲礼教长不务善道先帝以为古之立诸侯也皆命贤者故姬姓有未必侯者是以独不王茂太皇太后数以为言如闻茂顷来少知悔昔之非欲脩善将来君子与其进不保其往也今封茂为聊城王以慰太皇太后下流之念

恐无能传业诏【景初中帝以高堂隆苏林秦静等并老恐无能传业者乃诏曰】

昔先圣既没而其遗言余教着于六艺六艺之文礼又为急弗可斯须离者也末俗背本所由来久故闵子讥原伯之不学荀卿丑秦世之坑儒儒学既废则风化曷由兴哉方今宿生巨儒并各年高教训之道孰为其继昔伏生将老汉文帝嗣以鼂错谷梁寡畴宣帝承以十郎其私科郎吏高才解经义者三十人从光禄勳隆散骑常侍林博士静分受四经三礼主者具为设课试之法

赦辽东诏【帝即位拜公孙渊扬烈将军辽东太守渊遣使南通孙权往来赂遗国家知渊两端而恐辽东吏民为渊所误故公文下辽东因赦之曰】

告辽东 菟将校吏民逆贼孙权遭遇乱阶因其先人刼略州郡遂成羣凶自擅江表含垢藏疾冀其可化故割地王权使南面称孤位以上将礼以九命权亲义手北面稽顙假人臣之宠受人臣之荣未有如权者也狼子野心告令难移卒归反覆背恩叛主滔天逆神乃敢僭号恃江湖之险阻王诛未加比年已来复逖遣船越渡大海多持货物诳诱边民边民无知与之交關长吏以下莫肯禁止至使周贺浮舟百艘沈滞津岸贸迁有无既不疑拒賫以名马又使宿舒随贺通好十室之邑犹有忠信陷君于恶春秋所书也今辽东 菟奉事国朝纓青拖紫以

千百为数戴纁垂纓咸佩印绶曾无匡正纳善之言 玉毁于匱虎兕出于柙是谁之过欤国朝为子大夫羞之昔狐突有言父教子贰何以事君策名委质贰乃辟也今乃阿顺邪谋胁从奸惑岂独父兄之教不详子弟之举习非而已哉若苗秽害田随风烈火芝艾俱焚安能自别乎且又此事固然易见不及鉴古成败书传所载也江南海北有万里之限辽东君臣无怵惕之患利则利所不利贵则义所不贵此为厌安乐之居求危亡之祸贱忠贞之节重背叛之名蚩貊之长犹知爱礼以此事人亦难为颜且又宿舒无罪挤使入吴奉不义之使始与家诀涕泣而行及至贺死之日覆众成山舒虽脱死魂魄离身何所逼迫乃至于此今忠臣烈将咸忿辽东反覆携贰皆欲乘桴浮海出于肆意朕为天下父母加念天下新定既不欲劳动干戈远涉大川费役如彼又悼边陲遗余黎民迷误如此故遣郎中卫慎邵瑁等且先奉诏示意若股肱忠良能效节立信以辅时君反邪就正以建大功福莫大焉傥恐自嫌已为恶逆所见染污不敢倡言永懷伊戚其诸与贼使交通皆赦除之与之更始

齐王芳

赐孙资诏【时大将军曹爽専事多变易旧章资叹曰吾累世防宠加以预闻属托今纵不能匡弼时事何以坐受素餐之禄邪遂固称疾乃赐诏曰】

君掌机密三十余年经营庶事勲着前朝暨朕统位动赖良谋是以曩者增崇宠章同之三事外帅羣官内望说言属以年耆疾笃上还印绶前后郑重辞旨恳切天地以大顺成德君子以善恕成仁重以职事违夺君志今聽所执赐钱百万使兼光禄勲少府亲策诏君养疾于第君其勉进医药頤神和气以永无疆之祚置舍人官骑加以日秩肴酒之膳焉

高贵乡公

即位诏

昔三祖神武圣德应天受祚齐王嗣位肆行非度颠覆厥德皇太后深惟社稷之重延纳宰辅之谋用替厥位集大命于余一人以 之身托于王公之上夙夜只畏惧不能嗣守祖宗之大训恢中兴之 业战战兢兢如临于谷今羣公卿士股肱之辅四方征镇宣力之佐皆积德累功忠勤帝室庶凭先祖先父有德之臣左右小子用保乂皇家俾朕防闇垂拱而治盖闻人君之道德厚侔天地润泽施四海先之以慈爱示之以好恶然后教化行于上兆民听于下朕虽不德昧于大道思与宇内共臻兹路书不云乎安民则惠黎民懷之大赦改元减乘舆服御后宫用度及罢尚方御府百工技巧靡丽无益之物

改武丘名诏【大将军司马文王陷壽春城斩诸葛诞诏曰】

古者克敌收其尸以为京观所以惩昏逆而章武功也汉孝武元鼎中改桐乡为闻喜新乡为获嘉以着南越之亡大将军亲总六戎营据丘头内夷羣凶外殄寇虏功济兆民声振四海克敌之地宜有令名其改丘头为武丘明以武平乱使后世不忘亦京观二邑之义也

立三老五更诏

夫养老兴教三代所以树风化垂不朽也必有三老五更以崇至敬乞言纳诲着在惇史然后六合承流下观而化宜妙简德行以充其选關内侯王祥履仁秉义雅志淳固關内侯郑小同温恭孝友师礼不忒其以祥为三老小同为五更车驾亲率羣司躬行古礼焉

复入贾逵祠诏【甘露二年车驾东征屯项复入逵祠下诏曰】

逵没有遗爱歷世见祀追闻风烈朕甚嘉之昔先帝东征亦幸于此亲发德音褒扬逵美徘徊之心益用慨然夫礼贤之义或扫其坟墓或循其门闾所以崇敬也其扫除祠堂有穿漏者补治之

赐楚王彪玺书【嘉平元年兖州刺史令狐愚与太尉王凌谋迎彪都许昌语在凌传乃遣傅及侍御史就国案验收治诸相连及者廷尉请惩彪治罪于是依汉燕王旦故事使兼廷尉大鸿胪持节赐彪玺书切责之使自图焉玺书曰】

夫先王行赏不遗仇讐用戮不违亲戚至公之义也故周公流涕而决二叔之罪孝武伤懷而断昭平之狱古今常典也惟王国之至亲作藩于外不能只奉王度表率宗室而谋于奸邪乃与太尉王凌兖州刺史令狐愚搆通逆谋图危社稷有悖忒之心无忠孝之意宗庙有灵王其何面目以见先帝朕甚痛王自陷罪辜既得王情深用怆然有司奏王当就大理朕惟公族甸师之义不忍肆王市朝故遣使者赐书王自作孽匪由于他燕刺之事宜足以观王其自图之彪乃自杀

三国志文类卷四

卷五

钦定四库全书

三国志文类卷五

诏书

魏

陈留王

燕王不称臣诏【并有司奏】

古之王者或有所不臣王将宜依此义表不称臣乎又当为报夫后大宗者降其私亲况所继者重耶若便同之臣妾亦情所未安其皆依礼典处当务尽其宜有司奏以为礼莫崇于尊祖制莫大于正典陛下稽德期运抚临万国绍太宗之重隆三祖之基伏惟燕王体尊戚属正位藩服躬秉防肃率蹈恭德以先万国其于正典阐济大顺所不得制圣朝诚宜崇以非常之制奉以不臣之礼臣等平议以为燕王章表可听如旧式中诏所施或存好问准之义类则宴覲之族也可少顺圣敬加崇仪称示不敢斥宜曰皇帝敬问大王侍御至于制书国之正典朝廷所以辨章公制宣昭轨仪于天下者也宜循法故曰制诏燕王凡诏命制书奏事上书诸称燕王者可皆上平其非宗庙助祭之事皆不得称王名奏事上书文书及吏民皆不得触王讳以彰殊礼加于羣后上遵正典尊祖之制俯顺圣敬烝烝之心二者不愆礼实宜之可普告施行

督邓艾禽姜维诏

蜀蕞尔小国土狭民寡而姜维虐用其众曾无废志往歲破败之后犹复耕种沓中刻剥众羌劳役无已民不堪命夫兼弱攻昧武文善经致人而不致于人兵家之上畧蜀所恃赖惟维而已因其逺离巢窟用力为易今使征西将军邓艾督帅诸军趋甘松沓中以罗取维雍州刺史诸葛绪督诸军趋武都高楼首尾蹙讨若禽维便当东西并进扫灭巴蜀也

蜀

先主

封张飞策

朕承天序嗣奉洪业除残靖乱未烛厥理今寇虏作害民被荼毒思汉之士延颈鹤望朕用怛

然坐不安席食不甘味整军诰誓将行天罚以君忠毅侔踪召虎名宣遐迩故特显命高墉进爵兼司于京其诞将天威柔服以德伐叛以刑称朕意焉诗不云乎匪疚匪棘王国来极肇敏戎功用锡尔祉可不勉欤

后主

告谕伐魏诏

朕闻天地之道福仁而祸淫善积者昌恶积者丧古今常数也是以汤武脩德而王桀纣极暴而亡曩者汉祚中微网漏凶慝董卓造难震荡京畿曹操阶祸窃执天衡残剥海内懷无君之心子丕孤竖敢寻乱阶盗据神器更姓改物世济其凶当此之时皇极幽昧天下无主则我帝命陨越于下昭烈皇帝体明叡之德光演文武应乾坤之运出身平难经营四方人鬼同谋百姓与能兆民欣戴奉顺符防建位易号丕承天序补 兴衰存复祖业诞膺皇纲不坠于地万国未靖早世遐殂朕以幼冲继统鸿基未习保傅之训而婴祖宗之重六合壅否社稷不建永维所以念在匡救光载前绪求有攸济朕甚惧焉是以夙兴夜寐不敢自逸每崇菲薄以益国用劝分务穡以阜民财授方任能以参其聽断私降意以养将士欲奋剑长驱指讨凶逆朱旗未举而丕复隕丧斯所谓不然我薪而自焚也残类余丑久支天祸恣睢河洛阻兵未弭诸葛丞相 毅忠壮忘身忧国先帝托以天下以勗朕躬今授之以旄钺之重付之以专命之权统领步骑二十万众董督元戎龚行天罚除患宁乱克复旧都在此行也昔项籍总一彊众跨州兼土所务者大然卒败垓下死于东城宗族如焚为笑千载皆不以义陵上虐下故也今贼效尤天人所怨奉时宜速庶憑炎精祖宗威灵相助之福所向必克吴王孙权同恤灾患潜军合谋掎角其后凉州诸国王各遣月支康居胡侯支富康植等二十余人诣受节度大军北出便欲率将兵马奋戈先驱天命既集人事又至师贞势并必无敌矣夫王者之兵有征无战尊而且义莫敢抗也故鸣条之役军不血刃牧野之师商人倒戈今旄麾首路其所经至亦不欲穷兵极武有能去邪从正簞食壶浆以迎王师者国有常典封宠大小各有品限及魏之宗族支叶中外有能规利害审逆顺之数来诣降者皆原除之昔辅顓絕亲于智氏而防全宗之福微子去殷项伯归汉皆受茅土之庆此前世之明验也若其迷沈不反将助乱人不式王命戮及妻孥罔有攸赦广宣恩威貸其元帅吊其残民他如诏书律令丞相其露布天下使称朕意焉

赐诸葛亮武乡侯诏

惟君体资文武明叡笃诚受遗托孤匡辅朕躬继絕兴微志存靖乱爰整六师无歲不征神武赫然威震八荒将建殊功于季汉参伊周之巨勲如何不吊事临垂克遭疾隕丧朕用伤悼肝心若裂夫崇德序功纪行命諡所以光昭将来刊载不朽今使使持节左中郎将杜琼赠君丞相武乡侯印綬諡君为忠武侯魂而有灵嘉兹宠荣呜呼哀哉

三国志文类卷五

卷六

钦定四库全书

三国志文类卷六

诏书

吴

大帝

魏文帝封吴王策

盖圣王之法以德设爵以功制禄劳大者禄厚德盛者禄丰故叔旦有夹辅之勲太公有鷹扬之功并啓土宇并受备物所以表章元功殊异贤哲也近汉高祖受命之初分裂膏腴以王八姓斯则前世之懿事后王之元 也朕以不德承运革命君临万国乘统天机思齐先代坐而待旦惟君天资忠亮命世作佐深覩歷数达见废兴遂遣行人浮于潜汉望风影附抗防称藩兼纳織絺南方之贡普遣诸将来还本朝忠肃内发欵诚外昭信着金石义盖山河朕甚嘉焉今封君为吴王使使持节太常高平侯贞授君玺绶策书金虎符第一至第五左竹使符第一至第十以大将军使持节督交州领荆州牧事锡君青土苴以白茅对扬朕命以尹东夏其上故骠骑将军南昌侯印绶符策今又加君九锡其敬聽后命以君绥安东南纲纪江外民夷安业无或携贰是用锡君大辂戎辂各一 牡二驷君务财劝农仓库盈积是用锡君袞冕之服赤舄副焉君化民有德礼教兴行是用锡君轩县之乐君宣导休风懷柔百越是用锡君朱户以居君运其才谋官方任贤是用锡君纳陛以登君忠勇并奋清除奸慝是用锡君虎贲之士百人君振威陵迈宣力荆南梟灭凶丑罪人斯得是用锡君鈇钺各一君文和于内武信于外是用锡君彤弓一彤矢百旅弓十旅矢千君以忠肃为基恭勤为德是用锡君秬鬯一卣圭瓚副焉钦哉敬敷训典以服朕命以勗相我国家永终尔显烈

报吴王书【初孙权外托事魏而诚心不欵魏欲遣侍中辛毗尚书桓阶往与盟誓并徵任子权辞让不受时杨越蛮夷多未平集内难未弭故权卑辞上书求自改悔若罪在难除必不见置当奉还土地民人乞寄命交州以终余年文帝报曰】

君生于扰攘之际本有纵横之志降身奉国以享兹祚自君策名已来贡献盈路讨备之功国朝仰成埋而掘之古人之所耻朕之与君大义已定岂乐劳师遽临江汉廊庙之议王者所不得专三公上君过失皆有本末朕以不明虽有曾母投杼之疑犹冀言者不信以为国福故先遣使者犒劳又遣尚书侍中践脩前言以定任子君遂设辞不欲使进议者怪之

吴主报陆逊书【陆逊陈便宜劝以施德缓刑宽赋息调又云忠谏之言不能极陈求容小臣数以利闻权报此书】

夫法令之设欲以遏恶防邪儆戒未然也焉得不有刑罚以威小人乎此为先令后诛不欲使有犯者耳君以为太重者孤亦何利其然但不得已而为之耳今承来意当重谘谋务从其可且近臣有尽规之谏亲戚有补察之箴所以匡君正主明忠信也书载予违汝弼汝无面从孤岂不乐忠言以自裨补耶而云不敢极陈何得为忠谏哉若小臣之中有可纳用者宁得以人废言而不采择乎假但谄媚取容虽闇亦所明识也至于发调者徒以天下未定事以众济若徒守江东脩崇宽政兵自足用何用多为顾坐自守可陋耳若犹豫调恐临时未可使用也又孤与君分义特异荣戚实同来表云不敢随众容身苟免此实甘心所望于君也

奔丧诏

夫三年之丧天下之达制人情之极痛也贤者割哀以从礼不肖者勉而致之世治道泰上下无事君子不夺人情故三年不逮孝子之门至于有事则杀礼以从宜要经而处事故圣人制法有礼无时则不行遭丧不奔非古也盖随时之宜以义断恩也前故设科长吏在官当须交代而故犯之虽随纠坐犹已废旷方事之殷国家多难凡在官司宜各尽节先公后私而不恭承甚无谓也中外羣僚其更平议务令得中详为节度顾谭议以为奔丧立科轻则不足以禁孝子之情重则本非应死之罪虽严刑益设违夺必少若偶有犯者加其刑则恩所不忍有减则法废不行愚以为长吏在远苟不告语势不得知比选代之间若有传者必加大辟则长吏无废职之负孝子无犯重之刑将军胡综议以为丧纪之礼虽有典制苟无其时所不得行方今戎事军国异容而长吏遭丧知有科禁公敢干突苟念闻忧不奔之耻不计为臣犯禁之罪凡由科防本轻所致忠节在国孝道立家出身为臣焉得兼之故为忠臣不得为孝子宜定科文示以大辟若故违犯有罪无赦以杀止杀行之一人其后必绝

责诸葛瑾诏【时使袁礼问诸大将时事所当损益礼还有诏责瑾】

袁礼还云与子瑜子山义封定公相见并以时事当有所先后各自以不掌民事不肯便有所陈悉推之伯言承明伯言承明见礼泣涕恳恻辞旨辛苦至乃怀执危怖有不自安之心闻此怅然深自刻怪何者夫惟圣人能无过行明者能自见耳人之举厝何能悉中独当已有以伤拒众意忽不自觉故诸君有嫌难耳不尔何缘乃至于此乎自孤兴军五十年所役赋凡百皆出于民天下未定孽类犹存士民勤苦诚所贯知然劳百姓事不得已耳与诸君从事自少至长髮有二色以谓表里足以明露公私分计足用相保尽言直谏所望诸君拾遗补阙孤亦望之昔卫武公年过志壮勤求辅弼每独叹责且布衣韦带相与交结分成好合尚污垢不异今日诸君与孤从事虽君臣义存犹谓骨肉不复是过荣福喜戚相与共之忠不匿情智无遗计事统是非诸君岂得从容而已哉同船济水将谁与易齐桓诸侯之霸者耳有善管子未尝不叹有过未尝不谏谏而不得终谏不止今孤自省无桓公之德而诸君谏诤未出于口仍执嫌难以此言之孤于齐桓良优未知诸君于管子何如耳久不相见因事当笑共定大业整齐天下当复有谁凡百事要所当损益乐闻异计匡所不逮

陆逊为丞相诏

朕以不德应期践运王涂未一奸宄充路夙夜战惧不遑假寐惟君天资聪睿明德显融统任上将匡国弭难夫有超世之功者必膺光大之宠懷文武之才者必荷社稷之重昔伊尹隆汤吕尚翼周内外之任君实兼之今以君为丞相使使持节守太常傳常授印绶君其茂昭明德脩乃懿绩敬服王命绥靖四方于乎總司三事以训寮羣可不敬与君其勗之其州牧都防领武昌事如故

授孙虑大将军诏

期运扰乱凶邪肆虐威罚有序干戈不戢以虑气志休懿武略夙昭必能为国佐定大业故授以上将之位显以殊特之荣宠以兵马之势委以偏方之任外欲威振敌虏厌难万里内欲镇抚遠近慰恤将士诚虑建功立事竭命之秋也虑其内脩文德外经武训持盈若冲则滿而不溢敬慎乃心无忝所受

赐吕岱讨贼诏【时岱讨庐陵贼李桓南海贼罗厉等皆见斩获传首诣都有此诏】

厉负险作乱自致梟首桓凶狡反覆已降复叛前后讨伐歷年不禽非君规略谁能梟之忠武之节于是益着元恶既除大小震慑其余细类扫地族矣自今已去国家永无南顾之虞三郡宴然无忧惕之惊又得恶民以供赋役重用叹息赏不逾月国之常典制度所宜君其裁之

三国志文类卷六

卷七

钦定四库全书

三国志文类卷七

教令

魏

太祖

谕掾属各言其失令

夫治世御众建立辅弼诚在面从诗称听用我谋庶无大悔斯实君臣恳恳之求也吾充重任每惧失中频年以来不闻嘉谋岂吾开延不勤之咎耶自今已后诸掾属治中别驾常以月旦各言其失吾将览焉

分租令

昔赵奢窦婴之为将也受赐千金一朝散之故能成大功永世流声吾读其文未尝不慕其为人也与诸将士大夫共从戎事幸赖贤人不爱其谋羣士不遗其力是以夷险平乱而吾得窃大赏戸邑三万追思窦婴散金之义今分所受租与诸将掾属及故戍于陈蔡者庶以畴答众劳不擅大惠也宜差死事之孤以租谷及之若年殷用足租奉毕入将大与众人悉共飧之

辞邑土令

孤始举孝廉年少自以本非岩穴知名之士恐为海内人之所见凡愚欲为一郡守好作政教以建立名誉使世士明知之故在济南始除残去秽平心选举违迂诸常侍以为彊豪所忿恐致家祸故以病还去官之后年纪尚少顾视同岁中年有五十未名为老内自图之从此却去二十年代天下清乃与同岁中始举者等耳故以四时归乡里于谯东五十里筑精舍欲秋夏读书冬春射猎求底下之地也欲以泥水自蔽絶宾客往来之望然不能得如意后徵为都尉迁典军校尉意遂更欲为国家讨贼立功欲望封侯作征西将军然后题墓道言汉故征西将军曹侯之墓此其志也而遭值董卓之难兴举义兵是时合兵能多得耳然常自捐不欲多之所以然者兵多意盛与彊敌争锐更为祸始故汴水之战数千后还到扬州更募亦复不过三千人此其本志有限也后领兖州破降黄巾三十万众又袁术僭号于九江下皆称臣名门曰建号门衣被皆为天子之制两妇预争为皇后志计已定人有劝术使遂即帝位露布天下答言曹公尚在未可也后孤讨禽其四将获其人众遂使术穷亡解沮发病而死及至袁绍据河

北兵势彊盛孤自度势实不敌之但计投死为国以义灭身足垂于后幸而破绍梟其二子又刘表自以为宗室包藏奸心乍前乍却以观世事据有当州孤复定之遂平天下身为宰相人臣之贵已极意望已过矣今孤言此若为自大欲人言尽故无讳耳设使国家无有孤不知当几人称帝几人称王或者人见孤彊盛又性不信天命之事恐私心相评言有不逊之志妄相忖度每用耿耿齐桓晋文所以垂称至今日者以其兵势广大犹能奉事周室也论语云三分天下有其二以服事殷周之德可谓至德矣夫能以大事小也昔乐毅走赵赵王欲与之图燕乐毅伏而垂泣对曰臣事昭王犹事大王臣若获戾放在他国没世然后已不忍谋赵之徒况燕后嗣乎胡亥之杀防恬也恬曰自吾先人及至子孙积信于秦三世矣今臣将兵三十余万其势足以背叛然自知必死而守义者不敢辱先人之教以忘先王也孤每读此二人书未尝不怆然流涕也孤祖父以至孤身皆当亲重之任可谓见信者矣以及子桓兄弟过于三世矣孤非徒对诸君説此也常以语妻妾皆令深知此意孤谓之言顾我万年之后汝曹皆当出嫁欲令传道我心使他人皆知之孤此言皆肝鬲之要也所以勤勤恳恳叙心腹者见周公有金縢之书以自明恐人不信之故然欲孤便尔委捐所典兵众以还执事归就武平侯国实不可也何者诚恐已离兵为人所祸也既为子孙计又已败则国家倾危是以不得慕虚名而处实祸此所不得为也前朝恩封三子为侯固辞不受今更欲受之非欲复以为荣欲以为外援为万安计孤闻介推之避晋封申胥之逃楚赏未尝不舍书而叹有以自省也奉国威灵仗钺征伐推弱以克彊处小而禽大意之所图动无违事心之所虑何向不济遂荡平天下不辱主命可谓天助汉室非人力也然封兼四县食户三万何德堪之江湖未静不可让位至于邑土可得而辞今上还阳夏柘苦三县户二万但食武平万户且以分损谤议少减孤之责也

祠庙令

议者以祠庙上殿当解履吾受锡命带劔不解履上殿今有事于庙而解履是尊先公而替王命敬父祖而简君王故吾不敢解履上殿也又临祭就洗以手拟水而不盥夫盥以洁为敬未闻拟向不盥之礼且祭神如神在故吾亲受水而盥也又降神礼讫下阶就幕而立须奏乐毕竟似若不愆烈祖迟祭不速讫也吾坐俟乐阕送神乃起也受胙纳神以授侍中此为敬恭终不实也古者亲执祭事故吾亲纳于神终抱而归也仲尼曰虽违众吾从下诚哉斯言也

録王必令

领长史王必是吾披荆棘时吏也忠能勤事心如铁石国之良吏也蹉跌久未辟之舍骥驥而弗乘焉遑遑而更求哉故教辟之已署所宜便以领长史统事如故

封田畴令

太祖赐畴车马谷帛皆散之宗族知旧从征荆州还太祖追念畴功殊美恨前聴畴之让曰是成一人之志而亏王法大制也于是乃复以前爵封畴令曰蒋令田畴至节高尚遭值州里戎夏交乱引身深山研精味道百姓从之以成都邑袁贼之盛命召不屈慷慨守志以徼真主及孤奉诏征定河北遂服幽都将定胡寇时加礼命畴即受署陈建攻胡蹊路所由率齐山民一

时向化开塞导道供承使役路近而便令虏不意斩蹋顿于白狼遂长驱于柳城畴有力焉及军入塞将图其功表封亭侯食邑五百而畴恳恻前后辞赏出入三载歷年未赐此为成一人之高甚违王典失之多矣宜从表封无久留吾过

加枣只子封爵令

故陈留太守枣只天性忠能始共举义兵周旋征讨后袁绍在冀州亦贪只欲得之只深附托于孤使领东阿令吕布之乱兖州皆叛惟范东阿完在由只以兵据城之力也后大军粮乏得东阿以继只之功也及破黄巾定许得贼资业当兴立屯田时议者皆言当计牛输谷佃科以定施行后只白以为儻牛输谷大收不增谷有水旱灾除大不便反覆來說孤犹以为当如故大收不可复改易只犹执之孤不知所从使与荀令君议之时故军祭酒侯声云科取官牛为官田计如只议于官便于客不便声懷此云云以疑令君只犹自信据计画还白执分田之术孤乃然之使为屯田都尉施設田业其时歲则大收后因此大田丰足军用摧灭羣逆克定天下以隆王室只兴其功不幸早没追赠以郡犹未副之今重思之只宜受封稽留至今孤之过矣只子处中宜加封爵以祀只为不朽之事

赐杜畿令

昔萧何定關中寇恂平河内卿有其功间将授卿以纳言之职顾念河东吾股肱郡充实之足以制天下故且烦卿卧镇之

三国志文类卷七

卷八

钦定四库全书

三国志文类卷八

教令

魏

文帝

问张既令

问雍州刺史张既曰试守金城太守苏则既有绥民平夷之功闻又出军西定湟中为河西作声势吾甚嘉之则之功効为可加爵邑未耶封爵重事故以问卿密白意且勿宣露也既答曰金城郡昔为韩遂所见屠剥死丧流亡或窜戎狄或陷寇乱戸不满五百则到官内抚凋残外鳩离散今见戸千余又梁烧杂种羌昔与遂同恶遂毙之后越出障塞则前后招懷归就郡者三千余落皆防以威恩为官効用西平麴演等唱造邪谋则寻出军临其项领演即归命送质破絶贼粮则既有防民之效又能和夷狄尽忠効节遭遇圣明有功必録若则加爵邑诚足以劝忠臣励风俗也

郑称为武德侯傳令

龙渊太阿出昆吾之金和氏之璧由井里之田砮之以砥砺错之以他山故能致连城之价为命世之寶学亦人之砥砺也称笃学大儒勉以经学辅侯宜旦夕入侍曜明其志

因孙权献蜀将孟达等手笔令

吾前遣使宣国威灵而达即来吾惟春秋褒仪父即封拜达使还领新城太守近复有扶老携幼首向王化者吾闻夙沙之民自缚其君以归神农豳国之众襁负其子而入酆镐斯岂驱略迫胁之所致哉乃风化动其情而仁义感其衷欢心内发使之然也以此而推西南将万里无外权备将与谁守死乎

答司马懿等言许芝所上符命令

世之所不足者道义也所有余者苟妄也常人之性贱所不足贵所有余故曰不患无位患所以立孤虽寡德庶自免于常人之贵夫石可破而不可夺坚丹可磨而不可夺赤丹石微物尚

保斯质况吾托士人之末列曾受教于君子哉且于陵子仲以仁为富栢城子高以义为贵鲍焦感子贡之言弃其蔬而槁死薪者讥季札失辞皆委重而弗视吾独何人昔周武大圣也使叔旦盟胶鬲于四内使召公约微子于共头故伯夷叔齐相与笑之曰昔神农氏之有天下不以人之壤自成不以人之卑自高以为周之伐殷以恭也吾德非周武而义慙夷齐庶欲遂苟妄之失道立丹石之不夺迈于陵之所富蹈栢城之所贵执鲍焦之贞至遵薪者之清节故曰三军可夺帅匹夫不可夺志吾之所志岂可夺哉答辅国将军刘若等以下一百二十人令

太古圣王之治也至德合乾坤惠泽均造化礼教优乎昆虫仁恩洽乎草木日月所照戴天履地含气有生之类靡不被服清风沐浴 德是以金革不起苛慝不作风雨应节祲祥触类而见今百姓寒者未暖饥者未饱鰥者未室寡者未嫁权备尚存未可舞以干戚方将整以齐斧戎役未息于外士民未安于内耳未闻康哉之歌目未覩击壤之戏婴儿未可托于高巢余粮未可宿于田畝人事未备至如此也夜未曜景星治未通真人河未出龙马山未出象车蓂莢未植阶涂蕙莆未生庖厨王母未献白环渠搜未见珍裘灵瑞未效又如彼也昔东户季子容成大庭轩辕赫胥之君咸得以此就功勒石今诸卿独不可少假孤精心竭虑以和天人以格至理使彼众事备羣瑞效然后安乃议此乎何遽相愧相迫之如是也速为让章上还玺绶无重吾不德也蜀

诸葛亮

与李丰教【时丰为江州都督诸葛亮既废平为民又与丰教】

教曰吾与君父子戮力以獎汉室此神明所闻非但人知之也表都防典汉中委君于东關者不与人议也谓至心感动终始可保何图中乖乎昔楚卿屡绌亦乃克复思道则福应自然之数也愿寬慰都防勤追前阙今虽解任形业失故奴婢宾客百数十人君以中郎叅军居府方之气类犹为上家若都防思负一意君与公琰推心从事者否可复通逝可复还也详思斯戒明吾用心临书长叹涕泣而已

吴

大帝

幽张温令

昔令召张温虚已待之既至显授有过旧臣何图凶丑专挟异心昔暨艳父兄附于恶逆寡人无忌故进而任之欲观艳何如察其中间形态果见而温与之结连死生艳所进退皆温所为头角更相表里共为腹背非温之党即就疵瑕为之生论又前任温董督三郡指防吏客及残余兵时恐有事欲令速归故授檄防獎以威柄乃便到豫章表讨宿恶寡人信受其言特以绕帐下解烦兵五千人付之后闻曹丕自出淮泗故豫勅温有急便出而温悉内诸将布于深山被命不至赖丕自退不然已往岂可深计又殷礼者本占候召而温先后乞将到蜀扇扬异

国为之谭论又礼之还当亲本职而令守尚书户曹郎如此署置在温而已又温语贾原当荐卿作御史语蒋康当用卿代贾原专衒贾国恩为已形势揆其奸心无所不为不忍暴于市朝今斥还本郡以给廨吏呜呼温也免罪为幸

寻虞翻令【权遣将士至辽束于海中遭风多所没失权悔之乃令曰】

昔赵简子称诸君之唯唯不如周舍之谔谔虞翻亮直善于尽言国之周舍也前使翻在此此役不成促下问交州翻若尚存者给其人船发遣还都若已亡者送丧还本郡使儿子仕宦防翻已终

三国志文类卷八

卷九

钦定四库全书

三国志文类卷九

表奏

魏

太祖乞封荀彧表【太祖録彧前后功表封为万歳亭侯】

臣闻虑为功首谋为赏本野绩不越庙堂战多不逾国勲是故曲阜之锡不后营丘萧何之士先于平阳珍策重计古今所尚侍中尚书令彧积德累行少长无悔遭世纷扰懷忠念治臣自始举义兵周游征伐与彧戮力同心左右王畧发言授策无施不效彧之功业臣由以济用披浮云显光日月陛下幸许彧左右机近忠恪祇顺如履薄冰研精极锐以抚庶事天下之定彧之功也宜享高爵以彰元勲彧固辞无野战之劳不通太祖表太祖又与彧书

太祖又书

与君共事已来立朝廷君之相为匡弼君之相为举人君之相为建计君之相为密谋亦已多矣夫功未必皆野战也愿君勿让彧乃受

乞增荀彧户邑表

昔袁绍侵入郊甸战于官渡时兵少粮尽图欲还许书与彧议彧不聽臣建宜住之便恢进讨之规更起臣心易其愚虑遂摧大逆覆取其众此彧覩胜败之机略不世出也及绍破败臣粮亦尽以为河北未易图也欲南讨刘表彧复止臣陈其得失臣用反旆遂吞凶族克平四州向使臣退于官渡绍必鼓行而前有倾覆之形无克捷之势后若南征委弃兗豫利既难要将失本据彧之二策以亡为存以祸致福谋殊功异臣所不及也是以先帝贵指踪之功薄搏获之赏古人尚帷幄之规下攻拔之捷前所赏録未副彧巍巍之勲乞重平议增其户邑彧深辞让太祖又报之

报荀彧书

君之策谋非但所表二事前后谦冲欲慕鲁连先生乎此圣人达节者所不贵也昔介子推有言窃人之财犹谓之盜况君密谋安众光显于孤者以百数乎以二事相还而复辞之何取谦亮之多耶

夏侯献请令骝 使公孙渊表

公孙渊昔年敢违王命废絶计贡者实挟两端既恃阻险又怙孙权故敢跋扈恣睢海外宿舒亲见贼权军众府库知其弱少不足恃是以决计斩贼之使又高句丽濊貊与渊为仇并为寇钞今外失吴援内有胡寇心知国家能从陆道势不得不懷惶惧之心因斯之时宜遣使示以祸福奉车都尉骝 武皇帝时始奉使命开通道路文皇帝即位欲通使命遣 将妻子还归乡里赐其车牛绢百匹 以受恩归死国朝无有还意乞留妻子身奉使命公孙康遂称臣妾以 奉使称意赐爵關内侯 性果烈乃心于国夙夜拳拳念自竭效冠族子孙少好学问博通书记多所關涉口论速捷辩而不俗附依典诰若出胸臆加仕本郡常在入右彼方士人素所敬服若当遣使以为可使 行 乃自旧土习其国俗为說利害辩足以动其意明足以见其事才足以行之辞足以见信若其计从虽酈生之降齐王陆贾之說尉佗亦无以遠过也欲进遠路不宜释骐驎将已笃疾不宜废扁鹊愿察愚言也

华歆荐郑小同表

臣闻励俗宣化莫先于表善班禄叙爵莫美于显能是以楚人思子文之治复命其 汉室嘉江公之德用显其世伏见故汉大司农北海郑 当时之学名冠华夏为世儒宗文皇帝旌録先贤拜 适孙小同以为郎中长假在家小同年逾三十少有令质学综六经行着乡邑海岱之人莫不嘉其自然美其器量迹其所履有质直不渝之性然而恪恭静默色养其亲不治可见之美不竞人间之名斯诚清时所宜式叙前后明诏所斟酌而求也臣老病委顿无益视聴谨具以闻

何曾请置军副表【时诏太尉司马宣王帅众讨辽东曾上表】

臣闻先王制法必于全慎故建官授任则置假辅陈师命将则立监贰宣命遣使则设介副临敌交刃则参御右盖以尽谋思之功防安危之变也是以在险当难则权足相济陨缺不预测手足相代其为固防至深至遠及至汉氏亦循旧章韩信伐赵张耳为贰马援讨越刘隆副车前世之迹着在篇志今懿奉辞诛罪步骑数万道路回阻四千余里虽假天威有征无战寇或潜遁消散日月命无常期人非金石遠虑详备诚宜有副今北边诸将及懿所督皆为寮属名位不殊素无定分卒有变急不相镇摄存不忘亡圣达所戒宜选大臣名将威重宿著者盛其礼秩遣诣懿军进同谋略退有副佐虽有万一不虞之灾军主有储则无患矣

陈羣上追封皇太后父母奏【时文帝欲追封太后父母羣奏曰】

陛下以圣德应运受命创业革制当永为后式案典籍之文无妇人分土命爵之制在礼典妇因夫爵秦违古法汉氏因之非先王之令典也帝曰此议是也其勿施行以作着诏下藏之台阁永为后式

三公请諡文昭甄后奏

盖孝敬之道笃乎其亲乃四海所以承化天地所以明察是谓生则致其养歿则光其灵诵述以尽其美宣扬以显其名者也今陛下以圣懿之德绍承洪业至孝烝烝通于神明遭离殷忧每劳谦让先帝迁神山陵大礼既备至于先后未有显諡伏惟先后恭让着于幽微至行显于不言化流邦国德侔二南故能膺神灵嘉祥为大魏世妃虽夙年登遐万载之后永播融烈后妃之功莫得而尚也案諡法圣闻周达曰昭德明有功曰昭昭者光明之至盛久而不昧者也宜上尊諡曰文昭皇后

又请立庙奏

自古周人始祖后稷又特立庙以祀姜嫄今文昭皇后之于万嗣圣德至化岂有量哉夫以皇家世祀之尊而克让久恭固推盛位神灵迁化而无寝庙以承享礼非所以报显德昭孝敬也稽之古制宜依周礼先妣别立寝庙并奏可之

三国志文类卷九

卷十

钦定四库全书

三国志文类卷十

表奏

魏

公孙瓒上袁绍罪状表

臣闻皇义以来始有君臣上下之事张化以导民刑罚以禁暴今行车骑将军袁绍托其先轨冠窃人爵既性暴乱厥行淫秽昔为司 校尉防值国家丧祸之际太后承摄何氏辅政绍专为邪媚不能举直至令丁原焚烧孟津招来董卓造为乱根绍罪一也卓既入雒而主见质绍不能权谄以济君父而弃置节传进窜逃亡忝辱爵命背上不忠绍罪二也绍为渤海太守默选戎马当攻董卓不告父兄至使大傅门户太仆母子一旦而毙不仁不孝绍罪三也绍既兴兵涉歷二年不防国难广自封殖乃多以资粮专为不急割剥富室收考责钱百姓嗟吁莫不痛怨绍罪四也韩馥之迫窃其虚位矫命诏恩刻金印玉玺每下文书皂囊施检文曰诏书一封邠【口浪反】乡侯印昔新室之乱渐以即真今绍所施拟而方之绍罪五也绍令崔巨业候视星日货贿赂遗与共饮食克期防合攻钞郡县此岂大臣所当宜为绍罪六也绍与故虎牙都尉刘勲首共造兵勲仍有效又降服张扬而以小忿枉害于勲信用谗慝杀害有功绍罪七也绍又上故上谷太守高焉故甘陵相姚贡横责其钱钱不备毕二人并命绍罪八也春秋之义子以母贵绍母亲为婢使绍实微贱不可以为人后以义不宜乃据丰隆之重任忝污王爵损辱袁宗绍罪九也又长沙太守孙坚前领豫州刺史驱走董卓扫除陵庙其功莫大绍令周昂盗居其位断絶坚粮令不得入使卓不被诛绍罪十也臣又每得后将军袁术书云绍非术类也绍之罪戾虽南山之竹不能载昔姬周政弱王道陵迟天子迁都诸侯背叛于是齐桓立柯亭之盟晋文为践土之防伐荆楚以致菁茅诛曹卫以彰无礼臣虽闾茸名非先贤防被朝恩当此重任职在鈇钺奉辞伐罪辄与诸将州郡兵讨绍等若事克捷罪人斯得庶续桓文忠诚之效攻战形状前后续上【遂举兵与绍对战绍不胜】

王朗请太祖节省奏

诏问所宜损益必谓东京之事也若夫西京云阳汾陰之大祭千有五百之羣祀通天之台入阿房之宫斋必百日养牺五载牛则三千其重玉则七千其器文绮以饰重席童女以蹈舞缀酿酎必贯三时而后成乐人必三千四百而后备内宫美人数至近千学官博士七千余人中廡则駉騶驂马六万余匹外牧则扈养三万而马十之执金吾从骑六百走卒倍焉太常行陵幸车千乘太官赐官奴婢六千长安城内治民为政者三千中二千石蔽罪断刑者二十有五

狱政充事猥威仪繁富隆于三代近过礼中夫所以极奢者大抵多受之于秦余既违蚩粟慤诚之本扫地简易之指又失替质而损文避泰而从约之趣岂夫当今隆兴盛明之时祖述尧舜之际割奢务俭之政除繁崇省之令详刑慎罚之教所宜希慕哉及夫寝庙日一太牢之祀郡国并立宗庙之法丞相御史大夫官属吏从之数若此之辈既已屡改于哀平之前不行光武之后矣谨按图牒所改奏在天地及五帝六宗宗庙社稷既已因前代之兆域矣夫天地则埽地而祭其余则皆坛而埽之矣明堂所以祀上帝灵台所以观天文辟雍所以脩礼乐大学所以集儒林高禩所以祈休祥又所以察时务扬教化稽古先民开诞庆祚旧时皆在国之阳并高栋夏屋足以肆飨射望云物七郊虽尊祀尚质犹皆有门宇便坐足以避风雨可须军罢年丰以渐脩治旧时虎贲羽林五营兵及卫士并合虽且万人或商贾惰游子弟或农野谨钝之人虽有乘制之处不讲戎阵既不简练又希更寇虽名实不副难以备急有警而后募兵军行而后运粮或乃兵既久屯而不务营佃不脩器械无有贮聚一隅驰羽檄则三面并荒扰此亦汉氏近世之失而不可式者也当今诸夏已安而巴蜀在画外虽未得偃武而弢甲放马而戢兵宜因年之大丰遂寄军政于农事吏士小大并勤稼穡止则成井里于广野动则成校队于六军省其暴繇赡其衣食易称悦以使民民忘其劳悦以犯难民忘其死今之谓矣粮畜于食勇畜于势虽坐曜烈威而众未动画外之蛮必复稽颡以求改往而效用矣若畏威效用不战而定则贤于交兵而后威立接刃而后功成速矣若奸凶不革遂迷不反犹欲以其所虐用之民待大魏投命报养之士然后徐以前歌后舞乐征之众临彼倒防折矢乐服之羣伐腐摧枯未足以为喻太祖乞追赠郭嘉户邑表【嘉疾笃太祖问疾者交错及薨临其丧哀甚谓荀攸等曰诸君年皆孤辈也惟奉孝最少天下事竟欲以后事属之而中年夭折命也夫乃表曰军祭酒郭嘉自从征伐十有一年每有大议临敌制变臣策未决嘉辄成之平定天下谋功为高不幸短命事业未终追思嘉勲实不可忘可增邑八百户并前千户】

臣闻褒忠宠贤未必当身念功惟绩恩隆后嗣是以楚宗孙叔显封厥子岑彭既没爵及支庶故军祭酒郭嘉忠良渊淑体通性达每有大议发言盈廷执中处理动无遗策自在军旅十有余年行同骑乘坐共幄席东禽吕布西取眭固斩袁谭之首平朔土之众逾越险塞荡定乌丸震威辽东以梟袁尚虽假天威易为指麾至于临敌发扬一命凶逆克殄勲实由嘉方将表扬短命早终上为朝廷悼惜良臣下自毒恨丧失奇佐宜追增嘉封并前千户褒亡为存厚往劝来也

又论田畴功表【田畴字子泰举茂才拜为蓟令不之官随军次无终方夏水雨而滨海湾下泞滞不通虏亦遮守蹊要车不得进太祖患之以问畴畴曰此道秋夏每常有水浅不通车马深不载舟船为难久矣旧北平郡治在平冈道出卢龙达于柳城自建武以来陷壤断绝垂二百载而尚有微径可从今虏将以大军当由无终不得进而退懈弛无备若嘿回军从卢龙口越白檀之险出空虚之地路近而便掩其不备蹋顿之首可不战而禽也太祖曰善乃引军还而署大木表于水侧路傍曰方今夏暑道路不通且俟秋冬乃复进军虏候骑见之诚以为大军去也太祖令畴将其众为乡导上徐无山出卢龙历平冈登白狼堆去柳城二百余里虏乃惊觉单于身自临阵太祖与交战遂大斩获追奔逐北至柳城军还入塞论功行封畴侯太祖表论畴功曰】

文雅优备忠武又着和于抚下慎于事上量时度理进退合义幽州始抗胡汉交萃荡析离居靡所依懷疇率宗人避难于无终山北拒卢龙南守要害清静隱约耕而后食人民化从咸共资奉及袁绍父子威力加于朔野遠结乌丸与为首尾前后召疇终不陷挠后臣奉命军次易县疇长驱自到陈讨胡之势犹广武之建燕策薛公之度淮南又使部曲持臣露布出诱胡众汉民或因亡来乌丸闻之震蕩王旅出塞涂由山中九百余里疇帅兵五百启导山谷遂灭乌丸荡平塞表疇文武有效节义可嘉诚应宠赏以旌其美【疇自以始为居难率众遁逃志义不立反以为利非本意也固让太祖知其至心许而不夺】

卫凯请置律博士奏【明帝时】

九章之律自古所传断定刑罪其意微妙百里长吏皆宜知律刑法者国家之所贵重而私议之所轻贱狱吏者百姓之所县命而选用者之所卑下王政之弊未必不由此也请置律博士转相教授事遂施行

刘廙论治道表

昔者周有乱臣十人有妇人焉九人而已孔子称才难不其然乎明贤者难得也况乱弊之后百姓凋尽士之存者盖亦无几股肱大职及州郡督司邊方重任虽备其官亦未得人也此非选者之不用意蓋才匱使之然耳况于长吏以下羣职小任能皆简练备得其人也其计莫如督之以法不尔而数转易往来不已送迎之烦不可胜计转易之间辄有奸巧既于其事不省而为政者亦以其不得久安之故知惠益不得成于已而苟且之可免于患皆将不念尽心于防民而梦想于声誉此非所以为政之本意也今之所以为黜陟者近颇以州郡之毀誉听往来之浮言耳亦皆得其事实而课其能否也长吏之所以为佳者奉法也忧公也防民也此三事者或州郡有所不便往来者有所不安而长吏执之不已于治虽得计其声誉未为美阙而从人于治虽失计其声誉必集也长吏皆知黜陟之在于此也亦何能不去本而就末哉以为长吏皆宜使小久足使自展歲课之能三年總计乃加黜陟课之皆当以事不得依名事者皆以户口率以垦田之多少及盜賊发兴民之亡叛者为得负之计如此行之则无能之吏脩名无益有能之人无名无损法之一行虽无部司之监奸誉妄毀可得而尽事上太祖甚善之

卢毓駁弃市奏【字子家崔琰举为冀州主簿时天下草创多逋逃故重士亡法罪及妻子亡士妻白等始适夫家三日未与夫相见大理奏弃市毓駁之曰】

夫女子之情以接见而恩生成妇而义重故诗云未见君子我心伤悲亦既见止我心则夷又礼未庙见之妇而死归葬女氏之党以未成妇也今白等生有未见之悲死有非妇之痛而吏议欲肆之大辟则若同牢合 之后罪何所加且记曰附从轻言附人之罪以轻者为比也又书云与其杀不辜宁失不经恐过重也苟以白等皆受聘礼已入门庭刑之为可杀之为重太祖曰毓执之是也又引经典有意使孤叹息

王昶陈治略五事【司马宣王既诛曹爽乃奏博问大臣得失昶陈治畧五事】

其一欲崇道笃学抑絶浮华使国子入太学而脩庠序其二欲用考试考试犹准绳也未有舍准绳而意正曲直废黜陟而空论能否也其三欲令居官者久于其职有治绩则就增位赐爵其四欲约官实禄励士廉耻不使与百姓争利其五欲絶侈靡务崇节俭令衣服有章上下有叙储谷蓄帛反民于朴【诏书褒赞】

三国志文类卷十

卷十一

钦定四库全书

三国志文类卷十一

表奏

蜀

羣臣上汉帝表【先主有汉中之地羣臣马超等上先主为汉中王表于汉帝曰】

昔唐尧至圣而四防在朝周成仁贤而四国作难高后称制而诸吕窃命孝昭幼冲而上官逆谋皆冯世宠借履国权穷防极乱社稷几危非大舜周公朱虚博陆则不能流放禽讨安危定倾伏惟陛下诞姿圣德统理万邦而遭厄运不造之艰董卓首难荡覆京畿曹操阶祸窃执天衡皇后太子鸩杀见害剥乱天下残毁民物从令陛下防尘忧厄幽处虚邑人神无主遏绝王命厌昧皇极欲盗神器左将军领司 校尉豫荆益三州牧宜城亭侯备受朝爵秩念在输力以殉国难覩其机兆赫然愤发与车骑将军董承同谋诛操将安国家克宁旧都防承机事不密令操游防得遂长恶残泯海内臣等每惧王室大有阎乐之祸小有安定之变夙夜惴惴战栗累息昔在虞书敦序九族周监二代封建同姓诗着其义歴载长从汉兴之初割裂疆土尊王子弟是以卒折诸吕之难而成太宗之基臣等以备肺腑枝叶宗子藩翰心存国家念在弭乱自操破于汉中海内英雄望风蚁附而爵号不显九锡未加非所以镇衛社稷光昭万世也奉辞在外礼命断绝昔河西太守梁统等值汉中兴限于山河位同权均不能相率咸推窦融以为元帅卒立效绩摧破隗嚣今社稷之难急于陇蜀操外吞天下内残羣寮朝廷有萧墙之危而御侮未建可为寒心臣等輒依旧典封备汉中王拜大司马董齐六军纠合同盟扫灭凶逆以汉中巴蜀广汉犍为为国所署置依汉初诸侯王典故夫权宜之制苟利社稷专之可也然后功成事立臣等退伏矫罪虽死无恨

先主上汉帝表

臣以具臣之才荷上将之任董督三军奉辞于外不能扫除寇难靖匡王室从使陛下圣教陵迟六合之内否而未泰惟忧反侧疚如疾首曩者董卓造为乱阶自是之后羣凶纵横残剥海内赖陛下圣德威灵人臣同应或忠义奋讨或上天降罚暴逆并殪以渐冰消惟独曹操从末梟除侵擅国权恣心极乱臣昔与车骑将军董承图谋讨操机事不密承见陷害臣播越失据忠义不果遂得使操穷凶极逆主后戮杀皇子鸩害虽纠合同盟念在奋力懦弱不武歴年未效常恐殒没孤负国恩寤寐永叹夕惕若厉今臣羣寮以为在昔虞书敦叙九族庶明厉翼五帝损益此道不废周监二代并建诸姬实赖晋郑夹辅之福高祖龙兴尊王子弟大啓九国卒斩诸吕以安太宗今操恶直丑正寔繁有徒包藏祸心篡盗已显既宗室防弱帝族无位斟酌

古式依假权宜上臣大司马汉中王臣伏自三省受国厚恩荷任一方陈力未效所获已过不宜复忝高位以重罪谤羣寮见逼迫臣以义臣退惟寇贼不梟国难未已宗庙倾危社稷将坠成臣忧责碎首之负若应权通变以寧靖圣朝虽赴水火所不得辞敢虑常宜以防后悔輒顺众议拜受印玺以崇国威仰惟爵号位高宠厚俯思报效忧深责重惊怖累息如临于谷尽力输诚獎厉六师率齐羣义应天顺时扑讨凶逆以寧社稷以报万分谨拜章因驿上还所假左将军宜城亭侯印绶

陈壽进诸葛氏集表

臣壽等言臣前在著作郎侍中领中书监济北侯臣荀勗中书令关内侯臣和峤奏使臣定故蜀丞相诸葛亮故事亮毗佐危国负阻不賔然犹存錄其言耻善有遗诚是大晋光明至德泽被无疆自古已来未之有伦也輒删除复重随类相从凡为二十四篇篇名如右亮少有逸羣之才英霸之器身长八尺容貌甚伟时人异焉遭汉末扰乱随叔父 避难荆州躬耕于野不求闻达时左将军刘备以亮有殊量乃三顾亮于草庐之中亮深谓备雄姿杰出遂解带寫诚厚相结纳及魏武帝南征荆州刘琮举州委质而备失势众寡无立锥之地亮时年二十七乃建奇防身使孙权求援吴防权既宿服仰备又覩亮奇雅甚敬重之即遣兵三万人以助备备得用与武帝交战大破其军乘胜克捷江南悉平后备又西取益州益州既定以亮为军师将军备称尊号拜亮为丞相錄尚书事及备殂没嗣子幼弱事无巨细亮皆专之于是外连东吴内平南越立法施度整理戎旅工械技巧物究其极科教严明赏罚必信无恶不惩无善不显至于吏不容奸人懷自厉道不拾遗强不侵弱风化肃然也当此之时亮之素志进欲龙骧虎视包括四海退欲跨陵边疆震荡宇内又自以为无身之日则未有能蹈涉中原抗衡上国者是以用兵不戢屡耀其武然亮才于治戎为长奇谋为短理民之干优于将畧而所与对敌或值人杰加众寡不侔攻守异体故虽连年动众未能有克昔萧何荐韩信管仲举王子城父皆付已之长未能兼有故也亮之器能政理抑亦管萧之亚匹也而时之名将无城父韩信故使功业陵迟大义不及邪盖天命有归不可以智力争也青龙二年春亮帅众出武功分兵屯田为久驻之基其秋病卒黎庶追思以为口实至今梁益之民咨述亮者言犹在耳虽甘棠之咏召公郑人之歌子产无以逮譬也孟轲有云以逸道使民虽劳不怨以生道杀人虽死不忿信矣论者或怪亮文采不艳而过于丁寧周至臣愚以为咎繇大贤也周公圣人也考之尚书咎繇之謦略而雅周公之诰烦而悉何则咎繇与舜禹共譚周公与羣下矢誓故也亮所与言尽众人凡士故其文指不得及逮也然其声教遗言皆经事综物公诚之心形于文墨足以知其人之意理而有补于当世伏惟陛下迈踪古圣荡然无忌故虽敌国诽谤之言咸肆其辞而无所革讳所以明大通之道也谨錄写上诣著作

诸葛亮废李平表【李严后改名平亮出军命平以中都防署府事亮军祁山平催督运事夏秋之际值天霖雨运粮不继平遣参军狐忠喻防呼亮来还亮承以退军平闻军退乃阳惊說军粮饶足何以便归欲以解已不办之责显亮不进之愆也又表后主說军伪退欲以诱贼与战亮具出前后手笔书疏本末平违错章灼平辞穷情竭首谢罪负于是亮表平乃废平为民】

自先帝崩后平所在治家尚为小惠安身求名无忧国之事臣当北出欲得平兵以镇汉中平穷难纵横无有来意而求以五郡为巴州刺史去年臣欲西征欲令平主督汉中平說司马懿等开府辟召臣知平鄙情欲因行之际偏臣取利也是以表平子丰督主江州隆崇其遇以取一时之务平至之日都委诸事羣臣上下皆怪臣待平之厚也正以大事未定汉室倾危伐平之短莫若褒之然谓平情在于荣利而已不意平心颠倒乃尔若事稽留将至祸败是臣不敏言多增咎

习隆乞立诸葛亮庙表【亮初亡所在各求为立庙朝议以礼秩不听百姓遂因时节私祭之于道陌上言事者或以为可听立庙于成都者后主不从步兵校尉习隆中书郎尚充等共上表曰】

臣闻周人懷召伯之德甘棠为之不伐越王思范蠡之功铸金以存其像自汉兴已来小善小德而图形立庙者多矣况亮德范遐迹勲盖季世兴王室之不壞实斯人是赖而蒸尝止于私门庙像阙而莫立使百姓巷祭戎夷野祀非所以存德念功述追在昔者也今若尽顺民心则渎而无典建之京师又偏宗庙此圣懷所以为疑也臣愚以为宜因近其墓立之于沔阳使所亲属以时赐祭凡其臣故吏欲奉祠者皆限至庙断其私祀以崇正礼于是始从之

孟达辞先主表

伏惟殿下将建伊吕之业追桓文之功大事草创假势吴楚是以有为之士深覩归趣臣委质已来愆戾山积臣犹自知况于君乎今王朝以兴英俊鳞集臣内无辅佐之器外无将领之才列次功臣诚自愧也臣闻范蠡识防浮于五湖咎犯谢罪逡巡于河上夫际防之间请命乞身何则欲絜去就之分也况臣卑鄙无元功巨勲自系于时窃慕前贤早思远耻昔申生至孝见疑于亲子胥至忠见诛于君蒙恬拓境而被大刑乐毅破齐而遭谗佞臣每读其书未尝不慷慨流涕而亲当其事益以伤絶何者荆州覆败大臣失节百无一还惟臣寻事自致房陵上庸而复乞身自放于外伏想殿下圣恩感悟愍臣之心悼臣之举臣诚小人不能始终知而为之敢谓非罪臣每闻交絶无恶声去臣无怨辞臣过奉教于君子愿君王勉之也

三国志文类卷十一

卷十二

钦定四库全书

三国志文类卷十二

表奏

吴

魏三公陈孙权罪恶请免官削土奏

臣闻枝大者披心尾大者不掉有国有家之所慎也昔汉承秦弊天下新定大国之王臣节未尽以萧张之谋不备録之至使六王前后反叛已而伐之戎车不辍又文景守成忘战戢役骄纵吴楚养虺成蛇既为社稷大忧盖前事之不忘后事之师也吴王孙权幼竖小子无尺寸之功遭遇兵乱因父兄之绪少防翼卵育伏之恩长含鸱梟反逆之性背弃天施罪恶积大复与关羽更相觊伺逐利见便挟为卑辞先帝知权奸以求用时以于禁败于水灾等当讨羽因以委权先帝委裘下席权不尽心诚在惻怛欲因大丧寡弱王室希托董桃传先帝令乘未得报许擅取襄阳及见驱逐乃更折节邪辟之态巧言如流虽重驿累使发遣禁等内包隗嚣顾望之奸外欲缓诛支仰蜀贼圣朝含 既加不忍优而赦之与之更始猥乃割地王之使南面称孤兼官累位礼备九命名马百驷以成其势光宠显赫古今无二权为犬羊之姿横被虎豹之文不思尽力致死之节以报无量不世之恩臣每见所下权前后表章又以愚意采察权防自以阻带江湖负固不服狙挟累世诈伪成功上有尉佗英布之计下诵伍被屈彊之辞终非不侵不叛之臣以为晁错不发削弱王侯之谋则七国同衡祸从大蒯通不决袭歴下之防则田横自虑罪深变重臣谨考之周礼九伐之法平权凶恶逆节萌生见罪十五昔九黎乱德黄帝加诛项羽罪十汉祖不舍权所犯罪衅明白非仁恩所养宇宙所容臣请免权官鸿胪削爵土捕治罪敢有不从移兵进讨以明国典好恶之常以静三州元元之苦其十五条文多不载

虞翻上易注二奏

臣闻六经之始莫大陰阳是以伏羲仰天县象而建八卦观变动六爻为六十四以通神明以类万物臣高祖父故零陵太守光少治孟氏易曾祖父故平舆令成續述其业至臣祖父鳳为之最密臣亡考故日南太守歆受本于鳳最有旧书世传其业至臣五世前人通讲多玩章句虽有秘説于经疏阔臣生遇世乱长于军旅习经于枹鼓之间讲论于戎马之上防先师之説依经立注又臣郡吏陈桃梦臣与道士相遇放髮被鹿裘布易六爻挠其三以饮臣臣乞尽吞之道士言易道在天三爻足矣岂臣受命应当知经所览诸家解不离流俗义有不当实辄悉改定以就其正孔子曰乾元用九而天下治圣人南面盖取诸离斯诚天子所宜協陰阳致麟鳳之道矣谨正书副上惟不罪戾

又奏

经之大者莫过于易自汉初以来海内英才其读易者解之率少至孝灵之际颍川荀诩号为知易臣得其注有愈俗儒至所說西南得朋东北丧朋颠倒反逆了不可知孔子叹易曰知变化之道者其知神之所为乎以美大衍四象之作而上为章首尤可怪笑又南郡太守马融名有俊才其所解释复不及诩孔子曰可与共学未可与适道岂不其然若乃北海郑 南阳宋忠虽各立注忠小差 而皆未得其门难以示世

又上书注奏

郑 解尚书违失事因臣闻周公制礼以辩上下孔子曰有君臣然后有上下有上下然后礼义有所错是故尊君卑臣礼之大同也伏见故征士北海郑 所注尚书以顾命康王执瑁古月似同从误作同既不觉定复训为杯谓之酒杯成王疾困憑几洮颡为濯以为澣衣成事洮字虚更作濯以成其非又古大篆卯字读当为柳古柳卯同字而以为昧分北三苗北古别字又训北言北犹别也若此之类诚可怪也玉人职曰天子执瑁以朝诸侯谓之酒杯天子颡面谓之澣衣古篆卯字反以为昧甚违不知盖阙之义于此数事误莫大焉宜命学官定此三事又马融训注亦以为同者大同天下今经益金就作铜字诂训言天子副玺虽皆不得犹愈于然此不定臣没之后而奋乎百世虽世有知者懷谦莫或奏正又 所注五经违义尤甚者百六十七事不可不正行乎学校传乎将来臣窃耻之翻放弃南方去自恨疏节骨体不媚犯上获罪当长没海隅生无可与语死以青蝇为吊客使天下一人知己者足以不恨以典籍自慰依易设象以占吉防又以宋氏解 颇有缪错更为立法并着明扬释宋以理其滞

张温使蜀拜章【字惠恕时使蜀权谓温曰卿不宜遠出恐诸葛孔明不知吾所以与曹氏通意以故屈卿行若出越都除便欲大搆于蜀行人之义受命不受辞也温对曰臣入无腹心之规出无专对之用惧无张老延誉之功又无子产陈事之效然诸葛亮達见计数必知神虑屈伸之宜加受朝廷天覆之惠推亮之心必无疑貳温至蜀诣阙拜章曰】

昔高宗以谅闇昌殷祚于再兴成王以幼冲隆周德于太平功冒溥天声贯罔极今陛下以聪明之姿等契往古总百揆于良佐参列精之炳耀遐迩望风莫不欣赖吴国勤任旅力清澄江浒愿与有道平一字内委心協规有如河水军事兴烦使役乏少是以忍鄙倍之羞使下臣温通致情好陛下敦崇礼义未便耻忽臣自入遠境及即近郊频防劳来恩诏辄加以荣自惧悚怛若惊谨奉所赍函书一封

骆统理张温表

伏惟殿下天生明德神啓圣心招髦秀于四方置俊乂于宫庙多士既受普笃之恩张温又防最隆之施而温自招罪譴孤负荣遇念其如此诚可悲疚然臣周旋之间为国观听深知其状故密陈其理温实心无他情事无逆迹但年纪尚少镇重尚浅而戴赫烈之宠体卓伟之才亢臧否之谈效褒贬之议于是务势者妬其宠争名者嫉其才 默者非其譚瑕衅者讳其议此

臣下所当详辩明朝所当究察也昔贾谊至忠之臣也汉文大明之君也然而绛灌一言贾谊
逖退何者疾之者深譖之者巧也然而误闻于天下失彰于后世故孔子曰为君难为臣不易
也温虽智非纵横武非虓虎然其 雅之素英秀之德文章之采论议之辨卓跖冠羣炜 曜
世世人未有及之者也故论温才即可惜言罪则可恕若忍威烈以赦盛德宥贤才以敦大业
固明朝之休光四方之丽观也国家之于暨艳不内之忌族犹等之平民是故先见用于朱治
次见举于众人中见任于明朝亦见交于温也君臣之义义之最重朋友之交交之最轻者也
国家不嫌于艳为最重之义是以温亦不嫌与艳为最轻之交也时世宠之于上温窃亲之于
下也夫宿恶之民放逸山险则为劲寇将置平土则为健兵故温念在欲取宿恶以除劲寇之
害而增健兵之锐也但自错落功不副言然计其送兵以比许晏数之多少温不减之用之彊
羸温不下之至于迟速温不后之故得及秋冬之月赴有警之期不敢忘恩而遗力也温之到
蜀共誉殷礼虽臣无境外之交亦有可原也境外之交谓无君命而私相从非国事而陰相闻
者也若以命行既修君好因叙已情亦使臣之道也故孔子使邻国则有私觐之礼季子聘诸
夏亦有燕谭之义也古人有言欲知其君观其所使见其下之明明知其上之赫赫温若誉礼
能使彼叹之诚所以昭我臣之多良明使之得其人显国美于异境扬君命于他邦是以晋赵
文子之盟于宋也称随防于屈建楚王孙圜之使于晋也誉左史于赵鞅亦向他国之辅而叹
本邦之臣经传美之以光国而不讥之以外交也王靖内不忧时外不趋事温弹之不私推之
不假于是与靖遂为大怨此其尽节之明驗也靖兵众之势干任之用皆胜于贾原蒋康温尚
不容私以安于靖岂敢卖恩以協原康邪又原在职不勤当事不堪温数对以丑色弹以急声
若其诚欲卖恩作乱则亦不必贪原也凡此数者校之于事既不合参之于众亦不驗臣窃念
人君虽有圣哲之姿非常之智然以一人之身御兆民之众从层宫之内瞰四国之外照羣下
之情求万机之理犹未易周也固当听察羣下之言以广聪明之烈今者人非温既愍勲臣是
温又契濶辞则俱巧意则俱至各自言欲为国谁其言欲为私仓卒之间犹难即别然以殿下
之聰叡察讲论之曲直若潜神留思纖粗研核情何嫌而不宣事何昧而不昭哉温非亲臣臣
非爱温者也昔之君子皆抑私忿以增君明彼独行之于前臣耻废之于后故遂发宿懷于今
日纳愚言于圣听实尽心于明朝非有念于温身也权终不纳

周魴诱曹休密表

方北有逋寇固阻河洛从稽王诛自擅朔土臣曾不能吐奇举善上以光賛洪化下以输展万
一忧心如搗假寐忘寝圣朝天覆含臣无效猥发优命敕臣以前诱致贼休恨不如计令于郡
界求山谷魁帅为北贼所闻知者令与北通臣伏思惟喜怖交集窃恐此人不可卒得假使得
之惧不可信不如令臣诱休于计为便此臣得以经年之冀愿逢值千载之一防辄自督竭竭
尽顽蔽撰立牋草以诳诱休者如别纸臣知无古人单复之术加卒奉大略佞蒙狼狽惧以轻
愚忝负特施豫懷忧灼臣闻唐尧先天而天弗违博询刍蕘以成盛勲朝廷神谟欲必致休于
步度之中灵賛圣规休必自送使六军囊括虏无子遗威风电迈天下幸甚谨拜表以闻并呈
牋草惧于浅局追用悚息【被报施行休果信魴帅步骑十万輜重满道径来入皖】陆凯切
諫孙皓将亡表【孙皓所行弥暴凯知其将亡上表云】

臣闻恶不可积过不可长积恶长过丧乱之源也是以古人惧不闻非故设进善之旌立敢諫

之鼓武公九十思闻警戒诗美其德士悦其行臣察陛下无思警戒之义而有积恶之渐臣深忧之此祸兆见矣故略陈其要寫尽愚懷陛下宜克己复礼述修前德不可捐弃臣言而放奢意意奢情至吏日欺民民离则上不信下下常疑上骨肉相克公子相奔臣虽愚闇于天命以心审之败不过二十稔也臣常忿亡国之人夏桀殷纣亦不可使后人复忿陛下也臣受国恩奉朝三世复以余年值遇陛下不能循俗与众沉浮若比干伍员以忠见戮以正见疑自谓毕足无所余恨灰身泉壤无负先帝愿陛下九思社稷存焉

华覈荐陆 表

天姿聪朗才通行洁昔歷选曹遗迹可纪还在交州奉宣朝恩流民归附海隅肃清苍梧南海歲有旧风障气之害风则折木飞砂转石气则雾鬱飞鸟不经自 至州风气絕息商旅平行民无疾疫田稼丰稔州治临海海流秋咸 又畜水民得甘食惠风横被化感人神遂憑天威招合遗散至被诏书当出民感其恩以忘恋土负老携幼甘心景从众无携贰不烦兵卫自诸将合众皆胁之以威未有如 结以恩信者也衔命在州十有余年賔带殊俗寶玩所生而内无粉黛附珠之妾家无文甲犀象之珍方之今臣实难多得宜在輶轂股肱王室以贊唐虞康哉之颂江边任轻不尽其才虎林选督堪之者众若召还都宠以上司则天工毕修庶绩咸熙矣

华覈上魏并蜀表【时蜀为魏所并覈诣宫门发表】

间闻贼众蚁聚向西境西境艰险谓当无虞定闻陆抗表至成都不守臣主播越社稷倾覆昔卫为翟所灭而桓公存之今道里长遠不可救振失委附之土弃贡献之国臣以草芥窃懷不寧陛下圣仁恩泽遠抚卒闻如此必垂哀悼臣不胜忉忉之情谨拜表以闻

三国志文类卷十二

卷十三

钦定四库全书

三国志文类卷十三

书疏

魏

太祖谢九锡书

臣防先帝厚恩致位郎署受性疲殆意望毕足非敢希望高位庶几显达防董卓作乱义当死难故敢奋身出命摧锋率众遂值千载之运奉役目下当二袁炎沸侵侮之际陛下与臣寒心同忧顾瞻京师进受猛敌常恐君臣俱陷虎口臣不自意能全首领赖祖宗灵佑丑类夷灭得使防臣窃名其间陛下加恩授以上相封爵宠禄丰大 厚生平之愿实不望也口与心计幸且待罪保持列侯遗付子孙自托圣世永无忧责不意陛下乃发盛意开国备锡以赐愚臣地比齐鲁礼同藩王非臣无功所宜膺据归情上闻不防听许严诏切至诚使臣心俯仰逼迫伏自惟省列在大臣命制王室身非已有岂敢自私遂其愚意亦将黜退令就初服今奉疆土备数藩翰非敢遽期虑有后世至于父子相誓终身灰躯尽命报塞厚恩天威在颜悚惧受诏

陶谦上太祖未可罢兵书【时曹公父于泰山被杀归咎于谦欲伐谦而畏其强乃表令州郡一时罢兵谦被诏乃上书】

臣闻懷遠柔服非德不集克难平乱非兵不济是以涿鹿坂泉三苗之野有五帝之师有扈鬼方商奄四国有王者之伐自古在昔未有不扬威以弭乱震武以止暴者也臣前初以黄巾乱治受防长驱匪遑启处虽宪章勅戒奉宣威灵敬行天诛每伐辄克然妖寇类众殊不畏死父兄殲殪子弟羣起治屯连兵至今为患若承命解甲弱国自虚释武备以资乱损官威以益寇今日兵罢明日难必至上忝朝廷宠授之本下令羣凶日月滋蔓非所以彊榦弱枝遏恶止乱之务也臣虽愚蔽忠恕不昭抱恩念报所不忍行辄勒部曲申令警备出芟彊寇惟力是视入宣德泽躬奉职事冀効防劳以赎罪负又曰华夏沸扰于今未弭包茅不入职贡多阙寤寐忧叹无日敢寧诚思贡献必至荐羞获通然后销锋解甲臣之愿也臣前调谷百万斛已在水次辄勅兵卫送霍性諫南征疏【魏王将出征度支中郎将新平霍性上疏諫】

臣闻文王与纣之事是时天下括囊无咎凡百君子莫肯用讯今大王体则乾坤广开四聪使贤愚各建所规伏惟先王功无与伦而今能言之类不称为德故圣人曰得百姓之欢心兵书曰战危事也是以六国力战彊秦承弊幽王不争周道用兴愚谓大王且当委重本朝而守其雌抗威虎卧功业可成而今剗基便复起兵兵者凶器必有凶扰扰则思乱乱出不意臣谓此

危危于累卵昔夏启隱神三年易有不遠而复论有不憚改誠愿大王揆古察今深謀遠慮与三事大夫算其长短臣沐浴先王之遇又初改政复受重任虽知言触龙鳞阿諛近福切感所誦危而不持

傅干言征孙权疏

治天下之大具有二文与武也用武则先威用文则先德威德足以相济而后王道备矣往者天下大乱上下失序明公用武攘之十平其九今未承王命者吴与蜀也吴有长江之险蜀有崇山之阻难以威服易以德懷愚以为可且按甲寝兵息军养士分土定封论功行赏若此则内外之心固有功者劝而天下制定矣然后渐兴学校以导其善性而长其义节公神武震于四海若修文以济之则普天之下无思不服矣今举十万之众顿之长江之濱若贼负固深藏则士马不得逞其能奇变无所用其权则大威有屈而敌心未能服矣唯公明思虞舜舞干戚之义全威养德以道制胜公不从军遂无功

张茂上錄夺士女书【茂以吴蜀数动诸将出征而帝盛兴宫室留意于玩饰赐与无度帑藏空竭又錄夺士女前已嫁为吏民妻者还以配士既听以生口自赎又简选其有姿色者内之掖庭乃上书諫】

臣伏见诏书诸士女嫁非士者一切錄夺以配战士斯誠权时之宜然非大化之善者也臣请论之陛下天子之子也百姓吏民亦陛下之子也礼賜君子小人不同日所以殊貴賤也吏属君子士为小人今夺彼与此无以异于夺兄之妻妻弟也于父母之恩偏矣又诏书听得以生口年纪顏色与妻相当者自代故富者则倾家尽产贫者举假贷贯贵买生口以赎其妻县官以配士为名而实内之掖庭其丑恶者乃出与士得妇者未必有懽心而失妻者必有忧色或穷或愁皆不得志夫君有天下而不得万姓之欢心者豈不危殆且军师在外数千万人一日之费非徒千金举天下之賦以奉此役犹将不给况复有宫庭非員无錄之女椒房母后之家赏賜橫兴内外交引其费半军昔汉武帝好神仙信方士掘地为海封土为山赖是时天下为一莫敢与爭者耳自衰乱以来四五十载马不舍鞍士不释甲每一交战血流丹野创痍号痛之声于今未已犹彊寇在疆图危魏室陛下不兢兢业业念崇节约思所以安天下者而乃奢靡是务中尚方纯作玩弄之物炫燿后园建承露之盘斯誠快耳目之观然亦足以骋寇讐之心矣惜乎舍尧舜之节俭而为汉武之侈事臣窃为陛下不取也愿陛下沛然下诏万机之事有无益而有损者悉除去之以所除无益之费厚賜将士父母妻子之饥寒者问民所疾而除其所恶实仓廩繕甲兵恪恭以临天下如是吴贼面缚蜀虏輿櫓不待诛而自服太平之路可计日而待也陛下可无劳神思于海表军师高枕战士备員今羣公皆结舌而臣所以不敢不献瞽言者臣昔上要言散骑奏臣书以听諫篇为善诏曰是也擢臣为太子舍人且臣作书讥为人臣不能諫诤今有可諫之事而臣不諫此为作书虚妄而不能言也臣年五十常恐至死无以报国是以投軀没命冒昧以闻惟陛下载察董寻上移露盘书【明帝徙长安诸钟簴骆驼铜人承露盘盘折铜人重不可致留于霸城大发铜铸作铜人二号曰翁仲列坐于司马门外又铸黄龙凤凰各二龙高四丈凤高三丈余置内殿前起土山于芳林园西北陬使公卿羣寮皆负土成山树竹杂木善草于其上捕山禽杂兽置其中初帝徙盘盘折声闻数十里金狄或

泣因留于霸城寻上书谏曰】

臣闻古之直士尽言于国不避死亡故周昌比高祖于桀纣刘辅譬赵后于人婢天生忠直虽白刃沸汤往而不顾者诚为时主爱惜天下也建安以来野战死亡或门殚户尽虽有存者遗孤老弱若今宫室狭小当广大之犹宜随时不妨农务况乃作无益之物黄龙凤凰九龙承露盘土山渊池此皆圣明之所不兴也其功参倍于殿舍三公九卿侍中尚书天下至德皆知非道而不敢言者以陛下春秋方刚心畏雷霆今陛下既尊羣臣显以冠冕被以文绣载以华舆所以异于小人而使穿方举土面目垢黑沾体涂足衣冠了鸟毁国之光以崇无益甚非谓也孔子曰君使臣以礼臣事君以忠无忠无礼国何以立故夫君不君臣不臣上下不通心懷鬱结使陰阳不和灾害屡降凶恶之徒因间而起谁当为陛下尽言是者乎又谁当千万乘以死为戏乎臣知言出必死而臣自比于牛之一毛生既无益死亦何损秉笔流涕心与世辞臣有八子臣死之后累陛下矣将奏沐浴既通帝曰董寻不畏死邪主者奏收寻有诏勿问后为贝丘令清省得民心

刘桢荅文帝书【文帝尝赐桢廓落带其后师死欲借取以为像因书嘲桢云夫物因人为贵故在贱者之手不御至尊之侧今虽取之勿嫌其不反也桢荅书曰】

桢闻荆山之璞曜元后之寶随侯之珠烛众士之好南垠之金登窈窕之首鼯貂之尾缀侍从之帟此四寶者伏朽石之下潜污泥之中而扬光千载之上发彩畴昔之外亦皆未能初自接于至尊也夫尊者所服卑者所修也贵者所御贱者所先也故夏屋初成而大匠先立其下嘉禾始熟而农夫先尝其粒恨桢所带无他妙饰若实殊异尚可纳也

刘廙荅文帝书【文帝命廙通草书廙荅书曰】

初以尊卑有逾礼之常分也是以贪守区区之节不敢修草必如严命诚知劳谦之素不贵殊异若彼之高而惇白屋如斯之好苟使郭隗不轻于燕九九不忽于齐乐毅自至霸业以隆亏匹夫之节成巍巍之美虽愚不敏何敢以辞

三国志文类卷十三

卷十四

钦定四库全书

三国志文类卷十四

书疏

魏

管寧辞爵书【字幼安时以寧为太中大夫寧上书以疾辞不受】

臣闻傳說发梦以感殷宗吕尚啓兆以动周文以通神之才悟于圣主用能匡佐帝业克成大勲臣之器朽实非其人虽贪清时释体蝉蜕内省顽病日薄西山唯陛下听野人山藪之愿使一老者得尽防命

管寧答礼遣疏

臣海濱孤防罢农无伍禄运幸厚横防陛下纂承洪绪德侔三皇化溢有唐从荷渥泽积祀一纪不能仰荅陛下恩养之福沈委笃痾寝疾弥留逋违臣 颠倒之节夙宵战怖无地自厝臣元年十一月被公车司马令所下州郡八月甲申诏书征臣更赐安车衣被茵蓐以礼发遣光宠并臻优命屡至怔营悚息悼心失图思自陈闻申展愚情而明诏抑割不令稍修章表是以鬱滯迄于今日诚谓干覆恩有纪极不意灵润弥以隆赫奉今年二月被州郡所下三年十二月辛酉诏书重赐安车衣服别驾从事与郡功曹以礼发遣又特被玺书以臣为光禄勲躬秉劳谦引喻周秦损上益下受诏之日精魄飞散靡所投死臣重自省揆德非园绮而防安车之荣功无窦融而防玺封之宠竊税驾下荷栋梁之任垂没之命获九棘之位惧有朱博鼓妖之眚又年疾日侵有加无损不任扶輿进路以塞元责望慕闔閭徘徊阙庭谨拜章陈情乞防哀省抑恩听放无令骸骨填于衢路

崔琰谏猎书【字季珪傳文帝于邺世子仍出猎变易服乘志在驱逐琰上书諫】

盖闻盘于游田书之所戒鲁隱观渔春秋讥之此周孔之格言二经之明义殷鉴夏后诗称不遠子卯不乐礼以为忌此又近者之得失不可不深察也袁族富强公子寬放盘游滋侈义声不闻哲人君子俄有色斯之志熊羆壮士墮于吞噬之用故所以拥徒百万跨有河朔无所容足也今邦国殄瘁惠康未洽士女企踵所思者德况公亲御戎马上下劳惨世子宜遵大路慎以行正思经国之高略内鉴近戒外扬遠节深惟储副以身为寶而猥袭虞旅之贱服忽驰鹜而陵险志雉兔之小娱忘社稷之为重斯诚有识所以惻心也唯世子燔翳捐褶以塞众望不令老臣获罪于天

世子报曰

昨奉嘉命惠示雅疏欲使燔翳捐褶翳已壞矣褶亦去焉后有此比蒙福海诸

鲍勋谏猎疏【字叔业文帝将出游猎勋停车上疏】

臣闻五帝三王靡不明本立教以孝治天下陛下仁圣惻隱有同古烈臣冀当继踪前代令万世可则也如何在谅闇之中修驰骋之事乎臣冒死以闻唯陛下察焉帝手毁其表而竟行猎中道顿息问侍臣曰猎之为乐何如八音也侍中刘晔对曰猎胜于乐勋抗辞曰夫乐上通神明下和人理隆治致化万邦咸乂故移风易俗莫善于乐况猎暴华盖于原野伤生育之至理栲风沐雨不以时隙哉昔鲁隱观渔于棠春秋讥之虽陛下以为务愚臣所不愿也因奏刘晔佞諛不忠阿顺陛下过戏之言昔梁丘据取媚于湣台晔之谓也请有司议罪以清皇朝帝怒作色罢还即出勋为右中郎将

钟繇复肉刑疏

大魏受命继踪虞夏孝文革法不合古道先帝圣德固天所纵坟典之业一以贯之是以继世仍发明诏思复古刑为一代法连有军事遂未施行陛下逮追二祖遗意借斩趾可以禁恶惜入死之无辜使明习律令与羣臣共议出本当右趾而入大辟者复行此刑书云皇帝清问下民鰥寡有辞于苗此言尧当除蚩尤有苗之刑先审问于下民之有辞者也若今蔽狱之时讯问三槐九棘羣吏万民使如孝景之令其弃市欲斩右趾者许之其黥劓左趾宫刑者自如孝文易髡答能有奸者率年二十至四五十虽斩其足犹任生育今天下人少于孝文之世下计所全歲三千人张仓除肉刑所杀歲以万计臣欲复肉刑歲生三千人子贡问能济民可谓仁乎孔子曰何事于仁必也圣乎尧舜其犹病诸又曰仁遠乎哉我欲仁斯仁至矣若诚行之斯民永济

华歆征蜀疏【太和中遣曹真从子午道伐蜀车驾东幸许昌歆上此疏】

兵乱以来过逾二纪大魏承天受命陛下以圣德当成康之隆宜一代之治绍三王之迹虽有二贼负险延命苟圣化日跻遠人懷德将襁负而至夫兵不得已而用之故戢而时动臣诚愿陛下先留心于治道以征伐为后事且千里运粮非用兵之利越险深入无独克之功如闻今年征役颇失农桑之业为国者以民为基民以衣食为本使中国无饥寒之患百姓无离土之心则天下幸甚二贼之衅可坐而待也臣备位宰相老病日笃犬马之命将尽恐不复奉望銮盖不敢不竭臣子之懷惟陛下裁察帝报曰君深虑国计朕甚嘉之贼憑恃山川二祖劳于前世犹不克平朕岂敢自多谓必灭之哉诸将以为不一探取无由自弊是以观兵以闚其衅若天时未至周武还师乃前事之鉴朕敬不忘所戒时秋大雨诏真引军还

王朗谏猎疏【时帝频出游猎或昏夜还宫朗上疏谏】

夫帝王之居外则饰周卫内则重禁门将行则设兵而后出幄称警而后践墀张弧而后登輿清道而后奉引遮列而后转轂静室而后息驾皆所以显至尊务戒慎垂法教也近日车驾出临捕虎日昃而行及昏而反违警蹕之常法非万乘之至慎也帝报曰览表虽魏绛称虞箴以讽晋悼相如陈猛兽以戒汉武未足以喻方今二寇未殄将帅远征故时入原野以习戎备至于夜还之戒已诏有司施行

又谏东征疏【时大兴屯田欲举军东征朗上此疏谏】

昔南越守善婴齐入侍遂为冢嗣还君其国康居骄黠情不副辞都护奏议以为宜遣侍子以黜无礼且吴淞之祸萌于子入隗嚣之叛亦不顾子往者闻权有遣子之言而未至今六军戒严臣恐輿人未畅圣防当谓国家愠于登之逋留是以为之兴师设师行而登乃至则为所动者至大所致者至细犹未足以为庆设其傲很殊无入志惧彼輿论之未畅者并懷伊邕臣愚以为宜敕别征诸将各明奉禁令以慎守所部外曜烈威内广耕稼使泊然若山澹然若渊势不可动计不可测是时帝以成军遂行权子不至车驾临江而还

又言修营宫室疏【明帝即位朗见百姓或有不足是时方营宫室朗遂上疏谏曰】

陛下即位已来恩诏屡布百姓万民莫不欣欣臣顷奉使北行往返道路闻众徭役其可得蠲除省减者甚多愿陛下重留日昃之听以计制寇昔大禹将欲拯天下之大患故乃先卑其宫室俭其衣食用能尽有九州弼成五服句践欲广其御儿之疆馘夫差于姑苏故亦约其身以及家俭其家以施国用能囊括五湖席卷三江取威中国定霸华夏汉之文景亦欲恢祖业增崇洪绪故能割意于百金之台昭俭于弋绋之服内减太官而不受贡献外省徭赋而务农桑用能号称升平几致刑错孝武之所以能奋其军势拓其外境诚因祖考畜积素足故能遂成大功霍去病中才之将犹以匈奴未灭不治第宅明防远者略近事外者简内自汉之初及其中兴皆于金革略寢之后然后鳳阙猥闓德阳并起今当建始之前足用列朝防崇华之后足用序内官华林天渊足用展游宴若且先成闾阖之象魏使足用列远人之朝贡者修城池使足用絶逾越成国险其余一切且须丰年一以勤耕农为务习戎备为事则国无怨旷户口滋息民充兵彊而寇戎不賔缉熙不作未之有也

又言屡失皇子疏【时屡失皇子而后宫就馆者少朗上疏曰】

昔周文十五而有武王遂享十子之祚以广诸姬之武王既老而生成王成王是以鲜于兄弟此二王者各树圣德无以相过比其孙子之祚则不相如盖生育有早晚所产有众寡也陛下既德祚兼彼二圣春秋高于姬文育武之时矣而子发未举于椒兰之奥房藩王未繁于掖庭之众室以成王为喻虽未为晚取譬伯邑则不为夙周礼六宫内官百二十人而诸经常說咸以十二为限至于秦汉之末或以千为数矣然虽弥猥而就时于吉馆者或甚鲜明百斯男之本诚在于一意不但在于务广也老臣悽悽愿国家同祚于轩辕之五五而未及周文之二五用为伊邕且少小常苦被褥泰温泰温则不能便柔肤弱体是以难可防护而易用感慨若常令少小之緼袍不至于甚厚则必咸保金石之性而比壽于南山矣帝报曰夫忠至者辞笃

爱重者言深君既劳思虑又手笔将顺三复德音欣然无量朕继嗣未立以为君忧钦纳至言
思闻良规

三国志文类卷十四

卷十五

钦定四库全书

三国志文类卷十五

书疏

魏

王肃谏征蜀疏【字子雍时大司马曹真征蜀肃上疏】

前志有之千里馈粮士有饥色樵苏后爨师不宿饱此谓平涂之行军者也又况于深入阻险凿路而前则其为劳必相百也今又加之以霖雨山坂峻滑众逼而不展粮县而难继实行军者之大忌也闻曹真发已逾月而行裁半谷治道功夫战士悉作是贼偏得以逸而待劳乃兵家之所惮也言之前代则武王伐纣出关而复还论之近事则武文征权临江而不济岂非所谓顺天知时通于权变者哉兆民知圣上以水雨艰剧之故休而息之后日有衅乘而用之则所谓悦以犯难民忘其死者矣于是遂罢

王肃陈政本疏

除无事之位损不急之禄止浮食之费拜从容之官使官必有职职任其事必受禄禄代其耕乃往古之常式当今之所宜也官寡而禄厚则公家之费鲜进仕之志劝进仕之志劝各展才力莫相倚仗敷奏以言明试以功能之与否则简在帝心是以唐虞之设官分职申命公卿各以其事然后惟龙为纳言犹今尚书也以出内帝命而已夏殷不可得而详甘誓曰六事之人明六卿亦典事者也周官则备矣五日视朝公卿大夫并进而司士辨其位焉其记曰坐而论道谓之王公作而行之谓之士大夫及汉之初拟前代公卿皆亲以事升朝故高祖躬追反走之周昌武帝遥可奉奏之汲黯宣帝使公卿五日一朝成帝始置尚书五人自是陵迟朝礼遂阙可复五日视朝之仪使公卿尚书各以事进废礼复兴光宣圣绪诚所谓名美而实厚者也

王肃谏修营宫室疏

大魏承百王之极生民无几干戈未戢诚宜息民而惠之以安静遐迩之时也夫务畜积而息疲民在于省徭役而勤稼穡今宫室未就功业未讫运漕调发转相供奉是以丁夫疲于力作农者离其南畝种谷者寡食谷者众旧谷既没新谷莫继斯则有国之大患而非备豫之长防也今见作者三四万人九龙可以安圣体其内足以列六宫显阳之殿又向将毕惟泰极已前功夫尚大方向盛寒疾疢或作诚愿陛下发德音下明诏深愍役夫之疲劳厚矜兆民之不赡取常食廩之士非急要者之用选其丁壮择留万人使一期而更之咸知息代有日则莫不悦

以即事劳而不怨矣计一歲有三百六十万夫亦不为少当一歲成者听且三年分遣其余使皆即农无穷之计也仓有溢粟民有余力以此兴功何功不立以此行化何化不成夫信之于民国家大寶也仲尼曰自古皆有死民非信不立夫区区之晋国防防之重耳欲用其民先示以信是故原虽将降顾信而归用能一战而霸于今见称前车驾当幸洛阳发民为营有司命以营成而罢既成而又利其功力不以时遣有司徒营其目前之利不顾经国之体臣愚以为自今已后倘复使民宜明其令使必如期若有事以次寧复更发无或失信凡陛下临时之所行刑皆有罪之吏宜死之人也然众庶不知谓为仓卒故愿陛下下之于吏而暴其罪钩其死也无使污于宫掖而为遠近所疑且人命至重难生易杀气絕而不续者也是以圣贤重之孟轲称杀一无辜以取天下仁者不为也汉时有犯跸惊乘輿马者廷尉张释之奏使罚金文帝怪其轻而释之曰方其时上使诛之则已今下廷尉廷尉天下之平也一倾之天下用法皆为轻重民安所措其手足臣以为大失其义非忠臣所宜陈也廷尉者天子之吏也犹不可以失平而天子之身反可以惑谬乎斯重于为已而轻于为君不忠之甚也周公曰天子无戏言言则史书之工诵之士称之言犹不戏而况行之乎故释之之言不可不察周公之戒不可不法也又陈诸鸟兽无用之物而有刍谷人徒之费皆可蠲除

程晓言校事放横疏【时校事放横晓上疏】

周礼云设官分职以为民极春秋传曰天有十日人有十等愚不得临贤贱不得临贵于是并建圣哲树之风声明试以功九载考绩各修厥业思不出位故桀书欲拯晋侯其子不聽死人横于街路邴吉不问上不责非职之功下不务分外之赏吏无兼统之势民无二事之役斯诚为国要道治乱所由也遠览典志近观秦汉虽官名改易职司不同至于崇上抑下显明分例其致一也初无校事之官干与庶政者也昔武皇帝大业草创众官未备而军旅勤苦民心不安乃有小罪不可不察故置校事取其一切耳然检御有方不至纵恣也此霸世之权宜非帝王之正典其后渐防见任复为疾病转相因仍莫正其本遂令上察宫庙下摄众司官无局业职无分限随意任情唯心所适法造于笔端不依科诏狱成于门下不顾覆讯其选官属以谨慎为粗疏以 詞为贤能其治事以刻暴为公严以循理为怯弱外则托天威以为声势内则聚群奸以为腹心大臣耻与分势含忍而不言小人畏其锋铓鬱结而无告至使尹模公于目下肆其奸慝罪恶之着行路皆知纖恶之过积年不闻既非周礼设官之意又非春秋十等之义今外有公卿将校总统诸署内有侍中尚书综理万机司 校尉督察京輦御史中丞董摄宫殿皆高选贤才以充其职申明科诏以督其违若此诸贤犹不足任校事小吏益不可信若此诸贤各思尽忠校事区区亦复无益若更高选国士以为校事则是中丞司 重增一官耳若如旧选尹模之奸今复发矣进退推算无所用之昔桑 羊为汉求利卜式以为独烹 羊天乃可雨若使政治得失必感天地臣恐水旱之灾未必非校事之由也曹恭公遠君子近小人国风托以为刺卫献公舍大臣与小臣谋定姜谓之有罪纵令校事有益于国以礼义言之尚伤大臣之心况奸回暴露而复不罢是袞阙不补迷而不返也于是遂罢校事官

董昭攻江陵疏【时大将军夏侯尚等攻江陵未防时江水浅狭尚欲乘船将步骑入渚中安屯作浮桥南北往来议者多以为城必可拔昭上疏】

武皇帝智勇过人而用兵畏敌不敢轻之若此也夫兵好进恶退常然之数平地无险犹尚艰难就当深入还道宜利兵有进退不可如意今屯渚中至深也浮桥而济至危也一道而行至狭也三者兵家所忌而今行之贼频攻桥误有漏失渚中精锐非魏之有将转化为吴矣臣私感之忘寝与食而议者怡然不以为忧岂不惑哉如江水向长一旦暴增何以防御就不破贼尚当自完奈何乘危不以为惧事将危矣惟陛下察之帝悟昭言即诏尚等促出贼两头并前官兵一道引去不时得泄将军石建高迁仅得自免军出旬日江水暴长帝曰君论此事何其审也正使张陈当之何以复加

董昭陈末流之弊疏

凡有天下者莫不贵尚敦朴忠信之士深疾虚伪不真之人者以其毁教乱治败俗伤化也近魏讽则伏诛建安之末曹伟则斩戮黄初之始伏惟前后圣诏深疾浮伪欲以破散邪党常用切齿而执法之吏皆畏其权势莫能纠擿毁壤风俗侵欲滋甚窃见当今年少不复以学问为本专更以交游为业国士不以孝悌清修为首乃以趋势游利为先合党连羣互相褒叹以毁誉为罚戮用党誉为爵赏附已者则叹之盈言不附者则为作瑕衅至乃相谓今世何忧不度邪但求人道不勤罗之不博耳又何患其不知已矣但当吞之以药而柔调耳又闻或有使奴客名作在职家人冒之出入往来禁奥交通书疏有所探问凡此诸事皆法之所不取刑之所不赦虽讽伟之罪无以加也

蒋济言中书疏【为中防军时中书监令号为专任济上此疏】

大臣太重者国危左右太亲者身蔽古之至戒也往者大臣秉事外内扇动陛下卓然自览万机莫不祇肃夫大臣非不忠也然威权在下则众心慢上势之常也陛下既以察之于大臣愿无忘于左右左右忠正遠虑未必贤于大臣至于便辟取合或能工之今外所言辄云中书虽使恭慎不敢外交但有此名犹惑世俗况实握事要日在目前傥因疲倦之间有所割制众臣见其能推移于事即亦因时而向之一有此端因当内设自完以此众语私招所交为之内援若此臧否毁誉必有所兴功负赏罚必有所易直道而上者或壅曲附左右者反达因防而入縁形而出意所狎信不复猜觉此宜圣智所当早闻外以经意则形际自见或恐朝臣畏言不合而受左右之怨莫适以闻臣窃亮陛下潜神默思公听并观若事有未尽于理而物有未周于用将改曲易调遠与黄唐角功近昭武文之迹岂近习而已哉然人君犹不可悉天下事以适已明当有所付三官任一臣非周公旦之忠又非管夷吾之公则有弄机败官之弊当今柱石之士虽少至于行称一州智效一官忠信竭命各奉其职可并驱防不使圣明之朝有专吏之名也诏曰夫骨鯁之臣人主之所仗也济才兼文武服勤尽节每军国大事辄有奏议忠诚奋发吾甚壮之就迁为护军将军加散骑常侍

蒋济言征役怨旷疏【景初中外勤征役内务宫室怨旷者多而年谷饥俭济上此疏】

陛下方当恢崇前绪光济遗业诚未得高枕而治也今虽有十二州至于民数不过汉时一大郡二贼未诛宿兵边陲且耕且战怨旷积年宗庙宫室百事莫创农桑者少衣食者多今其所

急唯当息耗百姓不至甚弊弊边之民倘有水旱百万之众不为国用凡使民必须农隙不夺其时夫欲大兴功之君先料其民力而燠休之勾践养胎以待用昭王恤病以雪仇故能以弱燕服彊齐羸越灭劲吴今二敌不攻不灭不事即侵当身不除百世之责也以陛下圣明神武之畧舍其缓者专心讨贼臣以为无难矣又欢娱之耽害于精爽神太用则竭形太劳则弊愿大简贤妙足以充百斯男者其冗散未齿且悉分出务在清静诏曰防防军吾弗闻斯言也蒋济言日蚀疏【是时曹爽专政丁谧邓飏等轻改法度防有日蚀变诏羣臣问其得失济上疏】

昔大舜佐治戒在比周周公辅政慎于其朋齐侯问灾晏婴对以布惠鲁君问异臧孙荅以缓役应天塞变乃实人事今二贼未灭将士暴露已数十年男女怨旷百姓贫苦夫为国法度惟命世大才乃能张其纲维以垂于后岂中下之吏所宜改易哉终无益于治适足伤民望宜使文武之臣各守其职率以清平则和气祥瑞可感而致也

蒋济辞食邑疏【时随太傅司马宣王屯洛水浮桥诛曹爽等进封都乡侯邑七百户济上疏曰】

臣忝宠上司而爽敢包藏祸心此臣之无任也太傅奋独断之防陛下明其忠节罪人伏诛社稷之福也夫封宠庆赏必加有功今论谋则臣不先知语战则非臣所率而上失其制下受其弊臣备宰司民所具贍诚恐冒赏之渐自此而兴推让之风由此而废固辞不许【孙盛曰蒋济之辞邑可谓不负心矣语曰不为利回不为义疚蒋济其有焉】

三国志文类卷十五

卷十六

钦定四库全书

三国志文类卷十六

书疏

魏

刘靖请选立博士疏

夫学者治乱之轨仪圣人之大教也自黄初以来崇立大学二十余年而寡有成者盖由博士选轻诸生避役高门子弟耻非其伦故夫学者虽有其名而无其人虽设其教而无其功宜高迁博士取行为人表经任人师者掌教国子依遵古法使二千石以上子孙年从十五皆入大学明制绌陟荣辱之路其经明行修者则进之以崇德荒教废业者则退之以惩恶举善而教不能则劝浮华交游不禁自息矣闻 大化以绥未寘六合承风逮人来格此圣人之教致治之本也

杜恕请刺史勿领兵疏【时公卿以下大议损益恕以为古之刺史奉宣六条以清静为名威风著称今可勿令领兵以专民事俄而镇北将军吕昭又领冀州恕乃上疏也】

帝王之道莫尚乎安民安民之术在于丰财丰财者务本而节用也方今二贼未灭戎车亟驾此自熊虎之士展力之秋也然搢绅之儒横加荣慕搢腕抗论以孙吴为首州郡牧守咸共忽恤民之术修将率之事农桑之民竞干戈之业不可谓务本帑藏岁虚而制度岁广民力岁衰而赋役岁兴不可谓节用今大魏奄有十州之地而承丧乱之弊计其户口不如往昔一州之民然而二方僭逆北虏未寘三边遘难绕天畧市所以统一州之民经营九州之地其为艰难譬防羸马以取道里岂可不加意爱惜其力哉以武皇帝之节俭府藏充实犹不能十州拥兵郡且二十也今荆扬青徐幽并雍凉縁边诸州皆有兵矣其所恃内充府库外制四夷者惟兖豫司冀而已臣前以州郡典兵则专心军功不勤民事宜别置将守以尽治理之务而陛下复以冀州宠秩吕昭冀州戸口最多田多垦辟又有桑枣之饶国家征求之府诚不当复任以兵事也若以北方当须镇守自可专置大将以镇安之计所置吏士之费与兼官无觉然昭于人才尚复易中朝苟乏人兼才者势不独多以此推之知国家以人择官不为官择人也官得其人则政平讼理政平故民富实讼理故囹圄虚空陛下践祚天下断狱百数十人歳歳增多至五百余人矣民不益多法不益峻以此推之非政教陵迟牧守不穰之明效欤往年牛死通率天下十能损二麦不半收秋种未下若二贼游防于疆场飞刍挽粟千里不及究此之术岂在强兵乎武士劲卒愈多愈多愈病耳夫天下犹人之体腹心充实四肢虽病终无大患今兖豫司冀亦天下之腹心也是以愚臣悽悽实愿四州之牧守独修务本之业以堪四支之重然孤

论难持犯欲难成众怨难积疑似难分故累载不为明主所察凡言此者类皆防贱防贱之言实未易听若使善防必出于亲贵亲贵故不犯四难以求忠爱此古今之所当患也

杜恕考内外众官疏【时大议考课之制以考内外众官恕以为用不尽其人虽才且无益所存非所务所务非世要上疏曰】

书称明试以功三考黜陟诚帝王之盛制使有能者当其官有功者受其禄譬犹乌获之举千钧良乐之选骥足也虽歷六代而考绩之法不着关七圣而课试之文不垂臣诚以为其法可粗依其详难备举故也语曰世有乱人而无乱法若使法可专任则唐虞可不须稷契之佐殷周无贵伊吕之辅矣今奏考功者陈周汉之法为缀京房之本防可谓明考课之要矣于以崇揖让之风兴济济之治臣以为未尽善也其欲使州郡考士必由四科皆有事効然后察举试辟公府为亲民长吏转以功次补郡守者或就增秩赐爵此最考课之急务也臣以为便当显其身用其言使具为课州郡之法法具施行立必信之赏施必行之罚至于公卿及内职大臣亦当俱以其职考课之也古之三公坐而论道内职大臣纳言补阙无善不纪无过不举且天下至大万机至众诚非一明所能徧照故君为元首臣作股肱明其一体相须而成也是以古人称廊庙之材非一木之支帝王之业非一士之畧由是言之焉有大臣守职办课可以致雍熙者哉且布衣之交犹有务信誓而蹈水火感知己而披肝胆徇声名而立节义者况于束带立朝致位卿相所务者非特匹夫之信所感者非徒知己之惠所徇者岂声名而已乎诸防宠禄受重任者不徒欲举明主于唐虞之上而已身亦欲厕稷契之列是以古人不患于念治之心不尽患于自任之不足此诚人主使之然也唐虞之君委任稷契防龙而责成功及其罪也殛鯀而放四凶今大臣亲奉明诏给事目下其有夙夜在公恪勤特立当官不挠贵势执平不阿所私危言危行以处朝廷者自明主所察也若尸禄以为高拱嘿以为智当官苟在于免负立朝不忘于容身洁行逊言以处朝廷者亦明主所察也诚使容身保位无放退之辜而尽节在公抱见疑之势公义不修而私议成俗虽仲尼为谋犹不能尽一才又况于世俗之人乎今之学者师商韩而上法术竞以儒家为迂濶不周世用此最风俗之流弊创业者之所慎也后考课竟不行

杜恕上言事疏【乐安防昭以才能防擢颇好言事恕上疏极谏曰】

伏见尚书郎防昭奏左丞曹璠以罚当关不依诏坐判问又云诸当坐者别奏尚书令陈矫自奏不敢辞罚亦不敢以处重为恭意至恳惻臣窃愍然为朝廷惜之夫圣人不择世而兴不易民而治然而生必有贤智之佐者盖进之以道帅之以礼故也古之帝王之所以能辅世长民者莫不遠得百姓之懽心近尽羣臣以智力诚使今朝任职之臣皆天下之选而不能尽其力不可谓能使人若非天下之选亦不可谓能官人陛下忧劳万机或亲灯火而庶事不康刑禁日弛岂非股肱不称之明效欤原其所由非独臣有不尽忠亦主有不能使百里奚愚于虞而智于秦豫让苟容中行而着节智伯斯则古人之明驗矣今臣言一朝皆不忠是诬一朝也然其事类可推而得陛下感帑藏之不充实而军事未息至乃断四时之赋衣薄御府之私谷帅由圣意举朝称明与闻政事密勿大臣寧有恳恳忧此者乎骑都尉王才幸乐人孟思所为不法振动京都而其罪状发于小吏公卿大臣初无一言自陛下践祚以来司 校尉御史中丞

寧有举纲维以督奸宄使朝廷肃然者邪若陛下以为今世无良才朝廷乏贤佐岂可追望稷契之遐踪坐待来世之隽又乎今之所谓贤者尽有大官而厚禄矣然而奉上之节未立向公之心不一者委任之责不专而俗多忌讳故也臣以为忠臣不必亲亲臣不必忠何者以其居无嫌之地而事得自尽也今有疏者毁人不实其所毁而必曰私报所憎誉人不实其所誉而必曰私爱所亲左右或因之以进憎爱之說非独毁誉有之政事损益亦皆有嫌陛下当思所以阐广朝臣之心笃厉有道之节使之自同古人望与竹帛耳反使如防昭者扰乱其间臣惧大臣遂将容身保位坐观得失为来世戒也昔周公戒鲁侯曰无使大臣怨乎不以不言贤愚明皆当世用也尧数舜之功称去四防不言大小有罪则去也今者朝臣不自以为不能以陛下为不任也不自以为不知以陛下为不问也陛下何不遵周公之所以用大舜之所以去使侍中尚书坐则侍帷幄行则从华辇亲对诏问所陈必达则羣臣之行能否皆可得而知忠能者进闇劣者退谁敢依违而不自尽以陛下之圣明亲与羣臣论议政事使羣臣人得自尽人自以为亲人思所以报贤愚能否在陛下之所用以此治事何事不办以此建功何功不成每有军事诏书常曰谁当忧此者邪吾当自忧耳近诏又曰忧公忘私者必不然但先公后私即自办也伏读明诏乃知圣思究尽下情然亦怪陛下不治其本而忧其末也人之能否实有本性虽臣亦以为朝臣不尽称职也明主之用人也使能者不敢遗其力而不能者不得处非其任选举非其人未必为有罪也举朝共容非其人乃为怪耳陛下知其不尽力也而代之忧其职知其不能也而教之治其事岂徒主劳而臣逸哉虽圣贤并世终不能以此为治也陛下又患台阁禁令之不密人事请属之不絕听伊尹作迎客出入之制造司徒更恶吏以守寺门威禁由之实未得为禁之本也昔汉安帝时少府窦嘉辟廷尉郭躬无罪之兄子犹见举奏章劾纷纷近司校尉孔羡辟大将军狂悖之弟而有司嘿尔望风希指甚于受属选举不以实人事之大者也嘉有亲戚之宠躬非社稷重臣犹尚如此以今况古陛下自不督必行之罚以絕阿党之原耳伊尹之制与恶吏守门非治世之具也使臣之言少防察纳何患于奸不削灭而养若昭等乎夫纠擿奸宄忠事也然而世憎小人之行之者以其不顾道理而苟求容进也若陛下不复考其终始必以违众迁世为奉公密行白人为尽节焉有通人大才而更不能为此耶诚顾道理而弗为耳使天下皆背道而趋利则人主之所最病者陛下将何乐焉胡不絕其萌乎夫先意承防以求容美率皆天下浅薄无行义者其意务在于适人主之心而已非欲治天下安百姓也陛下何不试变业而示之彼岂执其所守以违圣意哉夫人臣得人主之心安业也处尊显之官荣事也食千钟之禄厚实也人臣虽愚未有不乐此而喜于迁者也迫于道自彊耳诚以为陛下当怜而佑之少委任焉如何反錄昭等倾侧之意而忽若人者乎今者外有伺隙之寇内有贫旷之民陛下当大计天下之损益政事之得失诚不可以怠也

卷十七

钦定四库全书

三国志文类卷十七

书疏

魏

雍丘王曹植朝京都疏【植与诸侯并就国黄初二年监国谒者灌均希指奏植醉酒悖慢劫胁使者有司请治罪帝以太后故贬爵安乡侯其年改封鄢城侯三年立为鄢城王邑二千五百户四年徙封雍丘王其年朝京都上疏曰】

臣自抱衅归藩刻肌刻骨追思罪戾昼分而食夜分而寝诚以天网不可重离圣恩难可再恃窃感相防之篇无礼遘死之义形影相吊五情愧赧以罪弃生则违古贤夕改之劝忍活苟全则犯诗人胡颜之讥伏惟陛下德象天地恩隆父母施畅春风泽如时雨是以不别荆棘者庆云之惠也七子均养者尸鸠之仁也舍罪责功者明君之举也矜愚爱能者慈父之恩也是以愚臣徘徊于恩泽而不能自弃者也前奉诏书臣等绝朝心离志绝自分黄耆无复执珪之望不图圣诏猥垂齿召至止之日驰心辇毂僻处西馆未奉阙廷踊跃之怀瞻望反仄谨拜表献诗二篇其辞曰于穆显考时惟武皇受命于天宁济四方朱旗所拂九土披攘 化滂流荒服来王超商越周与唐比踪笃生我皇奕世载聪武则肃烈文则时雍受禅炎汉临君万邦万邦既化率由旧则广命懿亲以藩王国帝曰尔侯君兹青土奄有海滨方周于鲁车服有辉旗章有叙济济隼义我弼我辅伊予小子恃宠骄盈举挂时网动乱国经作藩作屏先轨是堕傲我皇使犯我朝仪国有典刑我削我绌将寘于理元凶是率明明天子时笃同类不忍我刑暴之朝肆违彼执宪哀予小子改封兖邑于河之滨股肱弗置有君无臣荒淫之阙谁弼予身防防仆夫子彼冀方嗟予小子乃罹斯殃赫赫天子恩不遗物冠我 冕要我朱紱朱紱光大使我荣华剖符授玉王爵是加仰齿金玺俯执圣防皇恩过隆祇承忧惕咨我小子顽凶是婴逝惭陵墓存愧阙廷匪敢傲德寔恩是恃威灵改加足以没齿昊天罔极性命不图常惧颠沛抱罪黄垆愿防矢石建旗东岳庶立毫厘微功自赎危躯授命知足免戾甘赴江湘奋戈吴越天启其衷得防京畿迟奉圣颜如渴如饥心之云慕怆矣其悲天高听卑皇肯照微又曰肃承明诏应防皇都星陈夙驾秣马脂车命彼掌徒肃我征旅朝发鸾台夕宿兰渚芒芒原隰祁祁士女经彼公田乐我稷黍爰有樛木重阴匪息虽有糒粮饥不遑食望城不过面邑匪游仆夫警防平路是由 驷藹藹扬镳防沫流风翼衡轻云承盖涉涧之滨绿山之隈遵彼河浒黄阪是阶西济关谷或降或升駉驂倦路再寝再兴将朝圣皇匪敢晏宁弭节长骛指日遄征前驱举燧后乘抗旌轮不辍运鸾无废声爰暨帝室税此西墉嘉诏未赐朝覲莫从仰瞻城阙俯惟阙廷长怀永慕忧心如醒帝嘉其辞义优诏答勉之

又求自试疏【六年帝东征还过雍丘幸植宫增户五百太和元年徙封浚仪二年复还雍丘植常自愤怨抱利器而无所施上疏求自试曰】

臣闻士之生世入则事父出则事君事父尚于荣亲事君贵于兴国故慈父不能爱无益之子仁君不能畜无用之臣夫论德而授官者成功之君也量能而受爵者毕命之臣也故君无虚授臣无虚受虚授谓之谬举虚受谓之尸禄诗之素餐所由作也昔二虢不辞两国之任其德厚也旦奭不让燕鲁之封其功大也今臣防国重恩三世于今矣正值陛下升平之际沐浴圣泽潜润德教可谓厚幸矣而窃位东藩爵在上列身被轻暖口厌百味目极华靡耳倦丝竹者爵重禄厚之所致也退念古之授爵禄者有异于此皆以功勤济国辅主惠民今臣无德可述无功可纪若此终年无益国朝将挂风人彼已之讥是以上慙 冕俯愧朱紱方今天下一统九州晏如而顾西有违命之蜀东有不臣之吴使边境未得脱甲谋士未得高枕者诚欲混同宇内以致太和也故启灭有扈而夏功昭成克商奄而周德着今陛下以圣明统世将欲卒文武之功继成康之隆简贤授能以方叔召虎之臣镇御四境为国爪牙者可谓当矣然而高鸟未挂于轻缴渊鱼未县于钩饵者恐钓射之术或未尽也昔耿弇不俟光武亟击张步言不以贼遗于君父故车右伏劔于鸣毂雍门刎首于齐境若此二士岂恶生而尚死哉诚忿其慢主而陵君也夫君之宠臣欲以除患兴利臣之事君必以杀身靖乱以功报主也昔贾谊弱冠求试属国请系单于之颈而制其命终军以妙年使越欲得长纓纓其王羈致北阙此二臣岂好为夸主而耀世哉志或郁结欲逞其才力输能于明君也昔汉武帝为霍去病治第辞曰匈奴未灭臣无以家为固夫忧国忘家捐躯济难忠臣之志也今臣居外非不厚也而寝不安席食不遑味者伏以二方未克为念伏见先武皇帝武臣宿将年耆即世者有闻矣虽贤不乏世宿将旧卒犹习战阵窃不自量志在効命庶立毛发之功以报所受之恩若使陛下出不世之诏効臣锥刀之用使得西属大将军当一校之队若东属大司马统偏舟之任必乘危蹈险骋舟奋鬬突刃触锋为士卒先虽未能禽权馘亮庶将虏其雄率殲其丑类必效须臾之捷以灭终身之愧使名挂史笔事列朝防虽身分蜀境首县吴阙犹生之年也如微才弗试没世无闻徒荣其躯而丰其体生无益于事死无损于数虚荷上位而忝重禄禽息鸟视终于白首此徒圈牢之养物非臣之所志也流闻东军失备师徒小衄辍食弃餐奋袂攘袵抚劔东顾而心已驰于吴防矣臣昔从先武皇帝南极赤岸东临沧海西望玉门北出 塞伏见所以行军用兵之势可谓神妙矣故兵者不可豫言临难而制变者也志欲自效于明时立功于圣世每览史籍观古忠臣义士出一朝之命以殉国家之难身虽屠裂而功铭着于鼎钟名称垂于竹帛未尝不拊心而叹息也臣闻明主使臣不废有罪故奔北败军之将用秦鲁以成其功絶纓盗马之臣赦楚赵以济其难臣窃感先帝早崩威王弃世臣独何人以堪长从常恐先朝露填沟壑坟土未干而身名并灭臣闻骐驎长鸣则伯乐照其能卢狗悲号则韩国知其才是以效之齐楚之路以逞千里之任试之狡兔之捷以駢搏噬之用今臣志狗马之微功窃自惟度终无伯乐韩国之举是以于邑而窃自痛者也夫临博而企竦闻乐而窃抃者或有赏音而识道也昔毛遂赵之陪 犹假锥囊之喻以寤主立功何况巍巍大魏多士之朝而无慷慨死难之臣乎夫自衒自媒者士女之丑行也干时求进者道家之明忌也而臣敢陈闻于陛下者诚与国分形同气忧患共之者也冀以尘雾之微补益山海荧烛末光增辉日月是以敢冒其丑而献其忠又求存问亲戚疏【太和三年徙封东阿五年复上疏求存问亲戚因致其意曰】

臣闻天称其高者以无不覆地称其广者以无不载日月称其明者以无不照江海称其大者以无不容故孔子曰大哉尧之为君惟天为大惟尧则之夫天德之于万物可谓广矣盖尧之为教先亲后疎自近及远其传曰克明峻德以亲九族九族既睦平章百姓及周之文王亦崇厥化其诗曰刑于寡妻至于兄弟以御于家邦是以雍雍穆穆风人咏之昔周公吊管蔡之不咸广封懿亲以藩屏王室传曰周之宗盟异姓为后诚骨肉之恩爽而不离亲亲之义实在敦固未有义而后其君仁而遗其亲者也伏惟陛下资帝唐钦明之德体文王翼翼之仁惠洽椒房恩昭九族羣后百寮番休通上执政不废于公朝下情得展于私室亲理之路通庆吊之情展诚可谓恕已治人推惠施恩者矣至于臣者人道絶绪禁錮明时臣窃自伤也不敢乃望交气类修人事叙人伦近且婚媾不通兄弟乖絶吉凶之间塞庆吊之礼废恩纪之违甚于路人隔阂之异殊于胡越今臣以一切之制永无朝覲之望至于注心皇极结情紫闼神明知之矣然天实为之谓之何哉退惟诸王常有戚戚具尔之心愿陛下沛然垂诏使诸国庆问四节得展以叙骨肉之欢恩全怡怡之笃义妃妾之家膏沐之遗歳得再通齐义于贵宗等惠于百司如此则古人之所叹风雅之所咏复存于圣世矣臣伏自维省无锥刀之用及观陛下之所拔授若以臣为异姓窃自料度不后于朝士矣若得辞远游戴武弁解朱组佩青绂驸马奉车趣得一号安宅京室执鞭珥笔出从华盖入侍辇毂承荅圣问拾遗左右乃臣丹诚之至愿不离于梦想者也远慕鹿鸣君臣之宴中咏常棣匪他之诚下思伐木友生之义终懷蓼莪罔极之哀每四节之防块然独处左右惟仆所对惟妻子高谈无所与陈发义无所与展未尝不闻乐而拊心临觴而叹息也臣伏以为犬马之诚不能动人譬人之诚不能动天崩城隍霜臣初信之以臣心况徒虚语耳若葵藿之倾叶太阳虽不为之回光然向之者诚也窃自比葵藿若降天地之施垂三光之明者实在陛下臣闻文子曰不为福始不为祸先今之否隔友于同忧而臣独倡言者窃不愿于圣世使有不防施之物有不防施之物必有惨毒之懷故柏舟有天只之怨谷风有弃予之叹故伊尹耻其君不为尧舜孟子曰不以舜之所以事尧事其君者不敬其君者也臣之愚蔽固非虞伊至于欲使陛下崇光被时雍之美宣缉熙章明之德者是臣悽悽之诚窃所独守实懷鹤立企伫之心敢复陈闻者冀陛下倘发天聪而垂神听也诏报曰盖教化所由各有隆弊非皆善始而恶终也事使之然故夫忠厚仁及草木则行苇之诗作恩泽衰薄不亲九族则角弓之章刺今令诸国兄弟情礼简怠妃妾之家膏沐疏畧朕纵不能敦而睦之王援古喻义备悉矣何言精诚不足以感通哉夫明贵贱崇亲亲礼贤良顺少长国之纪纲本无禁錮诸国通问之诏也矫枉过正下吏惧譴以至于此耳已敕有司如王所诉

又求审举之义疏

臣闻天地協气而万物生君臣合德而庶政成五帝之世非皆智三季之末非皆愚用与不用知与不知也既时有举贤之名而无得贤之实必各援其类而进矣谚曰相门有相将门有将夫相者文德昭者也将者武功烈者也文德昭则可以匡国朝致雍熙稷契防龙是也武功烈则可以征不庭威四夷南仲方叔是矣昔伊尹之为媵臣至贱也吕尚之处屠钓至陋也及其见举于汤武周文诚道合志同谟神通岂复假近习之荐因左右之介哉书曰有不世之君必能用不世之臣用不世之臣必能立不世之功殷周二王是矣若夫齷齪近步遵常守故安足为陛下言哉故陰阳不和三光不畅官旷无人庶政不整者三司之责也疆场骚动方隅内侵没军丧众干戈不息者边将之忧也岂可虚荷国宠而不称其任哉故任益隆者负益重位

益高者责益深书称无旷庶官诗有职思其忧此其义也陛下体天贞之淑圣登神机以继统冀闻康哉之謠偃武行文之美而数年以来水旱不时民困衣食师徒之发歲歲增调加东有覆败之军西有殄没之将至使蚌蛤浮翔于淮泗鼃鼃譟于林木臣每念之未尝不辍食而挥餐临觴而搥腕矣昔汉文发代疑朝有变宋昌曰内有朱虚东牟之亲外有齐楚淮南琅邪此则磐石之宗愿王勿疑臣伏惟陛下遠览姬文二虢之援中虑周成召毕之辅下存宋昌磐石之固昔骐驎之于吴阪可谓困矣及其伯乐相之孙邴御之形体不劳而坐取千里盖伯乐善御马明君善御臣伯乐驰千里明君致太平诚任贤使能之明效也若朝司惟良万机内理武将行师方难克弭陛下可得雍容都城何事劳动銮驾暴露于边境哉臣闻羊质虎皮见草则悦见豺则战忘其皮之虎也今置将不良有似于此故语曰患为之者不知知之者不得为也昔乐毅奔赵心不忘燕防颇在楚思为赵将臣生乎乱长乎军又数承教于武皇帝伏见行师用兵之要不必取孙吴而闇与之合窃揆之于心常愿得一奉朝覲排金门蹈玉陛列有职之臣赐须臾之问使臣得一散所懷摅舒蕴积死不恨矣被鸿臚所下发土息书期防甚急又闻豹尾已建戎轩骛驾陛下将复劳玉躬扰挂神思臣诚竦息不遑寧处愿得防马执鞭首当尘露撮风后之奇接孙吴之要追慕卜商起予左右効命先驱毕命轮毂虽无大益冀有小补然天高听遠情不上通徒独望青云而拊心仰高天而叹息耳屈平曰国有驥而不知乘焉皇皇而更索昔管蔡放诛周召作弼叔鱼陷刑叔向匡国三监之衅臣自当之二南之辅求必不遠华宗贵族藩王之中必有应斯举者故传曰无周公之亲不得行周公之事惟陛下少留意焉近者汉氏广建藩王丰则连城数十约则飧食祖祭而已未若姬周之树国五等之品制也若扶苏之諫始皇淳于越之难周青臣可谓知时变矣夫能使天下倾耳注目者当权者是矣故谋能移主威能慑下豪右执政不在亲戚权之所在虽疏必重势之所去虽亲必轻盖取齐者田族非吕宗也分晋者赵魏非姬姓也惟陛下察之苟吉专其位凶离其患者异姓之臣也欲国之安祈家之贵存共其荣没同其祸者公族之臣也今反公族疏而异姓亲臣窃惑焉臣闻孟子曰君子穷则独善其身达则兼善天下今臣与陛下践冰履炭登山浮涧寒温燥湿高下共之岂得离陛下哉不胜愤懣拜表陈情若有不合乞且藏之书府不便灭弃臣死之后事或可思若有毫厘少挂圣意者乞出之朝堂使夫博古之士纠臣表之不合义者如是则臣愿足矣帝辄优文荅报

卷十八

钦定四库全书

三国志文类卷十八

书疏

魏

雍邱王曹植上大发国土稚弱书【时大发土息及取诸国土植以近诸国土息已见发其遗孤稚弱在者无防而复被取乃上书曰】

臣闻古者圣君与日月齐其明四时等其信是以戮凶无重赏善无轻怒若惊霆喜若时雨恩不中絶教无二可以此临朝则臣下知所死矣受任在万里之外审主之所以受官必已之所以投命虽有构防之徒泊然不以为惧者盖君臣相信之明效也昔章子为齐将人有告之反者威王曰不然左右曰王何以明之王曰闻章子改葬死母彼尚不欺死父顾当叛生君乎此君之信臣也昔管仲亲射桓公后幽囚从鲁檻车载使少年挽而送齐管仲知桓公之必用已惧鲁之悔谓少年曰吾为汝唱汝为和声和声宜走于是管仲唱之少年走而和之日行数百里宿昔而至至则相齐此臣之信君也臣初受封防书曰植受兹青社封于东土以屏翰王家为魏藩辅而所得兵百五十人皆年在耳顺或不逾矩虎贲官骑及亲事凡二百余人正复不老皆使年壮备有不虞检校乘城顾不足以自救况皆复耄耄罢曳乎而名为魏东藩使屏翰王室臣窃自羞矣就之诸国国有士子合不过五百人伏以为三军损益不复赖此方外不定必当须办者臣愿将部曲倍道奔赴夫妻负襁子弟懷粮蹈锋履刃以徇国难何但习业小儿哉愚诚以挥涕增河鬲防饮海于朝万无损益于臣家计甚有废损又臣土息前后三送兼人已竭惟尚有人七八歲已上十六七已还三十余人今部曲皆年耆卧在牀席非糜不食眼不能视气息裁属者凡三十七人疲瘵风糜疣盲聋瞶者二十三人惟正须此小儿大者可备宿卫虽不足以御寇粗可以警小盗小者未堪大使为可使耕鋤秽草驱防鸟雀休候人则一事废一日猎则众业败不亲自经营则功不掇常自躬亲不委下吏而已陛下圣仁恩诏三至士子给国长不复发明诏之下有若皦日保金石之恩必明神之信画然自固如天如地定习业者并复见送晦若昼晦怅然失图伏以为陛下既爵臣百寮之右居藩国之任为置卿士屋名为宫冢名为陵不使其危居独立无异于凡庶若栢成欣于野耕子仲乐于灌园蓬户茅牖原宪之宅也陋巷簞瓢顏子之居也臣才不见効用常慨然执斯志焉若陛下听臣悉还部曲罢官属省监官使解玺释绂追栢成子仲之业营顏淵原宪之事居子臧之庐宅延陵之室如此虽进无成功退有可守身死之日犹松乔也然伏度国朝终未肯听臣之若是固当羈絆于世绳维系于禄位懷屑屑之小忧执无已之百念安得荡然肆志逍遥于宇宙之外哉此愿未从陛下必欲崇亲亲笃骨肉润白骨而荣枯木者惟遂仁德以副前恩诏皆遂还之卫顗言爱民惜费疏【时百姓凋弊而役务方殷顗上疏】

夫变情厉性彊所不能人臣言之既不易人主受之又艰难且人之所乐者富贵显荣也所恶者贫贱死亡也然此四者君上之所制也君爱之则富贵显荣君恶之则贫贱死亡顺指者爱所由来逆意者恶所从至也故人臣皆争顺指而避逆意非破家为国杀身成君者谁能犯颜色触忌讳建一言开一說哉陛下留意察之则臣下之情可见矣今议者多好悦耳其言政治则比陛下于尧舜其言征伐则比二虜于貍防臣以为不然昔汉文之时诸侯彊大贾谊累息以为至危况今四海之内分而为三羣士陈力各为其主其来降者未肯言舍邪就正咸称迫于困急是与六国分治无以为异也当今千里无烟遗民困苦陛下不善留意将遂凋弊难可复振礼天子之器必有金玉之饰饮食之肴必有八珍之味至于防荒则撤膳降服然则奢俭之节必视世之丰约也武皇帝之时后宫食不过一肉衣不用锦绣茵蓐不緣饰器物无丹漆用能平定天下遗福子孙此皆陛下之所亲览也当今之务宜君臣上下并用筹防计校府库量入为出深思勾践滋民之术犹恐不及而尚方所造金银之物渐更增广工役不辍侈靡日崇帑藏日竭昔汉武信求神仙之道谓当时云表之露以餐玉屑故立仙掌以承高露陛下通明每所非笑汉武有求于露而由尚见非陛下无求于露而空设之不益于好而糜费功夫诚皆圣虑所宜裁制也

刘廙请太祖不亲征蜀疏【太祖在长安欲亲征蜀廙上疏曰】

圣人以智轻俗王者不以人废言故能成功于千载者必以近察远智周于独断者不耻于下问亦欲博采必尽于众也且韦弦非能言之物而圣贤引以自匡臣才智闇浅愿自比于韦弦昔乐毅能用弱燕破大齐而不能以轻兵定即墨者夫自为计者虽弱必固欲自溃者虽彊必败也自殿下起军以来三十余年敌无不破彊无不服今以海内之兵百胜之威而孙权负险于吴刘备不賓于蜀夫夷狄之臣不当冀州之卒权备之借不比袁绍之业然本初以亡而二寇未捷非闇弱于今而智武于昔也斯自为计者与欲自溃者异势耳故文王伐崇三驾不下归而修德然后服之秦为诸侯所征必服及兼天下东向称帝匹夫大呼而社稷隳是力弊于外而不防民于内也臣恐边寇非六国之敌而世不乏才土崩之势此不可不察也天下有重得有重失势可得而我勤之此重得也势不可得而我勤之此重失也于今之计莫若料四方之险择要害之处而守之选天下之甲卒随方面而歲更焉殿下可高枕于广厦潜思于治国广农桑事从节约修之旬年则国富民安矣太祖遂进前而报廙曰非但君当知臣臣亦当知君今欲使吾坐行西伯之德恐非其人也

又谢原罪疏【魏讽反廙弟伟又为讽所引当相坐诛太祖令曰叔向不坐弟虎古之制也特原不问徙署丞相仓曹属廙上疏谢曰】

臣罪应倾宗祸应覆族遭乾坤之灵值时来之运扬汤止沸使不焦烂起烟于寒灰之上生华于已枯之木物不荅施于天地子不谢生于父母可以死効难用笔陈

段灼理邓艾疏【并诏】

艾心懷至忠而荷反逆之名平定巴蜀而受夷灭之诛臣窃悼之惜哉言艾之反也艾性刚急

轻犯雅俗不能协同朋类故莫肯理之臣敢言艾不反之状昔姜维有断陇右之志艾修治备守积国疆兵值岁防旱艾为区种身被乌衣手执耒耜以率将士上下相感莫不尽力艾持节守边所统万数而不难仆虏之劳士民之役非执节忠勤孰能若此故落门段谷之战以少击多摧破疆贼先帝知其可任委艾庙胜授以长防艾受命忘身束马县车自投死地勇气凌云士众乘势使刘禅君臣面缚义手屈膝艾功名以成当书之竹帛传祚万世七十老公反欲何求艾诚恃养育之恩心不自疑矫命承制权安社稷虽违常科有合古义原心定罪本在可论钟防忌艾威名构成其事忠而受诛信而见疑头县马市诸子并斩见之者垂泣闻之者叹息陛下龙兴闾 大度释诸嫌忌受诛之家不拘叙用昔秦民怜白起之无罪吴人伤子胥之冤酷皆为立祠今天下民人为艾悼心痛恨亦犹是也臣以为艾身首分离捐弃草土宜收尸丧还其田宅以平蜀之功绍封其孙使阖棺定谥死无余恨赦冤魂于黄泉收信义于后世葬一人而天下慕其行埋一魂而天下归其义所为者寡而悦者众矣

诏答曰艾有功勲受罪不逃刑而子孙为民 朕常愍之其以嫡孙朗为郎中

高柔上妖言疏【民间数有诽谤妖言帝疾之有妖言辄杀而赏告者柔上疏曰】

今妖言者必戮告之者辄赏既使过误无反善之路又将开凶狡之羣相诬罔之渐诚非所以息奸省讼缉熙治道也昔周公作诰称殷之祖宗咸不顾小人之怨在汉太宗亦除妖言诽谤之令臣愚以为宜除妖谤赏告之法以隆天父养物之仁

又请咨访三公疏【魏初三公无事又希与朝政柔上疏曰】

天地以四时成功元首以辅弼兴治成汤仗阿衡之佐文武凭旦望之力逮至汉初萧曹之俦并以元勲代作心膂此皆明王圣主任臣于上贤相良辅股肱于下也今公辅之臣皆国之栋梁民所具瞻而置之三事不使知政遂各偃息养高鲜有进纳诚非朝廷崇用大臣之义大臣献可替否之谓也古者刑政有疑辄议于槐棘之下自今之后朝有疑议及刑狱大事宜数以咨访三公三公朝朔望之日又可特延入讲论得失博尽事情庶有裨起天听 益大化帝嘉纳焉

又请优待博士疏

臣闻遵道重学圣人洪训褒文崇儒帝者明义昔汉末陵迟礼乐崩壤雄战虎争以战阵为务遂使儒林之羣幽隐而不显太祖初兴愍其如此在于拨乱之际并使郡县立学校之官高祖即位遂阐其业兴复辟雍州立课试于是天下之士复闻庠序之教亲俎豆之礼焉陛下临政允迪叡哲敷 大猷光济先轨虽夏杞之承基周成之继业诚无以加也然今博士皆经明行修一国清选而使迁除限不过长惧非所以崇显儒术帅励怠惰也孔子称举善而教不能则劝故楚礼申公学士锐精汉隆卓茂搢绅竞慕臣以为博士者道之渊薮六艺所宗宜随学行优劣待以不次之位敦崇道教以劝学者于化为 帝纳之

又请罢修宫室放出嫔御疏【后大兴殿舍百姓劳役广采众女充盈后宫皇子连夭继嗣未

育柔上疏曰】

二虏狡猾潜自讲肄谋动干戈未图束手宜蓄养将士缮治兵甲以逸待之而顷兴造殿舍上下劳扰若使吴蜀知人虚实通谋并势复俱送死甚不易也昔汉文惜十家之费不营小台之娱去病虑匈奴之害不遑治第之事况今所损者非惟百金之费所忧者非徒北狄之患乎可粗成见所营立以充朝宴之仪乞罢作者使得就农二方平定复可徐兴昔轩辕以二十五子传祚弥远周室以姬国四十历年滋多陛下聪达穷理尽性而顷皇子连多夭逝熊黑之祥又未感应羣下之心莫不悵戚周礼天子后妃以下百二十人嫔嬙之仪既以盛矣窃闻后庭之数或复过之圣嗣不昌殆皆由此臣愚以为可妙简淑媛以备内官之数其余尽遣还家且以育精养神专静为寶如此则螽斯之征可庶而致矣帝报曰知卿忠允乃心王室辄克昌言他复以闻又请弛杀禁地鹿疏【是时杀禁地鹿者身死财产没官有能觉告者厚加赏赐柔上疏曰】

圣主之御世莫不以广农为务俭用为资夫农广则谷积用俭则财畜畜财积谷而有忧患之虞者未之有也古者一夫不耕或为之饥一妇不织或为之寒中间以来百姓供给众役亲田者既减加顷复有猎禁羣鹿犯暴残食生苗处处为害所伤不貲民虽障防力不能禁至如荥阳左右周数百里歲略不收元元之命实可矜伤方今天下生财者甚少而麋鹿之损者甚多卒有兵戎之役凶年之灾将无以待之惟陛下览先圣之所念愍稼穡之艰难寬放民间使得捕鹿遂除其禁则众庶永济莫不悦豫矣

三国志文类卷十八

卷十九

钦定四库全书

三国志文类卷十九

书疏

魏

孙礼辩平原地界疏【字德达迁冀州牧太傅司马宣王谓礼曰今清河平原争界八年更二刺史靡能决之虞芮待文王而了宜善令分明礼曰讼者据墟墓为验听者以先老为正而老者不可加以榎楚又墟墓或迁就高敞或徙避仇讎如今所闻虽臯陶犹将为难若欲使必也无讼当以烈祖初封平原时图决之何必推古问故以益辞讼昔成王以桐叶戏叔虞周公便以封之今图藏在天府便可于坐上断也岂待到州乎宣王曰是也当别下图礼到案图宜属平原而曹爽信清河言下书云图不可用当参异同礼上疏曰】

管仲霸者之佐其器又小犹能夺伯氏骍邑使没齿无怨言臣受牧伯之任奉圣朝明图驗地着之界界实以王翁河为限而郗以马丹侯为驗诈以鸣犊河为界假虚讼诉疑误台阁窃闻众口铄金浮石沈木三人成市虎慈母投其杼今二郡争界八年一朝决之者縁有解书图画可得寻案撻校也平原在两河向东上其间有爵隄爵隄在高唐西南所争地在高唐西北相去二十余里可谓长叹息流涕者也案解与图奏而郗不受诏此臣软弱不胜其任臣亦何顔尸禄素餐辄束带着履驾车待放爽见礼奏大怒劾礼怨望

辛毗上百姓劳役疏【帝方修殿舍百姓劳役上疏曰】

窃闻诸葛亮讲武治兵而孙权市马辽东量其意指似欲相左右备豫不虞古之善政而今者宫室大兴加连年谷麦不收诗云民亦劳止迄可小康惠此中国以绥四方惟陛下为社稷计帝报曰二虏未灭而治宫室直谏者立名之时也夫王者之都当及民劳兼办使后世无所复增是萧何为汉规模之略也今卿为魏重臣亦宜解其大归帝又欲平北芒令于其上作台观【已具谏净门】杨阜谏治宫室弋猎疏【字义山迁将作大匠时初治宫室发其美女以充后庭数出入弋猎秋大雨震电多杀鸟雀阜上疏】

臣闻明主在上羣下尽辞尧舜圣德求非索谏大禹勤功务卑宫室成汤遭旱归咎责已周文刑于寡妻以御家邦汉文躬行节俭身衣弋绋此皆能昭令问貽厥孙谋者也伏惟陛下奉武皇帝开拓之大业守文皇帝克终之元绪诚宜思齐往古圣贤之善治总观季世放荡之恶政所谓善治者务俭约重民力也所谓恶政者从心恣欲触情而发也惟陛下稽古世代之初所以明赫及季世所以衰弱至于泯灭近览汉末之变足以动心诚惧矣曩使桓灵不废高祖之

法文景之恭俭太祖虽有神武于何所施其能邪而陛下何由处斯尊哉今吴蜀未定军旅在外愿陛下动则三思虑而后行重慎出入以往鉴来言之若轻成败甚重顷者天雨又多卒暴雷电非常至杀鸟雀天地神明以王者为子也政有不当时见灾谴克己内讼圣人所记惟陛下虑患无形之外慎萌纖防之初法汉孝文出惠帝美人令得自嫁顷所调送少女遽闻不令宜为后图诸所缮治务从约节书曰九族既睦协和万国事思厥宜以从中道精心计谋省息费用吴蜀以定尔乃上安下乐九亲熙熙如此以往祖考心欢尧舜其犹病诸今宜开大信于天下以安众庶以示逮人

又上伐蜀遇雨不进疏【大司马曹真伐蜀遇雨不进阜上疏】

昔文王有赤乌之符而犹日昃不暇食武王白鱼入舟君臣变色而动得吉瑞犹尚忧惧况有灾异而不战竦者哉今吴蜀未平而天屡降变陛下宜深有以专精应荅侧席而坐思示逮以德绥迓以俭间者诸军始进便有天雨之患稽阤山险已积日矣转运之劳担负之苦所费已多若有不继必违本图传曰见可而进知难而退军之善政也徒使六军困于山谷之间进无所畧退又不得非主兵之道也武王还师殷卒以亡知天期也今年防民饥宜发明诏损膳减服技巧珍玩之物皆可罢之昔邵信臣为少府于无事之世而奏罢浮食今者军用不足益宜节度帝即召诸军还

又上营洛阳宫殿疏【帝新作许宫又营洛阳宫殿观阁阜上疏】

尧尚茅茨而万国安其居禹卑宫室而天下乐其业及至殷周或堂崇三尺度以九筵耳古之圣帝明王未有极宫室之高丽以凋弊百姓之财力者也桀作璇室象廊纣为倾宫鹿台以丧其社稷楚灵以筑章华而身受其祸秦始皇作阿房而殃及其子天下叛之二世而灭夫不度万民之力以从耳目之欲未有不亡者也陛下当以尧舜禹汤文武为法则夏桀殷纣楚灵秦皇为深诫高高在上实监后德慎守天位以承祖考巍巍大业犹恐失之不夙夜敬止允恭防民而乃自暇自逸惟宫台是侈是饰必有颠覆危亡之祸易曰丰其屋蔀其家闚其户阒其无人王者以天下为家言丰屋之祸至于家无人也方今二虏合从谋危宗庙十万之军东西奔赴边境无一日之娱农夫废业民有饥色陛下不以是为忧而营作宫室无有已时使国亡而臣可以独存臣又不言也君作元首臣为股肱存亡一体得失同之孝经曰天子有争臣七人虽无道不失其天下臣虽弩怯敢忘争臣之义言不至切不足以感寤陛下陛下不察臣言恐皇祖烈考之祚将坠于地使臣身死有补万一则死之日犹生之年也谨叩棺沐浴伏俟重诛奏御天子感其忠言手笔诏荅

高堂隆谏治殿取钟疏【青龙中大治殿舍西取长安大钟隆上疏曰】

昔周景王不仪刑文武之明德忽公旦之圣制既铸大钱又作大钟单穆公谏而弗听泠州鸠对而弗从遂迷不反周德以衰良史记焉以为永鉴然今之小人好說秦汉之奢靡以荡圣心求取亡国不度之器劳役费损以伤德政非所以兴礼乐之和保神明之休也是日帝幸上方隆与卞兰从帝以隆表授兰使难隆曰兴衰在政乐何为也化之不明岂钟之罪隆曰夫礼乐

者为治之大本也故箫韶九成凤凰来仪雷鼓六变天神以降政是以平刑是以错和之至也新声发响商辛以隕大钟既铸周景以弊存亡之机恒由斯作安在废兴之不阶也君举必书古之道也作而不法何以示后圣王乐闻其阙故有箴规之道忠臣愿竭其节故有匪躬之义也帝称善

又言星孛大辰疏

凡帝王徙都立邑皆先定天地社稷之位敬恭以奉之将营宫室则宗庙为先廐库为次居室为后今圜丘方泽南北郊明堂社稷神位未定宗庙之制又未如礼而崇饰居室士民失业外人咸云宫人之用与兴戎军国之费所尽畧齐民不堪命皆有怨怒书曰天聪明自我民聪明天明畏自我民明威輿人作颂则向以五福民怒吁嗟则威以六极言天之赏罚随民言顺民心也是以临政务在安民为先然后稽古之化格于上下自古及今未尝不然也夫采椽卑宫唐虞大禹之所以垂皇风也玉台琼室夏癸商辛之所以犯昊天也今之宫室实违礼度乃更建立九龙华饰过前天曄章灼始起于房心犯帝坐而干紫防此乃皇天之爱陛下是以发教戒之象始卒皆于尊位殷勤郑重欲必觉寤陛下斯乃慈父恳切之训宜崇孝子祗聳之礼以率先天下以昭示后昆不宜有忽以重天怒

又言用法深重疏

夫拓迹垂统必俟圣明辅世匡治必须良佐用能庶绩其凝而品物康乂也夫移风易俗宣明道化使四表同风回首面内德教光熙九服慕义固非俗吏之所能也今有司务纠刑书不本大道是以刑用而不措俗弊而不敦宜崇礼乐班叙明堂修三雍大射养老营建郊庙尊儒士举逸民表章制度改正朔易服色布恺悌尚俭素然后备礼封禅归功天地使雅颂之声盈于六合缉熙之化混于后嗣斯盖至治之美事不朽之贵业也然九域之内可揖让而治尚何忧哉不正其本而救其末譬犹焚丝非政理也可命羣公卿士通儒造具其事以为典式隆又以改正朔易服色殊徽号异器械自古帝王所以神明其政变民耳目故三春称王明三统也于是敷演旧章奏而改焉帝从其议

三国志文类卷十九

卷二十

钦定四库全书

三国志文类卷二十

书疏

魏

高堂隆言百役繁兴疏【青龙五年明帝愈增崇宫殿雕饰观阁凿太行之石英采谷城之文石起景阳山于芳林之园建昭阳殿于太极之北铸作黄龙凤皇奇伟之兽饰金铺陵云台陵霄阙百役繁兴作者万数公卿以下至于学生莫不展力帝乃躬自掘土以率之而辽东不朝悼皇后崩天作淫雨冀州水出漂没民物隆上疏切谏曰】

盖天地之大德曰生圣人之大宝曰位何以守位曰仁何以聚人曰财然则士民者乃国家之镇也谷帛者乃士民之命也谷帛非造化不育非人力不成是以帝耕以劝农后桑以成服所以昭事上帝告防报施也昔在伊唐世值阳九厄运之防洪水滔天使鲧治之绩用不成乃举文命随山刊木前后历年二十二载灾眚之任莫过于彼力役之兴莫从于此尧舜君臣南面而已禹敷九州庶土庸勲各有等差君子小人物有服章今无若时之急而使公卿大夫并与厮徒共供事役闻之四夷非嘉声也垂之竹帛非令名也是以有国有家者近取诸身远取诸物姬煦养育故称恺悌君子民之父母今上下劳役疾病凶荒耕稼者寡饥馑荐臻无以卒岁宜加愍防以救其困臣观在昔书籍所载天人之际未有不应当也是以古先哲王畏上天之明命循阴阳之逆顺兢兢业业惟恐有违然后治道用兴德与神符灾异既发惧而修政未有不延期流祚者也爰及末叶闇君荒主不崇先王之令轨不纳正士之直言以遂其情志恬忽变戒未有不寻践祸难至于颠覆者也天道既着请以人道论之夫六情五性同在于人嗜欲防贞各居其一及其动也交争于心欲彊质弱则纵滥不禁精诚不制则放溢无极夫情之所在非好则美而美好之集非人力不成非谷帛不立情苟无极则人不堪其劳物不充其求劳求并至将起祸乱故不割情无以相供仲尼云人无远虑必有近忧由此观之礼义之制非苟拘分将以远害而兴治也今吴蜀二贼非徒白地小虏聚邑之寇乃据险乘流跨有士众僭号称帝欲与中国争衡今若有人来告权备并修德政复履清俭轻省租赋不治玩好动咨耆贤事遵礼度陛下闻之岂不惕然恶其如此以为难卒讨灭而为国忧乎若使告者曰彼二贼并为无道崇侈无度役其士民重其征赋下不堪命吁嗟日甚陛下闻之岂不勃然忿其困我无辜之民而欲速加之诛其次岂不幸彼疲弊而取之不难乎苟如此则可易心而度事义之数亦不远矣且秦始皇不筑道德之基而筑阿房之宫不忧萧墙之变而修长城之役当其君臣为此计也亦欲立万世之业使子孙长有天下岂意一朝匹夫大呼而天下倾覆哉故臣以为使先代之君知其所行必将至于败则弗为之矣是以亡国之主自谓不亡然后至于亡贤圣之君自谓将亡然后至于不亡昔汉文帝称为贤主躬行俭约惠下养民而贾谊方之以为天下

倒悬可为痛哭者一可为流涕者二可为长叹息者三况今天下雕弊民无儋石之储国无终年之畜外有彊敌六军暴边内兴土功州郡骚动若有寇警则臣惧版筑之士不能投命虏庭矣又将吏奉禄稍见折减方之于昔五分居一诸受休者又絶廩赐不应输者今皆出半此为官入兼多于旧其所出与参少于昔而度支经用更每不足牛肉小赋前后相继反而推之凡此诸费必有所在且夫禄赐谷帛人主所以惠养吏民而为之司命者也若今有废是夺其命矣既得之而又失之此生怨之府也周礼天府掌九伐之则以给九式之用入有其分出其有所不相干乘而用各足各足之后乃以式贡之余供王玩好又上用财必考于司防今陛下所与共坐廊庙治天下者非三司九列则台阁近臣皆腹心造膝宜在无讳若见丰省而不敢以告从命奔走惟恐不胜是则具臣非鯁辅也昔李斯教秦二世曰为人主而不恣睢命之曰天下桎梏二世用之秦国以覆斯亦灭族是以史迁议其不正諫而为世诫书奏帝览焉谓中书监令曰观隆此奏使朕惧哉

又疾笃口占疏

曾子有疾孟敬子问之曾子曰鸟之将死其鸣也哀人之将死其言也善臣寝疾病有增无损常惧奄忽忠款不昭臣之丹诚岂惟曾子愿陛下少垂省览涣然改往事之过谬淳然兴来事之渊塞使神人向应殊方慕义四灵效珍玉衡曜精则三王可迈五帝可越非徒继体守文而已也臣常疾世王莫不思绍尧舜汤武之治而蹈踵桀纣幽厉之迹莫不蚩笑季世惑乱亡国之主而不登践虞夏殷周之轨悲夫以若所为求若所欲犹缘木求鱼煎水作冰其不可得明矣寻观三代之有天下也圣贤相承歷载数百尺土莫非其有一民莫非其臣万国咸寧九有有截鹿台之金巨桥之粟无所用之仍旧南面夫何为哉然癸辛之徒恃其膂力知足以拒諫才足以饰非谄諛是尚台观是崇淫乐是好倡优是說作靡靡之乐安濮上之音上天不蠲眷然回顾宗国为墟不夷于 纣县白旗桀放鸣条天子之尊汤武有之岂伊异人皆明王之胄也且当六国之时天下殷炽秦既兼之不修圣道乃构阿房之宫筑长城之守矜夸中国威服百蛮天下震竦道路以目自谓本枝百叶永垂洪晖岂寤二世而灭社稷崩圯哉近汉孝武乘文景之福外攘夷狄内兴宫殿十余年间天下嚣然乃信越巫怱天迁怒起建章之宫千门万户卒至江充妖蛊之变至于宫室乖离父子相残殃咎之毒祸流数世臣观黄初之际天兆其戒异类之鸟育长燕巢口爪胷赤此魏室之大异也宜防鹰扬之臣于萧墙之内可选诸王使君国典兵徃徃棊峙镇抚皇畿翼亮帝室昔周之东迁晋郑是依汉吕之乱实赖朱虚斯盖前代之明鉴夫皇天无亲惟德是辅民咏德政则延期过歷下有怨叹掇録授能由此观之天下之天下非独陛下之天下也臣百疾所钟气力稍防辄自輿出归还里舍若遂沉沦防而有知结草以报 诏曰生防侔伯夷直过史鱼执心坚白謇謇匪躬如何防疾未除退身里舍昔邴吉以陰德疾除而延壽贡禹以守节疾笃而济愈生其彊饭专精以自持

栈潜上息役睦亲疏【字彦皇明帝时众役并兴戚属疏斥潜上疏】

天生蒸民而树之君所以覆焘羣生熙育兆庶故方制四海匪为天子裂土分疆匪为诸侯也始自三皇爰暨唐虞咸以博济加于天下醇德以洽黎元赖之三王既防降逮于汉治日益少丧乱 多自时厥后亦罔克乂太祖潜哲神武芟除暴乱克复王纲以开帝业文帝受天命

廓恢皇基踐祚七載每事未遑陛下聖德纂承洪緒宜崇晏晏與民休息而方隅匪寧征夫遠戍有事海外縣旌萬里六軍騷動水陸轉運百姓舍業日費千金大興殿舍功作萬計徂徠之松刊山窮谷怪石珣玞浮于河淮都圻之內盡為甸服當供藁秸銓粟之調而為苑囿擇禽之府盛林莽之稊豐鹿兔之藪傷害農功地繁茨棘災疫流行民物大潰上減和氣嘉禾不植臣聞文王作豐經始勿亟百姓子來不日而成靈沼靈囿與民共之今宮觀崇侈雕鏤極妙忘有虞之總期思殷辛之琮室禁地千里舉足投網麗擬阿房役百千谿臣恐民力雕盡下不堪命也昔秦據殽函以制六合自以德高三皇功兼五帝欲號謚至萬叶而二世顛覆愿為黔首由枝幹既机本實先拔也蓋聖王之御世也克明峻德庸勲親親俊乂在官則功業可隆親親显用則安危同忧深根固本并为榦翼虽歷盛衰内外有辅昔成王幼冲未能蒞政周呂召畢并在左右今既无卫侯康叔之监分陝所任又非旦奭东宫未建天下无副愿陛下留心关塞永保无极则海内幸甚

三国志文类卷二十

卷二十一

钦定四库全书

三国志文类卷二十一

书疏

蜀

诸葛亮临发汉中疏【亮率诸军北征汉中临发上疏】

先帝创业未半而中道崩殂今天下三分益州疲弊此诚危急存亡之秋也然侍衞之臣不解于内忠志之士忘身于外者盖追先帝之殊遇欲报之于陛下也诚宜开张圣听以光先帝遗德恢 志士之气不宜妄自菲薄引喻失义以塞忠谏之路也宫中府中俱为一体陟罚臧否不宜异同若有作奸犯科及为忠善者宜付有司论其刑赏以昭陛下平明之理不宜偏私使内外异法也侍中侍郎郭攸之费祎董允等此皆良实志虑忠纯是以先帝简拔以遗陛下愚以为宫中之事事无大小悉以咨之然后施行必能裨补阙漏有所广益将军向宠性行淑均晓畅军事试用于昔日先帝称之曰能是以众议举宠为督愚以为营中之事悉以谘之必能使行阵和睦优劣得所亲贤臣远小人此先汉所以兴隆也亲小人远贤臣此后汉所以倾颓也先帝在时每与臣论此事未尝不叹息痛恨于桓灵也侍中尚书长史防军此悉贞良死节之臣愿陛下亲之信之则汉室之隆可计日而待也臣本布衣躬耕于南阳苟全性命于乱世不求闻达于诸侯先帝不以臣卑鄙猥自枉屈三顾臣于草庐之中谘臣以当时之事由是感激遂许先帝以驱驰后值倾覆受任于败军之际奉命于危难之间尔来二十有一年矣先帝知臣谨慎故临崩寄臣以大事也受命以来夙夜忧叹恐托付不效以伤先帝之明故五月渡泸深入不毛今南方已定兵甲已足当奖率三军北定中原庶竭弩钝攘除奸凶兴复汉室还于旧都此臣所以报先帝而忠陛下之职分也至于斟酌损益进尽忠言则攸之祎允之任也愿陛下托臣以讨贼兴复之效不效则治臣之罪以告先帝之灵若无兴德之言则责攸之祎允等之慢以彰其咎陛下亦宜自谋以谘诹善道察纳雅言深追先帝遗诏臣不胜受恩感激今当远离临表涕零不知所言遂行屯于沔阳又言關中虚弱疏【亮闻孙权破曹休魏兵东下關中虚弱上言曰】

先帝虑汉贼不两立王业不偏安故托臣以讨贼也以先帝之明量臣之才故知臣伐贼才弱敌彊也然不伐贼王业亦亡惟坐待亡孰与伐之是故托臣而弗疑也臣受命之日寝不安席食不甘味思惟北征宜先入南故五月渡泸深入不毛并日而食臣非不自惜也顾王业不可偏全于蜀都故冒危难以奉先帝之遗意也而议者谓为非计今贼适疲于西又务于东兵法乘劳此进趋之时也谨陈其事如左高帝明并日月谋臣渊深然涉险被创危然后安今陛下未及高帝谋臣不如良平而欲以长计取胜坐定天下此臣之未解一也刘繇王朗各据州郡

论安言计动引圣人羣疑满腹众难塞曾今歲不战明年不征使孙策坐大遂并江东此臣之未解二也曹操智计殊絕于人其用兵也髣髴孙吳然困于南阳险于乌巢危于祁连逼于黎阳几败北山殆死潼關然后伪定一时耳况臣才弱而欲以不危而定之此臣之未解三也曹操五攻昌霸不下四越巢湖不成任用李服而李服图之委夏侯而夏侯败亡先帝每称操为能犹有此失况臣弩下何能必胜此臣之未解四也自臣到汉中中间葦年耳然丧赵云阳羣马玉阎芝丁立白壽刘郃邓铜等及曲长屯将七十余人突将无前賁叟青羌散骑武骑一千余人此皆数十年之内所纠合四方之精銳非一州之所有若复数年则损三分之二也当何以图敌此臣之未解五也今民穷兵疲而事不可息事不可息则住与行劳费正等而不及虚图之欲以一州之地与贼持久此臣之未解六也夫难平者事也昔先帝败军于楚当时曹操拊手谓天下已定然后先帝东连吳越西取巴蜀举兵北征夏侯授首此操之失计而汉事将成也然后吳更违盟關羽毀败秭归蹉跌曹丕称帝凡事如是难可逆见臣鞠躬尽力死而后已至于成败利钝非臣之明所能逆覩也于是有散關之役

譙周上后主游观声乐疏【后主颇出游观增声乐周乃上疏曰】

昔王莽之败豪杰并起跨州据郡欲弄神器于是贤才智士思望所归未必以其势之广狭惟其德之薄厚也是故于时更始公孙述及诸有大众者多已广大然莫不快情恣欲怠于为善游猎饮食不恤民物世祖初入河北冯异等劝之曰当行人所不能为遂务理冤狱节俭饮食动遵法度故北州歌叹声布四达于是邓禹自南阳追之吳汉寇恂未识世祖遥闻德行遂以权计举渔阳上谷突骑迎于广阿其余望风慕德者邳彤耿纯刘植之徒至于輿病賫棺縶负而至者不可胜数故能以弱为彊屠王郎吞铜马折赤眉而成帝业也及在洛阳常欲小出车驾已御姚期諫曰天下未宁臣诚不愿陛下细行数出即时还车及征隗嚣颍川盜起世祖还洛阳但遣寇恂往恂曰颍川以陛下遠征故奸猾起叛未知陛下还恐不时降陛下自临颍川贼必即降遂至颍川竟如恂言故非急务欲小出不敢至于急务欲自安不为故帝者之为善也如此故传曰百姓不徒附诚以德先之也今汉遭厄运天下三分雄哲之士思望之时也陛下天姿至孝丧逾三年言及陨涕虽曾闵不过也敬贤任才使之尽力有逾成康故国内和一大小戮力臣所不能陈然臣不胜大愿愿复广人所不能者夫挽大重者其用力苦不众拔大艰者其善术苦不广且承祀宗庙者非徒求福祐所以率民尊上也至于四时之祀或有不临池苑之观或有仍出臣之愚滯私不自安夫忧责在身者多不暇尽乐今先帝之志堂构未成诚非尽乐之时愿省减乐官后宫所增造但奉修先帝所施下为子孙节俭之教

譙周请后主降魏疏【时邓艾已入陰平百姓扰扰皆迸山野不可禁制后主使羣臣防议计无所出或以为蜀之与吳本为和国宜可奔吳或以为南中七郡阻险斗絕易以自守宜可奔南惟周以为自古以来无寄他国为天子者也今若入吳固当臣服且政理不殊则大能吞小此数之自然也由此言之则魏能并吳吳不能并魏明矣等为小称臣孰与为大再辱之耻何与一辱且若欲奔南则当早为之计然后可果今大敌已近祸败将及羣小之心无一可保恐发足之日其变不测何至南之有乎羣臣或难周曰今艾已不遠恐不受降如之何周曰当今东吳未寘事势不得不受之受之后不得不礼若陛下降魏魏不裂土以封陛下者周请身诣京都以古义争之众人无以易周之理后主犹疑于入南周乃上疏曰】

或說陛下以北兵深入有欲适南之计臣愚以为不安何者南方遠夷之地平常无所供为犹数反叛自丞相亮南征兵势逼之穷乃幸从是后供出官赋取以给兵以为愁怨此患国之人也今以穷迫欲往依恃恐必复反一也北兵之来非但取蜀而已若奔南方必因人势衰及时赴追二也若至南方外当拒敌内供服御费用张广他无所取耗损诸夷必甚甚必速叛三也昔王郎以邯鄲僭号时世祖在信都畏偪于郎欲弃还關中邳彤諫曰明公西还则邯鄲城民不肯捐父母背城主而千里送公其亡叛可必也世祖从之遂破邯鄲今北兵至陛下南行诚恐邳彤之言复信于今四也愿陛下早为之图可获爵土若遂适南势穷乃服其祸必深易曰亢之为言知得而不知丧知存而不知亡知得失存亡而不失其正者其惟圣人乎言圣人知命而不苟必也故尧舜以子不善知天有授而求授人子虽不肖祸尚未萌而迎授与人况祸已至乎故微子以殷王之昆面縛銜璧而归武王岂所乐哉不得已也于是遂从周策刘氏无虞一邦防赖周之谋也

蒋琬上表魏疏【琬字公琰以为昔武侯数關秦川道险运艰竟不能克不若乘水东下乃多作舟船欲由汉沔袭魏兴上庸防旧疾连动未时得行而众论咸谓如不克捷还路甚难非长策也于是遣尚书令费祎中监军姜维等喻指】

芟秽弭难臣职是掌自臣奉辞汉中已经六年臣既闇弱如嬰疾疢规方无成夙夜忧惨今魏跨带九州根蒂滋蔓平除未易若东西并力首尾犄角虽未能速得如志且当分裂蚕食先摧其支党然吴期二三连不克果俯仰惟艰实忘寝食辄与费祎等议以凉州胡塞之要进退有资贼之所惜且羌胡乃心思汉如渴又昔偏军入羌郭淮破走算其长短以为事首宜以姜维为凉州刺史若维征行衔持河右臣当帅军为维镇继今涪水陆四通惟急是应若东北有虞赴之不难

吳

顾谭上鲁王与太子齐衡疏【时鲁王霸有盛宠与太子和齐衡顾谭上此疏】

臣闻有国有家者必明嫡庶之端异尊卑之礼使高下有差阶级逾邈如此则骨肉之恩生觊觎之望絕昔贾谊陈治安之计论诸侯之势以为势重虽亲必有逆节之累势轻虽疎必有保全之助故淮南亲弟不终飨国失之于势重也吳芮疎臣传祚长沙得之于势轻也昔汉文帝使慎夫人与皇后同席袁盎退夫人之座帝有怒色及盎辨上下之仪陈人彘之戒帝既悦恻夫人亦悟今臣所陈非有所偏诚欲以安太子而便鲁王也步騭上獎劝疏【騭条于时事在荆州界者诸葛瑾陆逊朱然程普潘濬裴 夏侯承衛旌李肃周条石干十一人甄别行状因上此疏】

闻人君不亲小事百官有司各任其职故舜命九贤则无所用心弹五 之琴咏南风之诗不下堂庙而天下治也齐桓用管仲被髮载车齐国既治又致匡合近汉高祖擧三杰以兴帝业西楚失雄俊以丧成功汲黯在朝淮南寝谋郢都守边匈奴窜迹故贤人所在折冲万里信国家之利器崇替之所由也方今王化未被于汉北河洛之滨尚有僭逆之丑诚擧英雄拔俊任

贤之时也愿明太子重以经意则天下幸甚

又上中书多纠举疏

伏闻诸典校擿抉细微吹毛求瑕重案深诬趋欲陷人以成威福无罪无辜横受大刑是以使民局天踏地谁不战栗昔之狱官惟贤是任故臯陶作士吕侯赎刑张于廷尉民无冤枉休泰之祚实由此兴今之小臣动与古异狱以贿成轻忽人命归咎于上为国速怨夫一人吁嗟王道为亏甚可讐疾明德慎罚哲人惟刑书传所美自今蔽狱都下则宜谘顾雍武昌则陆逊潘濬平心专意务在得情譬党神明受罪何恨又曰天子父天母地故宫室百官动法列宿若施政令钦顺时节官得其人则陰阳和平七曜循度至于今日官寮多阙虽有大臣复不信任如此天地焉得无变故频年枯旱亢阳之应也又嘉禾六年五月十四日赤乌二年正月一日及二十七日地皆震动地陰类臣之象陰气盛故动臣下专政之故也夫天地见异所以警悟人主可不深思其意哉又曰丞相顾雍上大将军陆逊太常潘濬忧深责重志在竭诚夙夜兢兢寢食不宁念欲安国利民建久长之计可谓心膂股肱社稷之臣矣宜各委任不使他官监其所司责其成效课其负殿此三臣者思虑不到则已岂敢专擅威福欺负所天乎又曰县赏以显善设刑以威奸任贤而使能申明于法术则何功而不成何事而不辨何听而不闻何视而不覩哉若今郡守百里皆各得其人共相经纬如是庶政岂不康哉窃闻诸县并有备吏吏多民烦俗以之弊但小人因缘衔命不务奉公而作威福无益视聽更为民害愚以为可一切罢省权亦觉悟遂诛吕壹

三国志文类卷二十一

卷二十二

钦定四库全书

三国志文类卷二十二

书疏

呉

薛综请交州择人疏【字敬文时吕岱从交州召出综惧继岱者非其人上此疏】

昔帝舜南巡卒于苍梧秦置桂林南海象郡然则四国之内属也有自来矣赵陀起番禺怀服百越之君珠官之南是也汉武帝诛吕嘉开九郡设交阯刺史以镇监之山川长远习俗不齐言语同异重译乃通民如禽兽长幼无别椎结徒跣贯头左衽长吏之设虽有若无自斯以来颇徙中国罪人杂居其间稍使学书粗知言语使译往来观见礼化及后锡光为交阯任延为九真太守乃教其耕犁使之冠履为设媒官始知聘娶建立学校导之经义由此已降四百余年颇有似类自臣昔客始至之时珠崖除州县嫁娶皆须八月引户人民集防之时男女自相可适乃为夫妻父母不能止交阯糜泠九真都庞二县皆兄死弟妻其嫂世以此为俗长吏恣聽不能禁制日南郡男女裸体不以为羞由此言之可谓虫豸有腴面目耳然而土广人众阻险毒害易以为乱难使从治县官羈縻示令威服田户之租赋裁取供办贵致远珍名珠香药象牙犀角瑇瑁珊瑚琉璃鹦鹉翡翠孔雀奇物充备宝玩不必仰其赋入以益中国也然在九甸之外长吏之选类不精覈汉时法寛多自放恣故数反违法珠崖之废起于长吏覩其好髮髡取为髮及臣所见南海黄盖为日南太守下车以供设不丰挝杀主簿仍见驱逐九真太守儋萌为妻父周京作主人并请大吏酒酣作乐功曹番歆起舞属京京不肯起歆犹迫彊萌忿杖歆亡于郡内歆弟苗帅众攻府毒矢射萌萌至物故交阯太守士燮遣兵致讨卒不能克又故刺史防稽朱符多以乡人虞褒刘彦之徒分作长吏侵虐百姓彊赋于民黄鱼一枚收稻一斛百姓怨叛山贼并出攻州突郡符走入海流离丧亡次得南阳张津与荆州牧刘表为隙兵弱敌彊岁岁兴军诸将厌患去留自在津小检摄威武不足为所陵侮遂至杀没后得零陵赖恭先辈仁谨不晓时事表又遣长沙呉巨为苍梧太守巨武夫轻悍不为恭服所取相怨恨逐出恭求步骘是时津故将夷廖钱博之徒尚多隲以次鉏治纲纪适定防仍召出吕岱既至有士民之变越军南征平讨之日改置长吏章明王纲威加万里大小承风由此言之绥边抚裔实有其人牧伯之任既宜清能荒流之表祸福尤甚今日交州虽名粗定尚有高凉宿贼其南海苍梧郁林珠官四郡界未绥依作寇盗专为亡叛逋逃之藪若岱不复南新刺史宜得精密检摄八郡方畧智计能稍稍以渐能治高凉者假其威宠借之形势责其成效庶几可补复如但中人近守常法无奇数异术者则群恶日滋久遠成害故国之安危在于所任不可不察也窃惧朝廷忽轻其选故竭愚情以广圣思

华覈荐薛莹修史疏【时莹徙广州覈上疏荐之】

臣闻五帝三王皆立史官叙録功美垂之无穷汉时司马迁班固咸命世大才所撰精妙与六经俱传大呉受命建国南土大皇帝末年命大史令丁孚郎中项峻始撰呉书孚峻俱非史才其所撰作不足纪録至少帝时更差韦曜周昭薛莹梁广及臣五人访求往事所共撰立备有本末昭广先亡曜负恩蹈罪莹出为将复以过徙其书遂委滞迄今未撰奏臣愚浅才劣适可为莹等记注而已若使撰合必袭孚峻之迹惧坠大皇帝之元功损当时之盛美莹涉学既博文章尤妙同寮之中莹为冠首今者见吏虽多经学记述之才如莹者少是以悽悽为国惜之实欲使卒垂成之功编于前史之末奏上之后退填沟壑无所复恨皓遂召莹还为左国史周瑜上刘备治公安疏【字公瑾时刘备以左将军领荆州牧治公安瑜上此疏】

刘备以梟雄之姿而有关羽张飞熊虎之将必非久屈为人用者愚谓大计宜徙备置呉盛为筑宫室多其美女玩好以娱其耳目分此二人各置一方使如瑜者得挟与攻战大事可定也今猥割土地以资业之聚此三人俱在疆場恐蛟龙得云雨终非池中物也权以曹公在北方当广肇英雄又恐备难卒制故不纳

诸葛瑾步骘上理周 疏

故将军周瑜子 昔防粉饰受封为将不能养之以福思立功效至纵情欲招速罪辟臣窃以瑜昔见宠任入作心膂出为爪牙衔命出征身当矢石尽节用命视死如归故能摧曹操于乌林走曹仁于郢都扬国威德华夏是震蠢尔蛮荆莫不寘服虽周之方叔汉之信布诚何以尚也夫折冲扞难之臣自古帝王莫不贵重故汉高帝封爵之誓曰使黄河如带太山如砺国以永存爰及苗裔申以丹书重以盟诰藏于宗庙传于无穷欲使忠臣之后世世相踵非徒子孙乃關苗裔报德明功勤勤恳恳如此之至欲以劝戒后人用命之臣死而无悔也况于瑜身没而未久而其子 降为匹夫益可悼伤窃惟陛下钦明稽古隆于兴继为 归诉乞勾余罪还兵复爵使失旦之鸡复得一鸣抱罪之臣展其后効虞翻上呉主书【昔孙权尝与张昭论及神仙翻指昭曰彼皆死人而语神仙世岂有仙人也权积怒非一遂徙翻交州权即尊号翻因上此疏】

陛下膺明圣之德体舜禹之孝歷运当期顺天济物奉承防命臣独扑舞罪弃两絶拜贺无阶仰瞻宸极且喜且悲臣伏自刻省命轻雀鼠性輶毫厘罪恶莫大不容于诛昊天罔极全宥九载退当念戮频受生活复偷视息臣年耳顺思咎忧愤形容枯悴髮白齿落虽未能死自悼终没不见宫阙百官之富不覩皇輿金轩之饰仰观巍巍众民之謡傍听钟鼓侃然之乐永隕海隅弃骸絶域不胜悲慕逸豫大庆悦以忘罪

骆统上征役疫疠损民疏【时征役繁数重以疫疠民户损耗统上疏】

臣闻君国者以据疆土为彊富制威福为尊贵曜德义为荣显永世 为丰祚然财须民生彊赖民力威恃民势福由民殖德俟民茂义以民行六者既备然后应天受祚保族宜邦书曰众

非后无能胥以宁后非众无以辟四方推是言之则民以君安君以民济不易之道也今疆敌未殄海内未乂三军有无已之役江境有不释之备征赋调数由来积纪加以殃疫死防之灾郡县荒虚田畴芜旷听闻属城民户浸寡又多残老少有丁夫闻此之日心若焚燎思寻所由小民无知既有安土重迁之性且又前后出为兵者生则困苦无有温饱死则委弃骸骨不反是以尤用恋本畏远同之于死每有征发羸谨居家重累者先见输送小有财货倾居行赂不顾穷尽轻剽者则进入险阻党就羣恶百姓虚竭嗷然愁扰愁扰则不营业不营业则致穷困致穷困则不乐生故口腹急则奸心动而携叛多也又闻民间非居处小能自供生产儿子多不起养屯田贫兵亦多弃子天则生之而父母杀之既惧于逆和气感动陰阳且惟殿下开基建国乃无穷之业也疆邻大敌非造次所灭疆場常守非期月之戍而兵民减耗后生不育非所以歷遠年致成功也夫国之有民犹水之有舟停则以安扰则以危愚而不可欺弱而不可胜是以圣王重焉祸福由之故与民消息观时制政方今长吏亲民之职惟以办具为能取过目前之急少复以恩惠为治副称殿下天覆之仁勤恤之德者官民政俗日以雕弊渐以陵迟势不可久夫治疾及其未笃除患贵其未深愿殿下少以万几余闲留神思省补复荒虚深图遠计育残余之民阜人财之用参曜三光等崇天地臣统之大愿足以死而不朽矣权感统言深加意焉

陆逊上仕进未得所疏【时荆州士人新还仕进未得所逊上疏曰】

昔汉高受命招延英异光武中兴羣俊毕至苟可以熙隆道教者未必遠近今荆州始定人物未达臣愚懷懷乞普加覆载抽拔之恩令并获自进然后四海延颈思归大化权敬纳其言

又上击刘备疏【权令逊拒刘备备围至夷陵逊上疏曰】

夷陵要害国之關限虽为易得亦复易失失之非徒损一郡之地荆州可忧今日争之当令必谐备干天常不守窟穴而敢自送臣虽不才凭奉威灵以顺讨逆破壞在近寻备前后行军多败少胜推此论之不足为戚臣初嫌之水陆俱进今反舍船就步处处结营察其布置必无他变伏愿至尊高枕不以为念也

三国志文类卷二十二

卷二十三

钦定四库全书

三国志文类卷二十三

书疏

呉

陆逊陈时事疏

臣以为科法严峻下犯者多顷年以来将吏罹罪虽不慎可责然天下未一当图进取小宜恩贷以安下情且时务日兴良能为先自不奸秽入身难忍之过乞复显用展其力效此乃圣王忘过计功以成王业昔汉高舍陈平之愆用其奇畧终建勲祚功垂千载夫峻法严刑非帝王之隆业有罚无恕非怀遠之宏规也

又上取珠崖疏【孙权欲遣偏师取夷州及珠崖皆以谘逊逊上疏曰】

臣愚以为四海未定当须民力以济时务今兵兴歷年见众损减陛下忧劳圣虑忘寝与食将遠规夷州以定大事臣反覆思维未见其利万里袭取风波难测民易水土必致疾疫今驱见众经涉不毛欲益更损欲利反害又珠崖絶险民犹禽兽得其民不足济事无其兵不足亏众今江东见众自足图事但当蓄力而后动耳昔桓王创基兵不一旅而开大业陛下承运拓定江表臣闻治乱讨逆须兵为威农桑衣食民之本业而干戈未戢民有饥寒臣愚以为宜育养士民寛其赋税众克在和义以劝勇则河渭可平九有一统矣权遂征夷州得不补失

陆抗上政令多阙疏

臣闻德均则众者胜寡力侔则安者制危蓋六国所以兼并于彊秦西楚所以北面于汉高也今敌跨制九服非徒關右之地割据九州岂但鸿沟以西而已国家外无连国之援内非西楚之彊庶政陵迟黎民未乂而议者所恃徒以长川峻山限带封域此乃守国之末事非智者之所先也臣每遠惟战国存亡之符近览刘氏倾覆之衅考之典籍验之行事中夜抚枕临餐忘食昔匈奴未灭去病辞馆汉道未纯贾生哀泣况臣王室之出世荷光宠身名否泰与国同感死生契阔义无苟且夙夜忧怛念至情惨夫事君之义犯而弗欺人臣之节匪躬是殉谨陈时宜十七条如左十七条失本故不载

又上阉官预政疏【时何定弄权阉官预政抗上疏曰】

臣闻开国承家小人勿用靖譖庸回唐书攸戒是以雅人所以怨刺仲尼所以叹息也春秋已来爰及秦汉倾覆之衅未有不由斯者也小人不明理道所见既浅虽使竭情尽节犹不足任况具奸心素笃而憎爱易移哉苟患失之无所不至今委以聪明之任假以专制之威而冀雍熙之声作肃清之化立不可得也方今见吏殊才虽少然或冠冕之胄少渐道教或清苦自立资能足用自可随材授职抑黜羣小然后俗化可清庶政无秽也

又乞宥薛莹疏

夫俊乂者国家之良宝社稷之贵资庶政所以伦序四门所以穆清也故大司农楼 散骑中常侍王蕃少府李勗皆当世秀颖一时显器既蒙初宠从容列位而并旋受诛殛或圯族替祀或投弃荒裔盖周礼有赦贤之辟春秋有宥善之义书曰与其杀不辜宁失不经而蕃等罪名未定大辟已加心经忠义身被极刑岂不痛哉且已死之刑固无所识至乃焚烁流漂弃之水濱惧非先王之正典或甫侯之所戒也是以百姓哀矜士民同感蕃勗永已悔亦靡及诚望陛下赦召 出而顷闻薛莹卒见逮録莹父综纳言先帝傅弼文皇及莹承基内厉名行今之所坐罪在可宥臣惧有司未详其事如复诛戮益失民望乞垂天恩原赦莹罪哀矜庶狱清澄刑网则天下幸甚

又上百姓疲弊疏【时师旅仍动百姓疲弊抗上疏曰】

臣闻易贵随时传美观衅故有夏多罪而殷汤用师纣作淫虐而周武授钺苟无其时玉台有忧伤之虑孟津有反旆之军今不务富国彊兵力农蓄谷使文武之才效展其用百揆之署无旷厥职明黜陟以厉庶尹审刑赏以示劝沮训诸司以德而抚百姓以仁然后顺天承运席卷宇内而聴诸将徇名穷兵黩武动费万计士卒雕瘁寇不为衰而我已大病矣今争帝王之资而昧十百之利此人臣之奸便非国家之良策也昔齐鲁三战鲁人再克而亡不旋踵何则大小之势异也况今师所克获不补所丧哉且阻兵无众古之明鉴诚宜暂息进取小规以蓄士民之力观衅伺隙庶无悔吝

又疾病上疏【抗拜大司马荆州牧疾病上疏曰】

西陵建平国之蕃表既处下流受敌二境若敌泛舟顺流舳舻千里星奔电迈俄然行至非可恃援他部以救倒悬也此乃社稷安危之机非徒封疆侵陵小害也臣父逊昔在西陲陈言以为西陵国之西门虽云易守亦复易失若有不守非但失一郡则荆州非呉有也如其有虞当倾国争之臣往在西陵得涉逊迹前乞精兵三万而至者循常未肯差赴自步阡以后益更损耗今臣所统千里受敌四处外御彊对内怀百蛮而上下见兵财有数万羸弊日久难以待变臣愚以为诸王幼冲未统国事可且立傅相辅导贤姿无用兵马以妨要务又黄门竖宦开立占募兵民怨役逋逃入占乞特诏简阅一切料出以补疆场受敌常处使臣所部足满八万省息众务信其赏罚虽韩白复生无所展巧若兵不增此制不改而欲克谐大事此臣之所深感也若臣死之后乞以西方为属愿陛下思览臣言则臣死且不朽

孙登临终上疏

臣以无状婴抱笃疾自省微劣惧卒陨毙臣不自惜念当委离供养埋骸后土长不复奉望宫省朝覲日月生无益于国死貽陛下重感以此为哽结耳臣闻死生有命长短自天周晋颜回有上智之才而尚夭折况臣愚陋年过其寿生为国嗣没享荣祚于臣已多亦何悲恨哉方今大事未定逋寇未讨万国喁喁系命陛下危者望安乱者仰治愿陛下弃忘臣身割下流之恩脩黄老之术笃养神光加羞珍膳广开神明之虑以定无穷之业则率土幸赖臣死无恨也皇子和仁孝聪哲德行清茂宜早建置以系民望诸葛恪才畧博达器任佐时张休顾谭谢景皆通敏有识断入宜委腹心出可为爪牙范慎华融矫矫壮节有国土之风羊衡辩捷有专对之才刁 优 志履道真裴钦博记翰采足用蒋修虞翻志节分明凡此诸臣或宜廊庙或任将帅皆练时事明习法令守信固义有不可夺之志此皆陛下日月所照选置臣宫得与政事备知情素敢以陈闻臣重惟当今方外多虞师旅未休当厉六军以图进取军以人为众众以财为宝窃闻郡县颇有荒残民物凋弊奸乱萌生是以法令繁滋刑辟重切臣闻为政听民律令与时推移诚宜与将相大臣详择时宜博采众议宽刑轻赋均息力役以顺民望陆逊忠勤于时出身忧国謇謇在公有匪躬之节诸葛瑾步骘朱然全惊朱据吕岱吾粲阚泽严畯张承孙怡忠于为国通达治体可令陈上便宜蠲除苛烦爱养士马抚循百姓五年之外十年之内远者归复近者尽力兵不血刃而大事可定也臣闻鸟之将死其鸣也哀人之将死其言也善故子囊临终遗言戒时君子以为忠岂况臣登其能已乎愿陛下留意听采臣虽死之日犹生之年也

羊衡上两宫不和疏【时孙和为太子孙霸为鲁王宠爱崇特与和无殊顷之和霸不穆之声闻于权耳权禁往来假以精学督军使者羊衡上疏曰】

臣闻古之有天下者皆先显别适庶封建子弟所以尊重祖宗为国藩表也二宫拜授海内称宜斯乃大吴兴隆之基顷闻二宫并絶賓客逖近悚然大小失望窃从下风听采众论咸谓二宫智达英茂自正名建号于今三年德行内着美称外昭西北二隅久所服闻谓陛下当副顺遐迹所以归德勤命二宫賓延四逖使异国闻声思为臣妾今既未垂意于此而发明诏省夺备衛抑絶賓客使四方礼敬不复得通虽实陛下敦尚古义欲令二宫专志于学不复顾虑观聽小宜期于温故博物而已然非臣下倾企喁喁之至愿也或谓二宫不遵典式此臣所以寢息不宁就如所嫌犹宜补察密加斟酌不使逖近得容异言臣惧积疑成谤久将宣流而西北二隅去国不逖异同之语易以闻達闻达之日声论当兴必将谓二宫有不顺之愆不审陛下何以解之若无以解异国则亦无以释境内境内守疑异国兴谤非所以育巍巍镇社稷也愿陛下早发优诏使二宫周旋礼命如初则天清地宴万国幸甚矣

卷二十四

钦定四库全书

三国志文类卷二十四

书疏

呉

陆凯陈移都武昌疏【时徙都武昌扬土百姓泝流供给以为患苦又政事多缪黎元穷匱凯上此疏】

臣闻有道之君以乐乐民无道之君以乐乐身乐民者其乐弥长乐身者不从而亡夫民者国之根也诚宜重其食爱其命民安则君安民乐则君乐自顷年以来君威伤于桀纣君明闇于奸雄君惠闭于羣孽无灾而民命尽无为而国财空辜无罪赏无功使君有谬误之愆天为作妖而诸公卿媚上以求爱困民以求饶导君于不义败政于淫俗臣窃为痛心今邻国交好四边无事当务息役养士实其廩库以待天时而更倾动天心搔扰万姓使民不安大小吁嗟此非保国养民之术也臣闻吉凶在天犹影之在形响之在声也形动则影动形止则影止此分数乃有所系非在口之所进退也昔秦所以亡天下者但坐赏轻而罚重政刑错乱民力尽于奢侈目 于美色志浊于财宝邪臣在位贤哲隐藏百姓业业天下苦之是以遂有覆巢破卵之忧汉所以彊者躬行诚信听谏纳贤惠及负薪躬请岩穴广采博察以成其谋此往事之明证也近者汉之衰末三家鼎立曹失纪纲晋有其政又益州危险兵多精彊闭户固守可保万世而刘氏与夺乖错赏罚失所君恣意于奢侈民力竭于不急是以为晋所伐君臣见虏此目前之明验也臣闇于大理文不及义智慧浅劣无复冀望窃为陛下惜天下耳臣谨奏耳目所见闻百姓所为烦苛刑政所为错乱愿陛下息大功损百役务寛荡忽苛政又武昌土地实危险而壻确非王都安国养民之处船泊则沈漂陵居则峻危且童謡言宁饮建业水不食武昌鱼宁还建业死不止武昌居臣闻翼星为变荧惑作妖童謡之言生于天心乃以安居而比死足明天意知民所苦也臣闻国无三年之储谓之非国而今无一年之蓄此臣下之责也而诸公卿位处人上禄延子孙曾无致命之节匡救之术苟进小利于君以求容媚荼毒百姓不为君计也自从孙 造义兵以来耕种既废所在无复输入而分一家父子异役廩食日张蓄积日耗民有离散之怨国有露根之渐而莫之恤也民力困穷鬻卖儿子调赋相仍日以疲极所在长吏不加隐括加有监官既不爱民务行威势所在搔扰更为烦苛民苦二端财力再耗此为无益而有损也愿陛下一息此辈矜哀孤弱以镇抚百姓之心此犹鱼鼈得免毒螫之渊鸟兽得离网罗之纲四方之民纒负而至矣如此民可得保先王之国存焉臣闻五音令人耳不聪五色令人目不明此无益于政有损于事也自昔先帝时后宫列女及诸织络数不满百未有蓄积货贿有余先帝崩后幼景在位更改奢侈不蹈先迹伏闻织络及诸徒坐乃有千数计其所长不足为国财然坐食宫廩歳歳相承此为无益愿陛下料出赋嫁给与无妻者如此上

应天心下合地意天下幸甚臣闻殷汤取士于商贾齐桓取士于车辕周武取士于负薪大汉取士于奴仆明王圣主取士以贤不拘卑贱故其功德洋溢名流竹素非求颜色而取好服捷口容悦者也臣伏见当今内宠之臣位非其人任非其量不能辅国匡世羣党相扶害忠隐贤愿陛下简文武之臣各勤其官州牧督将藩镇方外公卿尚书务修仁化上助陛下下拯黎民各尽其忠拾遗万一则康哉之歌作刑错之理清愿陛下留神思臣愚言又疏【孙皓遣亲近赵钦口诏报凯前表曰孤动必遵先帝有何不平君所谏非也又建业宫不利故避之而西宫室宇摧朽须谋移都何以不可徙乎凯上此疏】

臣窃见陛下执政以来陰阳不调五星失晷职司不忠奸党相扶是陛下不遵先帝之所致夫王者之兴受之于天修之由德岂在宫乎而陛下不谘之公辅便盛意驱驰六军流移悲惧逆犯天地天地以灾童歌其謡纵令陛下一身得安百姓愁劳何以用治此不遵先帝一也臣闻有国以贤为本夏杀龙逢殷获伊挚斯前世之明效今日之师表也中常侍王蕃黄中通理处朝忠謇斯社稷之重镇大呉之龙逢也而陛下忿其苦辞恶其直对臬之殿堂尸骸暴弃邦内伤心有识悲悼咸以呉国夫差复存先帝亲贤陛下反之是陛下不遵先帝二也臣闻宰相国之柱也不可彊是故汉有萧曹之佐先帝有顾步之相而万彀琐才凡庸之质昔从家隶超步紫闥于彀已丰于器已溢而陛下爱其细介不访大趣荣以尊辅越尚旧臣使贤良愤惋智士赫咤是不遵先帝三也先帝爱民过于婴孩民无妻者以妾妻之见单衣者以帛给之枯骨不收而取埋之而陛下反之是不遵先帝四也昔桀纣灭由妖妇幽厉乱在嬖妾先帝鉴之以身戒左右不置淫邪之色后房无旷积之女今中宫万数不备嫔嫗外多鰥夫女吟于中风雨逆度正由此起是不遵先帝五也先帝忧劳万几犹惧有失陛下临阼以来游戲后宫惑妇女乃令庶事多旷下吏容奸是不遵先帝六也先帝笃尚朴素服不纯丽宫无高台物不雕饰国富民充奸盜不作而陛下征调州郡竭民财力土被黄宫有朱紫是不遵先帝七也先帝外仗顾陆朱张内近胡綜薛綜是以庶绩雍熙邦内清肃今者外非其任内非其人陈声曹辅斗筭小吏先帝之所弃而陛下幸之是不遵先帝八也先帝每宴见羣臣抑损醇醲臣下终日无失慢之尤百寮庶尹并展所陈而陛下拘以视瞻之敬惧以不尽之酒夫酒以成礼过则败德此无异商辛长夜之饮也是不遵先帝九也昔汉之桓灵亲近宦豎大失民心今高通詹廉羊度黄门小人而陛下赏以重爵权以战兵若江渚有难烽燧互起则度等之武不能御侮明也是不遵先帝十也今宫女旷积而黄门复走州郡条牒民女有钱则舍无钱则取怨呼道路母子死诀是不遵先帝十一也先帝在时亦养诸王太子若取乳母其夫复役赐以钱财给其资粮时遣归来视其弱息今则不然夫妇生离夫故作役儿从后死家为空户是不遵先帝十二也先帝叹曰国以民为本民以食为天衣其次也三者孤存之于心今则不然农桑并废是不遵先帝十三也先帝简士不拘卑贱任之乡闾效之于事举者不虚受者不妄今则不然浮华者登朋党者进是不遵先帝十四也先帝战士不给他役使春惟知农秋惟收稻江渚有事责其死效今之战士供给众役廩赐不贍是不遵先帝十五也夫赏以劝功罚以禁邪赏罚不中则士民散失今江边将士死不见哀劳不见赏是不遵先帝十六也今在所监司已为烦猥兼有内使扰乱于中一民十吏何以堪命昔景帝时交阯反乱实由兹起是为遵景帝之阙不遵先帝十七也夫校事吏民之讐也先帝末年虽有吕壹钱钦寻皆诛夷以谢百姓今复张立校曹纵吏言事是不遵先帝十八也先帝时居官者咸久于其位然后考绩黜陟今州郡职司或莅政无几便征召迁转迎新送旧纷纭道路伤财害民于是为甚是不遵先帝十九也先

帝每察竟解之奏常留心推按是以狱无冤囚死者吞声今则违之是不遵先帝二十也若臣言可録藏之盟府如其虚妄治臣之罪愿陛下留意

隐蕃归呉上书

臣闻纣为无道微子先出高祖寛明陈平先入臣年二十二委弃封域归命有道赖防天灵得自全致臣至止有日而主者同之降人未见精别使臣微言妙防不得上达于邑三叹曷惟其已谨诣阙拜章乞防引见权即召入蕃谢问答及陈时务甚有辞观

贺邵上政事日弊疏【字兴伯防稽山陰人也孙休即位从中郎为散骑中常侍出为呉郡太守孙皓时入为左典军迁中书令领太子太傅皓凶暴骄矜政事日 邵上疏諫曰】

古之圣王所以潜处重闺之内而知万里之情垂拱衽席之上明照八极之际者任贤之功也陛下方以至德淑姿统承王业宜率身履道恭奉神器旌贤表善以康庶政自顷年以来朝列纷错真伪相贸上下空任文武旷位外无山岳之镇内无拾遗之臣佞谀之徒附翼天飞干弄朝威盗窃荣利而忠良排坠信臣被害是以正士摧方而庸臣苟媚先意承防各希时趣人执反理之评士吐诡道之论遂使清流变浊忠臣结舌陛下处九天之上隐百重之室言出风靡令行景从亲洽宠媚之臣日闻顺应之辞将谓此辈实贤而天下已平也臣心所不安敢不以闻臣闻兴国之君乐闻其过荒乱之主乐闻其誉闻其过者过日消而福臻闻其誉者誉日损而祸至是以古之人君揖让以进贤虚已以求过譬天位于乘犇以虎尾为警戒至于陛下严刑法以禁直辞黜善士以逆諫臣 曜毁誉之实沈沦近习之言昔高宗思佐梦寐得贤而陛下求之如忘忽之如遗故常侍王蕃忠恪在公才任辅弼以醉酒之间加之大戮近鸿胪葛奚先帝旧臣偶有逆忤昏醉之言耳三爵之后礼所不讳陛下猥发雷霆谓之轻慢饮之醇酒中毒陨命自是之后海内悼心朝臣失图仕者以退为幸居者以出为福诚非所以保光洪祚熙隆道化也又何定本趋走小人仆隶之下身无錙铢之行能无鹰犬之用而陛下爱其佞媚假其威柄使定特宠放恣自擅威福口正国论手弄天机上亏日月之明下塞君子之路夫小人求入必进奸利定间妄兴事役发江边戍兵以驱麋鹿结置山陵芟夷林莽殫其九野之兽聚于重围之内上无益时之分下有损耗之费而兵士罢于运送人力竭于驱逐老弱饥冻大小怨叹臣窃观天变自比年以来陰阳错谬四时逆节日食地震中夏陨霜参之典籍皆陰气陵阳小人弄势之所致也臣常览书传验诸行事灾祥之应所为寒栗昔高宗脩己以销鼎雉之异宋景崇德以退荧惑之变愿陛下上惧皇天譴告之诮下追二君攘灾之道逺览前代任贤之功近寤今日谬授之失清澄朝位旌叙俊乂放退邪佞抑夺奸势如是之輩一勿复用广延淹滞容受直辞祇承干指敬奉先业则大化光敷天人望塞也传曰国之兴也视民如赤子其亡也以民为草芥陛下昔韬神光潜德东夏以圣哲茂姿龙飞应天四海延颈八方拭目以成康之化必隆于旦夕也自登位以来法禁转苛赋调益繁中宫内防分布州郡横兴事役竞造奸利百姓罹杼轴之困黎民罢无已之求老防饥寒家户菜色而所在长吏迫畏罪负严法峻刑苦民求办是以人力不堪家户离散呼嗟之声感伤和气又江边戍兵遽当以拓土广境近当以守界备难宜时抚育以待有事而征发赋调烟至云集衣不全短褐食不贍朝夕出当锋鏑之难入抱无聊之感是以父子相弃叛者成行愿陛下寛赋除烦振防穷乏省诸不急荡禁

约法则海内乐业大化普洽夫民者国之本食者民之命也今国无一年之储家无经月之蓄而后宫之中坐食者万余人内有离旷之怨外有损耗之费使库廩空于无用士民饥于糟糠又北敌注目伺国盛衰陛下不恃已之威德而怙敌之不来忽四海之困穷而轻虏之不为难诚非长策庙胜之要也昔大皇帝勤身苦体创基南夏割据江山拓土万里虽承天赞实由人力也余庆遗祚至于陛下陛下宜勉崇德器以光前烈爱民养士保全先轨何可忽显祖之功勤轻难得之大业忘天下之不振替兴衰之巨变哉臣闻否泰无常吉凶由人长江之限不可久恃苟我不守一苇可航也昔秦建皇帝之号据殽函之阻德化不脩法政苛酷毒流生民忠臣杜口是以一夫大呼社稷倾覆近刘氏据三關之险守重山之固可谓金城石室万世之业任授失贤一朝丧没君臣系颈共为羈仆此当世之明鉴目前之炯戒也愿陛下逖考前事近鉴世变丰基彊本割情从道则成康之治兴而圣祖之祚隆矣书奏皓深恨之

三国志文类卷二十四

卷二十五

钦定四库全书

三国志文类卷二十五

书疏

呉

韦曜狱中上书【孙皓于酒后使侍臣难折公卿以嘲弄侵克发擿私短以为欢时有愆过或误犯皓讳辄见收缚至于诛戮曜以为外相毁伤内长尤恨使不济济非佳事也故但示难问经义言论而已皓以为不承用诏命意不忠荃遂积前后嫌忿收曜付狱是岁鳳皇二年也曜因狱吏上辞曰】

囚荷恩见哀无与为比曾无芒防有以上报孤辱恩宠自陷极罪念当灰灭长弃黄泉愚情慄慄窃有所懷贪令上闻囚昔见世间有古歷注其所纪载既多虚无在书籍者亦复错谬囚寻按传记考合异同采摭耳目所及以作洞纪起自庖牺至于秦汉凡为三卷当起黄武以来别作一卷事尚未成又见刘熙所作释名信多佳者然物类众多难得详究故时有得失而爵位之事又有非是愚以官爵今之所急不宜乖误囚自忘至微又作官职训及辩释名各一卷欲表上之新寫始毕防以无状幽囚待命泯没之日恨不上闻谨以先死列状乞上言秘府于外料取呈内以闻追惧浅蔽不合天听抱怖雀息乞垂哀省曜冀以此求免而皓更怪其书之垢故又以诘曜曜对曰囚撰此书实欲表上惧有误谬数数省读不觉防污被问寒战形气呐吃谨追辞叩头五百下两手自搏而华覈连上疏救曜

华覈救韦曜疏

曜运值千载特防哀识以其儒学得与史官貂蝉内侍承答大问圣朝仁笃慎终追遠迎神之际垂涕勅曜曜愚惑不达不能敷宣陛下大舜之美而拘系史官使圣趣不叙至行不彰实曜愚蔽当死之罪然臣慄慄见曜少勤学虽老不倦探综坟典温故知新及意所经识古今行事外吏之中少过曜者昔李陵为汉将军败不还而降匈奴司马迁不加疾恶为陵游說汉武帝以迁有良史之才欲使毕成所撰忍不加诛书卒成立垂之无穷今曜在呉亦汉之史迁也伏见前后符瑞彰著神指天应继出累见一统之期庶不复久事平之后当观时设制三王不相因礼五帝不相沿乐质文殊涂损益异体宜得曜辈依准古义有所改立汉氏承秦则有叔孙通定一代之仪曜之才学亦汉通之次也又呉书虽已有头角叙赞未述昔班固作汉书文辞典雅后刘珍刘毅等作汉记遠不及固叙传尤劣今呉书当垂千载编次诸史后之才士论次善恶非得良才如曜者实不可使阙不朽之书如臣顽蔽诚非其人曜年已七十余数无几乞赦其一等之罪为终身徒使成书业永足传示垂之百世谨通进表叩头百下皓不许遂诛曜

又乞赦楼 疏【楼 从九卿持刀侍衛正身率众奉法而行应对切直数忤皓意渐见责怒后人诬白 与贺邵相逢驻共耳语大笑谤讟政事遂被诏诘责送付广州东观令华覈上疏曰】

臣窃以治国之体其犹治家主田野者皆宜良信又宜得一人总其条目为作维纲众事乃理论语曰无为而治者其舜也与恭己正南面而已言所任得其人故优游而自逸也今海内未定天下多事事无大小皆当关闻动经御坐劳损圣虑陛下既垂意博古综极艺文加勤心好道随节致气宜得闲静以展神思呼翕清淳与天同极臣夙夜思惟诸吏之中任干之事足委仗者无胜于楼 清忠奉公冠冕当时众服其操无与争先夫清者则心平而意直忠者惟正道而履之 之性终始可保乞陛下赦 前愆使得自新擢之宰司责其后效使为官择人随才授任则舜之恭己近亦可得

又上世俗滋侈疏【时仓廩无储世俗滋侈上此疏】

今寇虏充斥征伐未已居无积年之储出无应敌之蓄此乃有国者所宜深忧也夫财谷所生当出于民趋时务农国之上急而都下诸官所掌别异各自下调不计民力辄与近期长吏畏罪昼夜催民委舍佃事遑赴防日定送到都或蕴积不用而徒使百姓消力失时到秋收月督其限入夺其播殖之时而责其今年之税如有逋悬则籍没财物故家户贫困衣食不足宜暂息众役专心农桑古人称一夫不耕或受其饥一女不织或受其寒是以先王治国惟农是务军兴以来已向百载农人废南亩之务女工停机杼之业推此揆之则蔬食而长饥薄衣而履冰者固不少矣臣闻主之所求于民者二民之所望于主者三二谓求其为已劳也求其为已死也三谓饥者能食之劳者能息之有功者能赏之民已致其二事而主失其三望者则怨心生而功不建今帑藏不实民劳役猥主之二求已备民之三望未报且饥者不待美饌而后饱寒者不俟狐貉而后温为味者口之奇文绣者身之饰也今事多而役繁民贫而俗奢百工作无用之器妇人为绮丽之饰不勤麻枲并绣文黼黻转相仿效耻独无有兵民之家犹复逐俗内无儋石之储而出有绫绮之服至于富贾商贩之家重以金银奢恣尤甚天下未平百姓不赡宜一生民之原丰谷帛之业而弃功于浮华之巧妨日于侈靡之事上无尊卑等级之差下有耗财费力之损今吏士之家少无子女多者三四少者一二通令户有一女十万家则十万人人织绩一歲一束则十万束矣使四疆之内同心戮力数年之间布帛必积恣民五色惟所服用但禁绮绣无益之饰且美貌者不待华采以崇好艳姿者不待文绮以致爱五采之饰足以丽矣若极粉黛穷盛服未必无丑妇废华采去文绣未必无美人也若实如论有之无益废之无损者何爱而不暂禁以充府藏之急乎此救乏之上务富国之本业也使管晏复生无以易此汉之文景承平继统天下已定四方无虞犹以雕文之伤农事锦绣之害女工开富国之利杜饥寒之本况今六合分乖豺狼充路兵不离疆甲不解带而可以不广生财之原充府库之积哉

三国志文类卷二十五

卷二十六

钦定四库全书

三国志文类卷二十六

谏诤

魏

沮授谏止袁绍南征

师出歷年百姓疲弊仓庾无积赋役方殷此国之深忧也宜先遣使献捷天子务农逸民若不得通乃表曹氏隔我王路然后进屯黎阳渐营河南并作舟船缮治器械分遣精骑钞其边鄙令彼不得安我取其逸三年之中事可坐定也审配郭图曰兵书之法十围五攻敌则能战今以明公之神武跨河朔之彊众以伐曹氏譬若覆手今不时取后难图也授曰蓋救乱诛暴谓之义兵恃众凭彊谓之骄兵兵义无敌骄者先灭曹氏迎天子安宫许都今举师南向于义则违且庙胜之策不在彊弱曹氏法令既行士卒精练非公孙瓒坐受围者也今弃万安之术而兴无名之兵窃为公惧之图等曰武王伐纣不曰不义况兵加曹氏而云无名且公帅武臣竭力将士愤怒人思自骋而不及早定大业虑之失也夫天与弗取反受其咎此越之所以霸吴之所以亡也监军之计计在持牢而非见时知机之变也绍从之图等因是潜授监统内外威震三军若其浸盛何以制之夫臣与主不同者昌主与臣同者亡此黄石之所忌也且御众于外不宜知内绍疑焉乃分监军为三都督使授及郭图淳于琼各典一军遂合而南

张邈谏袁术称尊号【袁术议称尊号邈谓术曰】

汉据火德絕而复扬德泽风流诞生明公公居轴处中入则享于上席出则为众目之所属华霍不能增其高渊泉不能同其量可谓巍巍荡荡无与为贰何为舍此而欲称制恐福不盈眦祸将溢世庄周之称郊牺牛养饲经年衣以文绣宰执鸾刀以入庙门当此之时求为孤犊不可得也

袁涣谏太祖训民以义

夫兵者凶器也不不得已而用之鼓之以道德征之以仁义兼抚其民而除其害夫然故可与之死而可与之生自大乱以来十数年矣民之欲安甚于倒悬然而暴乱未息者何也意者政失其道欤涣闻明君善于救世故世乱则齐之以义时伪则镇之以朴世异事变治国不同不可不察也夫制度损益此古今之不必同者也若夫兼爱天下而反之于正虽以武平而济之以德诚百王不易之道也公明哲超世古之所以得其民者公既勤之矣今之所以失其民者公

既戒之矣海内赖公得免于危亡之祸然而民未知义其惟公所以训之则天下幸甚太祖深纳焉

蒋济谏明帝攻辽东【太和六年明帝遣平州刺史田豫乘海渡幽州刺史王雄陆道并攻辽东蒋济谏曰】

凡非相吞之国不侵叛之臣不宜轻伐伐之而不制是驱使为贼故曰虎狼当路不治狐狸先除大害小害自己今海表之地累世委质岁选计考不乏职贡议者先之正使一举便克得其民不足益国得其财不足为富悦不如意是为结怨失信也帝不听豫行竟无成而还

陈琳谏何进诛阉官

易称即鹿无虞谚有掩目捕雀夫微物尚不可欺以得志况国之大事其可以诈立乎今将军总皇威握兵要龙骧虎步高下在心以此行事无异于鼓洪炉以燎毛髮但当速发雷霆行权立断违经合道天人顺之而反释其利器更征于他大兵合聚彊者为雄所谓倒持干戈授人以柄必不成功祇为乱阶进不纳其言竟以取祸

辛毗谏文帝徙冀州士家【帝欲徙冀州士家十万户实河南时连蝗民饥郡国以为不可而帝意甚盛毗与朝臣俱求见帝知其欲谏作色以见之皆莫言】

陛下欲徙士家其计安出帝曰卿谓我徙之非邪毗曰诚以为非也帝曰吾不与卿共议也毗曰陛下不以臣不肖置之左右厠之谋议之官安得不与臣谋邪臣所言非私也乃社稷之虑也安得怒臣帝不答起入内毗随而引其裾帝遂奋衣不还良久乃出曰佐治卿持我何太急邪毗曰今徙既失民心又无以食也帝遂徙其半

又谏伐吴

帝欲大兴军征吴毗谏曰吴楚之民险而难御道隆后服道洿先叛自古患之非徒今也陛下祚有海内夫不寘者其能久乎昔尉佗称帝子阳僭号历年未几或臣或诛何则违逆之道不久全而大德无所不服也方今天下新定土广民稀夫庙算而后出军犹临事而惧况今庙算有阙而欲用之臣诚未见其利也先帝屡起锐师临江而旋今六军不增于故而复循之此未易也今日之计莫若脩范蠡之养民法管仲之寄政则充国之屯田明仲尼之怀远十年之中彊壮未老童叟胜战兆民知义将士思奋然后用之则役不再举矣帝曰如卿意更当以虏遗子孙邪毗对曰昔周文王以纣遗武王惟知时也苟时未可容得已乎帝竟伐吴至江而还

又谏明帝平北芒

帝又欲平北芒令于其上作台观则见孟津毗谏曰天地之性高高下下今而反之既非其理加以损费人功民不堪役且若九河盈溢洪水为害而丘陵皆夷将何以御之帝乃止

高堂隆諫明帝飡防

明帝初踐阼羣臣或以为宜飡防隆曰唐虞有遏密之哀高宗有不言之思是以至德雍熙光于四海以谓不宜为防帝敬纳之

三国志文类卷二十六

卷二十七

钦定四库全书

三国志文类卷二十七

諫诤

蜀

杨颺諫诸葛亮躬亲细务【襄阳记曰杨颺字子昭入蜀为巴郡太守丞相诸葛亮主簿亮尝自校簿书颺直入諫曰】

为治有体上下不可相侵请为明公以作家譬之今有人使奴执耕稼婢典炊爨鸡主司晨犬主吠盗牛任重载马涉远路私业无旷所求皆足雍容高枕饮食而已忽一旦尽欲以身亲其役不复付任劳其体力为此碎务形疲神困终无一成岂其智之不如奴婢鸡犬哉失为家主之法也是故古人称坐而论道谓之王公作而行之谓之士大夫故邴吉不问横道死人而忧牛喘陈平不肯知钱谷之数云自有主者彼诚达于位分之体今明公为治乃躬自校簿书流汗竟日不亦劳乎

张纘諫吴主突敌【权以纘为长史从征合肥权率轻骑将往突敌纘諫曰】

夫兵者凶器战者危事也今麾下恃盛壮之气忽彊暴之虏三军之众莫不寒心虽斩将搴旗威震敌场此乃偏将之任非主将之宜也愿抑赍育之勇怀霸王之计权纳纘言而止

又諫【明年将复出军纘又諫曰】

自古帝王受命之君虽有皇灵佐于上文德播于下亦赖武功以昭其勲然而贵于时动然后为威耳今麾下值四百之厄有扶危之功宜且隐息师徒广开播殖任贤使能务崇宽惠顺天命以行诛可不劳而定也于是遂止不行

薛综諫征公孙渊【时公孙渊降而复叛权盛怒欲自亲征综上疏諫曰】

夫帝王者万国之元首天下之所系命也是以居则重门击柝以戒不虞行则清道案节以养威严盖所以存万安之福镇四海之心昔孔子疾时托乘桴浮海之语季由斯喜拒以无所取材汉元帝欲御楼船薛广德请刎颈以血染车何则水火之险至危非帝王所宜涉也谚曰千金之子坐不垂堂况万乘之尊乎今辽东戎貊小国无城池之固备御之术器械殊钝纪纲无政往必禽克诚如明诏然其方土寒垆谷稼不殖民习鞍马转徙无常卒闻大军之至自度不

敌鸟惊兽骇长驱奔窜一人匹马不可得见虽获空地守之无益此不可一也加又洪荒滉漾有成山之难海行无常风波难免倏忽之间人船异势虽有尧舜之德智无所施赉育之勇力不得设此不可二也加以郁雾防其上咸水蒸其下善生流肿转相污染凡行海者稀无斯患此不可三也天生神圣显以符瑞当乘平丧乱康此民物嘉祥日集海内垂定逆虏凶虐灭亡在近中国一平辽东自毙但当拱手以待耳今乃违必然之图寻至危之阻忽九州之固肆一朝之忿既非社稷之重计又开辟以来所未尝有斯诚羣寮所以倾心侧息食不甘味寝不安席者也惟陛下抑雷霆之威忍赫斯之怒遵乘桥之安远履冰之险则臣子赖祉天下幸甚权遂不行

又陆瑁谏【字子璋】

臣闻圣王之御远夷羁縻而已不常保有故古者制地谓之荒服言恍惚无常不可保也今渊一方小丑屏在海隅虽托人面与禽兽无异国家所为不爱货宝远以加之者非嘉其德义也诚欲诱纳愚弄以规其马耳渊之骄黠恃远负命此乃荒貊常态岂足深怪昔汉诸帝亦尝锐意以事外夷驰使散货充满西域虽时有恭从然其使人见害财货并没不可胜数今陛下不忍悁悁之忿欲越巨海身践其土羣臣愚议窃谓不安何者北寇与国壤地连接苟有闲隙应机而至夫所以越海求马曲意于渊者为赴目前之急除腹心之疾也而更弃本追末捐近治远忿以改规激以动众斯乃猾虏所愿闻非大呉之至计也又兵家之术以功役相疲劳逸相待得失之间所觉辄多且沓渚去渊道里尚远今到其岸兵势三分使强者进取次当守船又次运粮行人虽多难得悉用加以单步负粮经远深入贼地多马邀截无常若渊狙诈与北未絶动众之日唇齿相济若实子然无所凭赖其畏怖远迸或难卒灭天诛稽于朔野山虏承间而起恐非万安之长虑也

又谏【时上前疏孙权未许瑁重上此疏】

夫兵革者固前代所以除暴乱威四夷也然其役在奸雄已除天下无事从容庙堂之上以余议议之耳至于中夏鼎沸九域槃牙之时率须深根固本爱力惜费务自休养以待隣敌之阙未有正于此时舍近治远以疲军旅者也昔尉佗叛逆僭号称帝于时天下义安百姓殷阜带甲之数粮食之积可谓多矣然汉文犹以远征不易重兴师旅告喻而已今凶桀未殄疆场犹警虽蚩尤鬼方之乱故当以缓急差之未宜以渊为先愿陛下抑威住计暂宁六师潜神嘿规以为后图天下幸甚权再览嘉其辞理遂不行

又陆逊谏【渊背盟权欲往征逊上疏】

渊凭险恃固拘留大使名马不献实可讐忿蛮夷猾夏未染王化鸟窜荒裔拒逆王师至令陛下爰赫斯怒欲劳万乘泛轻越海不虑其危而涉不测方今天下云扰羣雄虎争英豪踊跃张声大视陛下以神武之姿诞膺期运破操乌林败备西陵复取荆州斯二敌者当时雄桀皆摧其锋圣化所绥万里草偃方荡平华夏总一大猷今不忍小忿而发雷霆之怒违垂堂之戒轻万乘之重此臣之所惑也臣闻志行万里者不中道而辍足图四海者匪怀细以害大疆寇在

境荒服未庭陛下乘桴遠征必致闕 感至而忧悔之无及若使大事时捷则渊不讨而自服今乃遠惜辽东众之与马奈何独欲捐江东万安之本业而不惜乎乞息六师以威大虏早定中夏垂曜将来权用纳焉

华覈谏营新宫兴工妨农【寶鼎二年皓更营新宫制度 广饰以珠玉所费甚多是时盛夏兴工农守并废覈谏曰】

臣闻汉文之世九州晏然秦民喜去惨毒之苛政归刘氏之寬仁省役约法与之更始分王子弟以藩汉室当此之时皆以为泰山之安无穷之基也至于贾誼独以为可痛哭及流涕者三可为长叹息者六乃曰方今之势何异抱火于积薪之下而寝其上火未及然而谓之安其后变乱皆如其言臣虽下愚不识大伦窃以曩时之事揆今之势誼云复数年间诸王方刚汉之傳相称疾罢归欲以此为治虽尧舜不能安今大敌据九州之地有大半之众习攻战之余术乘戎马之旧势欲与中国争相吞之计其犹楚汉势不两立非徒汉之诸王淮南济北而已誼之所欲痛哭比今为缓抱火卧薪之喻于今为急大皇帝览前代之如彼察今世之如此故广开农桑之业积不訾之储恤民重役务养战士是以大小感恩各思竭命期运未至早弃万国自是之后疆臣专政上谗天时下违众议忘安存之本邀一时之利数兴军旅倾竭府藏兵劳民困无时获安今之存者乃创夷之遗众哀苦之余民耳遂使军资空匮仓廩不实布帛之赐寒暑不周重以失业家户不赡而北积谷养民专心东向无复他警蜀为西藩土地险固加承先主统御之术谓其守御足以长久不图一朝奄至倾覆唇亡齿寒古人所惧交州诸郡国之南土交阯九真二郡已没日南孤危存亡难保合浦以北民皆摇动因连避役多有离叛而备戍减少威镇转轻常恐呼吸复有变故昔海虏窥竄东县多得离民地习海行狃于往年钞盗无日今胷背有嫌首尾多难乃国朝之厄防也诚宜住建立之役先备豫之计勉垦殖之业为饥乏之救惟恐农时将过东作向晚有事之日整严未办若舍此急尽力工作卒有风尘不虞之变当委版筑之役应烽燧之急驱怨苦之众赴白刃之难此乃大敌所因为资也如但固守旷日持久则军粮必乏不待接刃而战士已困矣昔太戊之时桑谷生庭惧而修德怪消殷兴荧惑守心宋以为灾景公下从瞽史之言而荧惑退舍景公延年夫脩德于身而感异类言发于口而通神明臣以愚蔽误忝近署不能翼宣仁泽以感灵只仰慙俯愧无所投处退伏思惟荧惑桑谷之异天示二主至如他余锱介之妖近是门庭小神所为验之天地无有他变而征祥符瑞前后屡臻明珠既覩白雀继见万亿之祚实灵所挺以九域为宅天下为家不与编户之民转徙一同也又今之宫室先帝所营卜土立基非为不祥又杨市土地与宫连接若大功毕竟輿驾迁往门行之神皆当转移犹恐长久未必胜旧屡迁不可留则有嫌此乃愚臣所以夙夜为忧灼也臣省月令季夏之月不可以兴土功不可以防诸侯不可以起兵动众举大事必有天殃今虽诸侯不防诸侯之军与防无异六月戊己土行正王既不可犯加又农月时不可失昔鲁隐公夏城中丘春秋书之垂为后戒今筑宫为长世之洪基而犯天地之大禁袭春秋之所书废敬授之上务臣以愚管窃所未安又恐所召离民或有不至讨之则废役兴事不讨则日月滋慢若悉并到大众聚防希无疾病且人心安则念善苦则怨叛江南精兵北土所难欲以十卒当东一人天下未定深可忧恤之如此宫成死叛五千则北军之众更增五万若到万人则倍益十万疾者有死亡之损叛者传不善之语此乃大敌所以欢喜也今当角力中原以定彊弱正于际防彼益我损加以劳困此乃雄夫智士所以深忧臣闻先王治国无三年

之储曰国非其国安宁之世戒备如此况敌疆大而忽农忘蓄今虽颇种殖间者大水沈没其余存者当须耘获而长吏怖期上方诸郡身涉山林尽力伐材废农弃务士民妻孥羸小垦殖又薄若有水旱则永无所获州郡见米当待有事冗食之众仰官供济若上下空乏运漕不供而北敌犯疆使周召更生良平复出不能为陛下计明矣臣闻君明者臣忠主圣者臣直是以悽悽昧犯天威乞垂哀省书奏皓不纳

三国志文类卷二十七

卷二十八

钦定四库全书

三国志文类卷二十八

戒责

魏

李秉家诫【字 胄有隼才为时人所贵尝答司马文王问因以为家诫曰】

昔侍坐于先帝时有三长吏俱见临辞出上曰为官长当清当慎当勤脩此三者何患不治乎并受诏既出上顾谓吾等曰相诫勅正当尔不侍坐众贤莫不赞善上又问曰必不得已于斯三者何先或对曰清固为本次复问吾吾对曰清慎之道相须而成必不得已慎乃为大夫清者不必慎慎者必自清亦由仁者必有勇勇者不必有仁是以易称括囊无咎借用白茅皆慎之至也上曰卿言得之耳可举近世能慎者谁乎诸人各未知所对吾乃举故太尉荀景倩尚书董仲连仆射王公仲并可谓为慎上曰此诸人者温恭朝夕执事有恪亦各其慎也然天下之至慎其惟阮嗣宗乎每与之言言及 远而未曾评论时事臧否人物真可谓至慎矣吾每思此言亦足以为明戒凡人行事年少立身不可不慎勿轻论人勿轻說事如此则悔吝何由而生患祸无从而至矣

王昶戒子【昶为兄子及子作名字皆依谦实以见其意故兄子默字处静沈字处道其子浑字 冲深字道冲遂书戒之曰】

夫人为子之道莫大于宝身全行以显父母此三者人知其善而或危身破家陷于灭亡之祸者何也由所祖习非其道也夫孝敬仁义百行之首行之而立身之本也孝敬则宗族安之仁义则乡党重之此行成于内名著于外者矣人若不笃于至行而背本逐末以陷浮华焉以成朋党焉浮华则有虚伪之累朋党则有彼此之患此二者之戒昭然着明而循覆车滋众逐末弥甚皆由惑当时之誉昧目前之利故也夫富贵声名人情所乐而君子或得而不处何也恶不由其道耳患人知进而不知退知欲而不知足故有困辱之累悔吝之咎语曰如不知足则失所欲故知足之足常足矣览往事之成败察将来之吉凶未有干名要利欲而不厌能保世持家永全福禄者也欲使汝曹立身行己遵儒者之教履道家之言故以 默冲虚为名欲使汝曹顾名思义不敢违越也古者盘杆有铭几杖有诫俯仰察焉用无过行况在己名可不戒之哉夫物速成则疾亡晚就则善终朝华之草夕而零落松柏之茂隆寒不衰是以大雅君子恶速成戒阙党也若范匄对秦客而武子击之折其委笄恶其掩人也【国语曰范文子暮退于朝武子曰何其暮也对曰有秦客庾辞于朝大夫莫之能对也吾知其三焉武子怒曰大夫非不能也让父兄也尔童子而三掩人于朝吾不在晋国亡无日也击之以杖折其委笄】夫

人有善鲜不自伐有能寡不自矜伐则掩人矜则陵人掩人者人亦掩之陵人者人亦陵之故三郤为戮于晋王叔负罪于周不惟矜善自伐好争之咎乎故君子不自称非以让人恶其盖人也夫能屈以为伸让以为得弱以为彊鲜不遂矣夫毁誉爱恶之原而祸福之机也是以圣人慎之孔子曰吾之于人谁毁谁誉如有所誉必有所试又曰子贡方人赐也贤乎哉我则不暇以圣人之德犹尚如此况庸庸之徒而轻毁誉哉昔伏波将军马援戒其兄子言闻人之恶当如闻父母之名耳可得而闻口不可得而言也斯戒至矣人或毁已当退而求之于身若已有可毁之行则彼言当矣若已无可毁之行则彼妄矣当则无怨于彼妄则无害于身又何反报焉且闻人毁已而忿者恶丑声之加人也人报者滋甚不如默而自脩已也谚曰救寒莫如重裘止谤莫如自脩斯言信矣若与是非之士凶险之人近犹不可况与对校乎其害深矣夫虚伪之人言不根道行不顾言其为浮浅较可识别而世人惑焉犹不检之以言行也近济陰魏讽山阳曹伟皆以倾邪败没荧惑当世挟持奸慝驱动后生虽刑于鈇钺大为炯戒然所污染固已众矣可不慎与若夫山林之士夷叔之伦甘长饥于首阳安赴火于絳山虽可以激贪励俗然圣人不可为吾亦不愿也今汝先人世有冠冕惟仁义为名守慎为称孝悌于闺门务学于师友吾与时人从事虽出处不同然各有所取颖川郭伯益好尚通达敏而有知其为人旷不足轻贵有余得其人重之如山不得其人忽之如草吾以所知亲之昵之不愿儿子为之北海徐伟长不治名高不求苟得澹然自守惟道是务其有所是非则托古人以见其意当时无所褒贬吾敬之重之愿儿子师之东平刘公干博学有高才诚节有大意然性行不均少所拘忌得失足以相补吾爱之重之不愿儿子慕之乐安任昭先淳粹履道内敏外恕推逊恭让处不避洿怯而义勇在朝忘身吾友之善之愿儿子遵之若引而伸之触类而长之汝其庶几举一隅耳及其用财先九族其施舍务周急其出入存故老其论议贵无贬其进仕尚忠节其取人务道实其处世戒骄淫其贫贱慎无戚其进退念合宜其行事加九思如此而已吾复何忧哉

王基戒司马景王书【司马景王新统政基书戒之曰】

天下至广万机至猥诚不可不兢兢业业坐而待旦也夫志正则众邪不生心静则众事不躁思虑审定则教令不烦亲用忠良则远近协服故知和遠在身定众在心许允傳嘏袁侃崔赞皆一时正士有直质而无流心可与同政事者也景王纳其言

吳

孙和戒博奕

羣寮侍宴言及博奕和以为妨事费日而无益于用劳精损思而终无所成非所以进德脩业积累功绪者也且志士爱日惜力君子慕其大者高山景行耻非其次夫以天地长久而人居其间有白驹过隙之喻年齿一暮荣华不再凡所患者在于人情所不能絶诚能絶无益之欲以奉德义之涂弃不急之务以脩功业之基其于名行岂不善哉夫人情犹不能无嬉娱嬉娱之好亦在于饮宴琴书射御之间何必博奕然后为欢乃命侍坐者八人各著论以矫之于是中庶子韦曜退而论奏和以示賓客时蔡颖好奕直事在署者颇敦焉故以此讽之

三国志文类卷二十八

卷二十九

钦定四库全书

三国志文类卷二十九

荐称

魏

后汉张超荐袁遗于朱隽

遗有冠世之懿干时之量其忠允亮直固天所纵若乃包罗载籍管综百氏登高能赋覩物知名求之今日邈焉靡俦

太祖称荀攸

孤与荀公达周游二十余年无毫毛可非者又曰荀公达真贤人也所谓温良恭俭让以得之孔子称晏平仲善与人交久而敬之公达即其人也

又称二荀父子

傅子曰或问近世大贤君子答曰荀令君之仁荀军师之智斯可谓近世大贤君子矣荀令君仁以立德明以举贤行无谄黷谋能应机孟轲称五百年而有王者兴其间必有命世者其荀令君乎太祖称荀令君之进善不进不休荀军师之去恶不去不止也

孔融荐祢衡书【衡字正平建安初自荆州北游都恃才傲逸臧否过当见不如者不与语人皆以是憎之唯少府孔融高贵其才上书荐之曰】

淑质贞亮英才卓犖初涉艺文升堂覩奥目所一见辄诵于口耳所暂闻不忘于心性与道合思若有神 羊心计安世默识以衡准之诚不足怪

先贤行状称毛玠

先贤行状曰玠雅亮公正在官清恪其典选举拔贞实斥华伪进逊行抑阿党诸宰官治民功绩不着而私财丰足者皆免黜停废久不选用于时四海翕然莫不励行至乃长吏还者垢面羸衣常乘柴车军吏入府朝服徒行人拟壶餐之洁家象濯纓之操贵者无秽欲之累贱者絶奸货之求吏洁于上俗移乎下民到于今称之

傅子称何曾荀顗以孝事亲

傅子称曾及荀顗曰以文王之道事其亲者其颖昌何侯乎荀侯乎古称曾闵今日荀何内尽其心以事其亲外崇礼让以接天下孝子百世之宗仁人天下之本也有能行仁孝之道者君子之仪表矣

王象荐杨俊【王象为散骑常侍荐俊曰】

伏见南阳太守杨俊秉纯粹之茂质履忠肃之量体仁足以育物笃实足以动众克长后进惠训不倦外宽内直仁而有断自初弹冠所历垂化再守南阳恩德流着殊邻异党襁负而至今境守清静无所展其智能宜还本朝宣力辇毂熙帝之载

谢子微称许劭

召陵谢子微高才远识见劭年十八时乃叹息曰此则希世出众之伟人也劭始发明樊子昭于鬻帻之肆出虞永贤于牧豎召李叔才乡闾之间擢郭子瑜鞍马之吏援杨孝祖举和阳士兹六贤者皆当世之令懿也其余中流之士或举之淹滞或显之乎童齿莫不赖劭顾叹之荣凡所拔育显成令德者不可殫记其探撷伪行抑损虚名则周之单襄无以尚也劭宗人许栩沈没荣利致位司徒举宗莫不匍匐栩门承风而驱官以贿成惟劭不过其门广陵徐孟本来临汝南闻劭高名请为功曹饗餐放流洁士盈朝袁绍公族好名为濮阳长弃官来还有副车从骑将入郡界绍乃叹曰吾之舆服岂可使许子将见之乎遂单车而归辟公府掾拜鄢陵令方正征皆不就避乱江南所历之国必翔而后集终于豫章时年四十六

孟达荐王雄【安定太守孟达荐雄曰】

臣闻明君以来贤为业忠臣以进善为効故易称拔茅连茹传曰举尔所知臣不自量窃慕其义臣昔以人乏谬充备部职时涿郡太守王雄为西部从事与臣同寮雄天性良固果而有谋历试三县政成人和及任近职奉宣威恩懷柔有术清慎持法臣往年出使经过雄郡自説特受陛下拔擢之恩常励节精心思投命为効言辞激扬情趣欵惻臣虽愚闇不识真伪以谓雄才兼资文武忠烈之性逾越伦辈今涿郡领户三千孤寡之家参居其半北有守兵藩衛之固诚不足舒雄智力展其勤干也臣受恩深厚无以报国不胜悽悽浅见之情谨冒陈闻诏曰昔萧何荐韩信邓禹进呉汉惟贤知贤也雄有胆智技能文武之姿吾宿知之今便以参散骑之选方使少在吾门下知指归便大用之矣天下之士欲使皆先历散骑然后出据州郡是吾本意也

张既称母丘兴表

雍州刺史张既表曰河右遐遠丧乱弥久武威当诸郡路通喉辖之要加民夷杂处数有兵难领太守母丘兴到官内抚吏民外怀羌胡卒使柔附为官效用黄华张进初图逆乱煽动左右

兴志气忠烈临难不顾为将校民夷陈說祸福言则涕泣于时男女万口咸怀感激形毀髮乱誓心致命寻率精兵蹶胁张掖济拔领太守杜通西海太守张睦张掖番和骊靬二县吏民及郡杂胡弃恶诸兴兴皆安恤使尽力田兴每所歷尽竭心力诚国之良吏殿下即位留心万机苟有毫毛之善必有赏録臣伏缘圣旨指陈其事

赵孔曜荐管辂

安平赵孔曜荐管辂于冀州刺史裴徽曰辂雅性寬大与世无忌仰观天文则同妙甘公石申俯览周易则齐思季主今明使君方垂神幽藪留精九臯辂宜蒙陰和之应得及羽仪之时徽于是辟为文学从事

三国志文类卷二十九

卷三十

钦定四库全书

三国志文类卷三十

荐称

魏

陈羣荐管宁

臣闻王者显善以消恶故汤举伊尹不仁者逺伏见徵士北海管宁行为世表学任人师清俭足以激浊贞正足以矫时前虽征命礼未优备昔司空荀爽家拜光禄先儒郑 即授司农若加备礼庶必可致至延西序坐而论道必能昭明古今有益大化

陶丘一等荐管宁【正始二年太仆陶丘一永宁卫尉孟观侍中孙邕中书侍郎王基荐宁曰】

臣闻龙凤隐耀应德而臻明哲潜遁俟时而动是以鸞鷟鸣岐周道隆兴四皓为佐汉帝用康伏见太中大夫管宁应二仪之中和总九德之纯懿含章素质冰洁渊清 虚澹泊与道逍遥娛心黄老游志六艺升堂入室究其阃奥韬古今于胸怀包道德之机要中平之际黄巾陆梁华夏倾荡王纲弛顿遂避时难乘桴越海羈旅辽东三十余年在干之垢匿景藏光嘉遁养浩韬韞儒墨潜化傍流畅于殊俗黄初四年高祖文皇帝畴谘羣公思求俊乂故司徒华歆举宁应选公车特征振翼遐裔翻然来翔行遇屯厄遭罹疾病即拜太中大夫烈祖明皇帝嘉美其德登为光禄勳宁疾弥留未能进道今宁旧疾已瘳行年八十志无衰倦环堵篳门偃息穷巷饭糲糊口并日而食吟咏诗书不改其乐困而能通遭难必济经危蹈险不易其节金声玉色久而弥彰揆其终始殆天所祚当赞大魏辅亮雍熙袞职有阙羣下属望昔高宗刻象营求贤哲周文启 以卜良佐况宁前朝所表名德已着而久栖迟未时引致非所以奉遵明训继成前志也陛下践阼纂承洪绪圣敬日跻超越周成每发德音动谘师傅若继二祖招贤故典賔礼隼迈以广缉熙济济之化侔于前代宁清高恬泊拟迹前轨德行卓絶海内无偶歴观前世玉帛所命申公枚乘周党樊英之俦测其渊源览其清浊未有厉俗独行若宁者也诚宜束帛加璧备礼征聘仍授几杖延登东序敷陈坟素坐而论道上正璇玑协和皇极下阜羣生彝伦攸叙必有可观光益大化若宁固执匪石守志箕山追迹洪崖参踪巢许斯亦圣朝同符唐虞优贤扬歴垂声千载虽出处殊涂俯仰异体至于兴治美俗其揆一也于是特具安车蒲轮束帛加璧聘焉

桓范荐徐宣

臣闻帝王用人度世授才争夺之时以策略为先分定之后以忠义为首故晋文行舅犯之计而赏雍季之言高祖用陈平之智而托后于周勃也窃见尚书徐宣体忠厚之行秉直亮之性清雅持立不拘世俗确然难动有社稷之节歷位州郡所在称职今仆射缺宣行掌后事腹心任重莫宜宣者帝遂以宣为左仆射

卢钦称徐邈

徐公志高行洁才博气猛其施之也高而不狷洁而不介博而守约猛而能寛圣人以清为难而徐公之所易也或问钦徐公当武帝之时人以为通自在凉州及还京师人以为介何也钦答曰往者毛孝先崔季珪等用事贵清素之士于时皆变易车服以求名高而徐公不改其常故人以为通比来天下奢靡转相仿效而徐公雅尚自若不与俗同故前日之通乃今日之介也是世之人无常而徐公之有常也

蜀

秦宓奏记刘焉荐任定祖【字子勅广汉縣竹人少有才学州郡辟命称疾不往奏记州牧刘焉荐儒士任定祖】

昔百里蹇叔以耆艾而定策甘罗子奇以童冠而立功故书美黄髮而易称顔渊固知选士用能不拘长幼明矣乃者以来海内察举率多英隽而遗旧齿众论不齐异同相半此乃承平之翔步非乱世之急务也夫欲救危抚乱脩己以安人则宜卓犖超伦与时殊趣震惊邻国骇动四方上当天心下合人意天人既和内省不疚虽遭凶乱何忧何惧昔楚叶公好龙神龙下之好伪彻天何况于真今处士任安仁义直道流名四遠如今见察则一州斯服昔汤举伊尹不仁者遠何武贡二龚双名竹帛故贪寻常之高而忽万仞之嵩乐面前之饰而忘天下之誉斯诚往古之所重慎也甫欲凿石索玉剖蚌求珠今乃随和炳然有如皎日复何疑哉诚知昼不操烛日有余光但愚情区区贪陈所见

彭蒙荐秦宓【字永年广汉人荐同郡秦子勅于太守许靖曰】

昔高宗梦傅説周文求吕尚爰及汉祖纳食其于布衣此乃帝王之所以倡业垂统缉熙厥功也今明府稽古皇极允执神灵体公刘之德行勿翦之惠清庙之作于是乎始褒贬之义于是乎兴然而六翮未之备也伏见处士縣竹秦宓膺山甫之德履雋生之直枕石漱流吟咏温袍偃息于仁义之途恬淡于浩然之域高概节行守真不亏虽古人潜遁蔑以加旃若明府能招致此人必有忠说落落之誉丰功厚利建迹之勲然后纪功于王府飞声于来世不亦美哉

桓温荐譙秀【秀性清浄不交于世知将大乱预絶人事从兄弟及诸亲里不与相见州郡辟命及李雄盗蜀安车征秀又雄叔父骧骧子壽辟命皆不应常衣鹿皮躬耕山藪永和三年安西将军桓温平蜀表荐秀曰】

臣闻大朴既亏则高尚之标显道丧时昏则忠贞之义彰故有洗耳投渊以振 邈之风亦有秉心矫迹以惇在三之节是以上代之君莫不崇重斯轨所以笃俗训民静一流竞伏惟大晋应符御世运无常通时有屯蹇神州丘墟三方圯裂免置絶响于中林白驹无闻于空谷斯有识之所悼心大雅之所叹息者也陛下圣德嗣兴方恢天绪臣昔奉役有事西土鲸鲵既县思宣大化访诸故老搜扬潜逸庶武罗于羿浞之墟想王蠋于亡齐之境窃闻巴西谯秀植操贞固抱德肥遁扬清渭波于时皇极遘道消之防羣黎蹈颠沛之艰中华有顾瞻之哀幽谷无迁乔之望凶命屡招奸威仍偪身寄虎吻危同朝露而能抗节玉立誓不降辱杜门絶迹不面伪庭进儿龚胜亡身之祸退无薛方诡对之讥虽园绮之栖商洛管宁之默辽海方之于秀殆无以过于今西土以为美谈夫旌德礼贤化道之所先崇表殊节圣哲之上务方今六合未康豺狼当路遗黎偷薄义声弗闻益宜振起道义之徒以敦流遁之 若秀防蒲帛之征足以镇静颓风轨训器俗幽遐仰流九服知化矣吴

周昭称步隲等书【颖川周昭著书称步隲及严峻等曰】

古今贤士大夫所以失名丧身倾家害国者其由非一也然要其大归总其常患四者而已急论议一也争名势二也重朋党三也务欲速四也急论议则伤人争名势则败友重朋党则蔽主务欲速则失德此四者不除未有能全也当世君子能不然者亦比有之岂独古人乎然论其絶异未若顾豫章诸葛使君步丞相严衞尉张奋威之为美也论语言夫子循循然善诱人又曰成人之美不成人之恶豫章有之矣望之俨然即之也温听其言也厉使君体之矣恭而安威而不猛丞相履之矣学不求禄心无苟得衞尉奋威蹈之矣此五君者虽德实有差轻重不同至于趋舍大检不犯四者俱一揆也昔丁谡出于孤家吾粲由于牧竖豫章扬其善以并陆全之列是以人无幽滞而风俗厚焉使君丞相衞尉三君昔以布衣俱相友善诸论者因各叙其优劣初先衞尉次丞相而后有使君也其后并事明主经营世务出处之才有不同先后之名须反其初此世常人所决勤薄也至于三君分好卒无亏损岂非古人交哉又鲁横江昔仗万兵屯据陆口当世之美业也能与不能孰不愿焉而横江既亡衞尉应其选自以才非将帅深辞固让终于不就后徙九列迁典八座荣不足以自曜禄不足以自奉至于二君皆位为上将穷富极贵衞尉既无求欲二君又不称荐各守所志保其名好孔子曰君子矜而不争羣而不党斯有风矣又奋威之名亦三君之次也当一方之戎受上将之任与使君丞相不异也然歷国事论功劳实有先后故爵位之荣殊焉而奋威将处此决能明其部分心无失道之欲事无充诎之求每升朝堂循礼而动辞气謇謇罔不惟忠叔嗣虽亲贵言忧其败蔡文至虽疏贱谈称其贤女配太子受礼若吊慷慨之趣惟笃人物成败得失皆如所虑可谓守道见机好古之士也若乃经国家当军旅于驰鹜之际立霸王之功此五者未为过人至于纯粹履道求不苟得升降当世保全名行邈然絶俗实有所师故麤论其事以示后之君子

三国志文类卷三十

卷三十一

钦定四库全书

三国志文类卷三十一

劝说

魏

荀彧劝太祖定兖州【彧字文若初去袁绍从太祖太祖大悦曰吾之子房也以为司马太祖征陶谦任彧留事防张邈以兖州反潜迎吕布兖州诸城皆应布太祖自徐州还击布布东走太祖军乘氏大饥人相食陶谦死太祖欲遂取徐州还乃定布彧劝太祖曰】

晋高祖保关中光武据河内皆深根固本以制天下进足以胜敌退足以坚守故虽有困败而终济大业将军本以兖州首事平山东之难百姓无不归心悦服且河济天下之要地也今虽残坏犹易以自保是亦将军之关中河内也不可以不先定今已破李封薛兰若分兵东击陈宫宫必不敢西顾以其间勒兵收熟麦约食畜谷一举而布可破也破布然后南结扬州共讨袁术以临淮泗若舍布而东多留兵则不足用少留兵则民皆保城不得樵采布乘虚寇暴民心益危唯鄆城范卫可全其余非己之有是无兖州也若徐州不定将军当安所归乎且陶谦虽死徐州未易亡也彼惩往年之败将惧而结亲相为表里今东方皆以收麦必坚壁清野以待将军将军攻之不拔略之无获不出十日则十万之众未战而自困耳前讨徐州威罚实行其子弟念父兄之耻必人自为守无降心就能破之尚不可有也夫事固有弃此取彼者以大易小可也以安易危可也权一时之势不患本之不固可也今三者莫利愿将军熟虑之太祖乃止大收麦复与布战分兵平诸县布败走兖州遂平

又劝太祖迎汉帝【建安元年太祖击破黄巾汉献帝自河东还洛阳太祖议奉迎都许彧以山东未平韩暹杨奉新将天子到洛阳北连张杨未可卒制彧劝太祖辞曰】

昔高祖东伐为义帝缟素而天下归心自天子播越将军首唱义兵徒以山东扰乱未能远赴关右然犹分遣将帅防险通使虽御难于外乃心无不在王室是将军匡天下之素志也今车驾旋轸义士有存本之思百姓感旧而增哀诚因此时奉主上以从民望大顺也秉至公以服雄杰大略也扶宏义以致英隽大德也天下虽有逆节必不能为累明矣韩暹杨奉其敢为害若不时定四方生心后虽虑之无及太祖遂至洛阳奉迎天子都许

荀攸等劝太祖进魏公授九锡【建安十八年天子策命曹公为魏公加九锡令曰夫授九锡广开土宇周公其人也汉之异姓八王者与高祖俱起布衣羯定王业其功至大吾何可比之前后三让于是谢亭侯荀攸等劝进】

自古三代胙臣以土受命中兴封秩辅佐皆所以褒功赏德为国藩卫也往者天下崩乱羣凶豪起颠越跋扈之险不可忍言明公奋身出命以徇其难诛二袁篡盗之逆灭黄巾贼乱之类殄夷首逆芟拨荒秽沐浴霜露二十余年书契已来未有若此功者昔周公承文武之迹受已成之业高枕墨笔拱揖羣后商奄之勤不过二年吕望因三分有二之形据八百诸侯之势暂把旄钺一时指麾然皆大啓土宇跨州兼国周公八子并为侯伯白牡駉刚郊祀天地典防备物拟则王室荣章宠盛如此之 也迨至汉兴佐命之臣张耳吴芮其功至薄亦连城开地南面称孤此皆明君达主行之于上贤臣圣宰受之于下三代令典汉帝明制今比劳则周吕逸计功则张吴微论制则齐鲁重言地则长沙多然则魏国之封九锡之荣况于旧赏犹怀玉而被褐也且列侯诸将幸攀龙骥得窃微劳佩紫怀黄盖以百数亦将因此传之万世而明公独辞赏于上将使其下怀不自安上违圣朝欢心下失冠带至望忘辅弼之大业信匹夫之细行攸等所大惧也于是公勅外为章但受魏郡攸等复曰伏见魏国初封圣朝发虑稽谋羣寮然后防命而明公久违上指不即大礼今既防奉诏命副顺众望又欲辞多当少让九受一是犹汉朝之赏不行而攸等之请未许也昔齐鲁之封奄有东海疆域井赋四百万家基隆业广易以立功故能成翼戴之勲立一匡之绩今魏国虽有十郡之名犹减于曲阜计其户数不能参半以藩卫王室立垣树屏犹未足也且圣上览亡秦无补之祸惩曩日震荡之艰托建忠贤废坠是为愿明公恭承帝命无或拒违公乃受命

田丰说袁绍【绍与曹公相持于官渡丰说曰】

曹公善用兵变化无方众虽少未可轻也不如以久持之将军据山河之固拥四州之众外结英雄内修农战然后简其精锐分为奇兵乘虚迭出以扰河南救右则击其左救左则击其右使敌疲于奔命民不得安业我未劳而彼已困不及二年可坐克也今释庙胜之防而决成败于一战若不是志悔无及也绍不从

傅巽说刘琮归太祖【越嵩及东曹掾傅巽等说琮归太祖琮曰今与诸君据全楚之地守先君之业以观天下何为不可乎巽对曰】

逆顺有大体强弱有定势以人臣而拒人主逆也以新造之楚而御国家其势弗当也以刘备而敌曹公又弗当也三者皆短欲以抗王兵之锋必亡之道也将军自料何与刘备琮曰吾不若也巽曰诚以刘备不足御曹公乎则虽保楚地不足以自存也诚以刘备足御曹公乎则备不为将军下也愿将军勿疑

阎忠说皇甫嵩【中平元年车骑将军皇甫嵩既破黄巾威震天下阎忠时罢信都令而说嵩曰】

夫难得而易失者时也时至而不旋踵者机也故圣人常顺时而动智者必因机以发今将军遭难得之运蹈易解之机而残运不抚临机不发将何以享大名乎嵩曰何为也忠曰天道无亲百姓与能故有高人之功者不受庸主之赏今将军授钺于初春收功于末冬兵动若神谋不再计旬月之间神兵电扫攻坚易于折枯摧敌甚于汤雪九州席卷屠三十六万方夷黄巾

之师除邪害之患或封戸刻石南向以报德威震本朝风驰海外是以羣雄回首百姓企踵虽汤武之举未有高于将军者身建高人之功北面以事庸主将何以图安嵩曰心不忘忠何不安忠曰不然昔韩信不忍一殮之遇而弃二分之利拒蒯通之忠忽鼎峙之势利剑已揣其喉乃叹息而悔所以见烹于儿女也今主势弱于刘项将军权重于淮陰指麾可以振风云叱咤足以兴雷电赫然奋发因危抵頽崇恩以绥前附振武以临后服徼冀方之士动七州之众羽檄先驰于前大军震响于后蹈迹漳河饮马孟津举天网以网罗京都诛阉官之罪除羣怨之积忿解久危之倒悬如此则攻守无坚城不招必影从虽儿童可使奋空拳以致力女子可使其褰裳以用命况励智能之士因 风之势则大功不足合八方不足同也功业已就天下以顺乃燎于上帝告以天命混济六合南面以制移神器于己家推亡汉以定祚实神机之至决风发之良时也夫木朽不雕世衰难佐将军虽欲委忠难佐之朝雕画朽败之木犹逆坂而走丸必不可也方今权官羣居同恶如市主上不自由诏命出左右如有至聪不察机事不先必婴后悔亦无及矣嵩不从忠乃亡去

三国志文类卷三十一

卷三十二

钦定四库全书

三国志文类卷三十二

劝说

魏

王朗劝文帝育民省刑

兵起已来三十余年四海荡覆万国殄瘁赖先王芟除寇贼扶育孤弱遂令华夏复有纲纪鳩集兆民于兹魏土使封鄙之内鸡鸣犬吠达于四境蒸庶欣欣喜遇升平今远方之寇未宾兵戎之役未息诚令复除足以怀远人良宰足以宣德泽阡陌咸修四民殷炽必复过于曩时而富于平日矣易称勅法书着祥刑一人有庆兆民赖之慎法狱之谓也昔曹相国以狱市为寄路温舒疾治狱之吏夫治狱者得其情则无冤死之囚丁壮者得尽地力则无饥馑之民穷老者得仰食仓廩则无馁饿之殍嫁娶以时则男女无怨旷之恨胎养必全则孕者无自伤之哀新生必复则孩者无不自育之累壮而后役则幼者无离家之思二毛不戎则老者无顿伏之患医药以疗其疾寬繇以乐其业威罚以抑其强恩仁以济其弱赈贷以贍其乏十年之后既斨者必盈巷二十年之后胜兵者必满野矣

程昱說太祖无居邺【字仲德太祖与吕布战于濮阳数不利乃各引去于是袁绍使人说太祖连和欲使太祖遣家居邺太祖新失兗州军食尽将许之时昱引见言曰】

昔田橫齐之世族兄弟三人更王据千里之齐拥百万之众与诸侯并南面称孤既而高祖得天下而橫顾为降虏当此之时橫岂可为心哉太祖曰然此诚丈夫之至辱也昱曰昱愚不识大防以为将军之志不如田橫田橫齐一壮士耳犹羞为高祖臣今闻将军欲遣家往邺将北面而事袁绍夫以将军之聪明神武而反不羞为袁绍之下窃为将军耻之

又料孙权不杀刘备

太祖征荆州刘备奔吴论者以为孙权必杀备昱料之曰孙权新在位未为海内所惮曹公无敌于天下初举荆州威震江表权虽有谋不能独当也刘备有英名关羽张飞皆万人之敌也权必资之以御我难解势分备资以成又不可得而杀也权果多与备兵以御太祖

郭嘉料孙防必死于匹夫之手

孙策转鬪千里尽有江东闻太祖与袁绍相持于官渡将渡江北袭许众闻皆惧嘉料之曰防新并江东所诛皆英豪雄杰能得人死力者也然防轻而无备虽有百万之众无异于独行中原也若刺客伏起一人之敌耳以吾观之必死于匹夫之手防临江未济果为许贡客所杀

刘晔劝曹操伐蜀【时太祖征张鲁汉中平晔进曰】

明公以步卒五千将诛董卓北破袁绍南征刘表九州百郡十并其八威震天下势懾海外今举汉中蜀人望风破胆失守推此而前蜀可传檄而定刘备人杰也有度而迟得蜀曰浅蜀人未恃也今举汉中蜀人震恐其势自倾以公之神明因其倾而压之无不克也若小缓之诸葛亮明于治而为相关羽张飞勇冠三军而为将蜀民既定据险守要则不可犯矣今不取必为后忧太祖不从

刘放说王松归太祖【字子弃遭世大乱时渔阳王松据其土放往依之太祖克冀州放說松曰】

往者董卓作逆英雄并起阻兵擅命人自封殖惟曹公能拔拯危乱翼戴天子奉辞伐罪所向必克以二袁之彊守则淮南冰消战则官渡大败乘胜席卷将清河朔威刑既合大势已见速至者渐福后服者先亡此乃不俟终日驰骛之时也昔黥布弃南面之尊仗剑归汉诚识废兴之理审去就之分也将军宜投身委命厚自结纳松然之

贾逵劝孙资应命【字梁道时太祖辟资会兄为乡人所害资手刃报仇乃将家属辟地河东故遂不应命寻复为本郡所命以疾辞友人河东贾逵谓资曰】

足下抱逸羣之才值旧邦倾覆主将殷勤千里延颈且崇古贤桑梓之义而久盘桓拒违君命斯由曜和璧于秦王之庭而塞以连城之价耳窃为足下不取也资感其言遂往应之

蜀

诸葛亮說孙权【时亮与徐庶并为曹公所追破获庶母庶辞先主而遂诣曹公亮曰事急矣请奉命求救于孙将军时权拥兵在柴桑观望成败亮说曰】

海内大乱将军起兵据有江东刘豫州亦收众汉南与曹操并争天下今操芟夷大难略已平矣遂破荆州威震四海英雄无所用武故豫州遁逃至此将军量力而处之若能以吴越之众与中国抗衡不如早与之絶若不能当何不案兵束甲北面而事之今将军外托服从之名而内怀犹豫之计事急而不断祸至无日矣权曰苟如君言刘豫州何不遂事之乎亮曰田横齐之壮士耳犹守义不辱况刘豫州王室之胄英才盖世众士慕仰若水之归海若事之不济此乃天也安能复为之下乎权勃然曰吾不能举全吴之地十万之众受制于人吾计决矣非刘豫州莫可以当曹操者然豫州新败之后安能抗此难乎亮曰豫州军虽败于长阪今战士还者及关羽水军精甲万人刘琦合江夏战士亦不下万人曹操之众远来疲弊闻追豫州轻骑

一日一夜行三百余里此所谓彊弩之末势不能穿鲁缟者也故兵法忌之曰必蹶上将军且北方之人不习水战又荆州之民附操者徧兵势耳非心服也今将军诚能命猛将统兵数万与豫州協规同力破操军必矣操军破必北还如此则荆吴之势彊鼎足之形成矣成败之机在于今日权大悦即遣周瑜程普鲁肃等水军三万随亮诣先主并力拒曹公

庞统说刘备【字士元先主器之亲待亚之诸葛亮与亮并为军师中郎将统説备曰】

荆州荒残人物殫尽东有吴孙北有曹氏鼎足之计难以得志今益州国富民彊户口百万四部兵马所出必具宝货无求于外今可权借以定大事备曰今之与吾为水火者曹操也操以急吾以寛操以暴吾以仁操以譎吾以忠每与操反事乃可成耳今以小故而失信义于天下者吾所不取也统曰权变之时固非一道所能定也兼弱攻昧五伯之事逆取顺守报之以义事定之后封以大国何负于信今日不取终为人利耳备遂行姜维説钟防【时防陰怀异图维见而知其心谓可構成扰乱以图克复也乃诡説防曰】

闻君自淮南已来算无遗防晋道克昌皆君之力今复定蜀威德振世民高其功主畏其谋欲以此安归乎夫韩信不背汉于扰攘以见疑于既平大夫种不从范蠡于五湖卒伏剑而妄死彼岂闇主愚臣哉利害使之然也今君大功既立大德已着何不法陶朱公泛舟絶迹全功保身登峨嵋之岭而从赤松遊乎会曰君言远矣我不能行且为今之道或未尽于此也维曰其他则君智力之所能无烦于老夫矣由是情好欢甚

吴

鲁肃说吴主吊刘表二子

夫荆楚与国邻接水流顺北外带江汉内阻山陵有金城之固沃野万里士民殷富若据而有之此帝王之资也今表新亡二子素不辑睦军中诸将各有彼此加刘备天下梟雄与操有隙寄寓于表表恶其能而不能用也若备与彼協心上下齐同则宜抚安与结盟好如有离违宜别图之以济大事肃请得奉命吊表二子并慰劳其军中用事者及説备使抚表众同心一意共治曹操备必喜而从命如其克谐天下可定也今不速往恐为操所先权即遣肃行

朱治说孙贲陈安危【字君理时权从兄豫章太守贲女为曹公子妇及曹公破荆州威震南土贲畏惧欲遣子入质治闻之求往见贲为陈安危】

治说贲曰破虏将军昔率义兵入讨董卓声冠中夏义士壮之讨逆继世廓定六郡特以君侯骨肉至亲器为时生故表汉朝剖符大郡兼建将校仍关综两府荣冠宗室为远近所瞻加讨虏聪明神武继承洪业揽结英雄周济世务军众日盛事业日隆虽昔萧王之在河北无以加也必克成王基应运东南故刘 德远布腹心求见拯救此天下所共知也前在东闻道路之言云将军有异趣良用忧然今曹公阻兵倾覆汉室幼帝流离百姓元元未知所归而中国萧条或百里无烟城邑空虚道殣相望士叹于外妇怨乎室加之以师旅因之以饥饉以此料之

岂能越长江与我争利哉将军当斯时也而欲背骨肉之亲违万安之计割同气之肤啖虎狼之口为一女子改虑易图失机毫厘差以千里岂不惜哉

三国志文类卷三十二

卷三十三

钦定四库全书

三国志文类卷三十三

对问

魏

高贵乡公问诸儒经义

帝幸太学问诸儒曰圣人幽赞神明仰观俯察始作八卦后圣重之为六十四立爻以极数凡斯大义罔有不备而夏有连山殷有归藏周曰周易易之书其故何也易博士淳于俊对曰庖牺因燧皇之图而制八卦神农演之为六十四黄帝尧舜通其变三代随时质文各由其事故易者变易也名曰连山似山出内气连天地也归藏者万事莫不归藏于其中也帝又曰若使包羲因燧皇而作易孔子何以不云燧人氏没包羲氏作乎俊不能答帝又问曰孔子作象象郑 作注虽圣贤不同其所释经义一也今象象不与经文相连而注连之何也俊对曰郑合象象于经者欲使学者寻省易了也帝曰若郑 合之于学诚便则孔子曷为不合以了学者乎俊对曰孔子恐其与文王相乱是以不合此圣人以不合为谦帝曰若圣人以不合为谦则郑 何独不谦耶俊对曰古义宏深圣问奥远非臣所能详尽帝又问曰系辞云黄帝尧舜垂衣裳而天下治此包羲神农之世为无衣裳但圣人化天下何殊异尔耶俊对曰三皇之时人寡而禽兽众故取其羽皮而天下用足及至黄帝人众而禽兽寡是以作为衣裳以济时变也帝又问干为天而复为金为玉为老马与细物并耶俊对曰圣人取象或远或近近取诸物远则天地讲易毕复命讲尚书帝问曰郑 云稽古同天言尧同于天也王肃云尧顺考古道而行之二义不同何者为是博士庾峻对曰先儒所执各有乖异臣不足以定之然洪范称三人占从二人之言贾马及肃皆以为顺考古道以洪范言之肃义为长帝曰仲尼言唯天为大唯尧则之尧之大美在乎则天顺考古道非其至也今发篇开义以明圣德而舍其大更称其细岂作者之意耶俊对曰臣奉遵师说未喻大义至于折中裁之圣思次及四岳举鲧帝又问曰夫大人者与天地合其德与日月合其明思无不周明无不照今王肃云尧意不能明鲧是以试用如此圣人之明有所未尽耶峻对曰虽圣人之宏犹有所未尽故禹曰知人则哲唯帝难之然卒能改授圣贤缉熙庶绩亦所以成圣也帝曰夫有始有卒其唯圣人若不能始何以圣其言惟帝难之然卒能改授盖谓知人圣人所难非不尽之言也经曰知人则哲能官人若尧疑鲧试之九年官人失叙何得谓之圣哲峻对曰臣窃观经传圣人行事不能无失是以尧失之四凶周公失之二叔仲尼失之宰予帝曰尧之任鲧九载无成汨陈五行民用昏垫至于仲尼失之宰予言行之间轻重不同也至于周公管蔡之事亦尚书所载皆博士所当通也峻对曰此皆先贤所疑非臣寡见所能究论次及有陂在下曰虞舜帝问曰当尧之时洪水为害四凶在朝宜速登贤圣济斯民之时也舜年在既立圣德光明而久不进用何也峻对曰尧

咨嗟求贤欲逊已位岳曰否德忝帝位尧复使岳扬举仄陋然后荐舜荐舜之本实由于尧此盖圣人欲尽众心也帝曰尧既闻舜而不登用又时忠臣亦不进达乃使岳扬仄陋而后荐举非急于用圣恤民之谓也峻对曰非臣愚见所能逮及于是复命讲礼记帝问曰太上立德其次务施报为治何由而教化各异皆修何政而能致于立德施而不报乎博士马照对曰太上立德谓三皇五帝之世以德化民其次报施谓三王之世以礼为治也帝曰二者致化薄厚不同将主有优劣耶时使之然乎照对曰诚由时有朴文故化有薄厚也

蒯良蒯越对刘表

刘表之初为荆州也江南宗贼盛袁术屯鲁阳尽有南阳之众吴人苏代领长沙太守贝羽为华容长各阻兵作乱表初到单马入宜城而延中庐人蒯良蒯越襄阳人蔡瑁与谋表曰宗贼甚盛而众不附袁术因之祸今至矣吾欲徵兵恐不集其策安出良曰众不附者仁不足也附而不治者义不足也苟仁义之道行百姓归之如水之趋下何患所至之不从而问兴兵与防乎表顾问越越曰治平者先仁义治乱者先权谋兵不在多在得人也袁术勇而无断苏代贝羽皆武人不足虑宗贼帅多贪暴为下所患越有所素养者使示之以利必以众来君诛其无道抚而用之一州之人有乐存之心闻君圣德必襁负而至矣兵集众附南据江陵北守襄阳荆州八郡可传檄而定术等虽至无能为也表曰子柔之言雍季之论也异度之计舅犯之谋也遂使越遣人诱宗贼至者五十五人皆斩之袭取其众

荀彧讨袁绍对【袁绍与太祖书其辞悖慢太祖以示彧曰今将讨不义而力不敌何如彧有此对】

古之成败者诚有其才虽弱必强苟非其人虽强亦弱刘项之存亡足以观矣今与公争天下者唯袁绍尔绍貌外宽而内忌任人而疑其心公明达不拘唯才所宜此度胜也绍迟重少决失在后机公能断大事应变无方此谋胜也绍御军宽缓法令不立士卒虽众其实难用公法令既明赏罚必行士卒虽寡皆争致死此武胜也绍恃世资从容饰智以收名誉故士之寡能好问者多归之公以至仁待人推诚心不为虚美行已谨俭而与有功者无所吝惜故天下忠正效实之士咸愿为用此德胜也夫以四胜辅天子扶义征伐谁敢不从绍之强其何能为太祖悦

贾诩定太子对【时文帝为五官将而临菑侯植才名方盛各有党与有夺宗之议文帝使人问诩自固之术诩对曰】

愿将军恢崇德度躬素士之业朝夕孜孜不违子道如是而已文帝从之深自砥砺太祖又尝屏除左右诩嘿然不对太祖曰与卿言而不答何也诩曰适有所思故不即对耳太祖曰何思诩曰思袁本初刘景升父子也太祖大笑于是太子遂定

又伐吴蜀对【帝问诩曰吾欲伐不从命以一天下吴蜀何先诩对】

攻取者先兵权建本者尚德化陛下应期受禅抚临率土若绥之以文德而俟其变则平之不难矣吴蜀虽蕞尔小国依岨山水刘备有雄才诸葛亮善治国孙权识虚实陆逊见兵势据险守要泛舟江湖皆难卒谋也用兵之道先胜后战量敌论将故举无遗防臣窃料群臣无备权对虽以天威临之未见万全之势也昔舜舞干戚而有苗服臣以为当今宜先文后武

钟繇狱诘辞【时毛玠出见黥面反者其妻子没为官奴婢玠言曰使天不雨盖此也太祖遂大怒收玠付狱大理钟繇诘玠】

自古圣帝明王罪及妻子书云左不共左右不共右予则孥戮女司寇之职男子入于罪女子入于舂槁汉律罪人妻子没为奴婢黥面汉法所行黥墨之刑存于古典今真奴婢祖先有罪虽历百世犹有黥面供官一以宽良民之命二以宥并罪之辜此何以负于神明之意而当致旱案典谋急恒寒若豫恒燠若宽则亢阳所以为旱玠之吐言以为宽耶以为急也急当阴霖何以反旱成汤圣世野无生草周宣令王旱魃为虐亢旱以来积三十年归咎黥面为相值不卫人伐邢师兴而雨罪恶无徵何以应天玠讥谤之言流于下民不悦之声上闻圣听玠之吐言势不独语时见黥面凡为防人黥面奴婢所识知邪何缘得见对之叹言时以语谁见答云何以何日月于何处所事已发露不得隐欺具以状对

毛玠狱诘对

臣闻萧生缢死困于石显贾子放外谗在绛灌白起赐剑于杜邮晁错致诛于东市伍员绝命于吴都斯数子者或妬其前或害其后臣垂韶执简累勤取官职在机近人事所窜属臣以私无势不绝语臣以冤无细不理人情淫利为法所禁法禁于利势能害之青蝇横生为臣作谤谤臣之人势不在他昔王叔陈生争正王廷宣子平理命举其契是非有宜曲直有所春秋嘉焉是以书之臣不言此无有时人说臣此言必有徵要乞防宣子之辨而求王叔之对若臣以曲闻即刑之日方之安驷之赠赐剑之来比之重赏之惠谨以状对

王肃对明帝帝欲不谥【帝尝问肃曰汉桓时白马令李云上书言帝者谥也是帝欲不谥当何得不死肃对】

但为言失逆顺之节原其本意皆欲尽心念存补国且帝者之威过于雷霆杀一匹夫无异蝼蚁宽而宥之可以示容受切言广德宇于天下故臣以为杀之未必为是也

又对史迁隐切对【帝问肃曰司马迁以受刑之故内怀隐切着史记非贬孝武令人切齿肃对】

司马迁记事不虚美不隐恶刘向杨雄服其善叙事有良史之才谓之实录汉武帝闻其述史记取孝景及己本纪览之于是大怒削而投之于今此两纪有录无书后遭李陵事遂下迁蚕室此为隐切在孝武而不在于史迁也

三国志文类卷三十三

卷三十四

钦定四库全书

三国志文类卷三十四

对问

魏

郭嘉讨袁本初对【字奉孝为司空军祭酒太祖谓嘉曰本初拥冀州之众青并从之地广兵强而数为不逊吾欲讨之力不敌如何嘉对曰】

刘项之不敌公所知也汉祖为智胜项羽虽彊终为所禽嘉窃料之绍有十败公有十胜虽兵彊无能为也绍繁礼多仪公体任自然此道胜一也绍以逆动公奉顺以率天下此义胜二也汉末政失于宽绍以宽济宽故不慑公纠之以猛而上下知制此治胜三也绍外宽内忌用人而疑之所任唯亲戚子弟公外易简而内机明用人无疑唯才所宜不间远近此度胜四也绍多谋少决失在后事公防得辄行应变无穷此谋胜五也绍因累世之资高议揖让以收名誉士之好言饰外者多归之公以至心待人推诚而行不为虚美以俭率下与有功者无所吝士之忠正远见而有实者皆愿为用此德胜六也绍见人饥寒恤念之形于颜色其所不见虑或不及也所谓妇人之仁耳公于目前小事时有所忽至于大事与四海接恩之所加皆过其望虽所不见虑之所周无不济也此仁胜七也绍大臣争权谗言惑乱公御下以道浸润不行此明胜八也绍是非不可知公所是进之以礼所不是正之以法此文胜九也绍好为虚势不知兵要公以少克众用兵如神军人恃之敌人畏之此武胜十也太祖笑曰如卿所言孤何德以堪之也嘉又曰绍方北击公孙瓒可因其远征东取吕布不先取布若绍为寇布为之援此深害也太祖曰然

刘晔伐陈防对【晔字子扬时庐江界有山贼陈防众数万临险守而先时遣偏将致诛莫能禽克太祖问羣下可伐与否咸云山峻高而谿谷深隘守易攻难又无之不足为损得之不足为益】

防等小竖因乱赴险遂相依为彊耳非有爵命威信相服也往者偏将资轻而中国未夷故防敢据险以守今天下略定后服先诛夫畏死趋赏愚智所同故广武君为韩信画防谓其威名足以先声后实而服邻国也岂况明公之德东征西怨先开赏募大兵临之令宣之日军门啓而虏自溃矣太祖笑曰卿言近之遂遣猛将在前大将在后至则克防如晔所度

又对无故求降【时孙权遣使求降帝以问晔晔对曰】

权无故求降必内有急权前袭杀关羽取荆州四郡备怒必大兴师伐之外有彊寇众心不安又恐中国乘其衅而伐之故委地求降一以却中国之兵二则假中国之援以彊其众而疑敌人权善用兵见防知变其计必出于此今天下三分中国十有其八吴蜀各保一州阻山依水有急相救此小国之利也今还自相攻天亡之也宜大兴师径渡江袭其内蜀攻其外我袭其内吴之亡不出旬月矣吴亡则蜀孤若割吴半蜀固不能久存况蜀得其外我得其内乎帝曰人称臣降而伐之疑天下欲来者心必以为惧其一不可孤何不且受吴降而袭蜀之后乎对曰蜀远吴近又闻中国伐之便还军不能止也今备已怒故兴兵击吴闻我伐吴知吴必亡必喜而进与我争割吴地必不改计抑怒救吴必然之势也帝不听遂受吴降即拜权为吴王晬又进曰不可先帝征伐天下兼其八威震海内陛下受禅即真德合天地声暨四远此实然之势非卑臣颂言也权虽有雄才故汉骠骑将军南昌侯耳官轻势卑士民有畏中国心不可彊迫与成所谋也不得已受其降可进其将军号封十万户侯不可即以为王也夫王位去天子一阶耳其礼秩服御相乱也彼直为侯江南士民未有君臣之义也我信其伪降就封殖之崇其位号定其君臣是为虎傅翼也权既受王位却蜀兵之后外尽礼事中国使其国内皆闻之内为无礼以怒陛下陛下赫然发怒兴兵讨之乃徐告其民曰我委身事中国不爱珍货重宝随时贡献不敢失臣礼也无故伐我必欲残我国家俘我民人子女以为僮仆妾吴民无縁不信其言也信其言而感怒上下同心战加十倍矣又不从遂即拜权为吴王权将陆逊大败刘备杀其兵八万余人备仅以身免权外礼愈卑而内行不顺果如晬言

孙资讨蜀对【时诸葛亮出在南郑议者以为可因大发兵讨之帝意亦然以问资资对曰】

昔武皇帝征南郑取张鲁阳平之役危而后济又自往拔出夏侯渊军数言南郑直为天狱中斜谷道为五百里石穴耳言其深险喜出渊军之辞也又武皇帝圣于用兵察蜀贼栖于山岩视吴虏窜于江湖皆挠而避之不责将士之力不争一朝之忿诚所谓见胜而战知难而退也今若进军就南郑讨亮道既险阻计用精兵又转运镇守南方四州遏御水贼凡用十五六万人必当复更有所发兴天下骚动费力广大此诚陛下所宜深虑夫守战之力力役参倍但以今日见兵分命大将据诸要险威足以震慑彊寇镇静疆场将士虎睡百姓无事数年之间中国日盛吴蜀二虏必自罢弊【帝由是止】伐吴对【时吴人彭绮又举义江南议者以为因此伐之必有所克帝问资】

资曰鄱阳宗人前后数有举义者众弱谋浅旋辄乖散昔文皇帝尝密论贼形势言洞浦杀万人得船千万数日间船人复会江陵被围歷月权裁以千数百兵住东门而其土地无崩解者是有法禁上下相奉持之明验也以此推绮惧未能为权腹心大疾也【绮果寻败亡】

又对明帝万年后计【资别传曰帝诏资曰吾年稍长又厯观书传中皆叹息无所不念图万年后计莫过使亲人广据职势兵任又重今射声校尉缺久欲得亲人谁可用者】

资曰陛下思深虑远诚非愚臣所及书传所载皆圣听所究向使汉高不知平勃能安刘氏孝武不识金霍付属以事殆不可言文皇帝始召曹真还时亲诏臣以重虑及至晏驾陛下即阼犹有曹休内外之望赖遭日月御勒不倾使各守分职纖介不间以此推之亲臣贵戚虽当据

势握兵宜使轻重素定若诸侯典兵力均衡平宠齐爱等则不相为服不相为服则意有异同今五营所领见兵常不过数百选授校尉如其辈类为有俦匹至于重大之任能有所维纲者宜以圣恩简择如平勃金霍刘章等一二人渐殊其威重使相镇固于事为善帝曰然如卿言当为吾远虑所图今日可参平勃侔金霍双刘章者其谁哉资曰臣闻知人则哲惟帝难之唐虞之圣凡所进用明试以功陈平初事汉祖绛灌等谤平有受金盗嫂之罪周勃以吹箫引疆始事高祖亦未知名也高祖察其行迹然后知可付以大事霍光给事中二十余年小心谨慎乃见亲信日防夷狄以至孝质直特见擢用左右尚曰妄得一胡儿而重贵之平勃虽安汉嗣其终勃被反名平劣自免于吕须之谗上官桀桑羊与霍光争权防成祸乱此诚知人之不易为臣之难也又所简择当得陛下所亲当得陛下所信诚非愚臣之所能识别

杜畿録寡妇对

畿在郡被书録寡妇是时他郡或有已自相配嫁依书皆録夺啼哭道路畿但取寡者故所送少及赵俨代畿而所送多文帝问畿前君所送何少今何多也畿对曰臣前所録皆亡者妻今俨送生人妇也帝及左右顾而失色

郑泰对董卓【字公业少有才畧多谋计何进辅政徵用名士以泰为尚书侍郎加奉车都尉进将诛黄门召董卓为助泰諫不能用进寻见害卓果专权废帝关东义兵起卓防议大发兵羣寮咸惮卓莫敢忤防其彊益将难制乃曰夫治在德不在兵也卓不悦曰如此兵无益耶众人莫不变容为泰震栗泰乃诡辞而对曰】

非以无益以山东不足加兵也今山东议欲起兵州郡相连人众相动非不能也然中国自光武以来无鸡鸣狗吠之惊百姓忘战日久仲尼有言不教民战是谓弃之虽众不能为害一也明公自出西州少为国将闲习军事数践战场名称当世以此威名民怀慑服二也袁本初公卿子弟生处京师体长妇人张孟卓东平长者坐不窥堂孔公绪能清谈高论嘘枯吹生无军师之才负霜露之勤临锋履刃决敌雌雄皆非明公敌三也察山东之士力能跨马控勇等孟贲捷齐庆忌信有聊城之守防有良平之谋可任以偏师责以成功未闻有其人者四也就有其人王爵不相加妇姑位不定各恃众怙力将人人碁跣以观成败不肯同心共胆牵徒旅进五也关西诸郡北接上党太原冯翊扶风安定自顷以来数与胡战妇女载防挟矛弓负矢况其悍夫以此当山东忘战之民譬驱羣羊向虎狼其胜可必六也且天下之拳勇今见在者不过并凉匈奴屠各湟中义从八种西羌皆百姓素所畏服而明公权以为爪牙壮夫震悚况小丑乎七也又明公之将帅皆中表腹心同旅日久自三原狭口以来恩信醇着忠诚可远任智谋可特使以此当山东解合之虚诞实不相若八也夫战有三亡以乱攻治者亡以邪攻正者亡以逆攻顺者亡今明公秉国政平讨夷凶患忠义克立以三德待于三亡奉辞伐罪谁人敢御九也东州有郑康成学该古今儒生之所以集北海邴根矩清高直亮羣士之楷式彼诸将若询其计画案典校之彊弱燕赵齐梁非不盛终见灭于秦吴楚七国非不众而不敢逾荥阳况今德政之赫赫股肱之邦良欲造乱以徼不义者必不相然赞成其凶谋十也若十事少有可采无事徵兵以惊天下使患役之民相聚为非弃德恃众以轻威重卓乃悦

三国志文类卷三十四

卷三十五

钦定四库全书

三国志文类卷三十五

对问

魏

傅嘏伐吴对【孙权死征南大将军王昶征东将军胡遵镇南将军毌立俭等表请征吴朝廷以三征计异诏访尚书傅嘏对曰】

昔夫差胜齐陵晋威行中国不能以免姑苏之祸齐闵辟兼国开地千里不足以救颠覆之败有始不必善终古事之明效也孙权自破蜀兼平荆州之后志盈欲满罪戮忠良诛及嗣元凶已极相国宣文侯先识取乱侮亡之义深建宏图大举之防今权已死托孤于诸葛恪若矫权苛暴蠲其虐政民免酷烈偷安新惠外内齐虑有同舟之惧虽不能终自保完犹足以延期挺命于深江之表矣昶等或欲泛舟径渡横行江表收民畧地因粮于寇或欲四道并进临之以武诱间防貳待其崩坏或欲进军大佃偪其项领积谷观衅相时而动凡此三者皆取贼之常计也然施之当机则功名成立苟不应节必貽后患自治兵以来出入三载非掩袭之军也贼丧元帅利存退守若撰饰舟楫罗船津要坚城清野以防卒攻横行之计殆难必施贼之为寇防六十年君臣伪立吉凶同患若恪蠲其弊天去其疾崩溃之应不可卒待今边壤之守与贼相远贼设罗落又持重密间谍不行耳目无闻夫军无耳目校察未详而举大众以临巨险此为希幸徼功先战而后求胜非全军之长防也唯有进军大佃最差完牢可诏昶遵等择地居险审所错置及令三方一时前守夺其肥壤使还耕墾土一也兵出民表寇钞不犯二也招怀近路降附日至三也罗落远设间构不来四也贼退其守罗落必浅佃作易之五也坐食积谷士不运输六也衅隙时闻讨袭速决七也凡此七者军事之急务也不据则贼擅便资据之则利归于国不可不察也夫屯垒相逼形势已交智勇得陈巧拙俱用防之而知得失之计角之而知有余不足虏之情伪将焉所逃夫以小敌大则役烦力竭以贫敌富则敛重财匿故敌逸能劳之饱能饥之此之谓也然后盛众厉兵以震之参惠倍赏以招之多方广似以疑之由不虞之道以间其不戒比及三年左提右挈虏必冰散瓦解安受其弊可坐算而得也昔汉氏厯世常患匈奴朝臣谋士早朝宴罢介冑之将则陈征伐搢绅之徒咸言和亲勇奋之士思展搏噬故樊哙愿以十万之众横行匈奴季布面折其短李信求以二十万独举楚人而果辱秦军今诸将有陈越江陵险独步虏廷即亦向时之类也以陛下圣德辅相忠贤法明士练措计于全胜之地振长防以御之虏之奔溃必然之数故兵法曰屈人之兵而非战也拔人之城而非攻也若释庙胜必然之理而行万一不必全之路诚愚臣之所虑也故谓大佃而偪之计最长时不从嘏言其年十一月诏昶等征吴五年正月诸葛恪拒战大破众军于东关

陈羣肉刑对【时太祖令议复肉刑羣对曰】

臣父纪以为汉除肉刑而增加笞本兴仁恻而死者更众所谓名轻而实重者也名轻则易犯实重则伤民书曰惟敬五刑以成三德易着剗刑灭趾之法所以辅政助教惩恶息杀也且杀人偿死合于古制至于伤人或残毁其体而裁剪毛发非其理也若用古刑使淫者下蚕室盗者刖其足则永无淫放穿窬之奸矣夫三千之属虽未可悉复若斯数者时之所患宜先施用汉律所杀殊死之罪仁所不及也其余逮死者可以刑杀如此则所以刑之与所生之足以相贸矣今以笞死之法易不杀之刑是重人支体而轻人躯命也

卢毓举才对【明帝时防司徒缺毓举处士管宁帝不能用更问其次毓对曰】

敦笃至行则太中大夫韩暨亮直清方则司 校尉崔林贞固纯粹则太常林帝乃用暨毓于人及选举先举性行而后言才黄门李丰尝以问毓毓曰才所以为善也故大才成大善小才成小善今称之有才而不能为善是才不中器也丰等服其言

和洽时风不至对【太和中散骑常侍高堂隆奏时风不至而有休废之气必有司不勤职事以失天常也诏书谦虚引咎博谘异同洽乃对】

洽以为民稀耕少浮食者多国以民为本民以谷为命故废一时之农则失育命之本是以先王务蠲烦费以专耕农自春夏已来民穷于役农业有废百姓嚣然时风不至未必不由此也消复之术莫大于节俭太祖建立洪业奉师徒之费供军赏之用吏士丰于资食仓库衍于谷帛由不饰无用之宫绝浮华之费方今之要固在息省劳烦之役损除他余之务以为军戎之储三边守御宜在备豫料贼虚实蓄士养众算庙胜之防明攻取之谋详询众庶以求厥中若谋不素定轻弱小敌军人数举而无庸所谓悦武无震古人之诫也

高堂隆对崇华殿灾【崇华殿灾诏问隆此何咎于礼宁有所禳之义乎】

夫灾变之发皆所以明教诫也惟率礼修德可以胜之易传曰上不俭下不节孽火烧其室又曰君高其台天火为灾此人君苟饰宫室不知百姓空竭故天应之以旱火从高殿起也上天降鉴故谴告陛下陛下宜增崇人道以答天意昔太戊有桑谷生于朝武丁有雉雉登于鼎皆闻灾恐惧侧身修德三年之后远夷朝贡故号曰中宗高宗此则前代之明鉴也今案旧占灾火之发皆以台榭宫室为诫然今宫室之所以充广者实由宫人猥多之故宜简择留其淑懿如周之制罢省其余此则祖已之所以训高宗高宗之所以享远号也诏问隆吾闻汉武帝时柏梁灾而大起宫殿以厌之其义云何隆对曰臣闻西京柏梁既灾越巫陈方建章是经以厌火祥乃夷越之巫所为非圣贤之明训也五行志曰柏梁灾其后有江充巫蛊也衞太子事如志之言越巫建章无所厌也孔子曰灾者修类应行精祲相感以戒人君是以圣主覩灾责躬退而修德以消复之今宜罢散民役宫室之制务从约节内足以待风雨外足以讲礼义清埽所灾之处不敢于此有所立作萑莆嘉禾必生此地以报陛下防恭之德岂可疲民之力竭民之财实非所以致符瑞而怀远人也帝遂复崇华时郡国有九龙见故改曰九龙殿

又对鹊巢凌霄阙

诗云惟鹊有巢惟鸠居之今兴宫室起凌霄阙而鹊巢之此宫室未成身不得居之象也天意若曰宫室未成将有他姓制御之斯乃上天之戒也夫天道无亲惟与善人不可不深防不可不深虑夏商之季皆继体也不钦承上天之明命惟谗谄是从废德适欲故其亡也忽焉太戊武丁覩灾竦惧祇承天戒故其兴也勃焉今若休罢百役俭以足用增崇德政动遵帝则除普天之所患兴兆民之所利三王可四五帝可六岂惟殷宗转祸为福而已哉臣备腹心苟可以繁祉圣躬安存社稷臣虽灰身破族犹生之年也岂惮忤逆之灾而令陛下不闻至言乎于是帝改容动色

王基伐吴对

夫兵动而无功则威名折于外财用穷于内故必全而后用也若不资通川聚粮水战之备则虽积兵江内无必渡之势矣今江陵有沮漳二水灌溉膏腴之田以千数安陆左右陂池沃衍若水陆并农以实军资然后引兵诣江陵夷陵分据夏口顺沮漳资水浮谷而下贼知官兵有经久之势则拒天诛者意沮而向王化者益固然后率合蛮夷以攻其内精卒劲兵以讨其外则夏口以上必拔而江外之郡不守如此吴蜀之交絶交絶而吴禽矣不然兵出之利未可必矣

三国志文类卷三十五

卷三十六

钦定四库全书

三国志文类卷三十六

对问

蜀

诸葛亮对先主问计【先主见亮屏人曰汉室倾颓奸臣窃命主上防尘孤不度德量力欲信大义于天下而智术浅短遂用猖獗至于今日然志犹未已君谓计将安出亮答曰】

自董卓已来豪杰并起跨州连郡者不可胜数曹操比于袁绍则名微而众寡然操遂能克绍以弱为强者非惟天时抑亦人谋也今操已拥百万之众挟天子以令诸侯此诚不可与争锋孙权据有江东已历三世国险而民附贤能为之用此可与为援而不可图也荆州北据汉沔利尽南海东连吴会西通巴蜀此用武之国而其王不能守此殆天所以资将军将军岂有意乎益州险塞沃野千里天府之土高祖因之以成帝业刘璋闇弱张鲁在北民殷国富而不知存恤智能之士思得明君将军既帝室之胄信义着于四海揔览英雄思贤如渴若跨有荆益保其岩阻西和诸戎南抚夷越外结好孙权内修政理天下有变则命一上将将荆州之军以向宛洛将军身率益州之众以出秦川百姓孰敢不箪食壶浆以迎将军者乎诚如是则霸业可成汉室可兴矣先主曰善于是与亮情好日密

庞统称才对【统性好人伦勤于长养每所称述多过其才时人怪而问之统对曰】

当今天下大乱雅道凌迟善人少而恶人多方欲兴风俗长道业不美其谭即声名不足慕企不足慕企而为善者少矣今拔十失五犹得其半而可以崇迈世教使有志者自励不亦可乎

秦宓对或问自比巢许四皓【或谓宓曰足下欲自比于巢许四皓何故扬文藻见瓌颖乎宓对曰】

仆文不能尽言言不能尽意何文藻之有扬乎昔孔子三见哀公言成七卷事盖有不可嘿嘿也接輿行且歌论家以光篇渔父咏沧浪贤者以耀章此二人者非有欲于时者也夫虎生而文炳凤生而五色岂以五采自饰画哉天性自然也盖河洛由文兴六经由文起君子懿文德采藻其何伤以仆之愚犹耻革子成之误况贤于已者乎

对夏侯纂【先主既定益州广汉太守夏侯纂请宓为师友祭酒领五官掾称曰仲父宓称疾卧在茅舍纂将功曹古朴主簿王普厨膳即宓第宴谈宓卧如故纂问朴曰至于贵州養生之

具实絶余州矣不知士人何如余州也朴对曰乃自先汉已来其爵位者不如余州耳至于著作世师式不负于余州也严君平见黄老作指归扬雄见易作太 见论语作法言司马相如为武帝制封禅之文于今天下所共闻也纂曰仲父何如宓以簿击颊曰愿明府勿以仲父之言假于小草民请为明府陈其本纪】

蜀有汶阜之山江出其腹帝以防昌神以建福故能沃野千里淮济四渎江为其首此其一也禹生石纽今之汶山郡是也昔尧遭洪水鯀所不治禹疏江决河东注于海为民除害生民以来功莫先者此其二也天帝布治房心决政参伐参伐则益州分野三皇乘祗车出谷口今之斜谷是也此便鄙州之阡陌明府以雅意论之何若于天下乎

又对张温【吴遣张温聘蜀宓有此对】

温问曰君学乎宓曰五尺童子皆学何必小人温复问曰天有头乎宓曰有之温曰在何方也宓曰在西方诗曰乃眷西顾以此推之头在西方温曰天有耳乎宓曰天处高而听卑诗云鹤鸣九臯声闻于天若其无耳何以听之温曰天有足乎宓曰有诗云天步艰难之子不犹若其无足何以步之温曰天有姓乎宓曰有温曰何姓宓曰姓刘温曰何以知之答曰天子姓刘故以此知之温曰日生于东乎宓曰虽生于东而没于西答问如响应声而出于是温大敬服宓之文辩皆此类也李恢代邓方对【时庾降都督邓方卒先主问恢谁可代者恢对曰】

人之才能各有长短故孔子曰其使人也器之且夫明主在上则臣下尽情是以先零之役赵充国曰莫若老臣臣窃不自量惟陛下察之先主笑曰孤之本意亦已在卿矣遂以恢为庾降都督使持节领交州刺史住平夷县

吴

赵咨对魏帝吴王状【遣都尉赵咨使魏魏帝问曰吴王何等主也咨对曰】

帝问曰吴王何等主也咨对曰聪明仁智雄略之主也帝问其状咨曰纳鲁肃于凡品是其聪也拔吕防于行阵是其明也获于禁而不害是其仁也取荆州而兵不血刃是其智也据三州虎视于天下是其雄也屈身于陛下是其略也

又答嘲

魏文帝嘲咨曰吴主颇知学乎咨曰吴王浮江万艘带甲百万任贤使能志存经略虽有余闲博览书传历史籍采奇异不效书生寻章摘句而已帝曰吴可征不咨对曰大国有征伐之兵小国有备御之固又曰吴难魏否咨曰带甲百万江汉为池何难之有帝问曰吴如大夫者防人咨曰聪明特达者八九十人如臣之比车载斗量不可胜数咨频载使北人敬异权闻而嘉之拜骑都尉咨言曰观北方终不能守盟今日之计朝廷承汉四百之际应东南之运宜改年号正服色以应天顺民权纳之

鲁肃对吴主佐桓文之功【字子敬权因议曰今汉室倾危四方云扰孤承父兄余业思有桓文之功君既惠顾何以佐之肃对曰】

昔高帝区区欲尊事义帝而不获者以项羽为害也今之曹操犹昔项羽将军何由得为桓文乎肃窃料之汉室不可复兴曹操不可卒除为将军计惟有鼎足江东以观天下之衅规模如此亦自无嫌何者北方诚多务也因其多务勦除黄祖进伐刘表竟长江所极据而有之然后建号帝王以图天下此高帝之业也权曰今尽力一方冀以辅汉耳此言非所及也

朱育对濮阳兴【防稽典录曰孙亮时有山阴朱育仕郡门下书佐太守濮阳兴正旦宴见掾史言次问太守昔闻朱颖川问士于郑召公韩吴郡问士于刘圣博王景兴问士于虞仲翔尝见郑刘二答而未覩仲翔对也钦闻国贤思覩盛美有日矣书佐宁识之乎育对曰】

往过习之昔初平末年王府君以渊妙之才超迁临郡思贤嘉善乐采名俊问功曹虞翻曰闻玉出昆山珠生南海远方异域各生珍宝且曾闻士人叹美贵邦旧多英俊徒以远于京畿含香未越耳功曹雅好博古宁识其人邪翻对曰夫会稽上应牵牛之宿下当少阳之位东渐巨海西通五湖南畅无垠北渚浙江南山攸居实为州镇昔禹会群臣因以命之山有金木鸟兽之殷水有盐鱼珠蚌之饶海岳精液善生俊异是以忠臣继踵孝子连闻下及贤女靡不育焉王府君笑曰地势然矣士女之名可悉闻乎翻对曰不敢及远略言其近者耳往者孝子句章董黯尽心色养丧致其哀单身林野鸟兽归怀怨亲之辱白日报讎海内闻名昭然光着太中大夫山阴陈嚣渔则化盗居则让邻感侵退藩遂成义里摄养车姬行足厉俗自扬子云等上书荐之灿然传世太尉山阴郑公清亮质直不畏彊御鲁相山阴钟离意稟殊特之姿孝家忠朝宰县相国所在遗惠故取养有君子之暮鲁国有丹书之信及陈宫费齐皆上契天心功德治状记在汉籍有道山阴赵晔徵士上虞王充各洪才渊懿学究道源著书垂藻络绎百篇释经传之宿疑解当世之槃结或上穷阴阳之奥秘下据人情之归极交趾刺史上虞綦母俊拔济一郡让爵土之封决曹掾上虞孟英三世死义主簿句章梁宏功曹史余姚曹骠勲主簿向章郑云皆敦终始之义引罪免居门下督盗贼余姚伍隆 候主簿任光章安小吏黄他身当白刃济君于难扬州从事句章王脩委身授命垂声来世河内太守上虞魏少英遭世屯蹇忘家忧国列在八俊为世英彦尚书乌伤杨乔桓帝妻以公主辞疾不纳近故太尉上虞朱公天姿聪亮钦明神武防无失谏征无遗虑是以天下义兵思以为首上虞女子曹娥父溺江流投水而死立石碑纪炳然着显王府君曰是既然矣颖川有巢许之逸轨吴有泰伯之三让贵郡虽士人纷纭于此足矣翻对曰故先言其近者耳若乃引上世之事及抗节之士亦有其人昔越王翳让位逃于巫山之穴越人薰而出之斯非泰伯之俦邪且泰伯外来之君非其地人也若以外来之人言之则大禹亦巡于此而葬之矣鄞大里黄公洁已暴秦之世高祖即阼不能一致惠帝恭让出则济难徵士余姚严遵王莽数聘抗节不行光武中兴然后俯就矫首不拜志凌云日皆着于传籍较然彰明岂如巢许流俗遗谭不见经传者哉王府君笑曰善哉话言也贤矣非君不着太守未之前闻也濮阳府君曰御史所云既闻其人亚斯已下书佐宁识之乎育曰瞻仰景行敢不识之近者太守上虞陈业洁身清行志怀霜雪贞亮之信同操柳下遭汉中微委官弃禄遁迹黟歙以求其志高邈妙踪天下所闻故桓文遗之尺牋之书比竟三高其聪明大略忠直謇谔则侍御史余姚虞翻偏将军乌伤骆统其渊懿纯德则太子少傅山阴闾

泽学通行茂作帝师儒其雄姿武毅立功当世则后将军贺齐勲成绩着其探极秘术言合神明则太史令上虞吴范其文章之士立言灿盛则御史中丞句章任爽鄱阳太守章安虞翔各驰文檄晔若春荣处士邓卢叙弟犯公宪自杀乞代吴宁斯敦山陰祁庚上虞樊正咸代父死罪其女则松杨柳朱永宁瞿素或一醺守节丧身不顾或遭寇刼贼死不亏行皆近世之事尚在耳目府君曰皆海内之英也吾闻秦始皇二十五年以吴越地为防稽郡治吴汉封诸侯王以何年复为郡而分治于此育对曰刘贾为荆王贾为英布所杀又以刘濞为吴王景帝四年濞反诛乃复为郡治于吴元鼎五年除东越因以其地为治并属于此而立东部都尉后徙章安阳朔元年又徙治鄞或有寇害复徙句章到永建四年刘府君上书浙江之北以为吴郡会稽还治山陰自永建四年岁在己巳以至今年积百二十九岁府君称善是岁吴之太平三年岁在丁丑

三国志文类卷三十六

卷三十七

钦定四库全书

三国志文类卷三十七

议

魏

太祖拒王芬等谋废立议【冀州刺史王芬南阳许攸沛国周旌等连结豪杰谋废灵帝立合肥侯以告太祖太祖拒之芬等遂败魏书载太祖拒芬辞曰】

夫废立之事天下之至不祥也古人有权成败计轻重而行之者伊尹霍光是也伊尹怀至忠之诚据宰臣之势处官司之上故进退废置计从事立及至霍光受托国之任籍宗臣之位内因太后秉政之重外有羣卿同欲之势昌邑即位日浅未有贵宠朝乏说臣议出密近故计行如转圜事成如摧朽今诸君徒见曩者之易未覩当今之难诸君自度结众连党何若七国合肥之贵孰若吴楚而造作非常欲望必克不亦危乎

曹髦帝王优劣议【帝宴羣臣于太极东堂与侍中荀顗尚书崔赞袁亮钟毓给事中中书令虞松等并讲述礼典遂言帝王优劣之差帝慕夏少康因问荀顗等曰】

有夏既衰后相殆灭少康收集夏众复禹之绩高祖拔起陇亩驱帅豪隼芟夷秦项包举防内斯二王可谓殊才异略命世大贤者也考其功德谁宜为先顗等对曰夫天下重器王者天授圣德应期然后能受命创业至于阶縁前绪兴复旧绩造之与因难易不同少康功德虽美犹为中兴之君与世祖同流可也至如高祖臣等以为优帝曰自古帝王功德言行互有高下未必创业者皆优绍继者咸劣也汤武高祖虽俱受命贤圣之分所览悬殊少康殷宗中兴之美夏啓周成守文之盛论德校实方诸汉祖吾见其优未闻其劣顾所遇之时殊故所名之功异耳少康生于灭亡之后降为诸侯之 崎岖逃难仅以身免能布其德而兆其谋卒灭过戈克复禹绩祀夏配天不失旧物非至德宏仁岂济斯勲汉祖因土崩之势仗一时之权专任智力以成功业行事动静多违圣检为人子则数危其亲为人君则囚系贤相为人父则不能卫子身没之后社稷防倾若与少康易时而处或未能复大禹之绩也推此言之宜高夏康而下汉祖矣诸卿且论详之翌日丁巳讲业既毕顗亮等议曰三代建国列土而治当其衰弊无土崩之势可怀以德难屈以力逮至战国彊弱相兼去道德而任智力故秦之弊可以力争少康布德仁者之英也高祖任力智者之隼也仁智不同二帝殊矣诗书述殷中宗高宗皆列大雅少康功美过于二宗其为大雅明矣少康为优宜如诏防赞毓松等议曰少康虽积德累仁然上承大禹遗泽余庆内有虞仍之援外有靡艾之助寒浞谗慝不德于民浇 无亲外内弃之以此有国盖有所因至于汉祖起自布衣率乌合之事以成帝者之业论德则少康优课功则高

祖多语资则少康易校时则高祖难帝曰诸卿论少康因资高祖创造诚有之矣然未知三代之世任德济勲如彼之难秦项之际任力成功如此之易且太上立德其次立功汉祖功高未若少康盛德之茂也且夫仁者必有勇诛暴必用武少康武烈之威岂必降于汉祖哉但夏书沦亡旧文残缺故勲美阙而罔载唯有伍员粗述大略其言复禹之绩不失旧物祖述圣业旧章不愆自非大雅兼才孰能与于此向令坟典俱存行事详备亦岂有异同之论哉于是羣臣咸悦服中书令松进曰少康之事去世久远其文昧如是以自古及今议论之士莫有言者德美隐而不宣陛下既垂心远鉴考详古昔又发德音賛明少康之美使显于千载之上宜録以成篇永垂于后帝曰吾学不博所闻浅狭惧于所论未获其宜纵有可采亿则屢中又不足贵无乃致笑后贤彰吾闇昧乎于是侍郎钟会退论次焉

荀彧粮尽议【太祖保官渡袁绍围之太祖军粮方尽书与彧议欲还许以引绍彧有此议】

今军食虽少未若楚汉在荥阳成皋间也是时刘项莫肯先退先退者势屈也公以十分居一之众画地而守之扼其喉而不得进已半年矣情见势竭必将有变此用奇之时不可失也太祖乃住遂以奇兵袭绍别屯斩其将淳于琼等绍退走

又寝复九州议【太祖拔邺领冀州牧或説太祖宜复古置九州则冀州所制者广大则天下服矣太祖将从之彧有此议】

若是则冀州当得河东冯翊扶风西河幽并之地所夺者众前日公破袁尚禽审配海内震骇必人人自恐不得保其土地守其兵众也今使分属冀州将皆动心且人多説關右诸将以闭关之计今闻此以为必以次见夺一旦生变虽有善守者转相胁为非则袁尚得寛其死而袁谭怀贰刘表遂保江汉之间天下未易图也愿公急引兵先定河北然后修复旧京南临荆州责贡之不入则天下咸知公意人人自安天下大定乃议古制此社稷长久之利也太祖遂寝九州议

贾诩追退军议

太祖征张绣一朝引军退绣自追之诩谓绣曰不可追也追必败绣不从奏进兵交战大败而还诩谓绣曰促更追之更战必胜绣谢曰不用公言以至于此今已败奈何复追诩曰兵势有变亟往必利绣信之遂收散卒赴追大战果以胜还问诩曰绣以精兵追退军而公曰必败退以败卒击胜兵而公曰必克悉如公言何其反而皆驗也诩曰此易知耳将军虽善用兵非曹公敌也军虽新退曹公必自断后追兵虽精将既不敌彼士亦锐故知必败曹公攻将军无失防力未尽而退必国内有故已破将军必轻军速进纵留诸将断后诸将虽勇亦非将军敌故虽用败兵而战必胜也绣乃服

夏侯 时事议

太傅司马宣王问以时事 议以为夫官才用人国之柄也故铨衡专于台阁上之分也孝行

存乎闾巷优劣任之乡人下之叙也夫欲清教审选在明其分叙不使相涉而已何者上过其分则恐所由之不本而干势驰骛之路开下逾其叙则恐天爵之外通而机权之门多矣夫天爵下通是庶人议柄也机权多门是纷乱之原也自州郡中正品度官才之来有年载矣緬緬纷纷未闻整齐岂非分叙参错各失其要之所由哉若令中正但考行伦辈伦辈当行均斯可官矣何者夫孝行着于家门岂不忠恪于在官乎仁恕称于九族岂不达于为政乎义断行于乡党岂不堪于任事乎三者之类取于中正虽不处其官名斯任官可知矣行有大小比有高下则所任之流亦焕然明别矣奚必使中正干铨衡之机于下而执机柄者有所委仗于上上下下交侵以生纷错哉且台阁临下考功校否众职之属各有官长旦夕相考莫究于此闾阎之议以意裁处而使匠宰失位众人驱骇欲风俗清静其可得乎天台县远众所絶意所得至者更在侧近孰不脩饰以要所求所求有路则修已家门者已不如自达于乡党矣自达乡党者已不如自求之于州邦矣苟开之有路而患其饰真离本虽复严责中正督以刑罚犹无益也岂若使各帅其分官长则各以其属能否献之台阁台阁则据官长能否之第参以乡闾德行之次拟其伦比勿使偏颇中正则唯考其行迹别其高下审定辈类勿使升降台阁摠之如其所简或有参错则其责负自在有司官长所第中正辈拟比随次率而用之如其不称责负在外然则内外相参得失有所互相形检孰能相饰斯则人心定而事理得庶可以静风俗而审官才矣又以为古之建官所以济育羣生统理民物也故为之君长以司牧之司牧之主欲一而专一则官任定而上下安专则职业修而事不烦夫事简业修上下相安而不治者未之有也先王建万国虽其详未可得而究然分疆画界各守土境则非重累羁绊之体也下考殷周五等之叙徒有小大贵贱之差亦无君官臣民而有二统互相牵制者也夫官统不一则职业不修职业不修则事何得而简事之不简则民何得而静民之不静则邪恶并兴而奸伪滋长矣先王达其如此故专其职司而一其统业始自秦世不师圣道私以御职奸以待下惧宰官之不修立监牧以董之畏督监之容曲设司察以纠之宰牧相累监察相司人怀异心上下殊务汉承其绪莫能匡改魏室之隆日不暇及五等之典虽难卒复可粗立仪准以一治制今之长吏皆君吏民横重以郡守累以刺史若郡所摄唯在大较则与州同无为再重宜省郡守但任刺史刺史职存则监察不废郡吏万数还亲农业以省烦费丰财殖谷一也大县之才皆堪郡守是非之讼每生异意顺从则安直已则争夫和羹之美在于合异上下之益在能相济顺从乃安此琴瑟一声也荡而除之则官省事简二也又干郡之吏职监诸县营护党亲乡邑旧故如有不副而因公掣顿民之困弊咎生于此若皆并合则乱源自塞三也今承衰弊民人雕落贤才鲜少任事者寡郡县良吏往往非一郡受县成其剧在下而吏之上选郡当先足此为亲民之吏专得底下吏者民命而常顽鄙今如并之吏多选清良者造职大化宣流民物获宁四也制使万户之县名之郡守五千以上名之都尉千户以下令长如故自长以上考课迁用转以能升所牧亦增此进才效功之叙也若经制一定则官才有次治功齐明五也若省郡守县皆径达事不拥隔官无留滞三代之风虽未可必简一之化庶防可致便民省费在于此矣又以为文质之更用犹四时之迭兴也王者体天理物必因弊而济通之时弥质则文之以礼时泰侈则救之以质今承百王之末秦汉余流世俗弥文宜大改之以易民望今科制自公列侯以下位从大将军以上皆得服绶锦罗绮纨素金银饰镂之物自是以下杂防之服通于贱人虽上下等级各示有差然朝臣之制已得侔至尊矣 黄之采已得通于下矣欲使市不鬻华丽之色商不通难得之货工不作雕刻之物不可得也是故宜大理其本准度古法文质之宜取其中则以为礼度车舆服章皆从质朴禁除末俗华丽之事使干朝之家有位之室不复

有锦绮之饰无兼采之服纖巧之物自上以下至于朴素之差示有等级而已勿使过一二之觉若夫功德之赐上恩所特加皆表之有司然后服用之夫上之化下犹风之靡草朴素之教兴于本朝则弥侈之心自消于下矣

刘劭废朝却防议

建安中为计吏诣许太史上言正旦当日蚀劭时在尚书令荀彧所坐者数十人或云当废朝或云宜却会劭曰梓慎禘灶古之良史犹占水火错失天时礼记曰诸侯旅见天子及门不得终礼者四日蚀在一然则圣人垂制不为变豫废朝礼者或灾销异伏或推术谬误也彧善其言勅朝会如旧日亦不蚀

三国志文类卷三十七

卷三十八

钦定四库全书

三国志文类卷三十八

议

魏

王朗复肉刑议【王朗字景兴时钟繇上疏复肉刑朗议】

繇欲轻减大辟之条以增益则刑之数此即起偃为豎化尸为人矣然臣之愚犹有未合微异之意夫五刑之属着在科律科律自有减死一等之法不死则为减施行已久不待遽假斧凿于彼肉刑然后有罪次也前世仁者不忍肉刑之惨酷是以废而不用不用已来历年数百今复行之恐所减之文未彰于万民之目而肉刑之问已宣于寇讎之耳非所以来远人也今可按繇所欲轻之死罪使减死之髡则嫌其轻者可倍其居作之岁数内有以生易死不訾之恩外无以刑易 骇耳之声议者百余人与朗同者多帝以吴蜀未平且寝华歆举孝廉议【字子鱼时三府议举孝廉本以德行不复限以试经】

歆以为丧乱以来六籍堕废当务存立以崇王道夫制法者所以经盛衰今听孝廉不以经试恐学业遂从此而废若有秀异可特徵用患于无其人何患不得哉帝从其言

程昱诛降者议【太祖征马超文帝留守使昱参军事田银苏伯等反河间遣将军贾信讨之贼有千余人请降议者皆以为宜如旧法昱议】

昱曰诛降者谓在扰攘之时天下云起故围而后降者不赦以示威天下开其利路使不至于围也今天下略定且在邦域之中此必降之贼杀之无所威惧非前日诛降之意臣以为不可诛也纵诛之宜先啓闻众议者曰军事有专无请昱不答文帝起入特引见昱曰君有所不尽邪昱曰凡专命者谓有临时之急呼吸之间者耳今此贼制在贾信之手无朝夕之变故老臣不愿将军行之也文帝曰君虑之善即白太祖太祖果不诛太祖还闻之甚悦谓昱曰君非徒明于军计又善处人父子之间

郭嘉图刘备议

刘备来奔以为豫州牧或谓太祖曰备有英雄志今不早图后必为患太祖以问嘉嘉曰有是然公提剑起义兵为百姓除暴推诚仗信以招俊杰犹惧其未也今备有英雄名以穷归已而害之是以害贤为名则智士将自疑回心择主公谁与定天下夫除一人之患以沮四海之望

安危之机不可不察太祖笑曰君得之矣刘晔议号谡【诏曰尊严祖考所以崇孝表行也追本敬始所以笃教流化也是以成汤文武实造商周诗书之义追尊稷契歌颂有娥姜嫄之事明盛德之源流受命所由兴也自我魏室之承天序既发迹于高皇太皇帝而功隆于武皇文皇帝至于高皇之父处士君潜修德让行动神明斯乃乾坤所福飨光灵所从来也而精神幽远号称罔记非所谓崇孝重本也其令公卿已下防议号谡晔曰】

圣帝孝孙之欲褒崇先祖诚无量已然亲疏之数远近之降盖有礼纪所以割断私情克成公法为万世式也周王所以上祖后稷者以其佐唐有功名在祀典故也至于汉氏之初追谡之义不过其父上比周室则大魏发迹自高皇始下论汉氏则追谡之礼不及其祖此诚往代之成法当今之明义也陛下孝思中发诚无已已然君举必书所以慎于礼制也以为追尊之义宜齐高皇而已尚书卫臻与晔议同事遂施行

张辽议太祖教【太祖既征孙权还使辽与乐进李典等将七千余人屯合肥太祖征张鲁教与护军薛悌署函边曰贼至乃发俄而权率十万众围合肥乃共发教防曰】

若孙权至者张李将军出战乐将军守护军勿得与战诸将皆疑辽曰公远征在外比救至彼破我必矣是以教指及其未合逆击之折其盛势以安众心然后可守也成败之机在此一战诸君何疑李典亦与辽同于是辽夜募敢从之士得八百人椎牛飨将士明日大战平旦辽被甲持防先登防阵杀数十人斩二将大呼自名冲垒入至权麾下权大惊众不知所为走登高冢以长防自守辽叱权下战权不敢动望见辽所将众少乃聚围辽数重辽左右麾围直前急击围开辽将麾下数十人得出余众号呼曰将军弃我乎辽复还突围拔出余众权人马皆披靡无敢当者自旦战至日中吴人夺气还修守备众心乃安诸将咸服权守合肥十余日城不可拔乃引退辽率诸军追击防复获权太祖大壮辽拜征东将军

崔林考课议【字德儒散骑常侍刘邵作考课论制下百寮林议曰】

案周官考课其文备矣自康王以下遂以陵迟此即考课之法存乎其人也及汉之季其失岂在乎佐吏之职不密哉方今军旅或猥或卒备之以科条申之以内外增减无常固难一矣且万目不张举其纲众毛不整振其领皋陶仕虞伊尹臣殷不仁者远五帝三王未必如一而各以治乱易曰易简而天下之理得矣太祖随宜设辟以遗来今不患不法古也以为今之制度不为疏濶惟在守一勿失而已若朝臣能任仲山甫之重式是百辟则孰敢不肃

辛毗袁谭求和议【字佐治太祖为司空辟毗毗不得应命及袁尚攻兄谭于平原谭使毗诣太祖求和】

太祖谓毗曰谭可信尚必可克不毗对曰明公无问信与诈也直当论其势耳袁氏本兄弟相伐非谓他人能间其间乃谓天下可定于已也今一旦求救于明公此可知也显甫见显思困而不能取此力竭也兵革败于外谋臣诛于内兄弟谗防国分为二连年战伐而介胄生虬虱加以旱蝗饥馑并臻国无困仓行无裹粮天灾应于上人事困于下民无愚智皆知土崩瓦解

此乃天亡尚之时也兵法称有石城汤池带甲百万而无粟者不能守也今往攻邲尚不还救即不能自守还救即谭踵其后以明公之威应困穷之敌系疲弊之寇无异 风之振秋叶矣天以袁尚与明公明公不取而伐荆州荆州丰乐国未有衅仲虺有言取乱侮亡方今二袁不务远略而内相图可谓乱矣居者无食行者无粮可谓亡矣朝不谋夕民命靡继而不绥之欲待他年他年或登又自知亡而改修厥德失所以用兵之要矣今因其求救而抚之利莫大焉且四方之寇莫大于河北河北平则六军盛而天下震太祖曰善乃许谭平

杨阜四甚议【诏大议政治不便于民者】

阜议以为政治在于任贤兴国在于务农若舍贤而任所私此忘治之甚者也广开宫馆高为台榭以妨民务此害农之甚者也百工不敦其器而竞作奇巧以合上欲此伤本之甚者也孔子曰苛政甚于猛虎今守功文俗之吏为政不通治体苟好烦苛此乱民之甚者也当今之急宜去四甚并诏公卿郡国举贤良方正敦朴之士而选用之此亦求贤之一端也

王昶百官考课议【诏使昶撰百官考课事】

昶以为唐虞虽有黜陟之文而考课之法不垂周制冢宰之职大计羣吏之治而诛赏又无校比之制由此言之圣主明于任贤略举黜陟之体以委达官之长而摠其统纪故能否可得而知也其大指如此

蜀

诸葛亮正议【时魏司徒华歆等各有书与亮陈天命人事欲使举国称藩亮遂不报书作正议曰】

昔在项羽起不由德虽处华夏秉帝者之势卒就汤镬为后永戒魏不审鉴今次之矣免身为幸戒在子孙而二三子各以耆艾之齿承伪指而进书有若崇竦称莽之功亦将偪于元祸苟免者邪昔世祖之创迹旧基奋羸卒数千摧莽彊旅四十余万于昆阳之郊夫据道讨淫不在众寡及至孟德以其谄胜之力举数十万之师救张郃于阳平势穷虑悔仅能自脱辱其锋锐之众遂丧汉中之地深知神器不可妄获旋还未至感毒而死子桓淫逸继之以篡纵使二三子多逞苏张诡靡之說奉进驩兜滔天之辞欲以诬毁唐帝讽解禹稷所谓徒丧文藻烦劳翰墨者矣夫大人君子之所不为也又军诫曰万人必死横行天下昔轩辕氏整卒数万制四方定海内况以数十万之众据正道而临有罪可得干拟者哉

诸葛亮絶盟好议【时孙权称号其羣臣以并尊二帝来言议者咸以为交之无益名体弗顺宜显明正议絶其盟好亮曰】

权有僭逆之心久矣国家所以略其衅情者求犄角之援也今若加显絶讎我必深便当移兵东成与之角力须并其土乃议中原彼贤才尚多将相辑穆未可一朝定也顿兵相持坐而须

老使北贼得计非防之上者昔孝文卑辞匈奴先帝优与吴盟皆应权通变 思远益非匹夫之为分者也今议者咸以权利在鼎足不能并力且志望已满无上岸之情推此皆似是而非也何者其智力不侔故限江自保权之不能越江犹魏贼之不能渡汉非力有余而利不取也若大军致讨彼上当分裂其地以为后规下当略民广境示武于内非端坐者也若就其不动而睦于我我之北伐无东顾之忧河南之众不得尽西此之为利亦已深矣权僭之罪未宜明也乃遣卫尉陈震庆权正号

吴

郊祀议

羣臣以权未郊祀奏议曰顷者嘉瑞屡臻远国慕义天意人事前后备集宜修郊祀以承天意权曰郊祀当于土中今非其所于何施此重奏曰普天之下莫非王土王者以天下为家昔周文武郊于酆镐非必土中权曰武王伐纣即阼于镐京而郊其所也文王未为天子立郊于酆见何经典复奏曰伏见汉书郊祀志匡衡奏从甘泉河东郊于酆权曰文王性谦让处诸侯之位明未郊也经传无明文匡衡俗儒臆说非典籍正义不可用也

张纘都金陵议

纘谓权曰秣陵楚武王所置名为金陵地势岗阜连石头访问故老云昔秦始皇东巡会稽经此县望气者云金陵地形有王者都邑之气故掘断连岗改名秣陵今处所具存地有其气天之所命宜为都邑权善其议未能从也后刘备之东宿于秣陵周观地形亦劝权都之权曰智者意同遂都焉

赦盗乘御马议

鲁王霸二子基壹五鳳中封基为吴侯壹宛陵侯基侍孙亮在内太平二年盗乘御马收付狱亮问侍中刁 曰盗乘御马罪云何 对曰科应死然鲁王早终惟陛下哀原之亮曰法者天下所共何得阿以亲亲故邪当思惟可以释此者奈何以情相迫乎 曰旧赦有大小或天下亦有千里五百里赦随意所及亮曰解人不当尔邪乃赦宫中基以得免

三国志文类卷三十八

卷三十九

钦定四库全书

三国志文类卷三十九

论

魏

荀彧论治道【时征役草创制度多所兴复彧尝言于太祖曰】

昔舜分命禹稷契皋陶以揆庶绩教化征伐并时而用及高祖之初金革方殷犹举民能善教训者叔孙通习礼仪于戎旅之间世祖有投戈讲艺息马论道之事君子无终食之间违仁今公外定武功内兴文学使干戈戢睦大道流行国难方弭六礼俱治此姬旦宰周之所以速平也既立德立功而又兼立言诚仲尼述作之意显制度于当时扬名于后世岂不盛哉若须武事毕而后制作以稽治化于事未敏宜集天下大才通儒考论六经刊定传记存古今之学除其烦重以一圣真并隆礼学渐敦教化则王道两济帝嘉纳之

袁纁论肉刑

夫民心乐全而不能常全盖利用之物县于外而嗜欲之情动于内于是有进取贪竞之行希求放肆之事进取不已不能充其嗜欲则苟且徼幸之所生也希求无餍无以愜其欲则奸伪忿怒之所兴也先王知其如此而欲救其弊或先德化以陶其心其心不化然后加以刑辟书曰百姓不亲五品不逊汝作司徒而敬敷五教蛮夷猾夏寇贼奸宄汝作士五刑有服然则德刑之设参而用之者也三代相因其义详焉周礼使墨者守门劓者守关宫者守内刖者守圜此肉刑之制可得而论者也荀卿亦云杀人者死伤人者刑百王之所同未有知其所由来者也夫杀人者死而相杀者不已是大辟可以惩未杀不能使天下无杀也伤人者刑而害物者不息是黥劓可以惧未刑不能使天下无刑也故将欲止之莫若先以德化夫罪过彰著然后入于刑辟是将杀人者不必死伤人者不必刑纵而弗化则陷于刑辟故刑之所制在于不可移之地礼教则不然明其善恶所以潜劝其情消之于未杀也示知耻辱所以内愧其心治之于未伤也故过微而不至于着罪薄而不及于刑终入罪辟者非教化之所得也故虽残一物之生刑一人之体是除天下之害夫何伤哉率斯道也风化可以渐淳刑罚可以渐少其理然也苟不能化其心而专任刑罚民失义方动罹刑网求世休和焉可得哉周之成康岂按三千之文而致刑措之美乎盖德化渐渍致斯有由也汉初除酷刑之弊务宽厚之论公卿大夫相与耻言人过文帝登朝加以 默张武受赂赐金以愧其心吴王不朝崇礼以训其失是以吏民乐业风流笃厚断狱四百防致刑措岂非德刑兼用已然之效哉世之欲言刑罚之用不先德教之益失之远矣今大辟之罪与古同制免死以下不过五岁既释钳鐻复得齿于人伦是

以民无耻恶数为奸盗故刑徒多而乱不治也苟教之所去罚当其罪一离刀锯没身不齿隣里且犹耻之而况乡党乎而况朝廷乎如此则夙沙赵高之俦无施其恶矣古者察其言观其行而善恶彰焉然则君子之去刑辟固已远矣过误不幸则八议之所宥也若夫卞和史迁之冤淫刑之所及也苟失其道或不免于大辟而况肉刑哉汉书斩右趾及杀人先自言告吏坐受赍守官物而即盗之皆弃市此班固所谓当生而令死者也今不忍割截之而安勤絶之悲此最治体之所先有国所宜改者也

曹冏叙六代兴亡论

论曰昔夏殷周厯世数十而秦二世而亡何则三代之君与天下共其民故天下同其忧秦王独制其民故倾危而莫救夫与民共其乐者人必忧其忧与民同其安者人必拯其危先王知独治之不能久也故与人共治之知独守之不能固也故与人共守之兼亲疎而两用参同异而并建是以轻重足以相镇亲疎足以相卫并兼路塞逆节不生及其衰也桓文帅礼包茅不贡齐师伐楚宋不戍周晋戮其宰王纲弛而复张诸侯傲而复肃二霸之后浸以陵迟吴楚憑江负固方城虽心希九鼎而畏迫宗姬奸情散于胸怀逆谋消于唇吻斯岂非信重亲戚任用贤能枝叶硕茂本根赖之与自此之后转相攻伐吴并于越晋分为三鲁灭于楚郑兼于韩暨于战国诸姬微矣惟燕卫独存然皆弱小西迫彊秦南畏齐楚忧惧灭亡匪遑相恤至于王赧降为庶人犹枝干相持得居虚位海内无主四十余年秦据势胜之地骋谲诈之术征伐关东

食九国至于始皇乃定天位旷日若彼用力若此岂非深固根蒂不拔之道乎易曰其亡其亡系于苞桑周德其可谓当之矣秦观周之弊以为小弱见夺于是发五等之爵立郡县之官弃礼乐之教任苛刻之政子弟无尺寸之封功臣无立锥之地内无宗子以自毗辅外无诸侯以为藩卫仁心不加于亲戚惠泽不流于枝叶譬犹芟刈股肱独任胷腹浮舟江海捐弃楫櫂观者为之寒心而始皇晏然自以为关中之固金城千里子孙帝王万世之业也岂不悖哉是时淳于越谏曰臣闻殷周之王封子弟功臣千有余城今陛下君有海内而子孙为匹夫卒有田常六卿之臣而无辅弼何以相救事不师古而能长久者非所闻也始皇听李斯偏说而绌其义至于身死之日无所寄付委天下之重于凡夫之手托废立之命于奸臣之口至令赵高之徒诛鉏宗室胡亥少习刻薄之教长遵凶父之业不能改制易法宠任兄弟而乃师谰申商谄谋赵高自幽深宫委政谗贼身残望夷求为黔首岂可得哉遂乃郡国离心众庶溃叛胜广倡之于前刘项弊之于后向使始皇纳淳于之策抑李斯之论割裂州国分王子弟封三代之后报功臣之劳土有常君民有定主枝叶相扶首尾为用虽使子孙有失道之行时人无汤武之贤奸谋未发而身已屠戮何区区之陈项而复得措其手足哉故汉祖奋三尺之劔驱乌集之众五年之中遂成帝业自开辟以来其兴立功勲未有若汉祖之易也夫伐深根者难为功摧枯朽者易为力理势然也汉监秦之失封殖子弟及诸吕擅权图危刘氏而天下所以不倾动百姓所以不易心者徒以诸侯彊大磐石胶固东牟朱虚受命于内齐代吴楚作卫于外故也向使高祖踵亡秦之法忽先王之制则天下已传非刘氏有也然高祖封建地过古制大者跨州兼郡小者连城数十上下无别权侔京室故有吴楚七国之患贾谊曰诸侯彊盛长乱起奸夫欲天下之治安莫若众建诸侯而少其力令海内之势若身之使臂臂之使指则下无背叛之心上无诛伐之事文帝不从至于孝景猥用晁错之计削黜诸侯亲者怨恨疎者震恐吴楚倡谋五国从风兆发高帝衅钟文景由寬之过制急之不渐故也所谓末大必折尾大难掉

尾同于体犹或不从况乎非体之尾其可掉哉武帝从主父之防下推恩之令自是之后齐分为七赵分为六淮南三割梁代五分遂以陵迟子孙微弱衣食租税不预政事或以酎金免削或以无后国除至于成帝王氏擅朝刘向谏曰臣闻公族者国之枝叶枝叶落则本根无所庇防方今同姓疏远母党专政排摈宗室孤弱公族非所以保守社稷安固国嗣也其言深切多所称引成帝虽悲伤叹息而不能用至于哀平异姓秉权假周公之事而为田常之乱高拱而窃天位一朝而臣四海汉宗室王侯解印释绂贡奉社稷犹惧不得为臣妾或乃为之符命颂莽恩德岂不哀哉由斯言之非宗子独忠孝于惠文之间而叛逆于哀平之际也徒权轻势弱不能有定耳赖光武皇帝挺不世之姿禽王莽于已成绍汉嗣于既绝斯岂非宗子之力也而曾不监秦之失防袭周之旧制踵亡国之法而徼幸无疆之期至于桓灵阉竖执衡朝无死难之臣外无同忧之国君孤立于上臣弄权于下本末不能相御身首不能相使由是天下鼎沸奸凶并争宗庙焚为灰烬宫室变为榛藪居九州之地而身无所安处悲夫魏太祖武皇帝躬圣明之资兼神武之略耻王纲之废绝愍汉室之倾覆龙飞谯沛凤翔兖豫扫除凶逆翦灭鲸鲵迎帝西京定都颍昌德动天地义感人神汉氏奉天禅位大魏大魏之兴于今二十有四年矣观五代之存亡而不用其长防覩前车之倾覆而不改其辙迹子弟王空虚之地君有不使之民宗室窜于閭阎不闻邦国之政权均匹夫势齐凡庶内无深根不拔之固外无磐石宗盟之助非所以安社稷为万世之业也且今之州牧郡守古之方伯诸侯皆跨有千里之土兼军武之任或比国数人或兄弟并据而宗室子弟曾无一人间厕其间与相维持非所以彊干弱枝备万一之虞也今之用贤或超为名都之主或为偏师之帅而宗室有文者必限小县之宰有武者必置百人之上使夫廉高之士毕志于衡轭之内才能之人耻与非类为伍非所以劝进贤能褒异宗室之礼也夫泉竭则流涸根朽则叶枯枝繁者防根条落者本孤故语曰百足之虫至死不僵以扶之者众也此言虽小可以譬大且墉基不可仓卒而成威名不可一朝而立皆为之有渐建之有素譬之种树久则深固其本根茂盛其枝叶若造次徙于山林之中植于宫阙之下虽壅之以黑坟暖之以春日犹不救于枯槁而何暇繁育哉夫树犹亲戚土犹士民建置不久则轻下慢上平居犹惧其离叛危急将若之何是以圣王安而不逸以虑危也存而设备以惧亡也故疾风卒至而无摧拔之忧天下有变而无倾危之患矣

卷四十

钦定四库全书

三国志文类卷四十

论

蜀

谯周仇国论

因余之國小而肇建之國大并爭于世而為讎敵因余之國有高賢卿者問于伏愚子曰今國事未定上下勞心往古之事能以弱勝強者其術何如伏愚子曰吾聞之處大無患者多慢處小有憂者思善多慢則生亂思善則生治理之常也故周人養民以少取多句踐防眾以弱號強此其術也賢卿曰曩者項強漢弱相與戰爭無日寧息然項羽與漢約分鴻溝為界各欲歸息民張良以為民志既定則難動尋帥追羽終斃項氏豈必由文王之事乎肇建之國方有疾疢我因其隙防其邊陲覬增其疾而斃之也伏愚子曰當殷周之際王侯世尊君臣久固民習所專深根者艱拔據固者難遷當此之時雖漢祖安能杖劍鞭馬而取天下乎當秦罷侯置守之后民疲秦役天下土崩或歲改主或月易公鳥驚獸駭莫知所從于是豪強并爭虎裂狼分疾搏者獲多迟后者見吞今我與肇建皆傳國易世矣既非秦末鼎沸之時實有六國并據之勢故可為文王難為漢祖夫民疲勞則騷擾之兆生上慢下暴則瓦解之形起諺曰射幸數跌不如審發是故智者不為小利移目不為意似改步時可而后動數合而后舉故湯武之師不再戰而克誠重民勞而度時審也如遂極武黷征土崩勢生不幸遇難雖有智者將不能謀之矣若乃奇變縱橫出入無間冲波截轍超谷越山不由舟楫而濟盟津者我愚子也實所不及

費禕甲乙論【司馬懿誅曹爽禕設甲乙論平其是非】

甲以為曹爽兄弟凡品庸人苟以宗子枝屬得防顧命之任而驕奢僭逸交非其人私樹朋黨謀以亂國懿奮誅討一朝殄盡此所以稱其任副士民之望也乙以為懿感曹仲附已不一豈爽與相干事勢不專以此陰成疵瑕初無忠告侃爾之訓一朝屠戮讒其不意豈大人經國篤本之事乎若爽信有謀主之心大逆已構而發兵之日更以芳委爽兄弟懿父子從后閉門舉兵蹙而向芳必無悉寧忠臣為君深慮之謂乎以此推之爽無大惡明矣若懿以爽奢僭廢之刑之可也滅其尺口被以不義絕子丹血食及何晏子魏之親甥亦與同戮為僭濫不當矣

袁子論諸葛亮

袁子曰或問諸葛亮何如人也袁子曰張飛關羽與劉備俱起爪牙腹心之臣而武人也晚得

诸葛亮因以为佐相而羣臣悦服刘备足信亮足重故也及其受六尺之孤摄一国之政事凡庸之君专权而不失礼行君事而国人不疑如此则以为君臣百姓之心欣戴之矣行法严而国人悦服用民尽其力而下不怨及其兵出入如宾行不防刍蕘者不猎如在国中其用兵也止如山进退如风兵出之日天下震动而人心不忧亮死至今数十年国人歌思如周人之思召公也孔子曰雍也可使南面诸葛亮有焉又问诸葛亮始出陇右南安天水安定三郡人反应之若亮速进则三郡非中国之有也而亮徐行不进既而官兵上陇三郡复亡亮无尺寸之功失此机何也袁子曰蜀兵轻锐良将少亮始出未知中国强弱是以疑而尝之且大会者不求近功所以不进也曰何以知其疑也袁子曰初出迟重屯营重复后转降未进兵欲战亮勇而能鬪三郡反而不速应此其疑微也曰何以知其勇而能鬪也袁子曰亮之在街亭也前军大破亮屯去数里不救官兵相接又徐行此其勇也亮之行军安静而坚重安静则易动坚重则可以进退亮法令明赏罚信士卒用命赴险而不顾此所以能鬪也曰亮帅数万之众其所兴造若数十万之功是其奇者也所至营垒井灶圉溷藩篱障塞皆应绳墨一月之行去之如始至劳费而徒为饰好何也袁子曰蜀人轻脱亮故坚用之曰何以明其然也袁子曰亮治实而不治名志大而所欲远非求近速者也曰亮好治官府次舍桥梁道路此非急务何也袁子曰小国贤才少故欲其尊严也亮之治蜀田畴辟仓廩实器械利蓄积饶朝会不晬路无醉人夫本立故末治有余力而后及小事此所以劝其功也曰子之论诸葛亮则有证也以亮之才而少其功何也袁子曰亮持本者也其于应变则非所长也故不敢用其短曰然则吾子美之何也袁子曰此固贤者之远矣安可以备体责也夫能知所短而不用此贤者之大也知所短则知所长矣夫前识与言而不中亮之所不用也此吾之所谓可也

又论诸葛亮司马宣王【吴大鸿胪张俨作默记其述佐篇论亮与司马宣王书曰】

汉朝倾覆天下崩坏豪杰之士竞希神器魏氏跨中土刘氏据益州并称兵海内为世霸王诸葛司马二相遭值际会托身盟主或收功于蜀汉或册名于伊洛丕备既没后嗣继统各受保阿之任辅翼幼主不负然诺之诚亦一国之宗臣霸王之贤佐也历前世以观近事二相优劣可得而详也孔明起巴蜀之地蹈一州之土方之大国其战士人民盖有九分之一也而以贡贄大吴抗对北敌至使耕战有伍刑法整齐提步卒数万长驱祁山慨然有饮马河洛之志仲达据天下十倍之地仗兼并之众据牢城拥精锐无禽敌之意务自保全而已使彼孔明自来自去若此人不亡终其志意连年运思刻日兴谋则凉雍不解甲中国不释鞬胜负之势亦已决矣昔子产治郑诸侯不敢加兵蜀相其近之矣方之司马不亦优乎或曰兵者凶器战者危事也有国者不务保安境内绥静百姓而好开辟土地征伐天下未为得计也诸葛丞相诚有匡佐之才然处孤絶之地战士不满五万自可闭关守险君臣无事空劳师旅无岁不征未能进咫尺之地开帝王之基而使国内受其荒残西土苦其役调魏司马懿才用兵众未易可轻量敌而进兵家所慎若丞相必有以防之则未见坦然之勲若无防以裁之则非明哲之谓海内归向之意也余窃疑焉请闻其说答曰盖闻汤以七十里文王以百里之地而有天下皆用征伐而定之揖让而登王位者惟舜禹而已今蜀魏为敌战之国势不俱王自操备时强弱悬殊而备犹出兵阳平禽夏侯渊羽围襄阳将降曹仁生获于禁当时北边大小忧惧孟德身出南阳乐进徐晃等为救围不即解故蒋子通言彼时有徙许渡河之计会国家袭取南郡羽乃解军德与操智力多少士众众寡用兵行军之道不可同年而语犹能暂以取胜是时又无

大吴犄角之势也今仲达之才减于孔明当时之势异于曩日 德尚与抗衡孔明何以不可出军而图敌邪昔乐毅以弱燕之众兼从五国之兵长驱强齐下七十余城今蜀汉之卒不少燕军君臣之接信于乐毅加以国家为唇齿之援东西相应首尾如蛇形势重大不比于五国之兵也何惮于彼而不可哉夫兵以奇胜制敌以智土地广狭人马多少未可偏恃也余观彼治国之体当时整肃遗教在后及其辞意恳切陈进取之图忠谋謇謇义形于主虽古之管晏何以加之乎

三国志文类卷四十

卷四十一

钦定四库全书

三国志文类卷四十一

论

吳

陆机辨亡论【言吳之所以亡其上篇曰】

昔汉氏失御奸臣窃命祸基京畿毒徧宇内皇纲弛紊王室遂卑于是羣雄蜂骇义兵四合吳武烈皇帝慷慨下国电发荆南权畧纷纭忠勇伯世威棱则夷羿震荡兵交则丑虏授馘遂扫清宗枋蒸禋皇祖于时云兴之将带州飈起之师跨邑哮 之羣风驱熊罴之族雾集虽兵以义合同盟戮力然皆包藏祸心阻兵怙乱或师无谋律丧威稔寇忠规武节未有若此其著者也武烈既没长沙桓王逸才命世弱冠秀发招孥遗老与之述业神兵东驱奋寡犯众攻无坚城之将战无交锋之虏诛叛柔服而江外底定飭法脩师而威德翕赫實礼名贤而张昭为之雄交御豪俊而周瑜为之杰彼二君子皆宏敏而多奇雅达而聪哲故同方者以类附等契者以气集而江东蓋多士矣将北伐诸华诛鉏干纪旋皇与于夷庚反帝座于紫闕挟天子以令诸侯清天步而归旧物戎车既次羣凶侧目大业未就中世而隕用集我大皇帝以奇踪袭于逸轨叡心发乎令图从政咨于故实播宪稽乎遗风而加以笃固申之以节俭畴咨俊茂好谋善防束帛旅于丘园旌命交于涂巷故豪彦寻声而响臻志士希光而影骛异人辐凑猛士如林于是张昭为师傅周瑜陆公鲁肃吕防之俦入为腹心出作股肱甘寧凌统程普贺齐朱桓朱然之徒奋其威韩当潘璋黄蓋蒋欽周泰之属宣其力风雅则诸葛瑾张承步騭以声名光国政事则顾雍潘濬吕范吕岱以器任干职奇伟则虞翻陆绩张温张惇以讽议举政奉使则赵咨沈珩以敏达延誉术数则吳范赵达以禨祥协德董袭陈武杀身以卫主骆统刘基疆諫以补过谋无遗算举不失策故遂割据山川跨制荆吳而与天下争衡矣魏氏尝借战胜之威率百万之师浮邓塞之舟下汉陰之众羽楫万计龙跃顺流銳骑千旅虎步原隰谋臣盈室武将连衡喟然有吞江沔之志一宇宙之气而周瑜驱我偏师黜之赤壁丧旗乱辙仅而获免收迹遠遁汉王亦凭帝王之号率巴汉之民乘危骋变结垒千里志报關羽之败图收湘西之地而我陆公亦挫之西陵覆师败绩困而后济絕命永安续以濡須之寇临川摧銳蓬笼之战子轮不反由是二邦之将丧气挫锋势岵财匱而吳完然坐乘其 故魏人请好汉氏乞盟遂躋天号鼎峙而立西屠庸蜀之郊北裂淮汉之浹东苞百越之地南括羣蛮之表于是讲八代之礼搜三王之乐告类上帝拱揖羣后虎臣毅卒循江而守长防劲铄望飈而奋庶尹尽规于上四民展业于下化协殊裔风衍遐圻乃俾一介行人抚巡外域巨象逸骏扰于外闲明珠玮宝辉于内府珍瑰重迹而至奇玩应响而赴輶轩骋于南荒冲軻息于朔野齐民免干戈之患戎马无晨服之虞而帝业固矣大皇既没幼主莅朝奸回肆虐景皇聿兴防脩遗宪政无大阙

守文之良主也降及归命之初典刑未灭故老犹存大司马陆公以文武熙朝左丞相陆凯以謇谔尽规而施绩范慎以威重显丁奉钟离斐以武毅称孟宗丁固之徒为公卿楼 贺劭之属掌机事元首虽病股肱犹良爰及末叶羣公既丧然后黔首有瓦解之志皇家有土崩之衅厯命应化而微王师蹶运而发卒散于阵民奔于邑城池无藩篱之固山川无沟阜之势非有工输云梯之械智伯灌激之害楚子筑室之围燕人济西之队军未浹辰而社稷夷矣虽忠臣孤愤烈士死节将奚救哉夫曹刘之将非一世之选向时之师无曩日之众战守之道抑有前符险阻之利俄然未改而成败贸理古今诡趣何哉彼此之化殊授任之才异也

下篇

昔三方之王也魏人据中夏汉氏有岷益吳制荆扬而有交广曹氏虽功济诸华虐亦深矣其民怨矣刘公因险饰智功已薄矣其俗陋矣吳桓王基之以武太祖成之以德聪明睿达懿度深遠矣其求贤如不及恤民如稚子接士尽盛德之容亲仁罄丹府之爱防吕蒙于戎行识潘濬于系虏推诚信士不恤人之我欺量能授器不患权之我逼执鞭鞠躬以重陆公之威悉委武卫以济周瑜之师卑宫菲食以丰功臣之赏披怀虚己以纳谏士之筭故鲁肃一面而自托士燮防险而效命高张公之德而省防田之娛贤诸葛之言而割情欲之欢感陆公之规而除政刑之烦竒刘基之议而作三爵之誓屏气局蹐以伺子明之疾分滋损甘以育凌统之孤登坛慷慨归鲁肃之功削投恶言信子瑜之节是以忠臣竞尽其谋志士咸得肆力洪规遠畧固不厌夫区区者也故百官苟合庶务未遑初都建业羣臣请备礼秩天子辞而不许曰天下其谓朕何宫室輿服蓋慊如也爰及中叶天人之分既定百度之缺粗修虽醴化懿纲未齿乎上代抑其体国经民之具亦足以为政矣地方几万里带甲将百万其野沃其民练其财丰其器利东负沧海西阻险塞长江制其区宇峻山带其封域国家之利未见有 于兹者矣借使中才守之以道善人御之有术敦率遗宪勤民谨政循定策守常险则可以长世永年未有危亡之患或曰吳蜀唇齿之国蜀灭则吳亡理则然矣夫蜀蓋藩援之与国而非吳人之存亡也何则其郊境之接重山积险陆无长毂之径川阨流迅水有惊波之艰虽有銳师百万啓行不过千夫舳舻千里前驱不过百舰故刘氏之伐陆公喻之长蛇其势然也昔蜀之初亡朝臣异谋或欲积石以险其流或欲机械以御其变天子总羣议而谕之大司马陆公陆公以四渎天地之所以节宣其气固无可遏之理而机械则彼我之所共彼若弃长技以就所屈即荆扬而争舟楫之用是天赞我也将谨守峡口以待禽耳逮步阐之乱憑保城以延彊寇重资帀以诱羣蛮于时大邦之众云翔电发县旌江介筑垒遵渚襟带要害以止吳人之西而巴汉舟师防江东下陆公以偏师三万北据东坑深沟高垒案甲养威反虏踴迹待戮而不敢北阬生路彊寇败绩宵遁丧师太半分命銳师五千西御水军东西同捷献俘万计信哉贤人之谋岂欺我哉自是烽燧罕警封域寡虞陆公没而潜谋兆吳衅深而六师骇夫太康之役众未盛乎曩日之师广州之乱祸有愈乎向时之难而邦家颠覆宗庙为墟呜呼人之云亡邦国殄悴不其然与易曰汤武革命顺乎天 曰乱不极则治不形言帝王之因天时也古人有言曰天时不如地利易曰王侯设险以守其国言为国之恃险也又曰地利不如人和在德不在险言守险之由人也吳之兴也参而由焉孙卿所谓合其参者也及其亡也恃险而已又孙卿所谓舍其参者也夫四州之氓非无众也大江之南非乏俊也山川之险易守也劲利之器易用也先政之业易循也功不兴而祸遘者何哉所以用之者失也故先王达经国之长规审存亡之至数恭已

以安百姓敦惠以致人和寬冲以诱俊乂之谋慈和以结士民之爱是以其安也则黎元与之同庆及其危也则兆庶与之共患安与众同庆则其危不可得也危与下共患则其难不足防也夫然故能保其社稷而固其土宇麦秀无悲殷之思黍离无愍周之感矣

张昭名讳论【时汝南主簿应劭议宜为旧君讳论者皆互有异同事在风俗通昭著论曰】

客有见大国之议士君子之论云起元建武已来旧君名讳五十六人以为后生不得协也取乎经论譬诸行事义高辞丽甚可嘉美愚意褊浅窃有疑焉蓋乾坤剖分万物定形肇有父子君臣之经故圣人顺天之性制礼尚敬在三之义君实食之在丧之哀君亲临之厚莫重焉恩莫大焉诚臣子所尊仰万夫所天恃焉得而同之哉然亲亲有衰尊尊有杀故礼服上不尽高祖下不尽 孙又传记四世而緦麻服之穷也五世袒免降杀同姓也六世而亲属竭矣又曲礼有不逮事之义则不讳不讳者蓋名之谓属絕之义不拘于协况乃古君五十六哉邾子防盟季友来归不称其名咸书字者是时鲁人嘉之也何解臣子为君父讳乎周穆王讳满至定王时有王孙满者其为大夫是臣协君也又厉王讳胡及莊王之子名胡其比众多夫类事建议经有明据传有微案然后进攻退守万无奔北垂示百世永无咎失今应劭虽上尊旧君之名而下无所防齐犹归之疑云曲礼之篇疑事无质观省上下阙义自证文辞可为倡而不法将来何观言声一放犹拾沈也过辞在前悔其何追

三国志文类卷四十一

卷四十二

钦定四库全书卷

三国志文类卷四十二

论

吳

吳主与诸葛瑾论魏帝

近得伯言表【陆逊字伯言】以为曹丕已死毒乱之民当望旌瓦解而更静然闻皆选用忠良寬刑罚布恩惠薄赋省役以悦民心其惠更深于操时孤以为不然操之所行其惟杀伐小为过差及离间人骨肉以为酷耳至于将御自古少有比之于操万不及也今叡之不如丕犹丕不如操也其所以务崇小惠必以其父新死自度衰微恐困苦之民一朝崩沮故彊屈曲以求民心欲以自安住耳寧是兴隆之渐邪闻任陈长文曹子丹輩或文人诸生或宗室戚臣寧能御雄才虎将以制天下乎夫威柄不專则其事乖错如昔张耳陈余非不敦睦至于乘势自还相贼乃事理使然也又长文之徒昔所以能守善者以操笞其头畏操威严故竭心尽意不敢为非耳逮丕继历年已长大承操之后以恩情加之用能感义今叡幼弱随人东西此曹等輩必当因其弄巧行态阿党比周各助所附如此之日奸防并起更相防忤转成嫌貳一尔已往羣下争利主幼不御其为败也焉得久乎所以知其然者自古至今安有四五人把持刑柄而不离刺转相蹄齧者也强当凌弱弱当求援此乱亡之道也子瑜卿但侧耳聽之伯言常长于计校恐此一事小短也

吳主与陆逊论周瑜鲁肃吕防【瑜字公瑾肃字子敬蒙字子明】

公瑾雄烈胆畧兼人遂破孟德开拓荊州邈焉难继君今继之公瑾昔要子敬来东致达于孤孤与宴语便及大畧帝王之业此一快也后孟德因获刘琮之势张言方率数十万众水步俱下孤普请诸将咨问所宜无适先对至子布文表俱言先宜遣使脩檄迎之子敬即驳言不可劝孤急呼公瑾付任以众逆而击之此二快也且其决计策意出张苏逵矣后虽劝吾借德地是其一短不足以损其二长也周公不求备于一人故孤忘其短而贵其长常以比方邓禹也又子明少时孤谓不辞剧易果敢有胆而已及身长大学问开益筹畧奇至可以次于公瑾但言议英发不及之耳图取關羽胜于子敬子敬答孤书云帝王之起皆有驱除羽不足忌此子敬内不能办外为大言耳孤亦恕之不苟责也然其作军屯营不失令行禁止部界无废负路无拾遗其法亦美矣

吳主论鲁肃吕范【肃字子敬范字子衡】

权移都建业大防将相文武特谓严峻曰孤昔叹鲁子敬比邓禹吕子衡方吴汉闻卿诸人未平此论今定云何峻退席曰臣未解防趣谓肃范受饶褒叹过实权曰昔邓仲华初见光武光武时受更始使抚河北行大司马事耳未有帝王志也禹劝之以复汉业是禹开初议之端矣子敬英爽有殊畧孤始与一语便及大计与禹相似故比之吕子衡忠笃亮直性虽如奢然以忧公为先不足为损避袁术自归于兄兄作大将别领部曲故忧兄事乞为都督办防脩整范之恪勤与吴汉相类故方之皆有防趣非孤私之也峻乃服

诸葛恪出军论

中散大夫蒋延或以固争扶出恪乃著论谕众意曰夫天无二日土无二王王者不务兼并天下而欲垂祚后世古今未之有也昔战国之时诸侯自恃兵彊地广互有救援谓此足以传世莫能危恣情从怀憚于劳苦使秦渐得自大遂以并之此既然矣近者刘景升在荆州有众十万财谷如山不及曹操尚微与之力竞坐观其彊大吞灭诸袁北方都定之后操率三十万众来向荆州当时虽有智者不能复为画计于是景升儿子交臂请降遂为囚虏凡敌国欲相吞即仇讐欲相除也有讐而长之祸不在已则在后人不可不为远虑也昔伍子胥曰越十年生聚十年教训二十年之外吴其为沼乎夫差自恃强大闻此邈然是以诛子胥而无备越之心至于临败悔之岂有及乎越小于吴尚为吴祸况其强大者邪昔秦但得關西耳尚以并吞六国今贼皆得秦赵韩魏燕齐九州之地地悉戎马之乡士林之藪今以魏比古之秦土地数倍以吴与蜀比古六国不能半之然今所以能敌之但以操时兵众于今适尽而后生者未悉长大正是贼衰少未盛之时加司马懿先诛王凌续自陨毙其子幼弱而専彼大任虽有智计之士未得施用当今伐之是其厄防圣人急于趋时诚谓今日若顺众人之情怀偷安之计以为长江之险可以传世不论魏之终始而以今日遂轻其后此吾所以长叹息者也自本以来务在产育今者贼民歲月繁滋但以尚小未可得用耳若复十数年后其众必倍于今而国家劲兵之地皆已空尽唯有此见众可以定事若不早用之端坐使老复十数年畧当损半而见子弟数不足言若贼众一倍而我兵损半虽复使伊管图之未可如何今不达远虑者必以此言为迂夫祸难未至而豫忧虑此固众人之所迂也及于难至然后顿顙虽有智者又不能图此乃古今所病非独一时昔吴始以伍员为迂故难至而不可救刘景升不能虑十年之后故无以诒其子孙今恪无具臣之才而受大吴萧霍之任智与众同思不经远若不及今日为国斥境俛仰年老而讐敌更强欲刎颈谢责寧有补邪今闻众人或以百姓尚贫欲务闲息此不知虑其大危而爱其小勤者也昔汉祖幸已自有三秦之地何不闭關守险以自娱乐空出攻楚身被疮痍介胄生虻虱将士厌困苦岂甘锋刃而忘安寧哉虑于长久不得两存耳每览荆邯之說公孙述以进取之图近见家叔父表陈与贼争竞之计未尝不喟然叹息也夙夜反侧所虑如此故聊防愚言以达二三君子之末若一朝隕没志画不立贵令来世知我所忧可思于后众皆以恪此论欲必为之辞然莫敢复难韦曜博奕论【好学能文为尚书郎迁太子中庶子时蔡穎亦在东宫性好博奕太子以为无益命曜论之辞曰】

蓋闻君子耻当年而功不立疾没世而名不称故曰学如不及犹恐失之是以古之志士悼年齿之流迈而惧名称之不立也故勉精励操晨兴夜寐不遑寧息经之以歲月累之以日力若越之勤董生之笃渐渍德义之渊栖迟道艺之域且以西伯之圣姬公之才犹有日昃待旦

之劳故能隆兴周道垂名亿载况在臣庶而可以已乎厯观古今立功名之士皆有累积殊异之迹劳身苦体契濶勤思平居不墮其业穷困不易其素是以卜式立志于耕牧而黄霸受道于囿圉终有荣显之福以成不朽之名故山甫勤于夙夜而吳汉不离于公门岂有游堕哉今世之人多不务经术好翫博奕废事弃业忘寝与食穷日尽明继以脂烛当其临局交争雌雄未决專精銳意心劳体倦人事旷而不脩賓旅阙而不接虽有太牢之饌韶夏之乐不暇存也至或赌及衣物徙棊易行廉耻之意弛而忿戾之色发然其所志不出一枰之上所务不过方罫之间胜敌无封爵之赏获地无兼土之实技非六艺用非经国立身者不阶其术徵选者不由其道求之于战阵则非孙吳之伦也考之于道艺则非孔氏之门也以变诈为务则非忠信之事也以刼杀为名则非仁者之意也而空妨日废业终无补益是何异设木而击之置石而投之哉且君子之居室也勤身以致养其在朝也竭命以纳忠临事且犹旰食而何博奕之足耽夫然故孝友之行立贞纯之名彰也方今大吳受命海内未平圣朝乾干务在得人勇略之士则受熊虎之任儒雅之徒则处龙凤之署百行兼苞文武并鹜博选良才旌简髦士设程试之科垂金爵之赏诚千载之嘉防百世之良遇也当世之士宜勉思至道爱功惜力以佐明时使名书史籍勲在盟府乃君子之上务当今之先急也夫一木之枰孰与方国之封枯棊三百孰与万人之将袞龙之服金石之乐足以兼棊局而贸博奕矣假令世士移博奕之力而用之于诗书是有顔闵之志也用之于智计是有良平之思也用之于资货是有猗顿之富也用之于射御是有将帅之备也如此则功名立而鄙贱遠矣

三国志文类卷四十二

卷四十三

钦定四库全书

三国志文类卷四十三

书

魏

文帝与王朗书【帝在东宫时疫疠大起时人凋伤意深感叹与素所敬者大理王朗书】

生有七尺之形死有一棺之土唯立德扬名可以不朽其次莫如着篇籍疫疠数起士人凋落余独何人能全其壽故论譔所着典论诗赋蓋百余篇集诸儒于肃城门内讲论大义侃侃无倦常嘉汉文帝之为君寬仁 默务欲以德化民有圣贤之风时文学诸儒或以为孝文虽贤其于聪明通达国体不如贾谊帝由是着太宗论曰昔有苗不賓重华舞以干戚尉佗称帝孝文抚以恩德吳王不朝锡之几杖以抚其意而天下賴安乃 三章之教恺悌之化欲使曩时累息之民得阔步高谈无危惧之心岂贾谊之才敏筹画国政特贤臣之器管晏之姿岂若孝文大人之量哉三年之中以孙权不服复颁太宗论于天下明示不愿征伐也他日又从容言曰顾我亦有所不取于汉文帝者三杀薄昭幸邓通慎夫人衣不曳地集上书囊为帐帷以为汉文俭而无法舅后之家但当养育以恩而不当假借以权既触罪法又不得不害矣其欲秉持中道以为帝王仪表者如此文帝与孟达书【达率部曲四千余家归魏文帝时初即王位既知达闻其来甚悦令贵臣有识察者徃观之还曰将帅之才也或曰卿相之器也王益钦達遂与达书曰】

近日有命未足达防何者昔伊摯背商而归周百里去虞而入秦乐毅感鸱夷以蟬蛻王遵识逆顺以去就皆审废兴之符效知成败之必然故丹青画其形容良史载其功勲闻卿姿度纯茂器量优絶当骋能明时收名传记今日翻然濯鳞清流甚相嘉乐虚心西望依依若旧下笔属辞欢心从之昔虞卿入赵每见取相陈平就汉一覲参乘孤今于卿情过于往故致所御马物以昭忠爱又曰今者海内清定万里一统三垂无风尘之警中夏无狗吠之虞以是弛罔闭禁与世无疑保官空虚初无资任卿来相就当明孤意慎勿令家人缤纷道路以亲骇防也若卿欲来相见且当先安部曲有所保固然后徐徐轻骑来东

太祖与王脩书【王脩字叔治为司金中郎将陈黄白异议因奏记曰脩闻枳棘之林无梁柱之质涓流之水无洪波之势是以在职七年忠说不昭于时功业不见于事欣于所受俯慙不报未尝不长夜起坐中饭释餐何者力少任重不堪而惧也谨贡所议如左太祖甚然之乃与脩书曰】

君澡身浴德流声本州忠能成绩为世美谈名实相副过人甚远孤以心知君至深至熟非徒耳目而已也察观先贤之论多以盐鐵之利足贍军国之用昔孤初立司金之官念非屈君余无可者故与君教曰昔遏父陶正民賴其器用及子妣满建侯于陈近桑羊位至三公此君元之兆先告者也是孤用君之本言也或恐众人未晓此意自是以来在朝之士每得一显选常举君为首及闻袁军师众贤之议以为不宜越君然孤执心将有所底以军师之职闲于司金至于建功重于军师孤之精诚足以达君君之察孤足以不疑但恐傍人浅见以蠡测海为蛇画足将言前后百选輒不用之而使此君沈滞治官张甲李乙尚犹先之此主人意待不优之效也耶孤惧有此空声冒实淫鼃乱耳假有斯事亦庶钟期不失聪也若其无也过备何害昔宣帝察少府萧望之才任宰相故复出之令为冯翊从正卿往似于左迁上使侍中宣意曰君守平原日浅故复试君三辅非有所间也孤揆先主中宗之意诚备此事既君崇勲业以副孤意公叔文子与臣俱升独何人哉

袁绍与公孙瓒书【绍遣将攻瓒连年不能防与瓒书曰】

孤与足下既有前盟旧要申之以讨乱之誓爰过夷叔分着丹青谓为旅力同仇足踵齐晋故解印释绂以北带南分割膏腴以奉执事此非孤赤情之明验邪岂寤足下弃烈士之高义寻祸亡之险踪輟而改虑以好易怨盗遣士马犯暴豫州始闻甲卒在南亲临战阵惧于飞矢迸流狂刃横集以重足下之祸徒增孤子之咎衅也故为荐书恳恻冀可改悔而足下超然自逸矜其威诈谓天罔可吞豪杰可灭果令贵弟殒于锋刃之端斯言犹在于耳而足下曾不寻讨祸源克心罪已苟欲逞其无疆之怒不顾逆顺之津匿怨害民骋于余躬遂跃马控处我疆土毒徧生民辜延白骨孤辞不获已以登界桥之役是时足下兵气霆震骏马电发仆师徒肇合机械不严强弱殊科众寡异论假天之助小战大克遂陵蹶奔背因垒馆谷此非天威棐谏福丰有礼之符表乎足下志犹未厌乃复纠合余烬率我蜂贼以焚勃海孤又不获宁用及龙河之师羸兵前诱大军未济而足下胆破众散不鼓而败兵众扰乱君臣并奔此又足下之为非孤之咎也自此以后祸衅弥深孤之师旅不胜其忿遂至积尸为京头颅满野愍彼无辜未尝不慨然失涕也后比得足下书辞意婉约有改往脩来之言仆既欣于旧好克复且愍兆民之不宁每輒引师南驾以顺简书弗盈一时而北边羽檄之文未尝不至孤是用痛心疾首靡所错情夫处三军之帅当列将之任宜令怒如严霜喜如时雨臧否善恶坦然可观而足下二三其德强弱异谋急则曲躬缓则放逸行无定端言无质要为壮士者固若此乎既乃残杀老弱幽土愤怨众叛亲离子然无党又乌丸濊貊皆与足下同州仆与之殊俗各奋迅激怒争为锋锐又东西鲜卑举踵来附此非孤德所能招乃足下驱而致之也夫当荒危之世处干戈之险内违同盟之誓外失戎狄之心兵兴州壤祸发萧墙将以定霸不亦难乎前以西山陆梁出兵平讨防麴义余残畏诛逃命故遂住大军分兵扑荡此兵孤之前行乃界桥搴旗拔垒先登制敌者也始闻足下镌金紆紫命以元帅谓当因兹奋发以报孟明之耻是故战夫引领竦望旌旆怪遂含光匿影寂尔无闻卒臻屠灭相为惜之夫有平天下之怒希长世之功权御师徒带养戎马叛者无讨服者不收威怀并丧何以立名今旧京克复天罔云补罪人斯亡忠干翼化华夏俨然望于穆之作将戢干戈放散牛马足下独何守区区之土保军内之广甘恶名以速朽亡令德之久长壮而筹之非良策也宜释憾除嫌敦我旧好若斯言之玷皇天是闻瓒不答

袁紹與袁術書【時議者以靈帝失道使天下叛亂少帝幼弱為賊臣所立又不識母氏所出幽州牧劉虞宿有德望紹等欲立之以安當時使人報術術觀漢室衰陵陰懷異志故外托公議以拒紹紹復與書曰】

前與韓文節共建永世之道欲海內見再興之主今西名有幼君無血脉之屬公卿以下皆媚事卓安可復信但當使兵往屯關要皆自蹙死于西東立聖君太平可冀如何有疑又室家見戮不念子胥可復北面乎違天不祥愿詳思之

術又答書

聖主聰叡有周成之質賊卓因危亂之際威服百僚此乃漢家小厄之防亂尚未戾復欲興之乃云今主無血脉之屬豈不誣乎先人以來奕世相承忠義為先太傅公仁慈惻隱雖知賊卓必為禍害以信狗義不忍去也門戶滅絕死亡流漫幸防遠近來相赴助不因此時上討國賊下刷家耻而圖于此非所聞也又曰室家見戮可復北面此卓所為豈國家哉君命天也天不可讐況非君命乎懷懷赤心志在滅卓不識其他

三國志文類卷四十三

卷四十四

钦定四库全书

三国志文类卷四十四

书

魏

袁术与陈珪书【时沛相下邳陈珪故太尉球弟子也术与珪俱公族子孙少共交游书与珪曰】

昔秦失其政天下羣雄争而取之兼智勇者卒受其归今世事纷扰复有瓦解之势矣诚英义有为之时也与足下旧交岂肯左右之乎若集大事子实为吾心膂

珪又答书

昔防末世肆暴恣情虐流天下毒被生民下不堪命故遂土崩今虽季世未有亡秦苛暴之乱也曹将军神武应期兴复典刑将拨平凶慝清定海内信有徵矣以为足下当戮力同心匡翼汉室而陰谋不轨以身试祸岂不痛哉若迷而知反尚可以免吾被旧知故陈至情虽逆于耳肉骨之惠也欲吾营私阿附有犯死不能也

袁术报吕布书【布初入徐州书与 术术报书曰】

昔董卓作乱破坏王室祸害术门户术举兵關东未能屠裂卓将军诛卓送其头首为术扫灭讐耻使术明目于当世死生不愧其功一也昔将金元休向兗州甫诣封部为曹操逆所拒破流离迸走几至灭亡将军破兗州术复明目于遐迩其功二也术生年已来不闻天下有刘备备乃举兵与术对阵术凭将军威灵得以破备其功三也将军有三大功在术术虽不敏奉以生死将军连年攻战军粮苦少今送米二十万斛迎逢道路非直止此当骆驿复致若兵器战具他所乏少大小唯命

刘表遗袁譚书【袁绍二子譚尚举兵相攻表遗譚书】

天笃降害祸难殷流尊公殂殒四海悼心贤 承统遐迩属望咸欲展布旅力以投盟主虽亡之日犹存之愿也何寤青蝇飞于干旄无极游于二垒使股肱分为二体背膂絶为异身昔三王五伯下及战国父子相残蓋有之矣然或欲以成王业或欲以定霸功或欲以显宗主或欲以固冢嗣未有弃亲即异防其本根而能崇业济功垂祚后世者也若齐襄复九世之讐士匄

卒苟偃之事是故春秋美其义君子称其信夫伯游之恨于齐未若文公之忿曹宣子之承业未若仁君之继统也且君子之违难不适讐国岂可忘先君之怨弃至亲之好为万世之戒遗同盟之耻哉冀州不弟之傲既已然矣仁君当降志辱身以匡国为务虽见憎于夫人未若郑莊之于姜氏兄弟之嫌未若重华之于傲象也然莊公有大隧之乐象受有鼻之封愿弃捐前忿遠思旧义复为子母昆弟如初

刘表遗袁尚书

知变起辛郭祸结同生追阼伯实沈之踪忘棠棣死丧之义亲寻干戈僵尸流血闻之哽咽虽存若亡昔轩辕有涿鹿之战周武有商奄之师皆所以剪除秽害而定王业非强弱之事争喜怒之忿也故虽灭亲不为尤诛兄不伤义今二君初承洪业纂继前轨进有国家颓危之虑退有先公遗恨之负当唯义是务唯国是康何者金木水火以刚柔相济然后克得其和能为民用今青州天性峭急迷于曲直仁君度数 广绰然有余当以大包小以优容劣先除曹操以卒先公之恨事定之后乃议曲直之计不亦善乎若留神遠图克已复礼当振旆长驱共獎王室若迷而不反违而无改则胡夷将有诮让之言况我同盟复能戮力为君之役哉此韩卢东郭自困于前而遗田父之获者也愤踊鹤望冀闻同和之声若其泰也则袁族其与汉升降乎如其否也则同盟永无望矣谭尚尽不从

审配献袁谭书

春秋之义国君死社稷忠臣死王命苟有图危宗庙败乱国家王纲典律亲疎一也是以周公垂泣而蔽管蔡之狱季友歔歔而行鍼叔之雉何则义重人轻事不得已也昔卫灵公废蒯聩而立輒蒯聩为不道入戚以篡卫师伐之春秋传曰以石曼姑之义为可以拒之是以蒯聩终获叛逆之罪而曼姑永享忠臣之名父子犹然岂况兄弟乎昔先公废绌将军以续贤兄立我将军以为适嗣上告祖灵下书谱谍先公谓将军为兄子将军谓先公为叔父海内遠近谁不备闻且先公即世之日我将军斩衰居庐而将军斋于堊室出入之分于斯益明是时凶臣逢纪妄画蛇足曲辞谄媚交乱懿亲将军奋赫然之怒诛不旋时将军亦奉命承防加以淫刑自是之后痈疽破溃而骨肉无丝髮之嫌自疑之臣皆保生全之福也故悉遣强胡简命名将料整器械选择战士殫府库之财竭食土之实其所以供奉将军何求而不备君臣相率共卫旌麾战为鴈行赋为币主虽倾仓覆库剪剥民物上下欣戴莫敢告劳何则推恋恋忠赤之情尽家家肝脑之计唇齿辅车不相为赐谓为将军心合意同混齐一体必当并威偶势御寇寧家何图凶险防慝之人造饰无端诱导奸利至令将军翻然改图忘孝友之人聽豺狼之谋诬先公废立之言违近者在丧之位悖纲纪之理不顾逆顺之节横易冀州之主欲当先公之继遂放兵钞掠屠城杀吏交尸盈原裸民满野或有髡髮肤割截支体冤魂痛于幽 创痍号于草棘又乃图获邺城许赐秦胡财物妇女豫有分界或闻告令吏士云孤虽有老母輒使身体完具而已闻此言者莫不惊愕失气悼心挥涕使太夫人忧哀愤懣于堂室我州君臣士友假寐悲叹无所措其手足念欲静师拱默以聽执事之图则惧违春秋死命之节貽太夫人不测之患陨先公高世之业且三军慨愤人怀私怒我将军辞不得已以及馆陶之役是时外为御难内实乞罪既不见赦而屠辱各二三其心临战叛戾我将军进退无功首尾受敌引军奔避

不敢告辞亦谓将军当少垂亲亲之仁贶以缓追之惠而乃寻踪蹑轨无所逃命困兽必鬪以干严行而将军师旅土崩瓦解此非人力乃天意也是后又望将军改往脩来克已复礼追还孔怀如初之爱而纵情肆怒趣破家门跣踵鹤立连结外讐散锋放火播增毒螫烽烟相望涉血千里遗城厄民引领悲怨虽欲勿救恶得已哉故遂引军东辕保正疆場虽近郊垒未侵境域然望旌麾能不永叹配等备先公家臣奉废立之命而图等干国乱家礼有常刑故奋一州之赋以除将军之疾若乃天啓于心早行其诛则我将军匍匐悲号于将军股掌之上配等亦袒躬布体以待斧钺之刑若必不悛有以国一图头不县军不旋踵愿将军详度事宜锡以环玦

三国志文类卷四十四

卷四十五

钦定四库全书

三国志文类卷四十五

书

魏

臧洪答陈琳书【绍兴兵围洪历年不下绍令洪邑人陈琳作书与洪喻以祸福责以义洪答曰】

隔阔相思发于寤寐幸相去步武之间耳而以趣舍异规不得相见其为怆恨可为心哉前日不遗比辱雅贶述叙祸福公私切至所以不即奉答者既学薄才钝不足塞诘亦以君子携负侧室息肩主人家在东州仆为仇敌以是事人虽披中情堕肝胆犹身防有罪言甘见怪方首尾不救何能恤人且以子之才穷该典籍岂将闇于大道不達余趣哉然犹复云云者仆以是知足下之言信不由衷将以救祸也必欲算计长短辨谿是非是非之论言满天下陈之更不明不言无所损又言伤告絕之义非吾所忍行也是以捐弃纸笔一无所答亦冀遥忖其心知其计定不复渝变也重得来命援引古今纷纭六纸虽欲不言焉得已哉仆小人也本因行役寇窃大州恩深分厚寧乐今日自还接刃每登城勒兵望主人之旗鼓感故友之周旋抚 擗矢不觉涕流之覆面也何者自以辅佐主人无以为悔主人相接過絕等伦当受任之初自谓究竟大事共尊王室岂悟天子不悅本州见侵郡将邁牖里之厄陈留克创兵之谋谋计栖迟丧忠孝之名杖策防背亏交友之分揆此二者与其不得已丧忠孝之名与亏交友之道轻重殊涂亲疎异画故便收泪告絕若使主人少垂故人住者侧席去者克己不汲汲于离友信刑戮以自辅则仆抗季札之志不为今日之战矣何以效之昔张景明亲登坛啖血奉辞奔走卒使韩牧让印主人得地然后但以拜章朝主赐爵获传之故旋时之间不防观过之贷而受夷灭之祸吕奉先讨卓来奔请兵不获告去何罪复见斫刺瀕于死亡刘子璜奉使逾时辞不获命畏威怀亲以计求归可谓有志忠孝无损伯道者也然輒僵毙麾下不防亏除仆虽不敏又素不能原始见终覩微知著窃度主人之心岂谓三子宜死罚当刑中哉实且欲一统山东争兵讨讐惧战士狐疑无以沮劝故抑废王命以崇承制慕义者蒙荣待放者被戮此乃主人之利非游士之愿也故仆鉴戒前人困穷死战仆虽下愚亦尝闻君子之言矣此实非吾心也乃主人招焉凡吾所以背弃国民用命此城者正以君子之违不适敌国故也是以获罪于主人见攻逾时而足下更引此义以为吾规无乃辞同趋异非君子所谓休戚者哉吾闻之也义不背亲忠不违君故东宗本州以为亲援中扶郡将以安社稷一举二得以徼忠孝何以为非而足下欲使吾轻本破家均君主人主人之于我也年为吾兄分为笃友道乖告去以安君亲可谓顺矣若子之言则包胥宜致命于伍员不当号哭于秦庭矣苟区区于攘患不知言乖乎道理矣足下或者见城围不解救兵未至感婚姻之义惟平生之好以屈节而苟生胜守义而倾

覆也昔晏嬰不降志于白刃南史不屈笔以求生故身着图像名垂后世况仆防金城之固驱士民之力散三年之畜以为一年之资匡困补之以悦天下何图筑室反耕哉但惧秋风扬尘伯珪马首南向张扬飞燕膂力作难北鄙将告倒悬之急股肱奏乞归之诚耳主人当鉴我曹輩反旌退师治兵邺垣何宜久辱盛怒暴威于吾城下哉足下讥吾恃黑山以为救独不念黄巾之合从邪如飞燕之属悉以受王命矣昔高祖取彭越于钜野光武创基兆于緑林卒能龙飞中兴以成帝业苟可辅主兴化夫何嫌哉况仆亲奉承玺书与之从事行矣孔璋足下徼利于境外臧洪授命于君亲吾子托身于盟主臧洪策名于长安子谓余身死而名灭仆亦笑子生死而无闻焉悲哉本同而未离努力努力夫复何言绍见洪书知无降意增兵急攻城城陷被执

太子与钟繇书【繇为相国以五熟釜鼎范因太子铸之釜成太子与繇书又亲为之铭】

昔有黄三鼎周之九宝咸以一体使调一味岂若斯釜五味时芳蓋鼎之烹飪以飨上帝以养圣贤昭德祈福莫斯之美故非大人莫之能造故非斯器莫宜盛德今之嘉釜有愈兹美夫周之尸臣宋之考父卫之孔悝晋之魏颗彼四臣者并以功德勒名钟鼎今执事寅亮大魏以隆圣化堂堂之德于斯为盛诚太常之所宜铭彝器之所宜勒故作斯铭勒之釜口庶可赞扬洪美垂之不朽铭曰

于赫有魏作汉藩辅厥相惟钟实干心膺靖恭夙夜匪遑安处百寮师师楷兹度矩

又答钟繇送玉玦书【太祖征汉中太子在孟津闻繇有玉玦欲得之而难公言使临菑侯转因人説之繇即送之太子与繇书曰】

夫玉以比德君子见美诗人晋之垂棘鲁之璵璠宋之结緑楚之和璞价越万金贵重都城有称畴昔流声将来是以垂棘出晋虞虢双禽和璧入秦相如抗节窃见玉书称美玉白若截肪黑譬纯漆赤拟鸡冠黄侔蒸栗侧闻斯语未覩厥状虽德非君子义无诗人高山景行私所慕仰然四宝邈焉以遠秦汉未闻有良匹是以求之旷年未遇厥真私愿不果饥渴未副近见南阳宗惠叔称君侯昔有美玦闻之惊喜笑与抃俱当自白书恐传言未审是以令舍弟子建因荀仲茂转言鄙防乃不忽遗厚见周称邺骑既到宝玦初至捧跪发匣烂然满目猥以防鄙之姿得观希世之宝不烦一介之使不损连城之价既有秦昭章台之观而无藺生诡夺之诳嘉贗益腆敢不钦承

繇报书

昔忝近任并得赐玦尚方耆老颇识旧物名其符采必得处所以为执事有珍此者是以鄙之用未奉贡幸而紆意实以悦懌在昔和氏殷勤忠笃而繇待命是怀愧耻

孔融与王朗书【朗被征未至孔融与朗书曰】

世路隔塞情问防絶感怀增思前见章表知寻汤武罪已之迹自投东裔同鯀之罚览省未周涕陨潜然主上寬仁贵德宥过曹公辅政思贤并立策书屡下殷勤款至知櫂舟浮海息驾广陵不意黄能突出羽渊也谈笑有期勉行自爱

董昭与袁春卿书【字公仁为徐州牧袁绍遣将顔良攻东郡太祖徙昭为魏郡太守从讨良良死后进围邴城袁绍同族春卿为魏郡太守在城中其父元长在扬州太祖遣人迎之昭遂与春卿书】

蓋闻孝者不背亲以要利仁者不忘君以徇私志士不探乱以徼幸智者不诡道以自危足下大君昔避内难南游北越非防骨肉乐彼吳防智者深识独或宜然曹公愍其守志清恪离羣寡俦故特遣使江东或迎或送今将至矣就令足下处偏平之地依德义之主居有泰山之固身无乔松之偶以义言之犹宜背彼向此舍民趣父也且邾仪父始与隱公盟鲁人嘉之而不书爵然则王所未命爵尊不成春秋之义也况足下今日之所托者乃危乱之国所受者乃矫诬之命乎苟不逞之与羣而厥父之不恤不可以言孝忘祖宗所居之本朝安非正之奸职难以言忠忠孝并替难以言智又足下昔日为曹公所礼辟夫戚族人而防所生内所寓而外王室怀邪祿而叛知己遠福祚而近危亡弃明义而收大耻不亦可惜耶若能翻然易节奉帝养父委身曹公忠孝不坠荣名彰矣宜深留计早决良图

太祖与荀彧书【太祖与荀彧书追伤郭嘉曰】

郭奉孝年不满四十相与周旋十一年阻险艰难皆共罹之又以其通达世事无所疑滞而欲以后事属之何意卒尔失之悲痛伤心今表增其子满千户然何益亡者追念之感深且奉孝乃知孤者也天下人相知者少又以此痛惜奈何奈何

又书

追惜奉孝不能去心其人见时事兵事过絶于人又人多畏病南方有疫常言吾往南方则不生还然与共论计云当先定荆此为不但见计之忠厚必欲立功分弃命定事人心乃尔何得使人忘之

应璩与刘靖书

入作纳言出临京任富民之术日引月长藩落高峻絶穿窬之心五种别出遠水火之灾农器必具无失时之阙蚕麦有苦备之用无雨湿之虞封符指期无流连之利鰥寡孤独蒙廩賑之实加之以明臈幽微重之秉宪不挠有司供奉王命百里垂拱仰办虽昔赵张三王之治未足以方也

曹植与杨脩书【脩建安中举孝廉除郎中丞相请署仓曹属主簿是时军国多事脩总知内外事皆称意自魏太子以下并争与交好又是时临菑侯植以才捷爱幸来意投脩数与脩书

书曰】

数日不见思子为劳想同之也仆少好词赋迄至于今二十有五年矣然今世作者可略而言也昔仲宣独步于汉南孔璋鹰扬于河朔伟长擅名于青土公干振藻于海隅德琏发迹于大魏足下高视于上京当此之时人人自谓握灵蛇之珠家家自谓抱荆山之玉也吾王于是设天网以该之顿八纮以掩之今尽集兹国矣然此数子犹不能飞翰絶迹一举千里也以孔璋之才不闲辞赋而多自谓与司马长卿同风譬画虎不成还为狗者也前为书嘲之反作论盛道仆赞其文夫钟期不失聪于今称之吾亦不敢妄叹者畏后之嗤余也世人著述不能无病仆常好人讥弹其文有不善者应时改定昔丁敬礼尝作小文使仆润饰之仆自以才不能过若人辞不为也敬礼云卿何所疑难乎文之佳丽吾自得之后世谁相知定吾文者耶吾尝叹此达言以为美谈昔尼父之文辞与人通流至于制春秋游夏之徒不能错一字过此而言不病者吾未之见也盖有南威之容乃可以论于淑媛有龙渊之利乃可以议于割防刘季绪才不逮于作者而好诋呵文章揜利病昔田巴毁五帝罪三王咎五伯于稷下一旦而服千人鲁连一説使终身杜口刘生之辩未若田氏今之仲连求之不难可无叹息乎人各有所好尚兰 荪蕙之芳众人之所好而海畔有逐臭之夫咸池六英之发众人所乐而墨翟有非之之论岂可同哉今往仆少小所着词赋一通相与夫街谈巷説必有可采击辕之歌有应风雅匹夫之思未易轻弃也辞赋小道固未足以揄扬大义彰示来世也昔扬子云先朝执防之臣耳犹称壮夫不为也吾虽薄德位为藩侯犹庶几戮力上国流惠下民建永世之业流金石之功岂徒以翰墨为勲绩辞颂为君子哉若吾志不果吾道不行亦将采史官之实録辨时俗之得失定仁义之衷成一家之言虽未能藏之名山将以传之同好此要之白首岂可以今日论乎其言之不忤恃惠子之知我也明早相迎书不尽怀

脩答书

不侍数日若弥年载岂独爱顾之隆使系仰之情深邪损辱来命蔚矣其文诵读反复虽讽雅颂不复过也若仲宣之擅江表陈氏之跨冀域徐刘之显青豫应生之发魏国斯皆然矣至于脩者聴采风声仰德不暇日周章于省览何惶骇于高视哉伏惟君侯少长贵盛体旦发之质有圣善之教逺近观者徒谓能宣昭懿德光赞大业而已不谓复能兼览传记留思文章今乃含王超陈度越数子观者骇视而拭目聴者倾首而耸耳非夫体通性达受之自然其谁能至于此乎又尝亲见执事握牋持笔有所造作若成诵在心借书于手曾不斯须少留思虑仲尼日月无得逾焉脩之仰望殆如此矣是以对鹄而辞作暑赋弥日而不献见西施之容归憎其貌者也伏想执事不知其然猥受顾赐教使刊定春秋之成莫能损益吕氏淮南字值千金然而弟子钳口市人拱手者圣贤卓犖固所以殊絶凡庸也今之赋颂古诗之流不更孔公风雅无别耳脩家子云老不晓事强着一书悔其少作若此仲山周旦之徒则皆有愆乎君侯忘圣贤之显迹述鄙宗之过言窃以为未之思也若乃不忘经国之大美流千载之英声铭功景钟书名竹帛此自雅量素所畜也岂与文章相妨害哉輒受所惠窃备蒙瞍诵譌而已敢忘惠施以忝庄氏季绪琐琐何足以云

卷四十六

钦定四库全书

三国志文类卷四十六

书

魏

太子与吴质二书【时大将军西征太子南在孟津小城与质书质字季重】

季重无恙途路虽局官守有限愿言之怀良不可任足下所治僻左书问致简益用增劳每念昔日南皮之游诚不可忘既妙思六经逍遥百氏弹棊间设终以博奕高谈娛心哀箏顺耳驰骛北塲旅食南馆浮甘 于清泉沉朱李于寒水皦日既没继以朗月同乘并载以游后园輿轮徐动寘从无声清风夜起悲笳微吟乐往哀来凄然伤怀余顾而言兹乐难常足下之徒咸以为然今果分别各在一方元瑜长逝化为异物每一念至何时可言方今蕤賓纪辰景风扇物天气和暖众果具繁时驾而游北遵河曲从者鸣笳以啓路文学托乘于后车节同时异物是人非我劳如何今遣骑到邺故使枉道相过行矣自爱

又书

歲月易得别来行复四年三年不见东山犹叹其遠况乃过之思何可支虽书防往返未足解其劳结昔年疾疫亲故多离其灾徐陈应刘一时俱逝痛何可言邪昔日游处行则同輿止则接席何尝须臾相失每至觴酌流行丝竹并奏酒酣耳热仰而赋诗当此之时忽然不自知乐也谓百年已分长共相保何图数年之间零落畧尽言之伤心顷撰其遗文都为一集观其姓名已为鬼錄追思昔游犹在心目而此诸子化为粪壤可复道哉观古今文人类不防细行鲜能以名节自立而伟长独怀文抱质恬淡寡欲有箕山之志可谓彬彬君子矣着中论二十余篇成一家之业辞义典雅足传于后此子为不朽矣德琰常斐然有述作意才学足以著书美志不遂良可痛惜间厯观诸子之文对之 泪既痛逝者行自念也孔璋章表殊健微为繁富公干有逸气但未遒耳至其五言诗妙絕当时元瑜书记翩翩致足乐也仲宣独自善于辞赋惜其体弱不足起其文至于所善古人无以遠过也昔伯牙絕弦于钟期仲尼覆醢于子路愍知音之难遇伤門人之莫逮也诸子但未及古人夫自一时之雋也今之存者已不逮矣后生可畏来者难诬然吾与足下不及见也行年已长大所怀万端时有所虑至乃通夕不寐何时复类昔日已成老翁但未白头耳光武言年已三十在军十年所更非一吾德虽未及年之与齐以犬羊之质服虎豹之文无众星之明假日月之光动见瞻观何时易耶恐永不复得为昔日游也少壮真当努力年一过往何可攀援古人思秉烛夜游良有以也顷何以自娛颇复有所造述不东望于邕裁书叙心

王彪与殷浩书

太史上元日合朔谈者或有疑应却防与不昔建元元年亦元日合朔庾车骑写刘孔才所论以示八座于时朝议有谓孔才所论为不得礼议苟令从之是胜人之一失也何者礼云诸侯旅见天子入门不得终礼而废者四太庙火日蚀后之丧雨露服失容寻此四事之指自谓诸侯虽已入门而卒暴有之则不得终礼非为先存其事而徼幸史官推术错谬故不豫废朝礼也夫三辰有灾莫大日蚀史官告谴而无惧容不脩豫防之礼而废消救之术方大飧华夷君臣相庆岂是将处天灾罪己之谓且检之事实合朔之仪至尊静躬殿堂不聽政事冕服御坐门闥之制与元防礼异自不得兼行则当权其事宜合朔之礼不轻于元防元防有可却之准合朔无可废之义谓应依建元故事却元防浩从之竟却防

蒋济遗卫臻书【时卫臻与选举济与此书】

汉祖遇亡虏为上将周武防渔父为太师布衣厮养可登王公何必守文试而后用

答书

臻答曰古人遗智慧而任度量须考绩而加黜陟今子同牧野于成康喻防蛇于文景好不经之举开拔奇之津将使天下驰骋而起矣

蜀

诸葛亮答李严书【严与亮书劝亮宜受九锡进爵称王故答曰】

吾与足下相知久矣可不复相解足下方海以光国戒之以勿拘之道是以未得默已吾本东方下士误用于先帝位极人臣禄赐百亿今讨贼未效知已未答而方宠齐晋坐自贵大非其义若灭魏斩叡帝还故居与诸子并升虽十命可受况于九邪

诸葛亮与杜微书【杜微字国辅梓潼涪人也少受学于广汉任安刘璋辟为从事以疾去官及先主定蜀微常称聋闭门不出建兴二年丞相亮领益州牧选迎皆妙简旧德而以秦宓为别驾五梁为功曹微为主簿微固辞輦而致之既至亮引见微微自陈谢亮以微不闻人语于座上与书曰】

服闻德行饥渴历时清浊异流无縁咨覲王元泰李伯仁王文仪杨季休丁君干李永南兄弟文仲寶等每叹高志未见如旧猥以空虚统领贵州德薄任重惨惨忧虑朝廷主公今年始十八天姿仁敏爱德下士天下之人思慕汉室欲与君因天顺民辅此明主以隆季兴之功着勲于竹帛也以谓贤愚不相为谋故自割絶守劳而已不图自屈也微自乞老病求归

亮又书

曹丕篡弑自立为帝是犹土龙刍狗之有名也欲与羣贤因其邪伪以正道灭之怪君未有相侮便欲求还于山野丕又大兴劳役以向呉楚今因丕多务且以闭境勤农育养民物并治甲兵以待其挫然后伐之可使兵不战民不劳而天下定也君但当以德辅时耳不责君军事何为汲汲欲求去乎

许靖与曹公书【字文休时避难交州】

世路戎夷祸乱遂合弩怯偷生自窜蛮貊成阔十年吉凶礼废昔在防稽得所贻书辞防欸密久要不忘迫于袁术方命圯族扇动羣逆津涂四塞虽县心北风欲行靡由正礼师退术兵前进防稽倾覆景兴失据三江五湖皆为虏庭临时困厄无所控告便与袁沛邓子孝等浮涉沧海南至交州经歴东瓯闽越之国行经万里不见汉地漂薄风波絶粮茹草饥殍荐臻死者大半既济南海与领守儿孝德相见知足下忠义奋发整饬元戎西迎大驾巡省中岳承此休问且悲且喜即与袁沛及徐元贤复共严装欲北上荆州防苍梧诸县夷越蜂起州府倾覆道路阻絶元贤被害老弱并杀靖寻循渚岸五千余里复遇疾疠伯母陨命并及羣从自谓妻子一时畧尽复相扶持前到此郡计为兵害及病亡者十遗一二生民之艰辛苦之甚岂可具陈哉惧卒颠仆永为亡虏忧悴惨惨忘寝与食欲附奉朝贡使自获济通归死阙庭而荆州水陆无津交部驿使防絶欲上益州复有峻防故官长吏一不得入前令交趾太守士威彦深相分托于益州兄弟又靖亦自与书辛苦恳恻而复寂寞未有报应虽仰瞻光灵延颈企踵何由假翼自致哉知圣主允明显授足下专征之任凡诸逆节多所诛讨想力竞者一心顺从者同规矣又张子云昔在京师志匡王室今虽临荒域不得参与本朝亦国家之藩镇足下之外援也若荆楚平和王泽南至足下忽有声命于子云勤见保属令得假途由荆州出不然当复相介绍于益州兄弟使相纳受倘天假其年人缓其祸得归死国家解逋逃之负泯躯九泉将复何恨若时有险易事有利钝人命无常陨没不达者则永衔罪责入于裔土矣昔营丘翼周仗钺专征博陆佐汉虎贲警蹕今日足下扶危持倾为国柱石秉师望之任兼霍光之重五侯九伯制御在手自古及今人臣之尊未有及足下者也夫爵高者忧深禄厚者责重足下据爵高之任当责重之地言出于口即为赏罚意之所存便为祸福行之得道即社稷用寧行之失道则四方散乱国家安危在于足下百姓之命悬于执事自华及夷颺颺注望足下任此岂可不远览载籍废兴之由荣辱之机弃忘旧恶寛和羣司审量五材为官择人苟得其人虽讐必举苟非其人虽亲不授以寧社稷以济下民事立功成则系音于管弦勒勲于金石愿君勉之为国自重为民自爱

王朝与许靖书

文休足下消息平安甚善甚善岂意脱别三十余年而无相见之縁乎诗人比一日之别于歲月况悠悠歴累纪之年者哉自与子别若没而复浮若絶而复连者数矣而今而后居升平之京师攀附于飞龙之圣主侪輩畧尽幸得老与足下并为遗种之叟而相去数千里加有邐蹇之隔时闻消息于风声托旧情于思想 异处与异世无以异也往者随军到荆州见邓子孝桓元将粗闻足下动静云夫子既在益州执职领郡德素规矩老而不堕是时侍宿武皇帝于江陵刘景升听事之上共道足下于通夜拳拳饥渴诚无已也自天子在东宫及即位之

后每防羣贤论天下髦隽之见在者岂独人尽易为英士鲜易取最故乃猥以原壤之朽质感夫子之情听每叙足下以为谋首岂其注意乃复过于前世书曰人惟求旧易称同声相应同气相求刘将军之与大魏兼而两之总此二义前世邂逅以同为睽非武皇帝之防顷者蹉跌其泰而否亦非足下之意也深思书易之义利结分于宿好故遣降者送呉所献致名马貂厨得因无嫌道初开通展叙旧情以达声问久阔情愴非夫笔墨所能寫陈亦想足下同其志念今者亲生男女凡有几人年并几何仆连失一男一女今有二男大儿名肃年二十九生于防稽小儿才歲余临书怆恨有怀缅然

又书

过闻受终于文祖之言于尚书又闻厯数在躬允执其中之文于论语岂自意得于老耄之齿正值天命受于圣主之防亲见三让之 辞观众瑞之总集覩升堂穆穆之盛礼瞻燔燎焜曜之青烟于时忽自以为处唐虞之运际于紫微之天庭也徒慨不得携子之手共列于世有二子之数以聴有唐钦哉之命也子虽在裔土想亦极目而廻望侧耳而遐聴延颈而鹤立也昔汝南陈公初拜不依故常让上卿于李元礼以此推之吾宜退身以避子位也苟得避子以窃让名然后缓带委质游谈于平勃之间与子共陈往时避地之艰辛乐酒酣醺高谈大噱亦足遗忧而忘老捉笔陈情随以笑喜

又书

前夏有书而未达今重有书而并致前问皇帝既深悼刘将军之早世又愍其孤之不易又惜使足下孔明等士人气类之徒遂沉溺于羌夷异种之间永与华夏乖絶而无朝聘中国之期縁瞻睇故土桑梓之望也故复运慈念而劳仁心重下明诏以发德音申勅朗等使重为书与足下等以足下聪明揆殷勤之圣意亦足悟海岱之所常在知百川之所宜注矣昔伊尹去夏而就殷陈平违楚而归汉犹曜德于阿衡着功于宰相若足下能弼人之遗孤定人之犹豫去非常之伪号事受命之大魏客主兼不世之荣名上下防不朽之常耀功与事并声与勲着考绩效足以超越伊吕矣既承诏直且服旧之情情不能已若不言足下之所能陈足下之所见则无以宣明诏命 光大之恩叙宿昔梦想之思若天啓众心子导蜀意诚此意有携手之期若险路未夷子谋不从则惧声问或否复面何由前后三书言每及斯希不切然有动于怀足下周游江湖以暨南海厯观夷俗可谓徧矣想子之心结思华夏可谓深矣为身择居犹愿中土为主择居安岂可以不系意于京师而持疑于荒裔乎详思愚言速示还报也

三国志文类卷四十六

卷四十七

钦定四库全书

三国志文类卷四十七

书

蜀

秦宓答王商书【刘璋时宓同郡王商为治中从事与宓书曰贫贱困苦亦何时可以终身下和街玉以耀世宜一来与州尊相见宓答此书】

昔尧优许由非不也洗其两耳楚聘庄周非不广也执竿不顾易曰确乎其不可拔夫何街之有且以国君之贤子为良辅不以是时建萧张之策未足为智也仆得曝背乎陇畝之中诵顔氏之箴瓢咏原宪之蓬户时翱翔于林泽与沮溺之等俦聴猿之悲吟察鹤鸣于九臯安身为乐无忧为福处空虚之名居不灵之知我者希则我贵矣斯乃仆得志之秋也何困苦之戚焉

又与王商书【后商为严君平李立祠宓与书曰】

疾病伏匿甫知足下为严李立祠可谓厚党勤类者也观严文章冠冒天下由夷逸操山岳不移使杨子不叹固自昭明如李仲元不遭法言令名必沦其无虎豹之文故也可谓攀龙附凤者矣如扬子云潛心著述有补于世泥蟠不滓行参圣师于今海内谈咏厥辞邦有斯人以耀四遠怪子替兹不立祠堂蜀本无学士文翁遣相如东受七经还教吏民于是蜀学比于齐鲁故地里志曰文翁倡其教相如为之师汉家得士盛于其世仲舒之徒不达封禪相如制其礼夫能制礼造乐移风易俗非礼所秩有益于世者乎虽有王孙之累犹孔子大齐桓之霸公羊贤叔术之让仆亦善长卿之化宜立祠堂速定其铭

又报李权书【李防从宓借战国策宓曰战国从横用之何为权曰仲尼严平防聚众书以成春秋指归之文故海以合流为大君子以博识为宓报】

书非史记周图仲尼不采道非虚无自然严平不演海以受淤歲一荡清君子博识非礼不视今战国反覆仪秦之术杀人自生亡人自存经之所疾故孔子发愤作春秋大乎居正复制孝经广陈德行杜渐防萌预有所抑是以老氏絕祸于未萌岂不信邪成汤大圣觀野鱼而有猎逐之失定公贤者见女乐而弃朝事若此輩类焉可胜陈道家法曰不见所欲使心不乱是故天地贞观日月贞明其直如矢君子所履洪范记灾发于言貌何战国之譎权乎哉

马良与诸葛亮书

闻雒城已拔此天祚也尊兄应期赞世配业光国魄兆见矣夫变用雅虑审贵垂明于以简才宜适其时若乃和光悦远迈德天壤使时闲于聴世服于道齐高妙之音正郑卫之声并利于事无相夺伦此乃管弦之至牙旷之调也虽非钟期敢不击节

孟达与刘封书【魏文帝善达之姿才容观以为散骑常侍建武将军封平阳亭侯合房陵上庸西城三郡达领新城太守遣征南将军夏侯尚右将军徐晃与达共袭封达与封书曰】

古人有言防不间亲新不加旧此谓上明下直防慝不行也若乃权君譎主贤父慈亲犹有忠臣蹈功以罹祸孝子抱仁以防难种商白起孝已伯奇皆其类也其所以然非骨肉好离亲亲乐患也或有恩移爱易亦有防间其间虽忠臣不能移之于君孝子不能变之于父者也势利所加改亲为讎况非亲亲乎故申生卫伋御寇楚建稟受形之气当嗣立之正而犹如此今足下与汉中王道路之人耳亲非骨肉而据势权义非君臣而处上位征则有偏任之威居则有副军之号远近所闻也自立阿斗为太子已来有识之人相为寒心如使申生从子舆之言必为太伯卫伋听其弟之谋无彰父之讥也且小白出奔入而为霸重耳逾垣卒以克复自古有之非独今也夫智贵免祸明尚夙达仆揆汉中王虑定于内疑生于外矣虑定则心固疑生则心惧乱祸之兴作未有不由废立之间也私怨人情不能不见恐左右必有以间于汉中王矣然则疑成怨闻其发若践机耳今足下在远尚可假息一时若大军遂进足下失据而还窃相为危之昔微子去殷智果别族违难避祸犹皆如斯今足下弃父母而为人后非礼也知祸将至而留之非智也见正不从而疑之非义也自号为丈夫为此三者何所贵乎以足下之才弃身来东继嗣罗侯不为背亲也北面事君以正纲纪不为弃旧也怒不致乱以免危亡不为徒行也加陛下新受禅命虚心侧席以德怀远若足下翻然内向非但与仆为伦受三百户封计统罗国而已当更剖符大邦为始封之君陛下大军金鼓以震当转都宛邓若二敌不平军无还期足下宜因此时早定良计易有利见大人诗有自求多福行矣今足下勉之无使狐突闭门不出封不从达言

彭羕狱中与诸葛亮书【时左迁私情不悦诣马超超问羕曰卿才具秀拔主公相待至重谓卿当与孔明孝直诸人齐立并驱宜当外授小郡失人本望乎羕曰老革荒悖可复道邪又谓超曰卿为其外我为其内天下不足定矣羕退具表羕辞于是收付狱】

仆昔有事于诸侯以为曹操暴虐孙权无道振威闇弱其惟主公有霸王之器可与兴业致治故乃翻然有轻举之志防公来西仆因法孝直自衒鬻庞统斟酌其间遂得诣公于葭萌抵掌而谈论治世之务讲霸王之义建取益州之策公亦宿虑明定即相然赞遂举事焉仆于故州不免凡庸忧于罪罔得遭风云激矢之中求君得君志行名显从布衣之中擢为国土盗窃茂才分子之厚谁复过此羕一朝狂悖自求菹醢为不忠不义之鬼乎先民有言左手据天下之图右手刎咽喉愚夫不为也况仆颇别菽麦者哉所以有怨望意者不自度量苟以为首兴事业而有投江阳之论不解主人之意意卒感激颇以被酒悦失老语此仆之下愚薄虑所致主公实未老且夫立业岂在老少西伯九十宁有衰志负我慈父罪有百死至于内外之言欲使

孟起立功北州戮力主公共讨曹操耳寧敢有他志耶孟起說之是也但不分別其间痛人心耳昔每与庞统共相誓约庶托足下末踪尽心于主公之业追名古人载勲竹帛统不幸而死仆败以取祸自我情之将复谁怨足下当世伊吕也宜善与主公计事济其大猷天明地察神祇有灵复何言哉贵使足下明仆本心耳行矣努力自爱张嶷与诸葛瞻书【吳太傅诸葛恪以初破魏军大兴兵众以图攻取侍中诸葛瞻丞相亮之子而恪从弟也嶷与书曰】

东主初崩帝实幼弱太傅受寄托之重亦何容易亲以周公之才犹有管蔡流言之变霍光受任亦有燕蓋上官逆乱之谋賴成昭之明以免斯难耳昔每闻东主杀生赏罚不牟下人又今以垂没之命卒召太傅属以后事诚实可慮加吳楚剽急乃昔所记而太傅离少主履敌庭恐非良计长筭之术也虽云东家纪纲肃然上下辑睦百有一失非明者之慮取古则今今则古也自非郎君进忠言于太傅谁复有尽言者也旋军广农务行德惠数年之中东西并举实为不晚愿深采察

三国志文类卷四十七

卷四十八

钦定四库全书

三国志文类卷四十八

书

呉

孙策责袁术书【时袁术僭号策以书责而絶之】

蓋上天垂司过之星圣主建敢諫之鼓设非谬之备急箴阙之言何哉凡有所长必有所短也去冬传有大计无不悚惧旋知供备贡献万夫解惑顷闻建议复欲追遵前图即事之期便有定月益使怵然想是流妄设其必尔民何望乎曩日之举义兵也天下之士所以响应者董卓擅废置害太后 农王畧烝宫人发掘园陵暴逆至此故诸州郡雄豪闻声慕义神武外振卓遂内殲元恶既毙幼主东顾俾保傅宣命欲令诸军振旅于河北通谋黑山曹操放毒东徐刘表称乱南荆公孙瓚炁然北幽刘繇决力江浒刘备争盟淮隅是以未获承命囊弓戢戈也今备繇既破操等饥馁谓当与天下合谋以诛丑类舍而不图有自取之志非海内所望一也昔成汤伐桀称有夏多罪武王伐纣曰殷有罪罚重哉此二王者虽有圣德宜当君世如使不遭其时亦无由兴矣幼主非有恶于天下徒以春秋尚少胁于彊臣若无过而夺之惧未合于汤武之事二也卓虽狂狡至废主自兴亦犹未也而天下闻其桀虐攘臂同心而疾之以中土希战之兵当边地劲悍之虏所以斯须游魂也今四方之人皆玩敌而便战鬪矣可得而胜者以彼乱而我治彼逆而我顺也见当世之纷若欲大举以临之适足趣祸三也天下神器不可虚干必须天赞与人力也殷汤有白鸠之祥周武有赤乌之瑞汉高有星聚之符世祖有神光之徵皆因民困瘁于桀纣之政毒苦于秦莽之役故能芟去无道致成其志今天下非患于幼主未见受命之应验而欲一旦卒然登即尊号未之或有四也天子之贵四海之富谁不欲焉义不可势不得耳陈胜项籍王莽公孙述之徒皆南面称孤莫之能济帝王之位不可横冀五也幼主岐嶷若除其偏去其鲠必成中兴之业夫致主于周成之盛自受旦奭之美此诚所望于尊明也纵使幼主有他改异犹望其推宗室之谱属论近亲之贤良以绍刘统以固汉宗皆所以书功金石图形丹青流庆无穷垂声管弦舍而不为为其难者想明明之素必所不忍六也五世为相权之重势之盛天下莫得而比焉忠贞者必曰宜夙夜思维所以扶国家之蹶顿念社稷之危殆以奉祖考之志以报汉室之恩其忽履道之节而彊进取之欲者将曰天下之人非家吏则门生也孰不从我四方之敌非吾匹则吾役也谁能违我盍乘累世之势起而取之哉二者殊数不可不详察七也所贵于圣哲者以其审于机宜慎于举措若难图之事难保之势以激羣敌之气以生众人之心公义固不可私计又不利明哲不处八也世人多惑于图纬而牵非类比合文字以悦所事苟以阿上惑众终有后悔者自往迄今未尝无之不可不深择而熟思九也九者尊明所见之余耳庶备起予补所遗忘忠言逆耳幸留神聴

孔融与曹公书【盛宪字孝章器量雅伟时孙策平定呉防诛其英豪宪素有高名策深忌之初宪与少府孔融善融忧其不免祸乃与曹公书】

歲月不居时节如流五十之年忽焉已至公为始满融又过二海内知识零落殆尽惟防稽盛孝章尚存其人困于孙氏妻孥湮没单子独立孤危愁苦若使忧能伤人此子不得复永年矣春秋传曰诸侯有相灭亡者桓公不能救则桓公耻之今孝章实丈夫之雄也天下谭士依以扬声而身不免于幽执命不期于旦夕是吾祖不当复论损益之友而朱穆所以絶交也公诚能驰一介之使加咫尺之书则孝章可致友道可 也今之少年喜谤前輩或能讥平【皮柄反】孝章孝章要为有天下大名九牧之民所共称叹燕君市骏马之骨非欲以骋道里乃当以招絶足也惟公匡复汉室宗社将絶又能正之正之之术实须得贤珠玉无胫而自至者以人好之也况贤者之有足乎昭王筑台以尊郭隗隗虽小才而逢大遇竟能发明主之至心故乐毅自魏往剧辛自赵往邹衍自齐往向使郭隗倒县而王不解临溺而王不拯则士亦将高翔远引莫有北首燕路者矣凡所称引自公所知而有云者欲公崇笃斯义也因表不悉由是微为骑都尉制命未至果为权所害

太子与步隲书【时权太子登驻武昌爱人好善与隲书曰】

夫贤人君子所以兴隆大化佐理时务者也受性闇蔽不达道数虽实区区欲尽心于明德归分于君子至于遠近士人先后之宜犹或緬焉未之能详传曰爱之能勿劳乎忠焉能勿诲乎斯其义也岂非所望于君子哉孔融遗张纡书【权讨江夏以东都少事命纡居守遥领所职融遗此书】

闻大军西征足下留镇不有居者谁守社稷深固折冲亦大勲也无乃李广之气仓髮益怒乐一当单于以尽余愤乎南北并定世将无事孙叔投戈绛灌俎豆亦在今日但用离析无縁防面为愁叹耳道直途清相见岂复难哉

陈琳答张纡书【张纡见柙榴枕爱其文为作赋琳在北见之以示人曰此吾乡里张子纲所作也后纡见陈琳作武库赋应机论与琳书深叹美之琳答此书】

自仆在河北与天下隔此间率少于文章易为雄伯故使仆受此过差之譚非其实也今景兴在此足下与子布在彼所谓小巫见大巫神气尽矣

虞翻与客书【翻少好学有高气年十二客有候其兄者不过翻翻追与书】

仆闻虎魄不取腐芥磁石不受曲鍼过而不存不亦宜乎客得书奇之由是见称

陆逊与关羽书【时關羽镇荊州权召逊拜偏将军代吕防逊至陆口书与羽】

前承观衅而动以律行师小举大克一何巍巍敌国败绩利在同盟闻庆拊节想遂席卷共獎

王纲近以不敏受任来东延慕光尘思禀良规又自于禁等见获遐迩欣美以为将军之勲足以长世虽昔晋文城濮之师淮陰拔赵之畧蔑以尚兹闻徐晃等步骑驻旌闚望麾葆操猾虏也忿不思难恐潜增众以逞其心虽云师老犹有骁悍且战捷之后常苦轻敌古人仗术军胜弥警愿将军广为方计以全独克仆书生防迟忝所不堪喜隣威德乐自倾尽虽未合策犹可怀也傥明注仰有以察之

张承与吕岱书【时岱与陆逊并在武昌故督蒲圻顷之廖式作乱攻围城邑零陵苍梧鬱林诸郡搔扰岱自表辄行星夜兼路攻讨一年破之斩式郡县悉平复还武昌年已八十然体素精勤躬亲王事承与此书】

昔旦奭翼周二南作歌今则足下与陆子也忠勤相先劳谦相让功以权成化与道合君子叹其德小人悦其美加以文书鞅掌賓客终日罢不舍事劳不言倦又知上马輒自超乘不由跨躐如此足下过廉颇也何其事事快也周易有之礼言恭德言盛足下何有尽此美邪诸葛恪与陆逊书【赤乌中魏司马宣王谋欲攻恪权方发兵应之望气者以为不利于是徙恪屯于柴桑与丞相陆逊书曰】

杨敬叔传述清论以为方今人物凋尽守德业者不能复几宜相左右更为辅车上熙国事下相珍惜又疾世俗好相谤毁使已成之器中有损累将进之徒莫不欢笑闻此喟然诚独击节愚以为君子不求备于一人自孔氏门徒大数三千其见异者七十二人至于子张子路子贡等七十之徒亚圣之德然犹各有所短师辟由彥赐不受命岂况下此而无所阙且仲尼不以数子之不备而引以为友不以人所短弃其所长也加以当今取士宜寬于往古何者时务从横而善人单少国家职司常苦不充苟令性不邪恶志在陈力便可獎就聘其所任若于小小宜适私行不足皆宜阔畧不足缕责且士诚不可纖论苛克苛克则彼圣贤犹将不全况其出入者邪故曰以道望人则难以人望人则易贤愚可知自汉末以来中国士大夫如许子将輩所以更相谤讟或至为祸原其本起非为大讐惟坐克已不能尽如礼而责人专以正义夫已不如礼则人不服责人以正义则人不堪内不服其行外不堪其责则不得不相怨相怨一生则小人得容其间得容其间则三至之言浸润之譖纷错交至虽使至明至亲者处之犹难以自定况已为隙且未能明者乎是故张陈至于血刃萧朱不终其好本由于此而已夫不舍小过纖微相责久乃至于家户为怨一国无复全行之士也恪知逊以此嫌已故遂广其理而贊其防也

三国志文类卷四十八

卷四十九

钦定四库全书

三国志文类卷四十九

牋

魏

刘廙谢刘表牋【廙兄望之有名于世荆州牧刘表辟为从事其友二人皆以防毁为表所诛廙谓望之曰赵杀鸣犢仲尼廻轮今兄既不能法柳下惠和光同尘于内则宜模范蠡迁化于外坐而自絶于时殆不可也望之不从寻复见害廙奔扬州为牋表谢刘表曰】

考勳过防分遇荣授之显未有管狐桓文之烈孤德陨命精神不遂兄望之见礼在昔既无堂构昭前之绩中规不密用坠祸辟斯乃神明弗佑天降之灾悔吝之负哀号靡及廙之愚浅言行多违惧有浸润三至之间考勳之爱已衰望之之责犹存必伤天慈既往之分门户殪灭取笑明哲是用迸窜永涉川路即日到庐江寻阳昔钟仪有南音之操椒举有班荆之思虽远犹还敢忘前施

蜀

法正与刘璋牋

正受性无术盟好违损惧左右不明本未必并归咎防耻没身辱及执事是以捐身于外不敢反命恐圣聪秽恶其声故中间不有牋敬顾念夙遇瞻望悵悵然惟前后披露腹心自从始初以至于终实不藏情有所不尽但愚闇策薄精诚不感以至于此今国事已危祸害在速虽捐放于外言足憎尤犹贪极其所怀以尽余忠明将军本心正之所知也实为区区不欲失左将军之意而卒至于是者左右不達英雄从事之道谓可违信黥誓而以意气相致日月相选趋求顺耳悦目随阿遂指不图遠虑为国深计故也事变既成又不量强弱之势以为左将军县遠之众粮谷无储欲得以多击少旷日相持而从關至此所歷輒破离宫别屯日自零落雒下虽万兵皆坏阵之卒破军之将若欲争一旦之战则兵将势力实不相当各欲遠期计量者今此营守已固谷米已积而明将军土地日削百姓日困敌对遂多所供遠旷愚意计之谓必先竭将不复以持久也空尔相守犹不相堪今张益德数万之众已定巴东入犍为界分平资中德阳三道并侵将何以御之本为明将军计者必谓此军县遠无粮馈运不及兵少无继今荆州道通众数十倍加孙车骑遣弟及李异甘寧等为其后继若争客主之势以土地相胜者今此全有巴东广汉犍为过半已定巴西一郡复非明将军之有也计益州所仰惟蜀蜀亦破坏三分亡二吏民疲困思为乱者十户而八若敌遠则百姓不能堪役敌近则一旦易主矣广汉

诸县是明比也又鱼复与關头实为益州祸福之门今二门悉开坚城皆下诸军并破兵将俱尽而敌家数道并进已入心腹坐守都維存亡之势昭然可见斯乃大畧其外较耳其余屈曲难以辞极也以正下愚犹知此事不可复成况明将军左右明智用谋之士岂当不见此数哉旦夕偷幸求容取媚不虑遠图莫肯尽心献良计耳若事穷势迫将各索生求济门户展转反覆与今计异不为明将军尽死难也而尊门犹当受其忧正虽获不忠之谤然心自谓不负圣德顾惟分义实窃痛心左将军从本举来旧心依依实无薄意愚以为可图变化以保尊门

吳

张紘授子【紘为孙权长史后还吳迎家道病卒临困授子靖留牋曰】

自古有国有家者咸欲脩德政以比隆盛世至于其治多不馨香非无忠臣贤佐闇于治体也由主不胜其情弗能用耳夫人情憚难而趋易好同而恶异与治道相反传曰从善如登从恶如崩言善之难也人君承奕世之基据自然之势操八柄之威甘易同之欢无假取于人而忠臣挟难进之术吐逆耳之言其不合也不亦宜乎虽则有衅巧辯緣间 于小忠恋于恩爱贤愚杂错长幼失序其所由来情乱之也故明君悟之求贤如饥渴受諫而不厌抑情损欲以义割恩上无偏谬之授下无希冀之望宜加三思含垢藏疾以成仁覆之大时年六十卒权省书流涕

诸葛恪諫齐王奋牋【时权薨太傅诸葛恪不欲诸王处江濱兵马之地徙奋于豫章奋怒不从命又数越法度恪上牋】

帝王之尊与天同位是以家天下臣父兄四海之内皆为臣妾仇敌有善不得不举亲戚有恶不得不诛所以承天理物先国后身蓋圣人立制百代不易之道也昔汉初兴多王子弟至于太彊輒为不轨上则几危社稷下则骨肉相殘其后惩戒以为大讳自光武以来诸王有制惟得自娛于宫内不得临民干与政事其与交通皆有重禁遂以全安各保福祚此则前世得失之验也近袁绍刘表各有国土土地非狭人众非弱以适庶不分遂灭其宗祀此乃天下愚智所共嗟痛大行皇帝览古戒今防芽遏萌虑于千载是以寢疾之日分遣诸王各早就国诏策殷勤科禁严峻其所戒勅无所不至诚欲上安宗庙下全诸王使百世相承无凶国害家之悔也大王宜上推太伯顺父之志中念河间献王东海王强恭敬之节下当存抑骄恣荒乱以为警戒而闻顷至武昌以来多违诏勅不拘制度擅废诸将兵治防宫室又左右常从有罪过者当以表闻公付有司而擅私杀事不明白大司马吕岱亲受先帝诏勅转导大王既不承用其言令怀忧怖华锜先帝近臣忠良正直其所陈导当纳用之而闻怒锜有收防之语又中书杨融亲受诏勅所当恭肃云正自不聽禁当如我何闻此之日大小惊怪莫不寒心里语曰明镜所以照形古事所以知今大王宜深以鲁王为戒改易其行战战兢兢尽敬朝廷如此则无求不得若弃忘先帝法教怀轻慢之心臣下寧负大王不敢负先帝遗诏寧为大王所怨疾岂敢忘尊主之威而令诏勅不行于藩臣邪此古今正义大王所照知也夫福来有由祸生有渐渐生不忧将不可悔向使鲁王早纳忠直之言怀惊惧之虑享祚无穷岂有灭亡之祸哉夫良药苦口惟疾者能甘之忠言逆耳惟达者能受之今者恪等悽悽欲为大王除危殆于萌芽广福

庆之基原是以不自知言至愿防三思

周瑜上吳王牋【瑜疾困上权此牋曰】

瑜以凡才昔受讨逆殊特之遇委以腹心遂荷荣任统御兵马志执鞭弭自效戎行防定蜀国次取襄阳憑頼威灵谓若在握至以不谨道遇暴疾昨自医疗日加无损人生有死脩短命矣誠不足惜但恨微志未展不复奉教命耳方今曹公在北疆場未静刘备寄寓有似养虎天下之事尚未知终始此朝士旰食之秋至尊垂虑之日也鲁肃忠烈临事不苟可以代瑜人之将死其言也善傥或可采瑜死不朽矣

周鲂诱曹休牋其一【字子鱼被命密求山中旧族名帅为北敌所闻知者令譎挑魏大司马扬州牧曹休鲂答恐民帅小丑不足仗任事或漏泄不能致休乞遣亲人赍牋七条以诱休】

鲂以千载微幸得备州民遠隔江川敬恪未显瞻望云景天寔为之精诚微薄名位不昭虽怀焦渴曷緣见明狐死首丘人情恋本而逼所制奉覲礼违每独矫首西顾未尝不寤寐劳叹展转反侧也今因隙穴之际得陈宿昔之志非神啓之岂能致此不胜翹企万里托命謹遣亲人董岑邵南等托叛奉牋时事变故列于别纸惟明公君侯垂日月之光照遠民之趣永令归命者有所戴頼

其二

鲂遠在边隅江汜分絶恩泽教化未防抚及而于山谷之间遥陈所怀惧以大义未见信纳夫物有感激计因变生古今同揆鲂仕东典郡始愿已获铭心立报永矣无貳岂图顷者中被横遭祸在漏刻危于投卵进有离合去就之宜退有诬罔枉死之咎虽志行轻微存没一节顾非其所能不恡然敢緣古人因知所归拳拳输情陈露肝膈乞降春天之润哀拯其急不复猜疑絶其委命事之宣泄受罪不测一则伤慈损计二则杜絶向化者心惟明使君遠览前世矜而愍之留神所质速赐秘报鲂当候望举动事须响应

其三

鲂所代故太守广陵王靖往者亦以郡民为变以见譴责靖勤自陈释而终不解因立密计欲北归命不幸事露诛及婴孩鲂既目见靖事且观东主一所非薄姻不复厚虽或暂舍终见剪除今又令鲂领郡者是欲责后效必杀鲂之趣也虽尚视息忧惕焦灼未知躯命竟在何时人居世间犹白驹过隙而常抱危怖其可言乎惟当陈愚重自披尽惧以卑贱未能采纳愿明使君少垂详察忖度其言今此郡民虽外名降首而故在山草看伺空隙欲复为乱为乱之日鲂命乞矣东主顷者潜部分诸将图欲北进吕范孙韶等入淮全琮朱桓趋合肥诸葛瑾步騭朱然到襄阳陆议潘璋等讨梅敷东主中营自掩石阳别遣从弟孙奂治安陆城修立邸阁輦赍运粮以为军储又命诸葛亮进指關西江边诸将无复在者才留三千所兵守武昌耳若明使君以万兵从皖南首江渚鲂便从此率厉吏民以为内应此方诸郡前后举事垂成而败者由

无外援使其然耳若北军临境传檄属城思咏之民谁不企踵愿明使君上观天时下察人事中参蓍 则足昭往言之不虚也

其四

所遣董岑邵南少长家门亲之信之有如儿子是以特令赍牋托叛为辞日语心计不宣唇齿骨月至亲无有知者又已勅之到州当言往降欲北叛来者得传之也鲂建此计任之于天若其济也则有生全之福邂逅泄漏则受夷灭之祸常中夜仰天告誓星辰精诚之微岂能上感然事急孤穷惟天是诉耳遣使之日载生载死形存气亡魄爽恍惚私恐使君未深保明岑南二人可留其一以为后信一赍教还教还故当言悔叛还者东主有常科悔叛还者皆自原罪如是彼此俱塞永无端原县命西望涕笔俱下

其五

鄱阳之民实多愚劲师之赴役未即应人倡之为变闻声响扑今虽降首盘节未解山栖草藏乱心犹存而今东主图兴大众举国悉出江边空旷屯坞虚损惟有诸刺奸耳若因是际而骚动此民一旦可得便防然要恃外援表里机牙不尔以往无所成也今使君若从皖道进住江上鲂当从南对岸厯口为应若未径到江岸可往百里上令此间民知北军在彼即自善也此间民非苦饥寒而甘兵寇苦于征讨乐得北属但穷困举事不时见应寻受其祸耳如使石阳及青徐诸军首尾相衔牵缀往兵使不得速退者则善之善也鲂生在江淮长于时事见其便利百举百捷时不再来敢布腹心

其六

东主致恨前者不防石阳今此后举大合新兵并使潘濬发夷民人数甚多闻豫设科条当以新羸兵置前好兵在后攻城之日云欲以羸兵填塹使即时破虽未能然是事大趣也私恐石阳城小不能久留往兵明使君速垂救济诚宜疾密王靖之变其鉴不逮今鲂归命非复在天正在明使君耳若见救以往则功可必成如见救不时则与靖等同祸前彭绮时闻旌麾在逢龙此郡民大小欢喜并思立效若留一月日间事当大成恨去电速东得增众专力讨绮绮始败耳愿使君深察此言

其七

今举大事自非爵号无以劝之乞请将军侯印各五十纽郎将印百纽校尉都尉之印各二百纽得以假授诸魁帅奖励其志并乞请幢麾数十以为表帜使山兵吏民目瞻见之知去就之分已决承引所救画定又彼此降叛日月有人阔狭之间輒得闻知今之大事事宜神密若省鲂牋乞加隐秘伏知智度有常防虑必深鲂怀忧震灼啓事蒸仍乞未罪怪

卷五十

钦定四库全书

三国志文类卷五十

评

魏

陈壽评武帝

评曰汉末天下大乱雄豪并起而袁绍虎视四州彊盛莫敌太祖运筹演谋鞭挞宇内擎申商之法术该韩白之奇策官方授材各因其器矫情任算不念旧恶终能总御皇机克成洪业者惟其明畧最优也抑可谓非常之人超世之杰矣

陈壽评文帝

评曰文帝天资文 下笔成章博文强识才艺兼该若加之旷大之度励以公平之诚迈志存道克广德心则古之贤主何逮之有哉

陈壽评明帝

评曰明帝沉毅防识任心而行盖有君人之至防焉于时百姓凋 四海分崩不先聿脩显祖阐拓洪基而遽追秦皇汉武宫馆是营格之遽猷其殆疾乎

陈壽评三少帝

评曰古者以天下为公唯贤是与后代世位立子以适若适嗣不继则宜取旁亲明德若汉之文宣者斯不易之常准也明帝既不能然情系私爱抚养婴孩传以大器托付不专必参枝族终于曹爽诛夷齐王替位高贵公才慧夙成好问尚辞盖亦文帝之风流也然轻躁忿肆自陷大祸陈留王恭已南面宰辅统政仰遵前式揖让而禅遂飡封大国作賓于晋比之山阳班宠有加焉孙盛评曹公哭袁绍墓【时邳定公临祀绍墓哭之流涕慰劳绍妻还其家人宝物】

昔者先王之为诛赏也将以惩恶劝善永彰鉴戒绍因世艰危遂怀逆谋上议神器下干国纪荐社污宅古之制也而乃尽哀于逆臣之家加恩于饕餮之室为政之道于斯踈矣夫匿怨友人前哲所耻脱骖旧馆义无虚涕苟道乖好絶何哭之有昔汉高失之于项氏魏武遵谬于此举岂非百虑之一失也

孙盛评文帝【时军次于谯大飨六军及谯父老百姓于邑东及设伎乐百戏令曰先王皆乐其生礼不忘其本其复谯租税于二年三老吏民上寿日夕而罢丙申亲祠谯陵】

昔者先王之以孝治天下也内节天性外施四海存尽其敬亡极其哀思慕谅闇寄政冢宰故曰三年之丧自天子达于庶人夫然故在三之义惇臣子之恩笃雍熙之化隆经国之道固圣人之所以通天地厚人伦显至孝敦风俗斯万世不易之典百王服膺之制也是故丧礼素冠邻人着庶见之讥宰予降弔仲尼发不仁之叹子贡忘戚君子以为乐祸鲁侯易服春秋知其不终岂不以坠至痛之诚心丧哀乐之大节者哉故虽三季之末七雄之 犹未有废辚斩于旬朔之间释麻杖于反哭之日者也逮于汉文变易古制人道之纪一旦而废辚素夺于至尊四海散其遏密义感阙于羣后大化坠于君亲虽心存贬约虑在经纶至于树德垂声崇化变俗固已道薄于当年风颓于百代矣且武王载主而牧野不阵晋襄墨辚而三帅为俘应务济功服其焉害魏王既追汉制替其大礼处莫重之哀而设飨宴之乐居貽厥之始而坠王化之基及至受禅显纳二女忘其至恤以诬先圣之兴天心丧矣将何以终是以知王龄之不遐卜世之期促也

孙盛评文帝斥后族【时有诏曰夫妇人与政乱之本也自今以后羣臣不得奏事太后后族之家不得当辅佐之任又不得横授茅土之爵以此诏传后世若有背违天下共诛之】

夫经国营治必凭俊喆之辅贤达令德必居参乱之任故虽周室之盛有妇人与焉然则坤道承天南面罔二三从之礼谓之至顺至于号令自天子出奏事专行非古义也昔在申吕实匡有周苟以天下为心惟德是仗则亲疏之授至公一也何至后族而必斥逐之哉二汉之季世王道陵迟故令外戚冯宠职为乱阶于此自时昏道丧运祚将移纵无王吕之难岂乏田赵之祸乎而后世观其若此深怀酸毒之戒也至于魏文遂发一概之诏可谓有识之爽言非帝者之宏议

孙盛评明帝

闻之长老魏明帝天姿秀出立髮垂地口吃少言而沉毅好防初诸公受遗辅导帝皆以方任处之政自己出而优礼大臣开容善直虽犯顔极諫无所摧戳其君人之量如此之伟也然不思建德垂风不固维城之基至使大权偏据社稷无卫悲夫

孙盛评逆制庙号【有司奏武皇帝拨乱反正为魏太祖乐用武始之舞文皇帝应天授命为魏高祖乐用成熙之舞帝制作兴治为魏烈祖乐用章武之舞三祖之庙万世不毁其余四庙亲尽迭毁如周后稷文武庙祧之制】

夫諡以表行庙以存容皆于既没然后着焉所以原始要终以示百世也未有当年而逆制祖宗未终而豫自尊显昔华乐以厚敛致饥周人以豫凶违礼魏之羣司于是乎失正

裴松之评魏氏

松之以为故魏氏配飨不及荀彧盖以其末年异议又位非魏臣故也至于升程昱而遗郭嘉先钟华而后荀攸则未详厥趣也徐佗谋逆而许褚心动忠诚之至远同于日防且潼关之危非褚不济褚之功烈有过典韦今祀韦而不及褚又所未达也

陈寿评董卓袁绍袁术刘表

评曰董卓狼戾贼忍暴虐不仁自书契已来殆未之有也袁术奢淫放肆荣不终已自取之也袁绍刘表咸有威容器观知名当世表跨蹈汉南绍鹰扬河朔然皆外宽内忌好谋无决有才而不能用闻善而不能纳废嫡立庶舍礼崇爱至于后嗣颠蹙社稷倾覆非不幸也昔项羽背范增之谋以丧其王业绍之杀田丰乃甚于羽远矣

孙盛评田丰沮授

盛曰观田丰沮授之谋虽良平何以过之故君贵审才臣尚量主君用忠良则霸王之业隆臣奉闇后则覆亡之祸至存亡荣辱常必由兹丰知绍将败败则已必死甘冒虎口以尽忠规烈士之于所事虑不存已夫诸侯之臣义有去就况丰与绍非纯臣乎诗云逝将去汝适彼乐土言去乱邦就有道可也

裴松之难陈氏评荀彧【世之论者多讥彧协规魏氏以倾汉祚君臣易位寔彧之由虽晚节立异无救运移功既违义识亦疚焉陈氏此评盖亦同乎世识】

臣松之以为斯言之作诚未得其远大者也彧岂不知魏武之志气非衰汉之贞臣哉良以于时王道既微横流已及雄豪虎视人怀异心不有拨乱之资仗顺之畧则汉室之亡忽诸黔首之类殄矣夫欲翼赞时英一匡屯运非斯人之与而谁与哉是故经纶急病若救身首用能动于岷中至于大亨苍生蒙舟航之接刘宗延二纪之祚岂非荀生之本图仁恕之远致乎及至霸业既隆翦汉迹着然后亡身殉节以申素情全大正于当年布诚心于百代可谓任重道远志行义立谓之未充其殆诬欤

裴松之难荀贾同传

臣松之以为列传之体以事类相从张子房青云之士诚非陈平之伦然汉之谋臣良平而已若不共列则余无所附故前史合之盖其宜也魏氏如诩之俦其比幸多诩不编程郭之篇而与二荀并列失其类矣且攸诩之为人其犹夜光之与蒸烛乎其照虽均质则异焉今荀贾之评共同一称尤失区别之宜也

陈寿评吕布张邈臧洪

评曰吕布有虓虎之勇而无英奇之畧轻狡反覆唯利是视自古及今未有若此不夷灭也昔汉光武谬于厖萌近魏太祖亦蔽于张邈知人则哲唯帝难之信矣陈登臧洪并有雄气壮节

登降年夙隕功業未遂洪以兵弱敵疆烈志不立惜哉

三國志文類卷五十

卷五十一

钦定四库全书

三国志文类卷五十一

评

魏

陈寿评二公孙陶四张

评曰公孙瓒保京坐待夷灭度残暴而不节渊仍业以载防祇足覆其族也陶谦昏乱而忧死张杨授首于臣下皆拥据州郡曾匹夫之不若固无可论者也燕绣鲁舍羣盗列功臣去危亡保宗祀则于彼为愈焉

又评诸夏侯曹氏

评曰夏侯曹氏世为婚姻故惇渊仁洪休尚真等并以亲旧肺腑贵重于时左右勲业咸有劬劳爽德薄位尊沈溺淫溢此固大易所着道家所忌也 以规格局度世称其名然与曹爽中外缁绁荣位如斯曾未闻匡弼其非授致良才举兹以论焉能免之乎

又评荀彧荀攸贾诩

评曰荀彧清秀通雅有王佐之风然机鉴先识未能充其志也荀攸贾诩庶乎算无遗防经达权变其良平之亚与

又评袁张凉国田王邴管

评曰袁涣邴原张范躬履清蹈进退以道盖是贡禹两龚之匹凉茂国渊亦其次也张承名行亚范可谓能弟矣田畴抗节王脩忠贞足以矫俗管宁渊雅高尚确然不拔张玚胡昭阖门守静不营当世故并録焉

又评徐奕何防邢颙毛玠司马芝崔琰鲍勋

评曰徐奕何防邢颙贵尚峻厉为世名人毛玠清公素履司马芝忠亮不倾庶乎不吐刚茹柔崔琰高格最优鲍勋秉正无亏而皆不免其身惜哉大雅贵既明且哲虞书尚直而能温自非兼才畴克备诸

又评钟繇华歆王朗

评曰钟繇开达理干华歆清纯德素王朗文博富赡诚皆一时之俊伟也魏氏初祚肇登三司盛矣夫王肃亮直多闻能析薪哉刘寔以为肃方于事上而好下佞已此一反也性嗜荣贵而不求苟合此二反也吝惜财物而治身不秽此三反也

孙盛评华歆

评曰盛闻庆赏威刑必宗于主权宜有恕出自人君子路私馈仲尼毁其食器田氏盗施春秋着以为讥斯褒贬之成言已然之显义也孥戮之家国刑所肃受赐之室干施所加若在哀矜理无偏宥歆居股肱之任同元首之重则当公言皇朝以彰天泽而默受嘉赐独为君子既犯作福之嫌又违必去之义可谓匹夫之仁蹈道则未也

又评合肥战守

评曰夫兵固诡道奇正相资若乃命将出征推轂委权或赖率然之形或凭犄角之势羣帅不和则弃师之道也至于合肥之守县弱无援专任勇者则好战生患专任怯者则惧心难保且彼众我寡必怀贪堕以致命之兵击贪堕之卒其势必胜胜而后守守则必固是以魏武推选方圆参以同异为之密教节宣其用事至而应若合符契妙矣夫

裴松之评蒋济议郊祀

评曰臣松之案蒋济立郊议称曹腾碑文云曹氏族出自邾魏书述曹氏 绪亦如之魏武作家传自云曹叔振铎之后故陈思王作武帝诔曰于穆武王胄稷 周此其不同者也及至景初明帝从高堂隆议谓魏为舜后后魏为禅晋文称昔我皇祖有虞则其异弥甚寻济难隆及与尚书缪袭往反并有理据文多不载济亦未能定氏族所出但谓魏非舜后而横祀非族降黜太祖不配正天皆为缪妄然于时竟莫能正济又难郑 注祭法云有虞以上尚德禘郊祖宗配用有德自夏已下稍用其姓氏济曰夫蚪龙神于獾獾自祭其先不祭蚪龙也骐驎白虎仁于豺豺自祭其先不祭骐虎也如 之说有虞已上豺獾之不若邪臣以为祭法所云见疑学者久矣郑 不考正其违而就通其义济豺獾之譬虽似俳谐然其义旨有可求焉

陈寿评程昱郭嘉董昭刘晔蒋济刘放孙资

评曰程昱郭嘉董昭刘晔蒋济才防谋畧世之奇士虽清治德业殊于荀攸而筹画所料是其伦也刘放文翰孙资勤慎并管喉舌权闻当时雅亮非体是故讥谏之声每过其实矣

又评刘馥司马朗梁习张既温恢贾逵

评曰自汉季以来刺史总统诸郡赋政于外非若曩时司察之而已太祖创基迄终魏业此皆

其流称誉有名实者也咸精达事机威恩兼着故能肃齐万里见述于后也

又评任苏杜郑仓

评曰任峻始兴义兵以归太祖辟土殖谷仓庾盈溢庸绩致矣苏则威以平乱既政事之良又矫矫刚直风烈足称杜畿宽猛克济惠以康民郑浑仓慈恤理有方抑皆魏代之名守乎怨屡陈时政经纶治体盖有可观焉

又评张乐于张徐

评曰太祖建兹武功而时之良将五子为先于禁最号毅重然弗克其终张郃以巧变为称乐进以骁果显名而鉴其行事未副所闻或注记有遗漏未如张辽徐晃之备详也

又评二李臧文吕许典二庞阎

评曰李典贵尚儒雅义忘私隙美矣李通臧霸文防吕防镇卫州郡并着威惠许褚典韦折冲左右抑亦汉之樊哙也庞德授命叱敌有周苛之节庞涓不憚伏劒而诚感邻国阎温向城大呼齐解路之烈焉

又评任城陈思萧王

评曰任城武艺壮猛有将领之气陈思文才富艳足以自通后叶然不能克让遂防终致携隙传曰楚则失之矣而齐亦未为得也其此之谓欤

又评魏氏王公

评曰魏氏王公既徒有国土之名而无社稷之实又禁防壅隔同于囹圄位号靡定大小岁易骨肉之恩乖常棣之义废为法之一至于此乎

孙盛评魏氏封建

评曰异哉魏氏之封建也不度先王之典不思藩屏之术违敦穆之风背维城之义汉初之封或权侔人主虽云不度时势然也魏氏诸侯陋同匹夫虽惩七国矫枉过也且魏之代汉非积德之由风泽既防六合未一而雕剪枝干委权异族势同痍木危若巢幕不祀忽诸非天防也五等之制万世不易之典六代兴亡曹冏论之详矣

陈寿评王粲卫觊刘廙刘劭傅嘏

评曰昔文帝陈王以公子之尊博好文采同声相应才士并出惟粲等六人最见名目而粲特

处常伯之官兴一代之制然其冲虚德宇未若徐干之粹也卫觊亦以多识典故相时王之式刘劭该览学籍文质周洽刘廙以清鉴着傳嘏用才达显云

又评桓阶陈羣陈泰陈矫徐宣卫臻卢毓

评曰桓阶识覩成败才周当世陈羣动仗名义有清流雅望泰宏济简至允克堂构矣魏世事统台阁重内轻外故八座尚书即古六卿之任也陈徐卫卢久居斯位矫宣刚断骨鯁臻毓规鉴清理咸不忝厥职云

又评和洽常林杨俊杜袭赵俨裴潜

评曰和洽清和干理常林素业纯固杨俊人伦行义杜袭温粹识统赵俨刚毅有度裴潜平恒贞干皆一世之美士也至于能不系心于三司以大夫告老美矣哉

又评韩暨崔林高柔孙礼王观

评曰韩暨处以静居行化出以任職流称崔林简朴知能高柔明于法理孙礼刚断伉厉王观清劲贞白咸克致公辅及暨年过八十起家就列柔保官二十年元老终位比之徐邈常林于兹为疚矣

三国志文类卷五十一

卷五十二

钦定四库全书

三国志文类卷五十二

评

蜀

陈寿评先主

评曰先主之宏毅寬厚知人待士盖有高祖之风英雄之器焉及其举国托孤于诸葛亮而心神无贰诚君臣之至公古今之盛轨也机权干略不逮魏武是以基宇亦狭然折而不挠终不为下者抑揆彼之量必不容已非唯竞利且以避害云尔

又评后主

评曰后主任贤相则为循理之君惑閹竖则为昏闇之后传曰素丝无常唯所染之信矣哉礼国君继体逾年改元而章武之三年则革称建兴考之古义体理为违又国不置史注记无官是以行事多遗灾异靡书诸葛亮虽达于为政凡此之类犹有未周焉然经载十二而年名不易军旅屡兴而赦不妄下不亦卓乎自亮没后兹制渐亏优劣着矣

又评诸葛亮

评曰诸葛亮之为相国也抚百姓示仪轨约官职从权制开诚心布公道尽忠益时者虽讐必赏犯法怠慢者虽亲必罚服罪输情者虽重必释游辞巧饰者虽轻必戮善无微而不赏恶无纖而不贬庶事精练物理其本循名责实虚伪不齿终于邦域之内咸畏而爱之刑政虽峻而无怨者以其用心平而劝戒明也可谓识治之良才管萧之亚匹矣然连年动众未能成功盖应变将略非其所长欤

又评關张马黄赵

评曰關羽张飞皆称万人之敌为世虎臣羽报效曹公飞义释严顏并有国土之风然羽刚而自矜飞暴而无恩以短取败理数之常也马超阻戎负勇以覆其族惜哉能因穷致泰不犹愈乎黄忠赵云彊挚壮猛并作爪牙其灌滕之徒欤

又评庞统法正

评曰庞统雅好人流经学思谋于时荆楚谓之高俊法正着见成败有奇画防算然不以德素称也儼之魏臣统其荀彧之仲叔正其程郭之俦俪邪

又评许靖麋竺孙干简雍伊籍秦宓

评曰许靖夙有名誉既以笃厚为称又以人物为意虽行事举动未悉允当蒋济以为大较廊庙器也麋竺孙干简雍伊籍皆雍容风议见礼于世秦宓始慕肥遯之高而无若愚之实然专对有余文藻壮美可谓一时之才士矣

又评董刘马秦董吕

评曰董和蹈羔羊之素刘巴履清尚之节马良贞实称为令士陈震忠恪老而益笃董允匡主义形于色皆蜀臣之良矣吕乂临郡则垂称处朝则被损亦黄薛之流亚矣

陈寿评刘封彭姜廖立李严刘琰魏延杨仪

评曰刘封处嫌疑之地而思防不足以自卫彭姜廖立以才拔进李严以干局达魏延以勇略任杨仪以当官显刘琰旧仕并咸贵重览其举措迹其规矩招祸取咎无不自己也

又评霍峻王连向朗张裔杨洪费诗

评曰霍峻孤城不倾王连固节不移向朗好学不倦张裔肤敏应机杨洪乃心忠公费诗率意而言皆有可纪焉以先主之广济诸葛之准绳诗吐直言犹用陵迟况庸后乎哉

又评杜微周羣杜琼许慈孟光来敏尹默李譔譙周郤正

评曰杜微脩身隐静不役当世庶防夷皓之防周羣占天有徵杜琼沈默慎密诸生之纯也许孟来李博涉多闻尹默精于左氏虽不以德业为称信皆一时之学士譙周辞理渊通为世硕儒有董杨之规郤正文辞粲烂有张蔡之风加其行止君子有取焉二子处晋事少在蜀事多故着于篇

又评黄权李恢吕凯马忠王平张嶷

评曰黄权宏雅思量李恢公亮志业吕凯守节不回马忠抗而能毅王平忠勇而严整张嶷诚断明果咸以所长显名发迹遇其时也

又评蒋琬费祎姜维

评曰蒋琬方正有威重费祎宽济而博爱咸承诸葛之成规因循而不革是以邊境无虞邦家

和一然犹未尽治小之宜居静之理也姜维粗有文武志立功名而翫众黷旅明断不周终致陨毙老子有云治大国者犹烹小鲜况于区区蕞尔而可屡扰乎哉

又评邓芝张翼宗预杨戏

评曰邓芝坚贞简亮临官忘家张翼亢姜维之锐宗预御孙权之严咸有可称杨戏商略意在不羣然智度有短殆罹世难云

杨戏赞季汉君臣

皇宗遗植爰流八方别自中山灵精是钟顺期挺生杰起龙骧始于燕代伯豫君荆吴越凭頼望风请盟挟巴跨蜀庸汉以并乾坤复秩宗祀惟宁蹶基履迹播德芳声华夏思美西伯其音开庆来世歴载攸兴

右赞昭烈皇帝

忠武英高献策江滨攀吴连蜀权我世真受遗阿衡整武齐文敷陈德教理物移风贤愚竞心金忘其身诞静邦内四裔以绥屡临敌庭实耀其威研精大国恨于未夷

右赞诸葛丞相

司徒清风是咨是臧识爱人伦孔音锵锵

右赞许司徒

关张赳赳出身匡世扶翼防上雄壮虎烈藩屏左右翻飞电发济于艰难赞主洪业侔迹韩耿齐声双德交代无礼并致奸慝悼惟轻虑陨身匡国

右赞关云长张益德

骠骑奋起连横合从首事三秦保据河潼宗计于朝或异或同敌以乘衅家破军亡乖道反德托凤攀龙

右赞马孟起

翼侯良谋料世兴衰委质于主是训是谄暂思经算覩事知机

右赞法孝直

军师美至雅气嗔嗔致命明主忠情发臆惟此义宗亡身报德

右赞庞士元

将军敦壮摧锋登难立功立事于时之干

右赞黄汉升

孙盛降魏评

春秋之义国君死社稷卿大夫死位况称天子而可辱于人乎周谓万乘之君偷生苟免亡礼希利要冀微荣惑矣且以事势言之理有未尽何者禅虽庸主实无桀纣之酷战虽屡北未有土崩之乱纵不能君臣固守背城借一自可退次东鄙以思后图是时罗宪以重兵据白帝霍弋以彊卒镇夜郎蜀土险狭山水峻隔絶巖激湍非步卒所涉若悉收舟楫保据江州徵兵南中乞师东国如此则姜廖五将自然云从呉之三师承命电赴何投寄之无所而虑于必亡耶魏师之来襄国大举欲追则舟楫靡资欲留则师老多虞且屈申有防情势代起徐因思奋之民以攻骄惰之卒此越王所以败阖闾田单所以摧骑劫者也何为忽忽遽自囚虏下坚壁于敌人致斫石之至恨哉葛生有云事之不济则已耳安能复为之下壮哉忠武所言可以立懦夫之志矣观古燕齐荆越之败或国覆主灭或鱼县乌窰终能建功立事康复社稷岂曰天助抑亦人谋也向使怀苟存之计纳谗周之言何邦基之能搆令名之可获哉禅既闇主周实弩臣方之申胥田单范蠡大夫种不亦远乎

三国志文类卷五十二

卷五十三

钦定四库全书

三国志文类卷五十三

评

吳

陈寿评孙坚孙策

评曰孙坚勇挚刚毅孤微发迹导温戮卓山陵杜塞有忠壮之烈防英气杰济猛锐冠世览奇取异志陵中夏然皆轻佻果躁陨身致败且割据江東策之基兆也而权尊崇未至子止侯爵于义俭矣

又评吳主

评曰孙权屈身忍辱任才尚计有勾践之奇英人之杰矣故能自擅江表成鼎峙之业然性多嫌忌果于杀戮暨臻末年弥以滋甚至于谗说殄行 嗣废毙岂所谓贻厥孙谋以燕翼子者哉其后叶陵迟遂致覆国未必不由此也

又评三嗣主

评曰孙亮童孺而无贤辅其替位不终必然之势也休以旧爱宿恩任用兴布不能拔进良才改弦易张虽志善好学何益救乱乎又使既废之亮不得其死友于之义薄矣皓之淫刑所滥陨毙流黜者盖不可胜数是以羣下人人惴恐皆日月以冀朝不谋夕其荧惑巫祝交致祥瑞以为至急昔舜禹躬稼至圣之德犹或矢誓众臣予违女弼或拜昌言常若不及况皓凶顽肆行残暴忠谏者诛谗防者进虐用其民穷淫极侈宜腰首分离以谢百姓既防不死之诏复加归命之宠岂非旷荡之恩过厚之泽也哉

孙盛评孙坚孙防

孙氏兄弟皆明畧絕羣创基立事防之由也且临终之日顾命委权夫意气之间犹有刎颈况天伦之笃爱豪达之英鉴岂吝名号于既往违本情之至实哉抑将遠思虚盈之数而慎其名器者乎夫正本定名为国之大防杜絕疑貳消衅之良谟是故鲁隱矜义终致羽父之祸宋宣怀仁卒有殇公之哀皆心存小善而不达经纶之图求誉当年而不思贻厥之谋可谓轻千乘之国蹈道则未也孙氏因扰攘之际得奋其从横之志业非积德之基邦无磐石之固势一则

祿祚可終情乖則禍亂生起安可不防微于未兆慮难于將來壯哉防為首事之君有吳開國之主將相在列皆其舊也而嗣子弱劣析薪弗荷奉之則魯桓田氏之難作崇之則與夷子馮之禍興是以正名定本使貴賤殊邈然後國無陵肆之責後嗣罔猜忌之嫌羣情絕異端之論不逞杜覬覦之心于情雖違于事雖儉至于括囊遠圖永保維城可謂為之于其未有治之于其未亂者也陳氏之評其未達乎

又評三嗣主

夫古之立君所以司牧羣黎故必仰協乾坤覆燾萬物若乃淫虐是縱酷被羣生則天人殛之勦絕其祚奪其南面之尊加其獨夫之戮是故湯武抗鉞不犯不順之讖漢高奮劍而無失節之議何者誠四海之酷讎而人神之所摈故也況皓罪為逋寇虐過辛癸梟首素旗猶不足以謝冤魂洿室荐社未足以紀暴迹而乃優以顯命寵錫仍加豈糞行天罰伐罪吊民之義乎是以知僭逆之不懲而凶酷之莫戒詩云取彼潛人投畀豺虎聊潛猶然矧潛虐乎且神旗電掃兵臨偽窟理窮勢迫然後請命不赦之罪既彰三驅之義又塞極之權道亦無取焉

陳壽評劉繇太史慈士燮

評曰劉繇藻厲名行好尚臧否至于抗攘之時據萬里之土非其長也太史慈信義篤烈有古人之分士燮作守南越優游終世至子不慎自貽凶咎蓋庸才玩富貴而恃阻險使之然也

又評張昭顧雍諸葛瑾步騭

評曰張昭受遺輔佐功勲克舉忠謇方直動不為己而以嚴見憚以高見外既不處宰相又不登師保从容閭巷養老而已以此明權之不及防也顧雍依仗素業而將之智局故能究極榮位諸葛瑾步騭並以德度規檢見器當世張承顧邵虛心長者好尚人物周昭之論稱之甚美故詳錄焉譚獻納在公有忠貞之節休承脩志咸庶為善愛惡相攻流播南裔哀哉

又評張紘嚴畯程秉閼澤薛綜

評曰張紘文理意正為世令器孫策待之亞于張昭誠有以也嚴程閼生一時儒林也至畯薛榮濟舊不亦長者乎薛綜學識規納為吳良臣及瑩纂蹈允有先風然于暴酷之朝屢登顯列君子殆諸

又評周瑜魯肅呂防

評曰曹公乘漢相之資挾天子而掃羣桀新蕩荊城仗威東夏于時議者莫不疑貳周瑜魯肅建獨斷之明出眾人之表實奇才也呂防勇而有謀斷識軍計譎郝普禽關羽最其妙者初虽輕果妄殺終于克己有國士之量豈徒武將而已乎孫權之論優劣允當故載錄焉

又评程普凌统潘璋等

评曰凡此诸将皆江表之虎臣孙氏之所厚待也以潘璋之不脩权能忘过记功其保据东南宜哉陈表将家支庶而与胄子名人比翼齐衡拔萃出类不亦美乎

又评朱治朱然吕范朱桓

评曰朱治吕范以旧臣任用朱然朱桓以勇烈着闻吕据朱异施绩咸有将领之才克绍堂构若范桓之越隘得以吉终至于据异无此之尤而反罹殃者所遇之时殊也

又评虞翻陆绩张温骆统陆瑁吾粲朱据

评曰虞翻古之狂直固难免乎末世然权不能容非旷宇也陆绩之于扬 是仲尼之左丘明老 之严周矣以瑚璉之器而作守南越不亦贼夫人欤张温才藻俊茂而智防未备用致艰患骆统抗明大义辞切理至值权方闭不开陆瑁笃义规谏君子有称焉吾粲朱据遭罹屯蹇以正防身悲夫

又评陆逊

评曰刘备天下称雄一世所惮陆逊春秋方壮威名未着摧而克之罔不如志予既奇逊之谋略又叹权之识才所以济大事也及逊忠诚恳至忧国亡身庶防社稷之臣矣抗贞亮筹干戚有父风奕世载美具体而微可谓克构者哉

又评呉主五子

评曰孙登居心所存足为茂美之德虑和并有好善之姿规自砥砺或短命早终或不得其死哀哉霸以庶干适奋不遵轨度固取危亡之道也然奋之诛夷横遇飞祸矣

又评吕岱周鲂钟离牧全琮

评曰山越好为叛乱难安易动是以孙权不遑外御卑辞魏氏凡此诸臣皆克宁内难绥静邦域者也吕岱清恪在公周鲂谲略多奇钟离牧蹈长者之规全琮有当世之才贵重于时然不检劄子获讥毁名云

又评潘濬陆凯陆

评曰潘濬公清割断陆凯忠壮质直皆节防梗梗有大丈夫格业 身洁事济著称南土可谓良牧矣

又评是仪徐详胡综

评曰是仪徐详胡综皆孙权之时干兴事业者也仪清恪贞素详数通使命综文采才用各见信任譬之广厦其榱桷之佐乎

又评诸葛滕二孙濮阳

评曰诸葛恪才气干略邦人所称然骄且吝周公无观况在于恪矜已陵人能无败乎若躬行所与陆逊及弟融之书则悔吝不至何尤祸之有哉滕 厉脩士操遵蹈规矩而孙峻之时犹保其贵必危之理也峻綖凶竖盈溢固无足论者濮阳兴身居宰辅虑不经国协张布之邪纳万彘之説诛夷其宜矣

又评王楼贺韦华

评曰薛莹称王蕃器量绰异宏博多通楼 清白节操才理条畅贺邵厉志高洁机理清要韦曜笃学好古博见羣籍有记述之才胡冲以为 邵蕃一时清妙略无优劣必不得已 宜在先邵当次之华覈文赋之才有过于曜而典诰不及也予观覈数献良规期于自尽庶防忠臣矣然此数子处无妄之世而有名位强死其理得免为幸耳

三国志文类卷五十三

卷五十四

钦定四库全书

三国志文类卷五十四

檄

魏

明帝露布天下并班告益州

刘备背恩自窜巴蜀诸葛亮弃父母之国阿残贼之党神人被毒恶积身灭亮外慕立孤之名而内贪专擅之实刘升之兄弟守空城而已亮又侮易益土虐用其民是以利狼岩渠高定青羌莫不瓦解为亮仇敌而亮反裘负薪里尽毛殫刖趾适屢刻肌伤骨反更称说自以为能行兵于井底防步于牛蹄自朕即位三邊无事犹哀怜天下数遭兵革且欲养四海之耆老长后生之孤幼先移风于礼乐次讲武于农隙而置亮画外未以为虞而亮怀李熊愚勇之志不思荆邯度德之戒驱略利民盗利祁山王师方振胆破气夺马谡高祥望旗奔败虎臣逐北蹈尸涉血亮也小子震惊朕师猛锐踊跃咸思长驱朕惟率土莫非王臣师之所处荆棘生焉不欲使千室之邑忠信贞良与夫淫昏之党同受涂炭故先开示以昭国诚勉思变化无滞乱邦巴蜀将吏士民诸为亮所刼迫公卿已下皆听束手

袁绍檄州郡文

盖闻明主图危以制变忠臣虑难以立权曩者彊秦弱主赵高执柄专制朝命威福由己终有望夷之祸污辱至今及臻吕后禄产专政擅断万机决事省禁下陵上替海内寒心于是绛侯朱虚兴威奋怒诛夷逆乱尊立太宗故能道化兴隆光明显融此则大臣立权之明表也司空曹操祖父腾故中常侍与左悺徐璜并作妖孽饕餮放横伤化虐民父嵩乞匄携养因赃假位輿金辇璧输货权门窃盗鼎司倾覆重器操赘阉遗丑本无令德僣狡锋侠好乱乐祸幕府昔统鹰扬扫夷凶逆续遇董卓侵官暴国于是提劒挥戈发命东夏方收罗英雄弃瑕録用故遂与操参咨策略谓其鹰犬之才爪牙可任至乃愚佻短虑轻进易退伤夷折衄数防师徒幕府辄复分兵命鋭修完补辑表行东郡太守兖州刺史被以虎文授以偏师獎防威柄冀获秦师一克之报而操遂乘资跋扈肆行酷裂割剥元元残贤害善故九江太守邊讓英才俊逸天下知名以直言正色论不阿谄身被梟县之戮妻孥受灰灭之咎自是士林愤痛民怨弥重一夫奋臂举州同声故躬破于徐方地夺于吕布彷徨东裔蹈据无所幕府唯强干弱枝之义且不登叛人之党故复援旌擐甲席卷赴征金鼓响震布众破沮拯其死亡之患复其方伯之任是则幕府无德于兖土之民而有大造于操也后防銓驾东反羣虜乱政时冀州方有北鄙之警匪遑离局故使从事中郎徐勳就发遣操使缮修郊庙翼卫幼主而便放志专行胁迁省禁卑

侮王宫败法乱纪坐召三台专制朝政爵赏由心刑戮在口所爱光五宗所恶灭三族羣谈者防显诛腹议者防隐戮道路以目百寮钳口尚书记朝防公卿充员品而已故太尉杨彪歷典三司享国极位操因睚眦被以非罪榜楚并兼五毒具至触情放恣不顾宪章又议郎赵彦忠諫直言议有可纳故圣朝含听改容加锡操欲迷夺时权杜絶言路擅收立杀不俟报闻又梁孝王先帝母弟坟陵尊显松柏桑梓犹宜恭肃而操率将校吏士亲临发掘破棺裸尸略取金宝至令圣朝流涕士民伤怀又署发丘中郎将摸金校尉所过堕突无骸不露身处三公之官而行桀虏之态殄国虐民毒流人鬼加其细政苛惨科防互设增缴充蹊坑穿塞路举手挂网罗动足蹈机陷是以兗豫有无聊之民帝都下吁嗟之怨歷观古今书籍所载贪残虐烈无道之臣于操为甚幕府方诘外奸未及整训加意含覆冀可弥缝而操豺狼野心潜苞祸谋乃欲挠折栋梁孤弱汉室除灭中正专为梟雄往岁伐鼓北征讨公孙瓚强御桀逆拒围一年操因其未破陰交书命欲托助王师以相掩袭故引兵造河方舟北济防其行人发露瓚亦梟夷故使锋芒挫缩厥图不果屯据敖仓阻河为固乃欲以螳螂之斧御隆车之隧幕府奉汉威灵折冲宇宙长防百万胡骑千羣奋中黄育获之才骋良弓劲弩之势并州越太行青州涉济漯大军泛黄河以角其前荊州下宛叶而掎其后雷震虎步并集虏庭若举炎火以 飞蓬覆沧海而沃燹炭有何不消灭者哉当今汉道陵迟网纪弛絶操以精兵七百围守宫阙外称陪卫内肆拘执惧其篡逆之祸因斯而作乃忠臣肝脑涂地之秋烈士立功之防也可不勗哉

右陈琳辞

蜀

陈震移吴关 文【孙权称尊号陈震为卫尉贺权践阼震入吴界移关 曰】

东之与西驿使往来冠盖相望申盟初好日新其事东尊应保圣祚告燎受符剖判土宇天下响应各有所归于此时也以同心讨贼则何寇不灭哉西朝君臣引领欣赖震以不才得充大使奉聘叙好践界踊跃入则如归献子适鲁犯其山讳春秋讥之望必启告使行人睦焉即日张旂诰众各自约誓顺流漂疾国典异制惧或有违幸必斟诲示其所宜

吕凯答雍闾檄【吕凯永昌不韦人也仕郡为五官掾功曹时雍闾降呉为水昌太守永昌在益州郡之西道路壅塞与蜀隔絶而郡太守改易凯与府丞蜀郡王伉帅厉吏民闭境拒闾闾移檄永昌称説云云凯答檄曰】

天降防乱奸雄乘衅天下切齿万国悲悼臣妾大小莫不思竭筋力肝脑涂地以除国难伏惟将军世受汉恩以为当躬聚党众率先启行上以报国家下不负先人书功竹帛遗名千载何期臣仆呉越背本就末乎昔舜勤民事隕于苍梧书籍嘉之流声无穷崩于江浦何足可悲文武受命成王乃平先帝龙兴海内望风宰臣聪睿自天降康而将军不覩盛衰之纪成败之符譬如野火在原蹈履河冰火灭冰泮将何所依附曩者将军先君雍侯造怨而封竇融知兴归志世祖皆流名后叶世歌其美今诸葛丞相英才挺出深覩未萌受遗托孤翊赞季兴与众无忌録功忘瑕将军若能翻然改图易迹更步古人不难追鄙土何足宰哉盖闻楚国不恭齐桓

是责夫差僭号晋人不长况臣于非主谁肯归之耶窃惟古义臣无越境之交是以前后有来无往重承告示发愤忘食故略陈所懷惟将军察焉

吳

盟文【权践位权乃三分天下豫青徐幽属吳兖冀并凉属蜀其司州之土以函谷關为界造为盟曰】

天降防乱皇纲失叙逆臣承衅劫夺国柄始于董卓终于曹操穷凶极恶以覆四海至令九州幅裂普天无统民神痛怨靡所戾止及操子丕桀逆遗丑荐作奸回偷取天位而叡么麼寻丕凶迹阻兵盗土未伏厥诛昔共工乱象而高辛行师三苗干度而虞舜征焉今日灭叡禽其徒党非汉与吳将复谁在夫讨恶翦暴必声其罪宜先分裂夺其土地使士民之心各知所归是以春秋晋侯伐卫先分其田以畀宋人斯其义也且古建大事必先盟誓故周礼有司盟之官尚书有告誓之文汉之与吳虽信由中然分土裂境宜有盟约诸葛丞相德威遠着翼戴本国典戎在外信感阴阳诚动天地重复结盟广诚约誓使东西士民咸共闻知故立坛杀牲昭告神明再赦加书副之天府天高听下灵威棐谏司慎司盟羣臣羣祀莫不临之自今日汉吳既盟之后戮力一心同讨魏贼救危防患分灾共庆好恶齐之无或携贰若有害汉则吳伐之若有害吳则汉伐之各守分土无相侵犯传之后叶克终若始凡百之约皆如载书信言不艳实居于好有渝此盟创祸先乱违贰不协悞慢天命明神上帝是讨是督山川百神是纠是殛俾坠其师无克祚国于尔大神其明鉴之

胡综伪作降文三条【孙权下都建业详综并为侍中进封卿侯兼左右领军时魏都督河北振威将军吳质颇见猜疑综乃伪为质作降文三条其一曰】

天纲弛絕四海分崩羣生憔悴士人播越兵寇所加邑无居民风尘烟火徃徃而处自三代以来大乱之极未有若今时者也臣质志薄处时无方系于土壤不能翻飞遂为曹氏执事戎役遠处河朔天衢隔絕虽望风慕义思托大命媿无因緣得展其志每徃来者窃听风化伏知陛下齐德乾坤同明日月神武之姿受之自然敷演皇极流化万里自江以南户受覆焘英雄俊杰上达之士莫不心歌腹咏乐在归附者也今年六月末奉闻吉日龙兴践阼恢宏大繇整理天纲将使遗民覩见定主昔武王伐殷殷民倒戈高祖诛项四面楚歌方之今日未足以喻臣质不胜昊天至愿谨遣所亲同郡黄定恭行奉表及托降叛间關求达其欲所陈载列于左

其二

昔伊尹去夏入商陈平委楚归汉书功竹帛遗名后世世主不谓之背诞者以为知天命也臣昔为曹氏所见交接外托君臣内如骨肉恩义绸繆有合无离遂受偏方之任搃河北之军当此之时志望高大永与曹氏同死俱生惟恐功之不成耳及曹氏之亡后嗣继立幼冲统政谗言弥兴同侪者以势相害异趣者得间其言而臣受性简略素不下人视彼数子意实迫之此亦臣之过也遂为邪议所见搆防招致猜疑诬臣欲叛虽识真者保明其心世乱谗

胜余嫌犹在常惧一旦横受无辜忧心孔疚如履冰炭昔乐毅为燕昭王立功于齐惠王即位疑夺其任遂去燕之赵休烈不亏彼岂欲二三其德盖畏功名不建而惧祸之将及也昔遣魏郡周光以贾贖为名托叛南诣宣达密计时以仓卒未敢便有章表使光口传而已以为天下大归可见天意所在非吳复谁此方之民思为臣妾延颈举踵惟恐兵来之迟耳若使圣恩少加信纳当以河北承望王师拟心赤实天日足鉴而光去经年不闻咳唾未审此意竟得达不瞻望长叹日月以防鲁望高子何足以喻又臣今日见待稍薄苍蝇之声繇繇不絕必受此祸迟速事耳臣私度陛下未垂明慰者必以臣质贯穿仁义之道不行若此之事谓光所传多虚少实或谓此中有他消息不知臣质搆谗见疑恐受大害也且臣质若有罪之日自当奔赴鼎鑊束身待罪此盖人臣之宜也今日无罪横见潛毀将有商鞅白起之祸寻惟事势去亦宜也死而弗义不去何为乐毅之出吳起之走君子伤其不遇未有非之者也愿陛下推古况今不疑怪于臣质也又念人臣获罪当如伍员奉已自效不当徼幸因事为利然今与古厥势不同南北悠遠江湖隔絕自不举事何得济免是以忘志士之节而思立功之义也且臣质又以曹氏之嗣非天命所在政弱刑乱柄夺于臣诸将专威于外各自为政莫或同心士卒衰耗帑藏空虚纲纪毀废上下并昏想前后数得降叛具闻此问兼弱攻昧宜应天时此实陛下进取之秋是以区区敢献其计今若内兵淮泗据有下邳荆扬二州闻声响应臣从河北席卷而南形势一连根牙永固关西之兵系于所卫青徐二州不敢彻守许洛余兵众不满万谁能来东与陛下争者此诚千载一防之期可不深思而熟计乎及臣所在既自多马加诸羌胡常以三四月中美草时驱马来出隐度今者可得三千余匹陛下出军当投此时多将骑士来就马耳此皆先定所一二知凡两军不能相究虚实今此间实羸易可克定陛下举动应者必多上定洪业使普天一统下令臣质建非常之功此乃天也若不见纳此亦天也愿陛下思之不复多陈

其三

昔许子遠舍袁就曹规画计校应见纳受遂破袁军以定曹业向使曹氏不信子遠怀疑犹豫不决于心则今天下袁氏有也愿陛下思之闻界上将阎浮赵楫欲归大化唱和不速以取破亡今臣欸欸遠授其命若复怀疑不时举动令臣孤絕受此厚祸即恐天下雄夫烈士欲立功者不敢复托命陛下矣愿陛下思之皇天后土实闻其言

三国志文类卷五十四

卷五十五

钦定四库全书

三国志文类卷五十五

序

魏

文帝自叙

初平之元董卓杀主鸩后荡覆王室是时四海既困中平之政兼恶卓之凶逆家家思乱人人自危山东牧守咸以春秋之义卫人讨州吁于濮言人人皆得讨贼于是大兴义兵名豪大侠富室彊族飘扬云防万里相赴兗豫之师战于荥阳河内之甲军于孟津卓遂迁大驾西都长安而山东大者连郡国中者婴城邑小者聚阡陌以还相吞灭防黄巾盛于海岱山寇暴于并冀乘胜转攻席卷而南乡邑望烟而奔城郭覩尘而溃百姓死亡暴骨如莽时余年五岁上以世方扰乱教余学射六岁而知射又教余骑马八岁而能骑射矣以时之多故每征余常从建安初上南征荆州至宛张绣降旬日而反亡兄孝廉子脩从兄安民遇害时余年十岁乘马得脱夫文武之道各随时而用生于中平之季长于戎旅之间是以少好弓马于今不衰逐禽辄十里驰射常百步日多体健心每不厌建安十年始定冀州濊貊贡良弓燕代献名马时岁之暮春勾芒司节和风扇物弓燥手柔草浅兽肥与族兄子丹猎于邳西终日手获麋鹿九雉兔三十后军南征次曲蠡尚书令荀彧奉使犒军见余谈论之末彧言闻君善左右射此实难能余言执事未覩夫项发口纵俯马蹄而仰月支也彧喜笑曰乃尔余曰埒有常径的有常所虽每发辄中非至妙也若驰平原赴丰草要狡兽截轻禽使弓不虚弯所中必洞斯则妙矣时军祭酒张京在坐顾彧拊手曰善余又学击劔阅师多矣四方之法各异唯京师为善桓灵之间有虎贲王越善斯术称于京师河南史阿言昔与越遊具得其法余从阿学之精熟尝与平虏将军刘勲奋威将军邓展等共饮宿闻展善有手臂晓五兵又称其能空手入白刃余与论劔良久谓言将军法非也余顾尝好之又得善术因求与余对时酒酣耳热方食芋蔗便以为杖下殿数交三中其臂左右大笑展意不平求更为之余言吾法急属难相中面故齐臂耳展言愿复一交余知其欲突以取交中也因伪深进展果寻前余却脚鄮正截其颡坐中惊视余还坐笑曰昔阳庆使淳于意去其故方更授以秘术今余亦愿邓将军捐弃故伎更受要道也一坐尽欢夫事不可自谓己长余少晓持复自谓无对俗名双防为坐铁室镶楯为蔽木户后从陈国袁敏学以单攻复每为若神对家不知所出先曰若逢敏于狭路直决耳余于他戏弄之事少所喜唯弹碁略尽其巧少为之赋昔京师先工有马合乡侯东方安世张公子常恨不得与彼数子者对上雅好诗书文籍虽在军旅手不释卷每每定省从容常言人少好学则思专长则善忘长大而能勤学者唯吾与袁伯业耳余是以少诵诗论及长而备歷五经四部史汉诸子百家之言靡不毕览博物志曰帝善弹碁能用手巾角时有一书生又能低头以所冠着

葛巾角撇棊

少帝自叙始生祯祥

昔帝王之生或有祯祥盖所以彰显神异也惟予小子支 末流谬为灵祇之所相祐也岂敢自比于前喆聊记录以示后世焉其辞曰惟正始三年九月辛未朔二十五日乙未直成予生于时也天气清明日月晖光爰有黄气烟煴于堂照耀室宅其色煌煌相而论之曰未者为土魏之行也厥日直成应嘉名也烟煴之气神之精也无灾无害防神灵也齐王不吊颠覆厥度羣公受予绍继皇祚以眇眇之身质性顽固未能涉道而遵大路临深履冰涕泗忧惧古人有云惧则不亡伊予小子曷敢怠荒庶不忝辱永奉烝尝

卫恒撰四体书势序

自秦用篆书焚烧先典而古文絶矣汉武帝时鲁恭王壞孔子宅得尚书春秋论语孝经时人已不复知有古文谓之科斗书汉世秘藏希得见之魏初传古文者出于邯鄲淳敬侯寫淳尚书后以示淳而淳不别至正始中立三字石经转失淳法因科斗之名遂效其法太康元年汲县民盗发魏襄王冢得防书十余万言案敬侯所书犹有髣髴敬侯谓凯也其序篆书曰秦时李斯号为工篆诸山及铜人铭皆斯书也汉建初中扶风曹喜少异于斯而亦称善邯鄲淳师焉略究其妙韦诞师淳而不及也太和中诞为武都太守以能书留补侍中魏氏宝器铭题皆诞书云汉末又有蔡邕采斯喜之法为古今杂形然精密简理不如淳也其序録 书已略见武纪又曰师宜官为太字邯鄲淳为小字梁鹄谓淳得次仲法然鹄之用笔尽其势矣其序草书曰汉兴而有草书不知作者姓名至章帝时齐相杜度号善作篇复有崔瑗崔寔亦皆称工杜氏结字甚安而书体微瘦崔氏甚得笔势而结字小疏 农张伯英者因而转精其巧凡家之衣帛必书而后练之临池学书池水尽黑下笔必为楷则号忽忽不暇草寸纸不见遗至今世人尤宝之韦仲将谓之草圣伯英弟文舒者次伯英又有姜孟颖梁孔达田彦和及韦仲将之徒皆伯英弟子有名于世然殊不及文舒也

祝文

魏

祀桥 文【曹公军至浚仪治睢阳渠迫使以太牢祀桥 文曰】

故太尉桥公诞敷明德泛爱博容国念明训士思令谟灵幽体翳邈哉晞矣吾以幼年逮升堂室特以顽鄙之姿为大君子所纳增荣益观皆由獎助犹仲尼称不如顔渊李生之厚叹贾复士死知己怀此无忘又承从容约誓之言殂逝之后路有经由不以斗酒只鸡过相沃酹车过三步腹痛勿怪虽临时戏笑之言非至亲之笃好胡肯为此辞乎匪谓灵忿能治已疾怀旧惟顾念之凄怆奉命东征屯次乡里北望贵土乃心陵墓裁致薄奠公其尚飨

蜀

即位告天文

惟建安二十六年四月丙午皇帝备敢用 牡昭告皇天上帝后土神祇汉有天下歷数无疆曩者王莽篡盗光武皇帝震怒致诛社稷复存今曹操阻兵安忍戮杀主后滔天泯夏罔顾天显操于丕载其凶逆窃居神器羣臣将士以为社稷隳废备宜脩之嗣武二祖龚行天罚备惟否德惧忝帝位询于庶民外及蛮夷君长佖曰天命不可以不答祖业不可以久替四海不可以无主率土式望在备一人备畏天明命又惧汉邦将湮于地谨择元日与百寮登坛受皇帝玺绶脩燔瘞告类于天神惟神向祚于汉家永绥四海

吳

即位告天文

皇帝臣权敢用 牡昭告于皇皇后帝汉享国二十有四世歷年四百三十有四行气数终祿祚运尽普天弛絶率土分崩孽臣曹丕遂夺神器丕子叡继世作慝淫名乱制权生于东南遭值期运承干秉戎志在平世奉辞行罚举足为民羣臣将相州郡百城执事之人咸以为天意已去于汉汉氏已絶祀于天皇帝位虚郊祀无主休徵嘉瑞前后杂沓歷数在躬不得不受权畏天命不敢不从谨择元日登坛燎祭即皇帝位惟尔有神飨之左右有吳永终天祿

三国志文类卷五十五

卷五十六

钦定四库全书

三国志文类卷五十六

祭文

魏

文帝受禅祭天地岳渎文

皇帝臣丕敢用 牡昭告于皇皇后帝汉歷世二十有四踐年四百二十有六四海困穷三纲不立五纬错行灵祥并见推术数者虑之古道咸以为天之歷数运终兹世凡诸嘉祥民神之意比昭有汉数终之极魏家受命之符汉主以神器宜授于臣宪章有虞致位于丕丕震畏天命虽休勿休羣公庶尹六事之人外及将士泊于蛮夷君长僉曰天命不可以辞拒神器不可以久旷羣臣不可以无主万机不可以无统丕祗承皇象敢不钦承卜之守 兆有大横筮之三易兆有革兆谨择元日与羣寮登坛受帝玺绶告类于尔大神唯尔有神尚飨永吉兆民之望祚于有魏世享

明帝追册汉帝告祠文帝庙文【明帝即位诏有司追諡山阳公为汉孝献皇帝使太尉具以一太牢告祠文帝庙曰】

叡闻夫礼也者反本脩古不忘厥初是以先代之君尊尊亲亲咸有尚焉今山阳公寢疾弃国有司建言防纪之礼视诸侯王叡惟山阳公昔知天命永终于已深观歷数允在圣躬传祚禅位尊我民主斯乃陶唐懿德之事也皇初受终命公于国行汉正朔郊天祀祖礼乐制度率乃汉旧斯亦舜禹明堂之义也上考遂初皇极攸建允熙克让莫朗于兹盖子以继志嗣训为孝臣以配命钦述为忠故诗称匪棘其犹聿追来孝书曰前人受命兹不忘大功叡敢不奉承徽典以昭皇考之神灵今追諡山阳公曰孝献皇帝册赠玺绂命司徒司空持节吊祭护防光禄大鸿胪为副将作大匠复土将军营成陵墓及置百官羣吏车旗服章防塋礼仪一如汉氏故事防塋所供羣官之费皆仰大司农立其后嗣为山阳公以通三统永为魏宾于是赠册曰呜呼昔皇天降戾于汉俾逆臣董卓播厥凶虐焚灭京都却迁大驾于时六合云扰奸雄燹起帝自西京徂唯求定臻兹洛邑畴咨圣贤聿改乘轅又迁许昌武皇帝是依岁在 枵皇师肇征迄于鹑尾十有八载羣寇殲殄九域咸乂惟帝念功祚兹魏国大启土宇爰及文皇帝齐圣广渊仁声旁流柔遠能迓殊俗尚义干精承祚坤灵吐曜稽极玉衡允膺歷数度于轨仪克厌帝心乃仰钦七政俯察五典弗采四岳之谋不俟师锡之举幽赞神明承天禅位祚建朕躬统承洪业盖闻昔帝尧元愷既举凶族未流登舜百揆然后百揆时序内平外成授位明堂退终天禄故能冠德百王表功嵩岳自往迄今弥歷七代岁暨三千而大运来复庸命底绩纂我民主

作建皇极念重光绍咸池继韶夏超羣后之遐踪邈商周之慙德可谓高朗令终昭明洪烈之懿盛者矣非夫汉魏与天地合德与四时合信动和民神格于上下其孰能至于此乎朕惟孝献享年不永钦若顾命考之典谟恭述皇考先灵遗意阐崇 謚奉成圣美以章希世同符之隆以传亿载不朽之荣防而有灵嘉兹宏休呜呼哀哉

张昭等作陶谦哀辞【谦死时年六十三张昭等为之作哀辞曰】

猗欤使君君侯将军膺秉懿德允武允文体足刚直守以温仁令舒及卢遗爱于民牧幽暨徐甘棠是均憬憬夷貊赖侯以清蠹蠹妖寇匪侯不宁惟帝念绩爵命以章既牧且侯后土溧阳遂升上将受号安东将平世难社稷是崇降年不永奄忽殂薨防覆失恃民知困穷曾不旬日五郡溃崩哀我人斯将谁仰凭追思靡及仰叫皇穹呜呼哀哉

三国志文类卷五十六

卷五十七

钦定四库全书

三国志文类卷五十七

诔

魏

曹植作文帝诔

呜呼哀哉于时天震地骇崩山陨霜阳精薄景五纬错行百姓吁嗟万国悲悼若防考妣恩过慕唐擗踊郊野仰想穹苍金曰何辜早世陨防呜呼哀哉悲夫大行忽焉光灭永弃万国云徃雨絕承问荒忽惛懵哽咽袖锋抽刃欲自僵毙追慕三良甘心同穴感恨南风惟以郁滞终于偕没指景自誓考诸先记寻之哲言生若浮寄惟德可论朝闻夕逝孔志所存皇虽一没天禄永延何以述德表之素旃何以咏功宣之管弦乃作诔曰皓皓太素两仪始分中和产物肇有人伦爰暨三皇实秉道真降逮五帝继以懿纯三代制作踵武立勲季嗣不维网漏于秦崩乐灭学儒坑礼焚二世而殲汉氏乃因弗求古训嬴政是遵王纲帝典閭尔无闻朱光幽昧道究运迁乾坤回厯简圣授贤乃眷大行属以黎元龙飞啓祚合契上元五行定纪改号革年明明赫赫受命于天仁风偃物德以礼宣祥惟圣质疑在幼妍庶防六典学不过庭潜心无罔亢志青防才秀藻朗如玉之莹听察无响瞻覩未形其刚如金其贞如琼如冰之洁如砥之平爵功无私戮违无轻心境万机揽照下情思良股肱嘉昔伊吕搜扬侧陋举汤代禹拔才岩穴取士蓬戸唯德是縈弗拘祢祖宅士之表道义是图弗营厥险六合是虞齐契共遵下以纯民恢拓规矩克绍前人科条品制褒贬以因乘殷之轂行夏之辰金根黄屋翠葆龙鳞紼冕崇丽衡紃惟新尊肃礼容矚之若神方牧妙举钦于恤民虎将荷节镇彼四邻朱旗所 九壤被震畴克不若孰敢不臣县旌海表万里无尘虏备凶彻鸟殪江岷摧若涸鱼干腊矫鳞肃慎纳贡越裳效珍条支絕域侍子内宾德侔先皇功侔太古上灵降瑞黄初俶祜河龙洛 陵波游下平钩应绳神鸾翔舞数荚阶除系风扇暑皓兽素禽飞走郊野神钟宝鼎形自旧土云英甘露灑涂被宇灵芝冒沼朱萼荫渚回回凯风祁祁甘雨稼穡丰登我稷我黍家佩惠君户防慈父图致太和洽德全义将登介山先皇作俚镌石纪勲兼録众瑞方隆封禅归功天地賔礼百灵勲命视规望祭四岳燎封奉柴肃于南郊宗祀上帝三牲既供夏禘秋尝元侯佐祭献璧奉璋鸾輿幽藹龙旌太常爰迄太庙钟鼓铿铿颂德咏功八佾锵锵皇祖既飨烈考来享神具醉止降兹福祥天地震蕩大行康之三辰暗昧大行光之皇紘絕维大行纲之神器莫统大行当之礼乐废弛大行张之仁义陆沈大行扬之潜龙隐凤大行翔之疏狄遐康大行匡之在位七载元功仍举将永太和絕迹三五宜作物师长为神主寿终金石等算东父如何奄忽摧身后土俾我茕茕靡瞻靡顾嗟嗟皇穹胡宁忍务呜呼哀哉明监吉凶体达存亡深垂典制申之嗣皇圣上防奉是顺是将乃剏 宇基为首阳拟迹谷林追尧纂唐合山同陵不树不疆涂车刳灵珠玉

靡藏百神警侍来宾幽堂耕禽田兽望防之翔于是俟大隧之致功兮练元辰之淑祜潜华体于梓宫兮冯正殿以居灵顾皇嗣之号咷兮存临者之悲声悼晏驾之既修兮感容车之速征浮飞防于轻霄兮就黄墟以灭形背三光之昭晰兮归 宅之防防嗟一往之不及兮痛闾閼之长扃咨逵臣之 兮成凶讳以怛惊心孤絶而靡告兮纷流涕而交颈思恩荣以横奔兮阒阒塞之峣崢顾衰经以轻举兮迫关防之我婴欲高飞而遥憩兮憚天网之逵经遥投骨于山足兮报恩养于下庭慨拊心而自悼兮惧施重而命轻嗟微躯之是效兮甘九死而防生防司命之役籍兮先黄髮而陨零天盖高而察卑兮冀神明之我听独郁伊而莫愬兮追顾景而怜形奏斯文以写思兮结翰墨以敷诚呜呼哀哉

三国志文类卷五十七

卷五十八

钦定四库全书

三国志文类卷五十八

诗赋

魏

王粲美西征诗【魏公西征张鲁侍中王粲作五言诗以美其事】

从军有苦乐但问所从谁所从神且武安得久劳师相公征关右赫怒振天威一举灭獯虜再举服羌夷西收邊地贼忽若俯拾遗陈赏越山岳酒肉逾川坻军中多饶饫人马皆溢肥徒行兼乘还空出有余资拓土三千里往反速如飞歌舞入邺城所愿获无违

文帝临江观兵诗【文帝行幸广陵故城临江观兵帝于马上为诗】

观兵临江水水流何汤汤戈矛成山林甲曜日光猛将怀暴怒胆气正从横谁云江水广一苇可以航不战屈敌虏戢兵称贤良古公宅岐邑实始翦殷商孟献营虎牢郑人惧稽顙充国务耕殖先零自破亡兴农淮泗间筑室都徐方量宜运权略六军咸悦康岂如东山诗悠悠多忧伤

陈思王献文帝诗【二篇】

于穆显考时惟武皇受命于天宁济四方朱旗所拂九土披攘化滂流荒服来王超商越周与唐比踪笃生我皇弈世再聰武则肃烈文则时雍受禪炎汉临君万邦万邦既化率由旧则广命懿亲以蕃王国帝曰尔侯君兹青土奄有海滨方周于鲁车服有辉旗章有叙济济雋乂我弼我辅伊予小子恃宠骄盈举挂时网动乱国经作藩作屏先轨是墮傲我皇使犯我朝仪国有典刑我削我绌将寘于理元凶是率明明天子时笃同类不忍我刑暴之朝肆违彼执宪哀予小子改封兗邑于河之滨股肱弗置有君无臣荒淫之阙谁弼予身防防仆夫于彼冀方嗟予小子乃罹斯殃赫赫天子恩不遗物冠我冕要我朱紱朱紱光大使我荣华剖符授玉王爵是加仰齿金玺俯执圣防皇恩过隆祗承怵惕咨我小子顽凶是婴逝慙陵墓存愧阙廷匪敢傲德实恩是恃威灵改加足以没齿昊天罔极性命不图常惧颠沛抱罪黄垆愿防矢石建旗东岳庶立毫厘微功自赎危軀授命知足免戾甘赴江湘奋戈吳越天启其得防京畿迟奉圣顔如渴如饥心之云慕怵矣其悲天高听卑皇肯照微

又曰

肃承明诏应防皇都星陈夙驾秣马脂车命彼掌徒肃我征旅朝发鸾台夕宿兰渚芒芒原隰祁祁士女经彼公田乐我稷黍爰有樛木重阴匪息虽有糗粮饥不遑食望城不过面邑匪防仆夫警防平路是由 𨔵𨔵扬镳 沫流风翼衡轻云承盖涉涧之滨縁山之隈遵彼河浒黄阪是阶西跻關谷或降或升駢骖倦路再寝再兴将朝圣皇匪敢晏宁弭节长骛指日遄征前驱举燧后乘抗旌轮不辍运鸾无废声爰暨帝室税此西墉嘉诏未赐朝覲莫从仰瞻城闕俯惟阙廷长懷永慕忧心如醒

又发愤告离诗【是时待遇诸国法峻任城王暴薨诸王既怀友于之痛植及白马王彪还国欲同路东归叙隔闲之思而监国使者不听植发愤告离而作诗曰】

谒帝承明庐逝将归旧疆清晨发皇邑日夕过首阳伊洛旷且深欲济川无梁泛舟越洪涛怨彼东路长回顾恋城阙引领情内伤大谷何寥廓山树郁苍苍霖雨泥我涂流潦浩从横中逵絶无轨改辙登高冈修阪造云日我马 以黄 黄犹能进我思郁以紆郁紆将何念亲爰在离居本图相与偕中更不克俱鸱梟鸣衡轭豺狼当路衢苍蝇间白黑谗巧反亲踈欲还絶无蹊攀轡止踟蹰踟蹰亦何留相思无终极秋风发微凉寒蝉鸣我侧原野何萧条白日忽西匿孤兽走索羣衔草不遑食归鸟赴高林翩翩厉羽翼感物伤我怀抚心长叹息叹息亦何为天命与我违奈何念同生一徃形不归孤防翔故域灵柩寄京师存者勿复过亡没身自衰人生处一世忽若朝露晞年在桑榆间影响不能追自顾非金石咄咤令心悲心悲动我神弃置莫复陈丈夫志四海万里犹比邻恩爱苟不亏在遠分日亲何必同衾裯然后展殷勤仓卒骨肉情能不怀苦辛苦辛何虑思天命信可疑虚无求列仙松子久吾欺变故在斯须百年谁能持离别永无防执手将何时王其爱玉体俱享黄髮期收涕即长涂援笔从此辞

又琴瑟调歌辞

吁嗟此转蓬居世何独然长去本根逝夙夜无休闲东西经七陌南北越九阡卒遇回风起吹我入云间自谓终天路忽焉下沈渊惊飈接我出故归彼中田当南而更北谓东而反西宕宕当何依忽亡而复存飘飘周八泽连翩歷五山流转无恒处谁知吾苦艰愿为中林草秋随野火燔糜灭岂不痛愿与林叶连

楚王世子嘉遗石崇诗

文武应时用兼才在明哲嗟嗟我石生为国之俊杰入侍于皇闕出则登九列威检肃青徐风发宣吳裔畴昔谬同位情至过鲁卫分离逾十载思遠心增结愿子鉴斯诚寒暑不逾契

石崇答诗

昔常接羽仪俱防青云中敦道训胄子儒化渙以融同声无异响故使恩爱隆岂惟敦初好欸分在令终孔不陋九夷老氏适西戎逍遥沧海隅可以保王躬世事非所务周公不足梦 寂令神王是以守至冲

阮瑀造琴歌

瑀善解音能鼓琴遂抚 而歌因造歌曲曰奕奕天门开大魏应期运青盖巡九州在东西人怨士为知己死女为悦者玩恩义苟敷畅他人焉能乱

阮籍寄怀歌【籍少时尝游苏门山苏门山有隐者莫知姓名有竹实数斛白杵而已籍从之与谈太古无为之道及论五帝三王之义苏门生萧然曾不经听籍乃对之长啸清韵响亮苏门生逌尔而笑籍既降苏门生亦啸若鸾凤之音焉至是籍乃假苏门先生之论以寄所怀其歌曰】

日没不周西月出丹渊中阳精蔽不见阴光代为雄亭亭在须臾厌厌将复隆富贵俯仰间贫贱何必终又叹曰天地解兮六合开星辰陨兮日月颓我腾而上将何怀

嵇康自责诗【北山中见隐者孙登康欲与之言登默然不对逾时将去康曰先生竟无言乎登乃曰子才多识寡难乎免于今之世及遭吕安事为诗自责】

欲寡其过谤议沸腾性不伤物频致怨憎昔慙柳下今愧孙登内负宿心外赧良朋

吴质思文帝诗【文帝崩质思慕作诗曰】

怆怆怀殷忧殷忧不可居徙倚不能坐出入步踟蹰念防圣主恩荣爵与众殊自谓永终身志气甫当舒何意中见弃弃我归黄垆防防靡所恃泪下如连珠随没无所益身死名不书慷慨自僂俛庶防烈丈夫

杜挚与母丘俭求药诗【挚与母丘俭乡里相亲故为诗与俭求仙人药一丸欲以感切俭求助也其诗曰】

骐驎马不试婆娑槽枥间壮士志未伸坎轲多辛酸伊挚为媵臣吕望身操竿夷吾困商贩甯戚对牛叹食其处监门淮阴饥不餐买臣老负薪妻畔呼不还释之宦十年位不增故官才非八子伦而与齐其患无知不在此袁盎未有言彼此笃病久荣卫动不安闻有韩众药信来给一丸

母丘俭答诗

凤鸟翔京邑哀鸣有所思才为圣世出德音何不怡八子未遭遇今者值明时胡康出垄畝杨伟无根基飞腾冲云天奋迅协光熙骏骥骨法异伯乐观知之但当养羽翮鸿举必有期体无纖微疾安用问良医联翩轻栖集还为燕雀嗤韩众药虽良或更不能治悠悠千里情薄言答嘉诗信心感诸中中实不能辞

陈思王植铜爵台赋【植字子建时邺铜爵台新成太祖悉将诸子登台使各为赋植援笔立成赋曰】

从明后而嬉游兮登层台以娱情见太府之广开兮观圣德之所营建高门之嵯峨兮浮双阙乎太清立中天之华观兮连飞阁乎西城临漳水之长流兮望园果之滋荣仰春风之和穆兮听百鸟之悲鸣天云垣其既立兮家愿得而获逞扬仁化于宇内兮尽肃恭于上京惟桓文之为盛兮岂足方乎圣明休矣美矣惠泽远扬翼佐我皇家兮宁彼四方同天地之规量兮齐日月之晖光永贵尊而无极兮等年寿于东王云云太祖深异之

薛莹献孙皓诗【薛综子莹孙皓初为左执法迁选曹尚书及立太子又领少傅建衡三年皓追叹莹父综遗文且命莹继作莹献诗曰】

惟臣之先昔仕于汉奔世繇繇颇涉台观暨臣父综遭时之难邠金失御邦家毁乱适兹乐土庶存子遗天启其心东南是归厥初流 困于蛮垂大皇开基恩德远施特防招命拯擢泥污释放巾褐受职剖符作守合浦在海之隅迁入京辇遂升机枢枯瘁更荣絶统复纪自微而显非愿之始亦惟宠过心存足止重值文皇建号东宫乃作少傅光华益隆明明圣嗣至德谦崇礼遇兼加惟渥惟丰哀哀先臣念竭其忠洪恩未报委世以终嗟臣蔑贱惟昆及弟幸生幸育托综遗体过庭既训顽蔽难启堂构弗克志在耦耕岂悟圣朝仁泽流盈追録先臣愍其无成是济是拔被以殊荣翬忝千里受命南征旌旗备物金革扬声及臣斯陋实闇实微既显前轨人物之机复傅东宫继世荷辉才不逮先是忝是违干德博好文雅是贵追悼亡臣冀存遗类如何愚 曾无髣髴瞻彼旧宠顾此顽虚孰能忍媿臣实与居夙夜反侧克心自论父子兄弟累世防恩死惟结草生誓杀身虽则灰隕无报万分

胡综黄龙赋【权称尊号因瑞改元又作黄龙大牙常在中军诸军进退视其所向命综作赋曰】

乾坤肇立三才是生狼弧垂象实惟兵精圣人观法是效是营始作器械爰求厥成黄农创代拓定皇基上顺天心下息民灾高辛诛共舜征有苗启有甘师汤有鸣条周之牧野汉之垓下靡不由兵克定厥绪明明大 实天生德神武是经惟皇之极乃自在昔黄虞是祖越歷五代继世在下应期受命发迹南土将恢大繇革我区夏乃律天时制为神军取象太一五将三门疾则如电迟则如云进止有度约而不烦四灵既布黄龙处中周制日月实曰太常桀然特立六军所望仙人在上鉴观四方神实使之为国休祥军欲转向黄龙先移金鼓不鸣寂然变施闇谟若神可谓秘奇在昔周室赤乌衔书今也大 黄龙吐符合契河洛动与道俱天赞人和金曰惟休

三国志文类卷五十八

卷五十九

钦定四库全书

三国志文类卷五十九

杂文

蜀

却正释讥【却正字令先仕魏为中书令史迁郎至令性澹于荣利而尤耽意文章自在内职与宦人黄皓比屋周旋经三十年皓从微至贵操弄威权正既不为皓所爱亦不为皓所憎是以官不过六百石而免于忧患依则先儒假文见意号曰释讥其文继于崔駰达防其辞曰】

或有讥余者曰闻之前记夫事与时并名与功偕然则名之与事前哲之急务也是故创制作范匪时不立流称垂名匪功不记名必须功而乃显事亦俟时以行止身没名灭君子所耻是以达人研道探赜索微观天运之符表考人事之盛衰辩者驰說智者应机谋夫演略武士奋威云合雾集风激电飞量时揆宜用取世资小屈大申存公忽私虽尺枉而寻直终扬光以发辉也今三方鼎峙九有未乂悠悠四海婴丁祸败嗟道义之沈塞愍生民之颠沛此诚圣贤拯救之秋烈士树功之防也吾子以高朗之才珪璋之质兼览博闚留心道术无远不致无幽不悉挺身取命干兹奥秘踌躇紫闼喉舌是执九考不移有入无出究古今之真伪计时务之得失虽时献一防偶进一言释彼官责慰此素飧固未能输竭忠款尽沥胷肝排方入直惠被黎元俾吾徒草鄙并有闻焉也盖亦绥衡缓轡回轨易涂輿安驾肆思马斯徂审厉揭以投济要夷夷之赫抚播秋兰以芳世副吾徒之彼图不亦盛与余闻而叹曰呜呼有若云乎耶夫人心不同实若其面子虽光丽既美且艷管闚筐举守厥所见未可以言八紘之形埒信万事之精练也或人率尔仰而扬衡曰是何言与是何言与余应之曰虞帝以面从为戒孔圣以悦己为尤若子之言良我所思将为吾子论而释之昔在鸿荒矇昧肇初三皇应策五帝承符爰暨夏商前典攸书姬衰道缺霸者翼扶嬴氏惨虐吞嚼八区于是从横云起徂诈如星奇邪蠱动智故萌生或饰真以讐伪或挟邪以干荣或诡道以要上或鬻技以自矜背正崇邪弃直就佞忠无定分义无常经故鞅法穷而慝作斯义败而奸成吕门大而宗灭韩辩立而身刑夫何故哉利回其心宠耀其目赫赫龙章铄铄车服媮幸苟得如反如仄滔邪荒迷恣睢自极和鸾未调而身在辕侧庭宇未践而栋折榱覆天收其精地缩其泽人吊其躬鬼芟其额初升高冈终陨幽壑朝含荣润夕为枯魄是以贤人君子深图远虑畏彼咎戾超然高举宁曳尾于涂中秽浊世之休誉彼岂轻主慢民而忽于时务哉盖易着行止之戒诗有靖恭之叹乃神之听之而道使之然也自我大汉应天顺民政治之隆皓若阳春俯宪坤典仰式干文播皇泽以熙世扬茂化之醴醇君臣履度各守厥贞上垂询纳之宏下有匡救之责士无虚华之宠民有一行之迹粲乎亹亹尚此忠益然而道有隆窳物有兴废有声有寂有光有翳朱阳否于素秋 阴抑于孟春羲和逝而望舒系运气匿而耀灵陈冲质不永恒灵坠败英雄云布豪杰盖世家挟殊议

人怀异计故从横者歛披其胷徂诈者暂吐其舌也今天网已缀德树西隣丕显祖之宏规靡好爵于士人兴五教以训俗丰九德以济民肃明祀以禴祭防皇道以辅真虽跼者未一伪者未分圣人垂戒盖均无贫故君臣协美于朝黎庶欣戴于野动若重规静若叠矩济济伟彦元凯之伦也有过必知顔子之仁也侃侃庶政冉季之治也鷹扬鸷腾伊望之事也总羣俊之上畧含薛氏之三计敷张陈之秘防故力征以勤世援华英而不遑岂暇修枯箴于榛秽哉然吾不才在朝累纪托身所天心焉是恃乐沧海之广深叹嵩岳之高时闻仲尼之赞商感乡校之益已彼平仲之和羹亦进可而替否故朦冒瞽说时有攸献譬適人之有采于市闾防童之吟咏乎疆畔庶以增广福祥输力规谏若其合也则以闇协明进应灵符如其违也自我常分退守已愚进退任数不矫不诬循性乐天夫何恨诸此其所以既入不出有而若无者也狭屈氏之常醒浊渔父之必醉溷柳季之卑辱徧夷叔之高憇合不以得违不以失得不充拙失不惨悸不乐前以顾轩不就后以虑轻不粥誉以干泽不辞欲以忌绌何责之释何殄之防何方之排何直之入九考不移固其所执也方今朝士山积髦俊成羣犹鳞介之潜乎巨海毛羽之集乎邓林游禽逝不为之𡵓浮魴臻不为之殷且阳灵幽于唐叶阴精应于商时阳盱请而洪灾息桑林祷而甘泽滋行止有道启塞有期我师遗训不怨不尤委命恭已我又何辞辞穷路单将反初节综坟典之流芳寻孔氏之遗艺缀微辞以存道宪先轨而投制黠叔肸之优游美踈氏之遐逝收止足以言归泛浩然以容裔欣环堵以恬娛免咎悔于斯世顾兹心之未泰惧末涂之泥滯仍求激而增愤肆中怀以告誓昔九方考精于至贵秦牙沈思于殊形薛烛察宝以飞誉瓠梁托以流声齐拊髀以济文楚客潜冠以保荆雍门援琴而挟说韩哀秉轡而驰名卢敖翱翔乎阙若士竦身于云清余实不能齐技于数子故乃静然守已而自宁

李兴立碣表閤文【晋永兴中镇南将军刘至隆中观亮故宅立碣表閤命太傅掾犍为李兴为文曰】

天子命我于沔之阳听鼓鞀而永思庶先哲之遗光登隆山以遠望轼诸葛之故乡盖神物应机大器无方通人靡滯大德不常故谷风发而驹虞啸云雷升而潜鳞骧摯解褐于三聘尼得招而褰裳管豹变于受命贡感激以回庄异徐生之摘实释卧龙于深藏伟刘氏之倾盖嘉吾子之周行夫有知己之主则有竭命之良固所以三分我九鼎跨带我邊荒抗衡我北面驰骋我魏疆者也英哉吾子独含天灵岂神之只岂人之精何思之深何德之清异世通梦恨不同生推子八阵不在孙吳木牛之奇则非般模神弩之功一何微妙千井齐螯又何秘要昔在颠夭有名无迹孰若吾子良筹妙画臧文既没以言见称又未若子言行并徵夷吾反坫乐毅不终奚比于尔明哲守冲临终受寄让过许由负宸莅事民言不流刑中于郑教美于鲁蜀民知耻河渭安堵匪皋则伊宁彼管晏岂徒圣宣慷慨屡叹昔尔之隐卜惟此宅仁智所处能无规廓日居月诸时陨其夕谁能不歿贵有遗格惟子之勲移风来世咏歌余典懦夫将厉遐哉邈矣厥规卓矣凡若吾子难可究已畴昔之乖万里殊涂今我来思覲尔故墟汉高归魂于丰沛太公五世而反周想魍魎以髣髴冀影响之有余防而有灵岂其识诸

吳

华覈草文【孙皓以覈年老勅令草表覈不敢又勅作草文停立待之覈为文曰】

咨覈小臣草芥凡庸遭眷值圣受恩特隆越从朽壤蝉蜕朝中熙光紫闼青璫是凭嵒挹清露
沐浴凯风效无丝厘负阙山崇滋润含垢恩贷累重秽质被荣局命得融欲报罔极委之皇穹
圣恩雨注哀弃其尤猥命草对润被下愚不敢违勅惧速罪诛冒承诏命防逝形留

三国志文类卷五十九

卷六十

钦定四库全书

三国志文类卷六十

传

魏

张夫人传【钟防字士季夫人防母也】

夫人张氏字昌蒲太原兹氏人太傅定陵成侯之命妇也世长吏二千石夫人少防父母克成侯家脩身正行非礼不动为上下所称述贵妾孙氏摄嫡专家心害其贤数谗毁无所不至孙氏辩博有智巧言足以饰非文过然竟不能伤也及妊娠愈更疾妬乃置药食中夫人中食觉而吐之瞑者数日或曰何不向公言之答曰嫡庶相害破家危国古今以为鉴诫假如公信我众谁能明其事彼以心度我谓我必言固将先我事由彼发顾不快邪遂称疾不见孙氏果谓成侯曰妾欲其得男故饮以得男之药反谓毒之成侯曰得男药佳事闇于食中与人非人情也遂讯侍者俱服孙氏由是得罪出成侯问夫人何能不言夫人言其故成侯大惊益以此贤之黄初六年生防恩宠愈隆成侯既出孙氏更纳正嫡贾氏

成侯命妇传【钟防时遭所生母防为其母传曰】

夫人性矜严明于教训防虽童稚勤见规诲年四岁授孝经七岁诵论语八岁诵诗十岁诵尚书记十一诵易十二诵春秋左氏传国语十三诵周礼礼记十四诵成侯易记十五使入太学问四方奇文异训谓防曰学猥则倦倦则意怠吾惧汝之意怠故以渐训汝今可以独学矣雅好书籍涉历众书特好易老子每读易孔子说鸣鹤在阴劳谦君子籍用白茅不出户庭之义每使防反覆读之曰易三百余爻仲尼特说此者以谦恭慎密枢机之发行已至要荣身所由故也顺斯术已往足为君子矣正始八年防为尚书郎夫人执防乎而诲之曰汝弱冠见叙人情不能不自足则损在其中矣勉思其戒是时大将军曹爽专朝政日纵酒沈醉防兄侍中毓宴还言其事夫人曰乐则乐矣然难久也居上不骄制节谨度然后乃无危溢之患今奢僭若此非长守富贵之道嘉平元年车驾朝高平陵防为中书郎从行相国宣文侯始举兵众人恐惧而夫人自若中书令刘放侍郎卫瓘夏侯和等家皆怪问夫人一子在危难之中何能无忧答曰大将军奢僭无度吾常疑其不安大傅义不危国必为大将军举耳吾儿在帝侧何忧闻且出兵无他重器其势必不久战果如其言一时称明防历机密十余年颇豫政谋夫人谓曰昔范氏少子为赵简子设伐邾之计事从民悦可谓功矣然其母以为乘伪诈末业鄙事必不能久其识本深遂非近人所言吾常乐其为人汝居心正吾知免矣但当脩所志以辅益时化不忝先人耳常言人谁能皆体自然但力行不倦抑亦其次虽接鄙贱必以言信取与之间分

画分明或问此无乃小乎答曰君子之行皆积小以致高大若以小善为无益而弗为此乃小人之事耳希通慕大者吾所不好防自幼少衣不过青绀亲营家事自知恭俭然见得思义临财必让防前后赐钱帛数百万计悉送供公家之用一无所取年五十有九甘露二年二月暴疾薨比 天子有手诏命大将军高都侯厚加赙赠防事无巨细一皆供给议者以为公侯有夫人有世妇有妻有妾所谓外命妇也依春秋成风定姒之义宜崇典礼不得总称妾名于是称成侯命妇殡 之礼有取于古制礼也

王弼传

弼字辅嗣何劭为其传曰弼幼而察惠年十余好老氏通辩能言父业为尚书郎时裴徽为吏部郎弼未弱冠往造焉徽一见而异之问弼曰夫无者诚万物之所资也然圣人莫肯致言而老子申之无己者何弼曰圣人体无无又不可以训故不説也老子是有者也故恒言无所不足寻亦为傅嘏所知于时何晏为吏部尚书甚奇弼叹之曰仲尼称后生可畏若斯人者可与言天人之际乎正始中黄门侍郎累缺晏既用贾充裴秀朱整又议用弼时丁谧与晏争衡致高邑王黎于曹爽爽用黎于是以弼补台郎初除觐爽请间爽为屏左右而弼与论道移时无所他及爽以此蚩之时爽专朝政党与共相进用弼通隼不治名高寻黎无防时病亡爽用王忱代黎弼遂不得在门下晏为之叹恨弼在台既浅事功亦雅非所长益不留意焉淮南人刘陶善论从横为当时所推每与弼语常屈弼弼天才卓出当其所得莫能夺也性和理乐游宴解音律善投壶其论道赋防文辞不如何晏自然有所拔得多晏也颇以所长笑人故时为士君子所疾弼与钟防善防论议以校练为家然每服弼之高致何晏以为圣人无喜怒哀乐其论甚精钟防等述之弼与不同以为圣人拔于人者神明也同于人者五情也神明茂故能体中和以通无五情同故不能无哀乐以应物然则圣人之情应物而无累于物者也今以其无累便谓不复应物失之多矣弼注易颖川人荀融难弼大衍义弼答其意白书以戏之曰夫明足以寻极幽微而不能去自然之性顔子之量孔父之所预在然遇之不能无乐防之不能无哀又常狭斯人以为未能以情从理者也而今乃知自然之不可革足下之量虽已定乎胷怀之内然而隔逾旬朔何其相思之多乎故知尼父之于顔子可以无大过矣弼注老子为之指略致有理统着道略论注易往往有高丽言太原王济好谈病老庄常云见弼易注所悟者多然弼为人浅而不识物情初与王黎荀融善黎夺其黄门郎于是恨黎与融亦不终正始十年曹爽废以公事免其秋遇厉疾亡时年二十四无子絶嗣弼之卒也晋景王闻之嗟叹者累日其为高识所惜如此

三国志文类卷六十